

კიკია ბუაჩიძე

შავზე შავი ნიბნი,

ენე

როცა გერი წყდება საქართველოსი...

ეს წიგნი პუბლიცისტური ხასიათისაა: მასში განხილული და გაანალიზებულია ზვენი ახლო წარსულისა და დღევანდელ ცხოვრების ჩრდილოვანი მხარეები.

წიგნში განსაკუთრებული ყურადღება ეთმობა დემოგრაფიულ პრობლემებს; იგი განკუთვნილია მკითხველთა ფართო წრისათვის.

4702170204—477

Б _____ ბრძ. 96

М—602 (08) — 96

© კიტა ზუაჩიძე, 1996

ISBN 5—505—01585—9

ავტორისაგან

წინამდებარე ნაჯაფ-ნალეაწს სამზეოზე გამოსვლა ერთობ დააგვიანდა: პირველ ხანებში გონება შემბორკავი და თავის ჭკუაზე მომთოკავი ცენზურის მიზეზით, ბოლო ხანებში კი — უქალღობის გამო.

ავტორი შაინც ფიქრობს, მოუხედავად საგრძნობი ხანდაზმულობისა — მთელი რვა წელიწადი — „შავზე შავი წიგნი“, ალბათ, არცთუ ისე დაძველდა, რომ ამხელად მისი გაცნობა მკითხველს სასჯელად ექცეს, თუმცა... დღეს საქართველოში სულ სხვა ქარი ქრის, ვიდრე მაშინ, როცა იგი იწერებოდა.

ამ დროის მანძილზე ჩვენს ცხოვრებაში ბევრი რამ შეიცვალა; შეიცვალნენ ამ ნაწერში „მოსიარულე“ ადამიანებიც: ზოგი რომ წელმოკაკული დადიოდა, ახლა არათუ წელში გასწორდა, ყელიც მოიღერა; პირიქითაც მოხდა: ცხვირაწეულებმა ცხვირები ჩამოუშვეს; იმდროინდელი ბევრი არაგმირი ამჟამად გაგმირდა, იჟამინდელი თითქმის ყველა გმირი კი გაჩანჩურდა...

მენდეთ: მე მათთვის, დღევანდელი ქარის კარნახით, თავდაპირველ ტექსტში არაფერი შემისწორებია, ერთნი — უფრო გალამაზების მიზნით, მეორენი — კიდევ უფრო დასაუშნობლად...

მოკლედ, თუ ბრწყინვალე თავადს, ალექსანდრე ჭავჭავაძეს დავესესხები, ამ მხრივ

„მე იგივე ვარ მარად და მარად!
არ ესდევ უამთა ცვლას,
მე იგივე ვარ მარად და მარად!“

საერთოდ, ისე, როგორც პირველ წიგნში, ამ მეორეშიც გზის მანათობლად ყოველთვის წინ იგივე გვარის მეორე ბრწყინვალე თავადი მიმიძღოდა:

„მარტო მტერი თუ დაგიმალავს შენ სახეზე
რაიმე უწესიერობა რომ ნახოს, მოყვარე
კი მაშინვე სარკეს მოგიტანს და შიგ ჩაგახედებს“.

P. S. ავტორი ბოდიშს უხდის ყველა ხელმოკლედ, ჯიბეგაფხეკილ მკითხველს ამ წიგნის დიდი ფასის გამო: ნიხრის დაღება არ იყო ამჯერად მასზე დამოკიდებული...

ესეც არის: მანეთ-ნახევრიანი „შავი წიგნი“ თავის ფასში მაინც არ იყიდებოდა: წიგნით პირშავმა მოვაჭრეებმა, გამომცემლობის ნაცვლად, თვითონვე აივსეს ისეც გატომრებული ჯიბეები...

1990 წ.

სამი წლის შემდეგ

ჩემო მკითხველო

არა მგონია, ცხოვრებაში ერთხელ მაინც არ წამოგდენოდათ, ზოგი ჭირი მარგებელიაო.

ჩინებული, წმინდა წყლის ქართული ანდაზაა, თუმცა მსგავსი რამ ჩინელებსაც მოეპოვებათ, რუსებსაც, გერმანელებსაც და, ალბათ, ბევრ სხვა ხალხსაც.

ფილოსოფიური სიბრძნისა რა მოგახსენოთ, ცხოვრებისეული სიბრძნე კი ყოველი ხალხის წილში ერთმანეთისგან დამოუკიდებლად, მიუბაძავადაც ჩაისახება ხოლმე.

ღიახ, ზოგი ჭირი მარგებელია!

„კიდევ ერთი დამატება, საბოლოო და უკანასკნელი“, — ამის მომდევნო გვერდიდან რომ გაეცნობით, სწორედ ამ მარგებელმა ჭირმა დამაწერინა.

თავდაპირველად ვფიქრობდი, ამ „უკანასკნელით“ დაესმებოდა კიდევ საბოლოო წერტილი „შავ წიგნს“, მაგრამ ამ ფიქრში იმდენმა სხვა უსარგებლო ჭირმა წამოყო თაფი, რომ მას, როგორც ხედავთ, მეორე წიგნი შემოემატა.

შეიძლება ბრძანოთ, ქართველი ერის დღევანდელ, ყველაზე დიდ ჭირ-სატკივართან, ამოწყვეტა-გადაშენებით რომ გვემუქრება, სხვა, მასთან შედარებით წერილმან ჭირთ რა აქვთ საერთო, მათ ერთმანეთთან რატომ აკავშირებთ?

მხოლოდ იმიტომ, რომ ისინი ერის ამ დიდზე დიდ სატკივარს კიდევ უფრო ნოყიერ ნიადაგს უქმნიან ლალ სასიცოცხლოდ და უხვ სამოსავლოდ...

სამი წლის შემდეგო, ქვესათაურში ამოიკითხავდით, მაგრამ უფრო მართებული ხომ არ იქნებოდა, ეს სამი ხუთამდე გამეზარდა, აკი ბოლო ორ წელიწადში ამ ნაწერში ზოგი რამ ახალიც შევიტანე?!

ვგონებ, არ ეღირებოდა: ძველთან შეფარდებით ეს ახალი
ძალზე მცირე ნაწილს შეიცავს და ხელახლა დათარიღება ჩემ-
გან, ვფიქრობ, უმადურობის ქვის სროლა იქნებოდა 1982 წლი-
სათვის, რომლისთვისაც ავტორს სამდურავი თითქოს არა ეტყ-
მის რა.

1984 წ.

კიდევ ერთი დამატება,
საგოლოო და უკანასკნელი...

Шумим, братец, шумим...

А. С. Грибоедов

ცხოვრებაში ყოველდღე და ყოველ ნაბიჯზე იმდენ რამ თავსამტვრევს ვაწყდებით, რებუს-კროსვორდების ამოსახსნელად აღარც დრო გვრჩება და არც მოთმინება გვყოფნის.

ერთდროულად ლიტერატურისა და ხელოვნების ეს ცნობილი ქმნილება კი ისე დიდად წააგავს ცხრაფუთიანი ინტელექტით გამოტენილ გამოცანას, — როცა იგი საექსპორტო-სამოს-კოვოდ დასჭირდათ და გამოიკითხეს, ვის შეუძლია მისი აზრისა და არსის, მიახლოებით მაინც, მზობა-ამოცნობა, ეს ბევრით, თქვენ წარმოიდგინეთ, ინტელექტუალობით თავმომწონე გამორჩეულებმაც კი ვერ შეძლეს და... დახმარებისათვის მის მშობელ ავტორს მიმართეს.

ჰოდა, განა უნდა გაგიკვირდეთ, თუ რა უძირო და უნაპირო იყო ჩემი განცვიფრება, როდესაც ამის მერე ერთ უჭარო, წვიმიან საღამოს, რადიოდან ფსევდომოკრძალებული, ფსევდო-თავმდაბლობით აღსავსე, სასიამოვნოდ მქლეჩადი ხმა უსიამოდ შემომეჭრა მარცხენა ყურის ლაბირინთში (მარჯვენა კაი ხანია გამიუქმეს „კარატისტებმა“):

„...ისიც უნდა მოგახსენოთ, რომ მკითხველ-მაყურებლებისგან უთვალავი წერილი მიჭილე და უამრავმა ადამიანმა დამირეკა“.

მოდით და ნუ შეგშურდებათ!

ჰო, მაგრამ, შური ხომ ადამიანის ქვენა გრძნობაა, დასაგმობი და ამოსაშანთავი, შენ კი, ღიმილს ამოფარებული მტრების

გარდა, თითქმის ყველას თვალში გვრიტად ითვლები და... ბი-
წიერების ეშმაკს მიეყიდე ქეხორციელივით?!

გრცხვენოღეს!

მრცხვენია კიდევ, და მერე როგორ? სირცხვილისაგან მსუ-
ქან-მსუქან ტყუილებით მოლაპარაკე ტელევიზიის დიქტორი-
ვით ისე ვწითლდები, ლიანდაგთან რომ დამაყენონ, მემანქანე
ხიფათის სიგნალად მიმიჩნევეს და მატარებელს შეაჩერებს.

და მაინც, ეს თავისმომკრელი სულმოკლეობა ამ ერთხელ
იქნებ შეპატიოს და შემენდოს კიდევ, ა?

აბა თვითონვე განსაჯეთ:

ხალხისა და გონებისათვის მიუწვდომელ, მისთვის თითქმის
სრულებით გაუგებარი ნაწარმოების შემოქმედმა იგივე ხალხი-
საგან სამადლობელი წერილობითი ნობათები თურმე ტომრო-
ბით მიიღო და არც არავინ შეეპუა მორალურ და ფიზიკურ წა-
მებას, რაიც ასე ხელიხელ გადაქდობილია ჩვენი დედაქალაქის
სატელეფონო ობობისებურ ქსელთან და...

წკარ და წკარუ!..

ღიან, გაუთავებელი, პერმანენტული „წკარუ“, რათა ექს-
ტრა-ქება მიაგონ და ათას ერთი მადლობა მიუქდენან ზღვა-
სიხარულისა და მახათას მთის ოდენა ჰარმონიული სიტკბოების
მინიკებისათვის;

„შავი წიგნის“ ოფლდამდენ ავტორს კი, მთელი გრძელი
ორი წლის მანძილზე, სულ რაღაც ათიოდე ბარათი მოუვიდა
და მოშლილი აპარატის ზრიალ-ზუზუნში მხოლოდ ორი ღვთის-
ნიერი ადამიანი შეეხმინა: ბავშვის შექმნის მონატრული, თვე-
ობით ლოგინს მიჭაკვეული — ნაყოფი რომ შეინარჩუნოს — ნა-
შინაბერალი, და უკვე ხნიერი, ლუდვიგ ვან ბეთჰოვენით
უცოლო და უშვილო, ოღონდ არაყრუ კომპოზიტორი...

თავი კაცმა თითქოს იმით შეგიძლია დაიმშვიდო, რომ „იმ“
ნაწარმოებ-სანახაობის მკითხველ-მაყურებელთა არმია თეორი-
ულად ათასობით დაითვლება, „შავი წიგნის“ მკითხველთა კონ-
ტინგენტი კი დღემდე, რაჰის დაცარიელებული ერთი სოფლის
ბიბლიოთეკის აბონენტთა რიცხვს თუ გაუტოლდება, აკი მისი
„ტირაჟი“ მიკროზე მიკროა და, ალბათ, არც აღემატება იმ
საღვთო წიგნების რაოდენობას, წარმართებისგან დამფრთხალი

შირველი ქრისტიანები გამოქვაბულებში ბოჩოლას ტყავზე მალულად რომ წერდნენ.

და მაინც, ასეთი ღარიბული ფოსტა, ასეთი ღარიბული ფოსტა!..

ღიახ, ასეთი ღარიბული ფოსტა თითქოს არ შეჰფერის და არ ეკადრება ერის საბედისწერო სატკივარზე თუნდაც უხეიროდ დაწერილ საგაზეთო სტატიასაც, „შავე წიგნი“ კი, ავია თუ კარგია...

არა, სულ ავი თითქოს არ უნდა იყოს, აკი მოარულ ხმებს და ზეპირ გადმოცემებს თუ ვერწმუნებით, ბევრი მის კითხვაში ლაშქებს ათენებს და ორასამდე გვერდს ერთი ამოსუნთქვით უღებს ბოლოს, ბევრიც დილიდანვე იწყებს, მაგრამ ვერ ამთავრებს, რადგან... „ერთმანეთს არ ვაცლით და ხელიდან ხელში ვტაცებთ“.

ჰოდა, თუ ეს მართლაც რეალური სურათია და ეს არ არის მირაჟი, მაშინ რით აიხსნება მხოლოდ ორიოდე ზარი და ათოდე...

თანაც ერთი ამ ბარათთაგანი — უკვე დროა გამოგიტყდეთ, — არათუ მადლობის მაუწყებელია, — მოურიდებლად გამომლანძღველი და თითქმის ჩახმახშეყენებულიც... იგი იმდენი ცოდვა-ბრალით არის სავსე, რომ აღმოსავლეთის ზოგიერთი ქვეყნის კანონმდებლობით, მათი ერთობლივი ჯამით, უეჭველად მომესჯებოდა, სულ ცოტა, 93 წელიწადი...

ჩამოვთვალათ მთავარზე მთავარი:

თურმე

„ფაქტების შეგროვება კარგი საქმეა, მაგრამ მათ სათანადო ანალიზი და მართებული გააზრება სჭირდება“,

მაშასადამე, მე ვერ გამიანალიზებია და ვერც გამიზრებია; თურმე მე ვიჩენ

„მამებლობას („პოდხალიმობას“), ოფიციალური პირების პანეგირიკას“.

(როგორც, ალბათ, გავრილა დერჟავინი к Екатерине Великой აქვე გავკადნიერდები და ჩემ უ-უგანათლებულეს პრო-

კურორ-გამქიაქებლის საყურადღებოდ გაუბედავი დაეჭვებით შევნიშნავ: „პოლხალიმობა“ ქართულად, მგონი, მლიქვნელობაა, „მაამებლობა“ კი რუსულად, თუ არ ვცდები, უფრო „უგონიჩესტვო“ უნდა იყოს, ვიდრე „პოლხალიმსტვო“).

შემდეგ... თურმე

„მშობლებს მრავალშვილიანობასთან ერთად უნდა მოეუწოდოთ შვილის პატრიოტული სულისკვეთებით აღზრდისაკენ. ამას კი ვერ ვხედავთ თქვენს წიგნში, რატომღაც“.

ხედავთ, მკითხველო, რას ხედავს? მე, თურმე, ქართველებს სხვა ერებში მალე გათქვეფას მოეუწოდებ; მე, თურმე ინტერნაციონალური სიამის ჟრუანტელს მგვრის სომხების ჩასახლების ამბავიც კი შუა გურიაში (ქართველების მხრივ მუშახელის ნაკლებობის გამო, თუმცა, მუშახელი სომხეთსაც აკლია და გლეხები იქაც ტოვებენ სოფლებს, მაგრამ ბევრი მათგანი ისევ სოფელში ცხოვრებას ამჯობინებს, თუკი ეს სოფელი წმინდა ქართულ მიწაზეა!), და აგრეთვე ლეკების შემოსევის ცდებიც ჭერ კიდევ მჭიდროდ დასახლებულ კახეთში და დაცარიელებულ თუშ-ფშავ-ხევსურეთში და სხვა მრავალზე მრავალი, ხალხთა ძმობის გამომხატველი აქცია ქართველების ხარჯზე;

მე თურმე

„ოფიციალობის მოსამადლიერებლად და თავის დასახლვევად სიტყვა „დისიდენტს“ აგდებულ კონტექსტში“ ვიხსენიებ...

ალბათ შეამჩნევდით, ჩვენი დროის ეს უებრო პერსენოლოგი აკადემიკოს ავლიბი ზურაბაშვილივით ერთი თვალის გადავლებითაც როგორ ჯაღოსანივით სწვდება ჩემ ცბიერ გულისნადებს; აკი მე, თურმე, დისიდენტობას თავქუდმოგლეჯილი იმიტომ არ ვუქრავ ტაშს, რომ „ოფიციალები“ მოვიმადლიერო, რათა ახლა მაინც...

როცა სამარიდან სულ რაღაც ხუთიოდე ადლით ვარ დაცილებული, ახლა მაინც ამისრულდეს ჩემი ხანგრძლივი სიცოცხლის ნატვრა და ოცნება: საქართველოს პრეზიდენტმა ამხანაგმა

პავლე გილაშვილმა ეგებ გაიღოს მოწყალება და მიბოძოს სიგელი (ცხადია, მასზე უფრო დიდი პრეზიდენტის ამხანაგ ედუარდ შევარდნაძის დასტურით, თორემ ისე, აბა, ვინ გაგაბედნიერებს!), რათა შავი მიწის წიაღის ჩამყურემ ლურჯი ზეცის შემყურეთა წინაშე, მკვდარმა მაინც მოვიღერო ყელიც და კისერიც:

— ჰეი, თქვენ, ჩემ ზევით მავალნო, წაიკითხეთ და გასკდით გულზე შურით:

აქ განისვენებს საპატო სიგელოსანი
კიტა ბუაჩიძე...
გამვლელო, ნუ დაინანებ შენდობას მისთვის,
რამეთუ
კაცი ესე მოკლებული იყო ნატამალსაც
იუმორისას...

ღიას!
მე თურმე...

„კონსტიტუციით ქართული ენა სახელმწიფო ენად შევი-
ნარჩუნეთო, პირველ პირში რომ ბრძანებთ...“

ო-ო, ახლა გინდა ნაბრძოლ-ნაომართ მიეტმასნო და მათ მიერ დიდებულად გაშლილ, სანადიმო სუფრას მიუჯდე? მაშინ კი სად დალოდავდი? ხომ იყავი თავგვივით სოროში შემძვრალი, ანდა ბუსავით ფულუროში?!

ა-ა, ხომ გამოგათრიეთ, ბიძიკელა, სამზევოზე?!

„ასე რომ ნუ იქნებით უმადური და თქვენს წინამორბედ-
თა ღვაწლის მიმჩქმალველი...“

გმადლობ შენ, უფალო, რამეთუ იოლად იხსენი ცოდვილი სული ჩემი!..

ამდენი ბრალდება და... არც დახვრეტა, არც ჩამოხრჩობა, არც კოცონი, და არც მოკვეთა მარჯვენისა, მხოლოდ... ტუსადობის მხოლოდ 93 წელიწადი!

(მინი — ცნობა: მეფის რუსეთის უზარმაზარი იმპერიის ერთ-ერთი გადამტრიალებელი — სტალინი — ციხეებში, ციხეებში საერთო ანგარიშით, სულ დიდი, რაღაც ორ წელიწადსაც არ მჭდარა, თანაც განუწყვეტლივ კი არა, — პაუზ-პაუზ, ამ სტრიქონების ჩამკვიპკვიებელი კი — თვალისათვის ძნელად შესამჩნევ ჭიამაიაზეც ეს ბევრად პატარა მწერი, რომელსაც დაუკითხავად საზოგადოებრივი კვების საბჭოთა თეფშიც თავუკუღმა ერთხელაც არ გადაუტრიალებია, — შვიდ წელიწადს, თანაც ყოველგვარი შესვენება-პაუზის გარეშე; ერთხელაც კი, ორთაქალის კოლონიიდან რამდენიმე საათით მაშინ გასვენებაზე, კუკიაზეც არ გაუშვეს, თვითმპყრობელობასთან მებრძოლ, პოლიტიკურ პატიმარ სოლომონ თავაძეს (პოეტობოლ მუშას) კი მეფის სატრაპებმა ნება დართეს მეტეხის ციხეში... ჯვარი დაეწერა).

ციხის ჟარგონით თუ ვიმსჯელებთ, პატიმრობის 93 წელიწადი, რა თქმა უნდა... „Это же детско-фрайерский срок! პროსტო იგრუშკაა“.

მით უმეტეს, რომ მე თურმე...

.. „კრინტსაც არ ძრავთ ზოგიერთ ძალზე მნიშვნელოვან საჭირბოროტო ეროვნულ პრობლემაზე“.

ვაგლახ, რომ ამ საჭირბოროტო ეროვნული პრობლემებიდან ერთსაც არ მისახელებს ჩემთვის გონებისა და თვალის ამხელად მოვლენილი ეს დიდი ჭკუისა და დიდი სულის მრჩეველი და დამრიგებელი... რომ დაესახელ-მიეთითებინა, მაინც რომელ ეროვნულ პრობლემაზე დამეძრა კრინტი, ჩემი წიგნის „მეორე, შევსებულ გამოცემაში“ კრინტსაც დავძრავდი და შევეცდებოდი კიდევ, რომ...

ო, არა! საამისოდ მე, ცხადია, არც ინტუიცია მეყოფოდა, არც ნაკითხობა, არც გაანალიზების უნარი და, რაც მთავარია, პატრიოტობა ხომ არა და არა, აკი

ნავტორი თავად ვერ უჩვენებს ერს პრინციპულობის მაგალითს“.

ჰოდა, უპრინციპო კაცი განა ერის ტკივილს შეიგრძნობს? განა იგი მის მკურნალად გამოდგება? რასაკვირველია, და ამას წამიერი ჩაფიქრებაც არ უნდა, — სწეული ივერიის ერთადერთი ქანაოზი მხოლოდ და მხოლოდ ამ ბარათის მომწერია...

მომწერია?!

ო, ო, „ეს რა თქვი, დე-სანტოს?“ ფრთხილად, ყური არ მოჰკრას ამ მდამიო სიტყვას, თორემ დედამიწას ააყირავენს და ცას ჩამოაქცევს!

და რისხვა მისი მართებული იქნება და სამართლიანიც, აკი თქვენმა მორჩილმა მონამ...

არა, თავხედმა მონამ თავის უპრინციპო და საამებლო, ცრუპატრიოტულ წიგნში, ია-ვარდით მოფენილ გზად მიმავალმა არათუ ცალკე გამოყო და განადიდა, გაკვრითაც არ მოიხსენია

წამებაი მისი და ღვაწებაი მისი, თავდადებაი მისი და სისხლთა დენაი მისი ქართველთა სამშობლოსათვის!..

ამ უბადლო მამულიშვილს (უასაკობის გამო ჯერ ცხოვრების ღრმა სარკეში ჩაუხედავ „იზარდე, მწვანე ჯეჯილოს“ წარმოდგენით!) თავის ბარათში, ჩემი ჩლუნგი აზრით, თითქოს უადგილო ადგილას მოჰყავს ანდაზა: „ლიტრას ესროდნენ და, კოკავ, შენ გესმოდესო“.

არ ვიცი, ვერ გავუგე კი, ამ სიტუაციაში ვინ იგულისხმება ლიტრად და ვინ კოკად, ოღონდ ეს კი ვიცი, რომ არსებობს ასეთი ანდაზაც: ისეთმა ფურმა დამწიხლოს, რომელიც ჩემზე მეტს იწველიდესო...

ერთ-ერთ უმძიმეს დანაშაულად ზორაბ ბალიშზეთავდადებაი მითელის (დასმენა რომ არ გამომივიდეს, სახელს ვუცვლი), რომ მე ვემამებლები და ვემლიქვნელები ყველაზე დიდ ოფიციალურ პირს საქართველოში...

ჯერ ერთი, რომ ეს ვაკიდან პირდაპირ ამაზონიის ჯუნგლებში მოხვედრილი ყარაიბის ტროპიკული ფანტაზიაა, მეორეც, — თუნდა ასეც იყოს, მე ხომ მას ფეხქვეშ არ ვეგები კარიერისტული მოსაზრებით, მრავალზე მრავალ „ზოგიერთივით“ ჩემი პირადი კეთილდღეობისათვის: ბინა მომეცი (მეხუთეჯერ!), „ეოლგა“ — მანქანა გამომიყავი (მეშვიდეჯერ!), მწერლების მდივანბეგობა ჩამაბარე, პიესების წერის ქავილით შეპყრობი-

ლი რევისორების მიერ კერძო დუქნებად გადაქცეულ სახელ-
მწიფო თეატრებში ათასში ერთხელ ჩემი პიესაც დაადგმევინე...

და არც წერილობით ვემუქრები, თავს მოვიკლავ, თუ დე-
პუტატად არ გამიყვანთ-მეთქი, როგორადაც ერთ დროს ვასილ
მეჟვანაძისა და გივი ჭავჭავიძის სახით კომუნისტურ პარ-
ტიას და საბჭოთა მთავრობას მიმართა ხან ბარში და ხან მთაში
მოსიარულე, ქართული მწერლობის ერთმა უცნობილესმა ოს-
ტატმა, სომხურად „ვარპეტს“ რომ ეძახიან...

მე ხომ მას მხოლოდ და მხოლოდ ქართველს ხალხის ფიზი-
კური სიცოცხლის შენარჩუნებისთვის „ვემლიქნელები...“

ანდა, გაუგონია კი ვისმე, კაცი შუა ზღვაში უმწეოდ ფარ-
თხალებდე და იქვე, გემზე მდგომ კაპიტანს, ხელში მაშველი
სარტყელი რომ უჭირავს, ზედ „Грузия“ რომ აწერია, — გადა-
მარჩინეო ეხვეწებოდე, და თან მასვე ლანძღავდე და თათხავ-
დე, აი შე ასეთო და ისეთო, ჩქარა, მალე ეგ „სპასატელნი კრუ-
გი“ გადმომიგდე, მე შენი გამჩენი დედაც და მამაცო...

ან არ ვარგა ნავსა ჯდომა, ანდა მენავესთან ბრძოლა, — შე-
ვანსენებდი ამ ანდაზას ანდაზების, როგორც ჩანს, სათუთ მოყ-
ვარულს, რომელიც, კერძოდ, იმის გამოც გაგვიჯვარდ-გავგი-
გულისდა, რომ საგანგებოდ არ აღვნიშნეთ მისი გარიბალდისე-
ბური როლი კონსტიტუციის იმ მუხლის შენარჩუნებისას, რო-
მელზეც ვწერდი „შავი წიგნის“ შუა ნაწილში...

რას გააწყობ, ბრალდება ისეთი, თუნდაც გაექცეო, ქეშმა-
რიტება მაინც პირველსავე მოსახვევში დაგეწევა...

მართლაცდა, ამ სფეროში არც მისი როლი გამხსენებია და,
ასე განსაჯეთ, არც ზოგიერთი სხვისა, რომელთაც, საერთოდ,
რიდითა და პატივისცემით ვეპყრობი.

და ეს მხოლოდ იმით აიხსნება, რომ მაშინაც მიმაჩნდა და
ახლაც იმ აზრს ვადგავარ, რომ ის სადავო მუხლი ჩვენთვის,
როგორც ერისთვის, მხოლოდ ფორმალური, თავის მოსატყუე-
ბელი ცარიელი სიტყვაა, და ის, თუნდაც, ერთი ქართველი
ახალგაზრდის არათუ სიცოცხლედ, — მისი ცხვირიდანაც კი
წარმოდენილ ორიოდ წვეთ სისხლადაც არა ღირს.

ღიას!..

პირველ პირში რომ ბრძანებთ, კონსტიტუცია შევინარჩუ-
ნეთო...

კი, პირველ პირში ვბრძანებ, მაგრამ არა იმიტომ, რომ ჩემგან დაუშსახურებელი ვისიმე ღვაწლი და ამაგი მივითვის-მინაწილო...

პირველი პირი აქ და ბევრ სხვაგანაც, ეს ჩემი წიგნის მსოლოდ ლიტერატურული ხერხი და ფორმაა; ძალიან ხშირად მე ამ ხერხით სხვების ბევრ ცოდვასაც ვიღებ საკუთარ თავზე, თუმცა, სინამდვილეში, იმ ცოდვებისგან, იცის ღმერთმა, ძალიან, ძალიან დაშორებული ვარ...

მე, მაგალითად, ისიც შემეძლო დამეწერა, რომ ჩვენ, ჩვენი სტალინის ფეხისწვერებზე შემდგარი ვუკრავდით ხოლმე ტაშა მე-20 საუკუნის, თუნდაც სულ ჩიკრიკელა ადამიანისთვისაც კი შეუფერებელ, ყოვლად გონჯ, ზოგჯერ პირდაპირ ბარბაროსულ „პირად ინიციატივებზე“, დიდი სიბრძნით გარნირმოყრილად წინ რომ დაგვიხათქუნებდნენ და — გინდოდა-არგინდოდა — უნდა შეგვეთქვლიფა, და თან, მადლობის ნიშნად საამური ცხოვრების მონიკებისათვის შუბლი უნდა გვეტახუნებინა ქვის იატაკზე...

არა, ათასი „ფხიზელი“ თვალის გარემოცვაში და მათივე თვალის ერთ დახამხამებაში ფიზიკური გაქრობის შიშისქვეშ მყოფი, ცხადია, ტაშს მეც ვაყოლებდი, მაგრამ მაინც...

1937 წელს, როცა პურისა და შეშის დამზადების პარალელურად ხალხის „დამზადებაც“ გაუგონარი მასშტაბით მიმდინარეობდა და წარმოება-დაწესებულებებში, სკოლებსა და უმაღლეს სასწავლებლებში ყოველდღე, ზოგჯერ დღეში ორჯერაც კი, სახელდახელოდ გამართულ მიტინგებზე, ერთსულოვანი მქუხარე ტაშით უნდა გაგვენადგურებინა სულ ახლად და ახლად, ასობით და ათასობით გამომქლავებული „ხალხის მტრები“, რომელთა შორის ჩვენს მამებსა და დედებსაც მიითვლიდნენ, ძმებსა და დებს, არცთუ იშვიათად ბალებსაც (ერთმა მამიკოს დამქერი ეჟოვის სურათი დახია, მეორემ რვეულის თავფურცლიდან „ძია სტალინის“ სურათი ვერ გადმოხატა კონტად და ლამაზად, — ცალი უღვაში მეორეზე ცოტა გრძელი გამოუვიდა და, ასე განგებ დახატაო, დააბეზლა კლასის დამრიგებელმა, უფრო იმის შიშით, თუ არ ვამხილე, ვაითუ სიფხიზლის მოღუნებისთვის მასთან ერთად მეც დამიქირონო).

ჰოდა, იმ ზარდამცემ დღეებში, რაკი ცალხელას, ასე ყვე-

ლასათვის საჩინო ფიზიკური ხინჯის გამო, ტაშის დაუკვრელობა შეიძლება (შე ი ძ ლ ე ბ ა!) კონტრრევოლუციად არ ჩამთვლოდა, მეც ვითომ, დაცემისას, ხელი ვიღრძე და ბინტუმხეველ-შეფუთვნილი გულმკერდზე ჩამოვიკიდე, რათა, ჩემი ხელებით მაინც, არ გამენადგურებინა ბევრი ჩემი უდანაშაულო ახლობელი და ბევრიც შორებელი...

(ამას ახლა, ღმერთის გარდა, უნივერსიტეტის იმდროინდელი ერთი ამხანაგიც დამიმოწმებს (ვაჟა ჩინჩალაძე), რომელსაც მ ა - შ ი ნ, საბედნიეროდ, დაჭერილი ჭერ კიდეც არაფერს ჰყავდა და ამიტომ თავსაც შედარებით ლაღად გრძნობდა, თანაც იგი სანდოზე სანდო იყო და „ფერშლობასაც“ ის მიწევდა).

ღიახ, ცუდკაცობის სწორედ პირველმა ნიშან-თვისებამ — უმალურობამ — შეუქმუნხნა ჩემ მიმართ ნათელი შუბლი ერის ამ მამვრალ შვილს, აჟი მე თურმე მივჩქმალე მისი წინამორბედობის ღვაწლი და კვალი... რომ ის არა და მისი აღრეული დისიდენტური საქმიანობა, მე თურმე გზას ვერ გავიგნებდი, ენა ვერ ამოვიღებდი, კალამს სამელნეში ვერ ჩავაწებდი და ვერც ამ უღლეურ წიგნს დავწერდი, რომლისთვისაც მასალებს ვაგროვებ აქ ტ ი უ რ ა დ, სულ ცოტა, სამი ათეული წელიწადი, მასზე ფიქრი კი გულს მისერავდა (და მისერავს) და გონებას მიფორიაქებდა (და მიფორიაქებს) ჭერ კიდეც იმ დროიდან, როცა ეს ჩემი წინამორბედ-გზისმკვლევნი ჩაფიქრებულები არ ჰყავდათ მის მშობლებს.

თქვენ აგდებულ კონტექსტში იხსენიებთ დისიდენტობასო...

არა, არც აგდებულად ვიხსენიებ და არც გამოცალკევებული მოწიწებით. ჩემთვის „დისიდენტი“ ისეთივე ჩვეულებრივი სიტყვაა, როგორც, მაგალითად, დისერტანტი, დილეტანტი, დეისტი, დეტერმინისტი და ათასი სხვა. „დისიდენტიც“ ამათსავით ლათინურიდან მოდის და, თუ მას რელიგიურ საბურველს ჩამოვაცილებთ, სხვაგვარად მოაზროვნეს ნიშნავს და მეტს არაფერს.

სხვაგვარად მოაზროვნე, სწვანაირად მოაზროვნე... სხვაფერ... სხვაფრივ... სხვარიგ...

მერედა, რა უნდა იყოს ამაში საკვირველი და არაბუნებრივი, ანდა რა კრიმინალი უნდა იმალებოდეს მის მიღმა? სამწვერიანი ოჯახიც კი არ არის ყოველთვის და ყველაფერზე ერთი

აზრის მქონე, საგრძნობი კი, გიყუბი გიყურად კი აზროვნებენ, მაგრამ ყველა გიყიცი არ აზროვნებს ერთსაზროვნად და, მით უფრო, 260-მილიონიან სახელმწიფოში—მამაკაცი და დედაკაცი, მოხუცი და ახალგაზრდა, წვერიანი და უწვერო, ქრისტიანი და მაკმადიანი, ქუთი და ესტონელი, — განა შეიძლება ყველა ერთნაირად ყველაფერზე ერთი აზრისა იყოს?!

ჰოდა, თუ ეს ასეა, მაშინ ასეთი რა უნიკალობის მაჩვენებელია ეს დაწყვეტილი თუ დალოცვილი დისიდენტობა? და თუ იგი თავმოსაწონია, მაშინ, ბატონო, ხელწამოსაკრავი არც მე ვყოფილვარ: ერთ დროს — და მერე რა დროს! — როცა, ჰაერის გარდა, ყველაფერი ნორმირებული იყო, გამოთვლილი და გამოზომილი, ნაბიჯის სიგრძეც და ამა თუ იმ ფრაზაში სიტყვათა რაოდენობა და მათი თანმიმდევრობაც, და როცა მილიონები პროკრუსტეს სარეცელზე ვიყავით მოკრუნჩხული, მეც მიმიჩნიეს, ჩემო დიდო ბატონო, დისიდენტად, მაგრამ შვიდწლიანი სასჯელი სამწლიანზე არ გამიცვლია, უფრო მეტიც, შეგძლო სულაც ამეცდინა, — არ ავიცდინე კი, და ამიტომაც ახალგაზრდობის ყველაზე საუკეთესო წლები ჩამომაწერეს, მაგრამ ამით ახლა არც თავი მომაქვს და არც ამისათვის პრივილეგიებს მოვიტხოვ, ჩემი ამჟამინდელი „გზისგამკაფავი“ კი...

ჩემდამი მოწერილ ბარათს. ზარატუსტრასებურად ასათაურებებს — „ნახევარსიმართლეს ტყუილი სჯობია“, და მერე: „ერთადერთი ფარი უნდა იყოს სიმართლე“, და იქვე მოაყოლებს საღვთო წერილიდან: „საჭურველად გარე მოგადგეს ჭეშმარიტებაი მისი“.

რაკი ასეა, სიმართლის ფარს საჭურველად მეც მოვიშველებ და გამოგიტყდებით: როგორც მღვდლის შვილს, სახარებისათვის ხელი მეც მიხლია და გადამიფურცლავს კიდევ, მაგრამ არსად არ ამომიკითხავს, არც ლუკასთან, არც მათესთან, არც მარკოზთან, არც იოანესთან, —

რომელიმე წმინდანს, რომელიმე მოციქულს თავისი მლოცველ-მიმდევარნი თუ შეაბჯრენი პალესტინის გაგანია სიტხეში შუა გზაზე მიეტოვებინოს და თავი თვითონ კვიპაროსის საამო ჩრდილისთვის შეეფარებინოს; არც ის ამომიკითხავს, რომელიმე ერის მესიას (ანდა მას, ვისაც თავი ასეთად მოჰქონდა), გნე-

ბავთ მოსეს, არა მარტო ისრაელთა, — სხვა ხალხთა მილიონების წინაშეც, სიტყვიერად და სახიერად, თავის ნაქადაგებისათვის მიეფუტხებინოს იმდროინდელ ტელედანადგარ — გოლგოთიდან.

ღიახ!

ბოლო დროს როგორღაც აღარ შემხვედრია, წინათ კი ბევრჯან, ბალებსა და სკვერებში, სად არ ნახავდით, სამფეხზე შემდგარ ფოტოაპარატის წინ, ტილოზე დახატულ ბედაურზე ამხედრებულ უთავო ჩოხოსანს, — თავის ნაცვლად პატარა საცარის ოდენა ადგილი ღიად რომ ჰქონდა დატოვებული; გაყოფილი „ბაშკას“ ამ საცერში და, — წკაპი ხუთ წუთში შენგან მზად იყო... გინდოდა თორნიკე ერისთავი, გინდოდა ზაქარია მხარგრძელი!

სხვათა შორის, ჩვენში ახლა ასე ჯგროდ ღვაწლმოსილ ერისკაცებად უმირონოდ მონათლულები — მწერალი იქნება იგი, მეცნიერი თუ ხელოვანი, — საოცრად ჩამოჰგვანან ამ თავსაცერას, და არა მხოლოდ ისინი...

ნაჩევარსიმართლეს ტყუილი სჯობიაო... არა, ნახევარსიმართლეს ტყუილი არ სჯობია და, საერთოდ, სჯობია კი ტყუილი რაიმეს? ან ასე რომ იყოს, მაშინ, რაც ირგვლივ წლითიწლობით ტყუილები გვესმის, ჩვენ უკვე ახლაც უნდა აყვავე... „იასნო დალში!..“

(შალვა დადიანის კომედიის „კაკალ გულშის“ ერთ-ერთი პერსონაჟი სათქმელს, ცენზურული მოსაზრებით, შუა გზაზე წყვეტდა ხოლმე, დანარჩენი ისეც იოლი მისახვედრიაო).

ჰო, მაგრამ, სრულ სიმართლეს, ერთი ეს მიბრძანეთ, ცხრათავიანი დევის გარდა, სხვა აბა, რომელი იტყვის? თანაც დევები, თურმე, ვერც წერენ და ვერც მეტყველებენ, — ხატავენ მხოლოდ. ასე რომ, თუკი მე ნახევარი სიმართლე მაინც გამოვცერი, — აქ კი, ჩვენს დროში ასე ძვირად ღირებული კიტრით, თავის ქებას ამ ერთხელ უკვე აღარ მოვერიდები, —

ბარაქალა ჩემში ჯერ კიდევ მოკიაფე, თუნდაც ოღნავ მბეუტავ გულოვნებას!

...ამ სტრიქონებს ნაჩუქარი, საუცხოო იტალიური პასტიტ ვწერ, რომელსაც ისე ვიზოგავ და ვუფრთხილდები, როგორც

ევერესტზე ამაველი ალპინისტი ჟანგბადს და, ცხადია, ჩემი „ალიზის“ დასამტკიცებლად მას ასე უხვად არ მივახარჯავდი, რომ „ის“ სამგვერდიანი უსტარი „ლია“ არ იყოს; ეს კი იმას ნიშნავს, რომ უფლებას იტოვებ ყველას წააქითხო. სამგვერდიან თხზულების დაბეჭდვას და გავრცელებას, თუნდა იგი რომის პაპის ენციკლიკაც იყოს, აბა რა დიდი ჯაფა უნდა!

ჰოდა, მისი ავტორიც „გამარჯვებით“ აფოფინებული („ხომ გაეცამტვერე!“) და ღრმად დარწმუნებული მასში, რომ საქართველოს მესიობა მარტოკა მისი მონოპოლიური მისიაა, — სადაც კი ფეხი შეეღგმის და ხელი მიუწვდება, ამ „ენციკლიკას“ ცისფერი ბუშტივით დააფრიალებს...

კი, მაგრამ მოუტანს კი ასეთი საპრესტიჟო გარჯილობა რაიმე სარგებლობას ჩვენს საერთო ეროვნულ სატკივარს?!

სამწუხარო და გულსატკენია აგრეთვე ისიც, რომ ამ მოკლე პასუხსაც კი, ჩემი „ამამეტყველებლის და გამაცამტვერებლის“ შესაძლო მრევლიდან, ალბათ, თითო-ოროლა თუ შეძლებს გაეცნოს.

ისე კი...

ყველაფერი ძველი როდია დასაგმობი და ყველაფერი ძველი როდია შესაცვლელი: ლოგიკის ჩვენი დროის სახელმძღვანელოში ვერ ამოიკითხავთ, რევოლუციამდელი „ლოგიკა“ კი დაბეჭივებით ასწავლიდა: არის საგნები, რომლებზეც არ კამათობენო, და არიან ადამიანები, რომლებსაც არ ედავებიანო.

ერთხელ ლევ ტოლსტოის მეუღლეს მორიდებით და ტაქტით ჰკითხეს, რა არის მიზეზი, რომ ისეთ გენიოსს, როგორც აქვენნი ქმარია, შვილები მაინცდამაინც ისეთი არ გამოუვიდა, როგორც თვითონ არისო, ამაზე სოფია ანდრეევნამ უპასუხა: „Природа отдыхает“.

ანუ, თუ გადმოვაქართულებთ, ბუნება ასე ხშირად როდი ჰბადებს გენიოსებსო.

მაგრამ ზოგჯერ პირიქითაც ხდება: პუშკინის მშობლები უფერული, წყალწყალა ადამიანები იყვნენ, — არც ჰკუთით გამოირჩეოდნენ, არც ნიჭით, — მზეკაცი კი შობეს.

1981 წლის ოქტომბერი

სულ ფუქია.. სათელთაქო
გვირგვინები და დიდება,
ღინც ღირსია, თავისთავად,
ღვაწლი შუქად დაადგება!

აკაკი

(პეტრე უმიკაშვილის ხსოვნისადმი მიძღ-
ვნილ ლექსიდან)

ჩემი თავი, რასაკვირველია, გამორჩეულ დრამატურგად არ მიმაჩნია, მაგრამ არცთუ ისეთ ჩაჩან-დრამურგად, რომ იგი სადმე და ოდესმე, ორიოდ სტრიქონით მაინც, მოხსენიების ღირსი არ იყოს, და ეს თანაც იმ დროში, როცა ხშირად ბზუი-ლა ხარაბუნაც ქედმოუღლეულ ხარად სადღედა და ბრალიანთა და უბრალონთა იუბილეების ნიაღვარმა კი „მადლიერი საზო-გადობა“ ლამის სულ ერთიანად წაგვლეკოს.

ჩვენში წესად მიღებული ორი ნაღდი (უწინააღმდეგარააფერს ვამბობ) საიუბილეო თარიღი ისე ჩამოვიტოვე, რომ ამ საზეი-მო დღისათვის არც სხვადასხვა პოზაში „ჩავფართოვებულ-ვარ“ და არც ტელეფონის ცნობარში ანიდან ჯანამდე საჭირო და გამოსადეგი ხალხის ბინისა და სამსახურის ნომრები მიძებ-ნია. პირიქით, — ორივეჯერ, როგორც იტყვიან, ქმედითი ზო-მები მივიღე, რათა პრესაში საამისო არაფერი მოხვედრილიყო და არც მწერალთა კავშირიდან ციემხურვალე მოლოცვა მი-მეღო.

მესამე საიუბილეო თარიღის (ალბათ, უკანასკნელის) გასა-უქმებლადაც დროულად დავტრიალდი, მაგრამ ამჯერად უკვე ფეხი წავიტეხე: ერთი დიდი გამომცემლობის თავკაცს იმ დროს ძნელად საშოვნელი „ქართაში“ („საით მიექანება ქართული თე-ატრი?!“) მივართვი იმისათვის, რომ ჩემზე არაფერი დაეწერათ კალენდარში, ზომელსაც მომავალი წლისათვის უკვე ამზადებ-დნენ...

კალენდრებისა და ბევრი სხვა, უფრო მნიშვნელოვანი რა-

ლატეების „თლა უფროსმა“ „ქრთამი“ ჩემგან, თუ არ ვცდები, სიამოვნებით კი მიიღო, ოღონდ... არ ვიცი გადაავიწყდა თუ, ცოტა არ იყოს, შეპრეკილად მიმიჩნია, აკი ასეთი სათხოვრით შეწუხებული მომავალი იუბილარი პირველად იხილა...

ასეა თუ ისე, ერთი წლის შემდეგ მეც ვიხილე, პირველად ჩემს ხანგრძლივ სიცოცხლეში, კედლის კალენდარში ჩემი თავი (უსურათოდ).

რა უნდა მექნა, ნახევარმილიონიან კალენდარს, მე, აბა, რაღას მოვერეოდი, ისე კი, ჩემს ნათესაებებ-ნაცნობებ-მეგობრებში, ვისთანაც კი ხელი მიმიწვდა, მათს ეგზემპლარებში ჩემი საიუბილეო ფურცელი ფარულად, გაწაფული დასტაქარივით ოსტატურად გამოეშიგნე...

ეს იმიტომ, რომ ჩემი საიუბილეო დღეების ჩასატარებლად არც საკუთარი თავი აეტკივებინათ და არც ჩემი „დამბადებელი“ სოფლის კოლმეურნეობისათვის დაედოთ ხარკი — როგორც ეს ჩვენში ყველა იუბილარს ურღვევ კანონად აქვს მიჩნეული — ქათამ-გოჭ-ინდაურ-ლომ-ჭად-ყველ-მწნილ-ხილ-ღვინ-პურ-დომის გამოსაღებად, მინიმუმ ხუთასკაციან საიუბილეო სუფრისათვის!

არ დავფარავ კი, გულში ჩემს იუბილეზე ვხითხითებდი, რამეთუ ზედმიწევნით კარგად ვიცნობ ჩვენში მიღებულ საიუბილეო მექანიკას, რაშიც წერილობით გამოვეუტყდი კიდევ — ცხადია, „იუბილემდე!“ — ერთს ჩემს სენაკელ პატივისმცემელს, ჩემი საიუბილეო თარიღით დაინტერესებულს:

„...რაც შეეხება ჩემს მოახლოებულ იუბილეს, როგორც თქვენ იწერებით, — ყოველგვარი მოსაჩვენარო თავმდაბლობის გარეშე გეტყვით, არაფერი საიუბილეო კაცად ჩემი თავი არ მიმაჩნია, მაგრამ ეს იმას როდი ნიშნავს, რომ ჩვენს დროში იუბილეებზე ასე დახარბებულ-მონადირენი, იუბილარი-მათხოვრები, იუბილე-გამომძალვენი მიმაჩნდეს საიუბილეო ზარ-ზეიმის ღირსად.

გაზეთის ძველი მუშაკი ბრძანდებით და თქვენს მახვილ თვალს ნუთუ აქამდე არ შეუნიშნავს, რომ ახლა საქართველოში იუბილეების 98 პროცენტი ეწყობა თვით „ღვაწლმოსილების“, „ქედმოუღლელ შემოქმედთა“ მიერ“.

ვწერდი ამას და უნებლიეთ თვალწინ დამიდგა ჩვენი დრო- ისა და ჩემი თაობის სამი იუბილარი...

ეს იყო საკმაოდ დიდი ხნის წინათ, როცა იუბილეთა ეპი- დემია ჯერ კიდევ არ იყო ზაფხულობით. მუცელსავეთ ასე სა- ყოველთაოდ მოდებული (ეჭიმათა მომრავლებამდე მუცელს ზემო იმერეთში დიზენტერიას ეძახდნენ).

იმხანად ეს იუბილარი თუმცა არც წლების მიხედვით იყო მსცოვანი და, თითქოს, არც შემოქმედებით, საიუბილეო სავარ- ძელში კი იმ გოროზი კრუხივით იჯდა, თითქოს ქათმობისას სულ ოქრო კვერცხებს დებდა და ახლა მათგან ოქრო წიწი- ლებს გამოელოდა...

და აი, სცენაზე გამოხტა კიდევ პირველი „წიწილა“ — პა- ტარა, ციციკა გოგონა, რომელიც ვარდ-თაიგულით მიესალმა ძია (ვთქვათ) კალენიკეს, მერე კი მიკროფონთან მიიბრინ-მი- ფარფატდა, მაგრამ იგი მისთვის ერთობ მომალლოდ იდგა და მისი საგულდაგულოდ დასწავლილი ტიტინი დარბაზს ვერა და ვერ სწვდებოდა...

„არ გვესმის არაფერი! დასწიეთ მიკროფონი!“ — მოისმა შუა პარტერიდან, მაგრამ სცენაზე მოკალათებულ იუბილარის შეგობრებ-თაყვანისმცემელთაგან განძრევა ერთმაც არ ისურ- ვა, უფრო, ალბათ, იმიტომ, რომ მიკროფონი მაშინ, ზრინწიანი ხმის ბოხად მოსაჩვენებლად, ის-ის იყო შემოდიოდა და ბევრს ისეთ რთულ აპარატად ეჩვენებოდა, რომლის საიდუმლოს მხო- ლოდ საამისოდ განსწავლილი ოსტატი თუ ამოხსნიდა...

ჰოდა, მიდი ახლა არატექნიკოსი ასეთ რთულ დანადგართან და მაცურებლებით სავსე დარბაზის წინაშე აიტყვივე აუტყვიარი თავი, ანდა, მდამბიურად თუ ვიტყვით, სახალხოდ გაიბითურე ბევრისგან პატივსაცემად მიჩნეული თავუნია!

ამასობაში პირველს მეორე, უფრო გაჭავრებული შეძახილი მოჰყვა, ახლა უკვე ქანდარიდან და... ჩვენმა შედარებით ახალ- გაზრდა იუბილარმა აქეთ-იქით მიიხედ-მოიხედა და როცა ენ- თუზიასტი-გამსწორებელი ვერავინ შენიშნა, დარბაისლური ნა- ბიჯებით მიკროფონისკენ გაემართა და, ალბათ, მანძილს ალღო ვერ აუღო და რაც გზად უკმაყოფილოდ თავისთვის ჩაიბურ- ტყუნა, ვერაგმა მიკროფონმა მთელ დარბაზს სმამალა ამცნო: „ესეც მე უნდა გავაკეთო?!“

ის მაშინ უთანამდებებო იუბილარი გახლდათ და ამიტომ, როგორც ჩანს, იძულებული იყო თავის საიბილეოდ ყველაფერი საკუთარი ხელით ეკეთებინა, ამ მეორემ კი, წლების მიხედვით უკვე მსცოვანმა და, როგორც ხშირად გვარწმუნებენ, შემოქმედებითაც დიდად მსცოვანმა, სხვებისთვის და, ცხადია, უწინარეს ყოვლისა, თავისთვის მუდამ საჭირო და გამოსადეგ თანამდებობაზე მყოფმა, თავისი სახელოვანი იუბილე, სულ აგერ ახლა... ტელესტუდიის ერთ-ერთ ვრცელსა და ფართო დარბაზში გადაიხადა: იქდა თავად შუაგულ მაგიდასთან ქრისტესავით...

ო, არა! ამ შედარებით შეუარაცყოფას არ მივაყენებ არც ჩვენს ათეისტ იუბილარს და არც... ათასჯერ უფრო კი — ქრისტეს!

ეს კია, ირგვლივ ესხდნენ მოციქულებივით მწერლები და კრიტიკოსები, თუ ზუსტად დავთვალე, სწორედ თორმეტი სული, რომელთა შორის იუდა ერთიც არ ერია ისეთი, ნათლობის სახელად იუდა რომ რქმეოდა.

ღიახ, ეს რომ ასე არ ყოფილიყო, მაშინ ჩვენამდე, ტელეეკრანებთან მსხდომ მსმენელ-მაყურებლამდე — ფიზიკა-ქიმიის ყველა ძირითადი კანონის საწინააღმდეგოდ! — ვერ მოაღწევდა იმ საზეიმო ტელეპალატში უხვად მიმობნეული გუნდრუკ-საკმევლის გამაბრუებელი სუნი.

იმ წუთებში და მერეც ბევრს გვიკვირდა, ქართული სიტყვის ამ ღვაწლმოსილმა დიდოსტატმა რატომ აღმართა ეს გადაულახავი ტელეკედელი თავის თავსა და თავისსავე მკითხველებს შორის და რატომ ცოცხალი სახით არ გამოგვეცხადა ფილარმონიის დიდ დარბაზში, ანდა, რომელსაც ინებებდა, სხვა საკრებულოში, ნებავდა სტადიონზეც კი... მე თქვენ გეტყვიო და ვინმე უარს გაუბედავდა..

იქნებ შეეშინდა, ვაითუ მიკროფონი გამიფუჭდესო, მაგრამ კალენიკე — იუბილარის დრო რა ხანია მარადიულობის კუთვნილებად იქცა და ახლა მიკროფონი კი არა, სტერეომაგნიტოფონიც კი ყველასათვის ჩაის კოვზივით იოლი მოსახმარა გახდა...

ანდა ეგებ... ეგებ...

მეოცე საუკუნეში მეცნიერება და ტექნიკა, ადამიანის სა-

ხოთ, ჩვენგან 400 ათასი კილომეტრით დაშორებულ მთვარე-საც მისწვდა და მას მოუბრუნებლად ურჯუი ბატონივით გულზე ფეხიცი დაადგა, ადამიანის გულს კი, ჩვენივე ცხვირწინ რომ მდებარეობს, ჯერ კიდევ თვალს ვერ ვუსწორებთ და ვერ ვახერხებთ მის წიაღში ჩახედვას, მასში მიმალული აზრები რომ ამოვიკითხოთ...

ო, ეს რომ შეგვეძლებოდა, ეს რომ შეგვეძლებოდა, მაშინ... მაშინ... იქნებ ამ ჩვენს საქვეყნოდ აღიარებულ ერისკაცს, უბრალო მამულიშვილს, საქართველოს დიდ მოჭირნახულეს... მმ... გონებაში ვეგებ იმ კვიმატმა აზრმა გაუელვია, იუბილე ცოცხალ ხალხთან პირისპირ რომ გადავიხადო, რა იცი, ვაითუ თავზე ხელაღებული ვინმე ლაწირაკი-ხულიგანი გამომიხტეს და ქანდარიდან ტყვიის ნაცვლად ახლა, — ღმერთმაც ნუ ქნას! — ყველასათვის მივიწყებელი ჩემივე სტრიქონები ტყვიასავით დამახალოსო:..

ჩემთვის ერთია ერეკლე და ალა-მაჰმად-ხან, —
სადაც არ წავალ, ჩემს სამშობლოს ყველგან ვიპოვი!..

არა, ამას დიდ ანგარიშს კი არაფერს გაუწევდა, მაგრამ ხომ ჩამწარდებოდა, მცირე დოზით მაინც, ყოველგვარი სიტკბოების მწვერვალზე მყოფს საიუბილეო დაფნის გვირგვინი!..

ჰოდა, განა არ სჯობს შეიყუეთო შენთვის სადმე, მყუდროდ, ტელესტუდიაში და იგივე დაფნის გვირგვინი დამშვიდებულს ჩამოგაცვან, ზვიადად თავმოლერილს?! ასი ათასების თვალწინ, კვირა საღამოს!

მესამე იუბილარმა, ჩვენი დედაქალაქის ხშირმა, მაგრამ მაინც სტუმარმა, თავის არამოკრძალებულ შემოქმედებაში რაიმე ორიგინალობით არასოდეს რომ არ გამოერჩეოდა, სულ ერთიანად თავდაყირა დააყენა დედამიწის ხუთივე კონტინენტზე აქამდე მიღებული საიუბილეო ცერემონიალი: იუბილარი სცენაზე როდი დაბრძანდა, — პარტერში, მეცხრე რიგში! (იღბლად თავისუფალი ადგილები ირგვლივ იოლად მოიძებნა: მიუხედავად მოლოდინისა, თეატრს ზღვა-მსურველი სულაც არ მოსწყდომია).

...და აი, სცენიდან ესალმებიან მას ქართველი მალმერთებ-

ლები, აგრეთვე ის სტუმრებიც, რომლებიც საგულდაგულოდ თავად ჩამოიყვანა იმ დიდად ცნობილი ქალაქიდან, სადაც თვითონაც ცხოვრობს მრავალი წლის მანძილზე.

ამ საიუბილეო უცნაურობას, რასაკვირველია, ყველა დამსწრე გრძნობდა, გარდა იუბილარისა... შეიძლება მას ამით ჩვენთვის იმის თქმა სურდა, რომ... აი, შემომხედეთ, იუბილეებს შე არაფრად ვაგდებ, იუბილეები მე, ბოდიში მომითხოვია, ფეხებზე მკიდია, მე ის თავზე ძალად მომახვიესო...

ო, ეს „ძალად მოხვეული“ იუბილეები..

რა ტყაპატყუპით „გვახვევენ“, ღმერთო, მათ თავს, რა ტყაპატყუპით!..

მეც ხომ იგი „ძალად მომახვიეს“ და... აი გათენდა, როგორც იქნა, კალენდრის მიხედვით, ჩემი საიუბილეო დღეც და...

არც ერთ გაზეთში არც ერთი სტრიქონი, არც სურათით, არც უსურათოდ!..

...და აი, დაღამდა კიდევ და ჩვენმა სიმპათიურმა ენაქიკლიკა ჯულიეტა ვაშაყმაძემ, ხელოვანთა და ლიტერატორთა მუდმივმა შეგკითხველ-მოსაუბრემ, „მოამბეში“ წარმოგვიდგინა — ცხადია, არა თავისი, კერძო ინიციატივით! — სულ სხვა იუბილარი, გოგი (ალბათ, სახელზეც ატყობთ, რომ საიუბილეოდ ჯერ კიდევ საკმაოდ ნორჩია და, მაშასადამე, ცხოვრებაში რამდენიმე საიუბილეო თარიღი ჯერ კიდევ წინ უდევს), რომელმაც „აღადგინა მრავალი აღრინდელი ქართული კინოფილმი“.

კი, მაგრამ...

ქალბატონო ტელევიზიავ! თუკი ჯეელი კაცისთვის ერთხელ უკვე გადაღებულის აღდგენა — „შეაჩინკებისათვის“ მოინახა ტკბილი ტელესიტყვა, რატომღა ვერ მოინახა ასეთივე სიტყვა იმ ბერიკაცისთვის, რომელმაც თავისი ცხოვრების წამებულ გზაზე, თუმცა მცირე, მაგრამ მაინც საკუთარ, დაუსესხებელი რაღაც შექმნა?

და თუ ეს ასე არ არის, მაშინ რატომღა გადასცემდით ხოლმე, საკმაოდ ხშირადაც კი, მისი კომედიების მიხედვით დადგმულ სპექტაკლებს?

ჰო, მაგრამ, აბა ტელევიზიას რას დაემდურები, როცა სა-

ქართველოს თეატრალურ წრეებშიც კი ერთი სულიერიც არ გამოჩნდა ისეთი, რომელიც გულის გამამხნევებელი ორიოდ სიტყვით მაინც შეეხმიანებოდა ახალ ნაინფარქტალ, თუ დრამატურგს არა, მოდრამატურგოს მაინც!..

ან კი ამათაც რას დაემდურები, როცა შენმა მშობლიურმა, ფაქტიურად პროფკავშირმა — მწერალთა კავშირმა, „ლიტერატურულ საქართველოს“ მეშვეობით, თავის, შედარებით, საკმაოდ ძველი წევრისათვის მისალმება არც ასეთი გამოიმეტა და არც ისეთი...

(ორი ხარისხის-რანგის მილოცვა აქვთ დაწესებული: ვინც დიდ ვინმედ მიაჩნიათ, — „ჩვენო ძმაო და მეგობარო (ვთქვათ), ანაპოდისტე! შენ დაწერე ეს... ეს... და ეს...“ თითქოსდა ეს უღარუნა იუბილარი იმ ზომამდე იყოს გამოთავყვანებული, რომ თავად აღარც კი ახსოვდეს, რა დაწერა... ვინც პატარად და თანაც, ხვეწნა-ვედრებით ტვინის ამომღებად... „მწერალმა არა-ანაპოდისტემ დაწერა ეს... ეს“...).

შეიძლება იკითხოთ, მაინც რატომაო ასეთი ღუმილი ყოველის მხრიდან, ეგებ მითითება ჰქონდათ, — თქვენ ხომ ჩვენს პარტიას და მთავრობას გულზე არ ეხატებით, როგორც ნაციონალისტი და შოვინისტი, რომელსაც მათს შეხმატკბილებულ ორკესტრანტებში დისონანსი შეაქვს თავისი, კვანის ფოთოლღერისგან გამოთლილი, საჭყვიტინებლითო...

და მაინც, არა მგონია, „ზემოდან“ რაიმე ბრძანება მიეღოთ, აკი, ეს რომ ასე ყოფილიყო, მაშინ სწორედ იმ დღეებში არც რადიო გადასცემდა გამოცალკეებულად:

„თქვენთვის, სტუდენტური რთველის მონაწილენო! — სტენები სპექტაკლებიდან კიტა ბუაჩიძის პიესების მიხედვით“-ო.

ეს უკვე სხვათა შორის, თუმცა... მმ... როგორც ამჩნევთ, ჩემს კომედიებსაც შეუძლიათ თურმე ხელი შეუწყონ სტუდენტობის მიერ ყურძნის ოპტიმისტურად კრეფას!

...ო, გამდლობ შენ, უფალო, სიცოცხლესთან ერთად წუთისოფლად მოვლენის პირველ დღესვე იუმორის შეგრძნების სულ პატარა ნაცხიცი რომ დამანათლე, თორემ 70 წელიწადი

რა გამაძლებინებდა ამა ქვეყნის სულ სტუმარსა და სტუმარს, და არაოდეს მასპინძელს! აბა უიუმოროდ, დროდადრო მაინც, ჩაუცინ-ჩაუხითხითებლად, ქვისკაცი ხომ არ ვიყავი, ამ სასიხარულო-საიუბილეო დღემდე რომ მომეღწია..

ენდეთ ჩემს გულწრფელობას: ამ ჩემმა „იუბილემ“ დიახაც გამახარა, დიდად გამახარა; მეც ხომ იმ პატარა ადამიანების კატეგორიას ვეკუთვნი, რომელთაც ფრთები ესხმებათ, როცა სამომავლო რაიმეს განჭვრეტენ, როცა მათი ადრე გამოთქმული მოსაზრება მართლდება...

გამართლდა აკი ჩემი აზრიც, გონიერო მკითხველო, იმის თაობაზე, ცოცხლებზე საზეიმო-საიუბილეო ბრახაბრუხი თუ როგორ და საიდან მობრახუნებს ხოლმე!

დიახ, ჩვენს ქვეყანაში უთანამდებებო კაცი თუ ხარ, ეს იმას ნიშნავს, თითქმის არაფერი ხარ, ამიტომ არის, პატარაკობა აღარავის უნდა, სულ ერთია ნიჭიერია იგი თუ უნიჭო. მცოდნე თუ უვიცი, მით უმეტეს, რომ განათლებულისა და მცოდნის დიპლომ-ატესტატი ჯიბეში უღვეს ყველას, ისეთებსაც კი, ვინც, მაგალითად, სახელმწიფო გამოცდებისას კომისიის შეკითხვაზე, ვთქვათ, რა დაწერა ლავრენტი არდაზიანმაო, რიხით მიაყრის, ლავრენტი არდაზიანმა დაწერა „დანიელ ჭონქაძეო“... და თუ ამ დროს გამომცდელთა მოქაშულ თვალებს შეეფეთა, თავის შეცდომას უმაღვე გამოასწორებს: — ო, არა!.. შევეცი, ბატონო, ეს დანიელ ჭონქაძემ დაწერა „ლავრენტი არდაზიანიო...“

დიახ, გოგრაში უყრია რამე თუ არ უყრია, დიდკაცობა უნდა ყველას!

შეიძლება იმიტომაც, რომ ეს ლილიპუტიაში... ბოდიშო, ლილიპუტია აქ რა სახსენებელია, — ს ა ქ ა რ თ ვ ე ლ ო შ ი ეს არტუ ისე ძნელი მისაღწევია.

აი, საამისოდ თუნდაც სულ პატარა მაგალითი: არის ასეთი ბეჭდვითი ორგანო „საქართველოს პოლიგრაფია“, რომლის ტურაჟი სულ რაღაც ათასი ცალია... არ ვიცი კი, ოთხგვერდიანო, დიახ ოთხგვერდიანი სახატავი რვეულის ფორმატის ბულებტენს ეთქმის თუ არა ჟურნალი, თუმცა... რატომ მეტრც არ ეთქმის, — ჟურნალთეჟურნალი! აკი მას, როგორც ბოლო

გვერდი გვაუწყებს, ჰყავს „მთავარი რედაქტორი“ ესა და ეს, და უბრალოდ „რედაქტორი“ ესა და ეს...

ეს რედაქტორები, უნდა ვივარაუდოთ, დამწყები ჟურნალისტები არიან და მათი დიდკაცობის მადა ჭერჭერობით ამით იფარგლება, მაგრამ არიან უფრო დაბრძენებული, დამსახურებული ჟურნალისტები... ჰმ!..

თუ ახალ ქართულ სიტყვას ვიხმართ — დამბადებადი — ესე იგი, ვინც იბადება თუ დაიბადებარ... დიახ, ეს ამხანაგიც, ჩემი არ იყოს, რაკი დამბადებადია, როდისმე, ჩემი არ იყოს, მოკვდებადიცაა, და როცა ეს საზარელი, უმზეო დღე დადგება, ცხადია, გამოქვეყნდება სულ დიდების ხელმოწერით დიდი ნეკროლოგი (მე რაკი პატარაისიცი და პატარებისიცი იმედი არა მაქვს, გონებაში უკვე დაწვერე ავტონეკროლოგი და შემოვიინახე ნაცნობ-მეგობრებისთვის)... მასში შავით თეთრზე ეწერება: „ქართულმა საბჭოთა ჟურნალისტიკამ აუნაზღაურებელი დანაკლისი განიცადა: მისი ერთ-ერთი ფუძემდებელი უდროოდ და ვაჟკაცურად წავიდა ჩვენგან...“

ამ უდროოდ წასულმა ღვაწლმოსილმა და კალამმოუღლეულმა ვაჟკაცმა კი, როგორც რედაქტორმა, ერთი ამბავი დაუწია თავის თანამშრომლებს, როცა მათ შეცდომით გამორჩათ (თუ განგებ გამოტოვეს?) ჟურნალის სარედაქციო კოლეგიის წევრებს შორისაც მისი გვარის მოხსენიება... ნუთუ მან არ იცოდა, რომ ეს თავისთავად იგულისხმება, რედაქტორი, რომელიც, როგორც წესი, კოლეგიას უძღვება... ეს იგივეა, რომ, მაგალითად, პარტკომის მდივანი არ იყოს პარტიის წევრი! მაშ, რაღად უნდოდა, ორად ორ სტრიქონში გავცნობოდით მის გვარ-ტიტულს? ამის ამოცნობა სულ იოლია: ამით კიდევ უფრო გამეთქმება სახელიო...

— ო, ეს სახელი და ეს ტიტულები!

მათი წამდაუწუმ, თანაც გრძლად, ჩამოთვლისას, ყური გვებუგება, მათი ჩაუთავებელი კითხვით თვალი გველლება და გვისივდება თავი...

აბა, ერთი, ჩვენს თეატრალურ პროგრამებსაც დახედეთ ხოლმე... თუმცა ხედავთ, ცხადია, და, ალბათ, მათი კითხვისას ბევრი დაკვირვებული მაყურებელი ამრეზით გააფურთხებდა კიდევ, რომ იატაკზე და, მით უფრო, თეატრალურ შენობაში

გაფურთხება უკიდურესი უზრდელობის მაჩვენებელი არ იყოს: ამ „პატარა ზომის“ სიფრიფანა, ბევრგან თითქმის ტუალეტის ქალაღზე ზოგი „მთავარი“, „სახალხო“, ამის და ამის „ლაურეატი“ ორჯერ და სამჯერაც კი არის ჩაბეჭდილი და სამჯერვე ჩამოთვლილია უსასრულოზე უსასრულო... ვითომ ამ პატარა ზომის ქალაღზე ერთხელ თუ გაგვაცნეს თავიანთი დამსახურება — ღვაწლმოსილობანი. ჩვენ, მაყურებელ-მკითხველები თითქოს იმდენად წყალწაღებული, დამთხვეული კრეტინები ვიყოთ, ხუთიოდე სტრიქონის ჩაკითხვის შემდეგ კვლავ თუ არ შეგვახსენეს, აღარ მოგვაგონდება...

ღიახ, ო, ეს სახელ-დიდება და ეს ტიტულები!

თქვენ თუ გაზეთ „ლელოს“ მუდმივი მკითხველი ბრძანდებით, გეცოდინებათ, ერთ დროს დიდად განთქმული ქართული კალათბურთი დროთა ვითარებაში ისე დაკნინდა, დაუძღურდა, დაქიანდა (ამჟამად ექვსი ძირითადი მოთამაშიდან სამი არაქართველია), რომ ხანგრძლივი, ჰამლეტისებური ჭოჭმანის შემდეგ, როგორც იქნა, გაბედეს კალათბურთის ფედერაციის ხელმძღვანელობა შეეცვალათ, და მის უსაქმურ პრეზიდენტს, პარტიის ხაზით საკმაოდ დიდი თანამდებობის პირს, ეს გადაწყვეტილება საწყენად რომ არ დარჩენოდა, მისთვის ს ა პ ა ტ ი ო პრეზიდენტობა დააწესეს, ახალ, საქმიან პრეზიდენტს კი... ოთხი ვიცე-პრეზიდენტი ამოუყენეს გვერდით!

მილიონობით ამერიკელს ერთი ვიცე-პრეზიდენტი ჰყავს, ჩვენს რამდენიმე კალათბურთელს კი — ოთხი, ოთხი!

და ამის შემდეგ თქვენ კიდევ გიკვირთ, ჰიამაიაშვილებს და კაკაიებს რატომ აღარ დაენახებებთ ცელი, თოხი და ბარი, დაზგა, ხელჩო და შალაშინი, და რომ მათაც სწადიათ ჯერ ვიღაცის და რალაცის ვიცეობა, მერე და მერე კი...

დიდი თანამდებობა და მყვირალა სახელი, და ამათთან ერთად, ცხადია, სახრავიც!

ო-ო, სახელს თუ მანქანიანი თანამდებობა არ ახლავს, შაურია მაშინ, ბატონო ჩემო, თქვენი სახელის ფასი!

გახსოვდეს, რომ ბარ აღამიანი!

მამია გურიელი

ანა ახმატოვამ ერთხელ გულისწუხილით თქვა: „У каждого поэта своя трагедия. Меня никто не знает“.

ვფიქრობ, ყალბი კოკობზიკობა და თავზე მაიმუნურად ნაცრის დაყრა გამომივიდოდა, თუ ვიტყვოდი, რომ მე, ვიწრო წრეში მაინც, არავეითარი სახელი არა მაქვს-მეთქი.

ჰოდა, ეს ექიმიც მე საკმაოდ კარგად მიცნობდა, ენახა თეატრებში ჩემი პიესების მიხედვით დადგმული სპექტაკლები და „შავი წიგნიც“ წაეკითხა, თითქოსდა შესამჩნევი პატივისცემითაც შეპყრობოდა, და როცა მასთან, ასე ვთქვათ, გამორჩეულ სამკურნალო დაწესებულებაში ჩემი ფეხით, უკვე მკაფიოდ გამოხატული წინასაინფარქტო მდგომარეობაში მყოფი, მივბაჭბაჭდი და გასინჯვა დამიწყო, და ამ დროს კაბინეტში მტკიცე ნაბიჯებით თავაღერილი და მუცელგამოწეული შუა ხნის კაცი შემოვიდა, მის დანახვისთანავე ჩემი ექიმი სკამიდან... არ ვიტყვი, ტყვიანაკრავივით წამოხტა-მეთქი, ცქვიტად კი წამოდგა და ახალშემოსულს გაბადრული ღიმილით მიეგება, აქ რამ მოგიყვანათ, რამ შეგაწუხათო...

მე კი რამ მომიყვანა და რამ შემაწუხა, ეს მას უკვე აღარ აინტერესებდა, ნაუცბათევეად მომამხახა კი — ღლეში სამჭერ მიიღეთ ნიტრონგიო, ოღონდ ამის სათქმელად ველარ მოიცალა, ჰამამდე თუ ჰამის შემდეგო, და მეც ეს ნიტრონგი ხან ჰამამდე მივიღე და ხან ჰამის შემდეგაც, მაგრამ...

სასწრაფო დანხარებამ მომდევნო ორ ღლეში თუმცა ბარემ ოთხჯერაც მომაკითხა, და მაინც, ჩემთვის საავადმყოფოს სარეგული მანამდე არ გაიმეტეს („ცეკას პლენუმში მიმდინარეობსო“, თითქოსდა პლენუმის ყველა მონაწილეს ერთდროულად დაერეოდა წელკავი თუ ინსულტი!), ვიდრე შინ უმძიმესმა ინფარქტმა საბოლოოდ არ მომცელა...

...დიახ, როცა ჩემი ფეხით, ათსანტიმეტრიანი ნაბიჯებით მივლოლდი ჩვენი ჯანმრთელობის... მმ... სათნოებით აღსავსე დარაჯებთან, მაშინ რომ მოესხათ მაღლი, ასე ხანგრძლივ და, შეიძლება, სამუდამო დაინვალიდებასაც ავცდებოდი...

სხვათა შორის ის მუცელამობურთული ამხანაგი, როცა სტაციონარში საკაცეთი მიმიტანეს, იქ დამხვდა: ჩემს ექიმს, თურმე, იმ დღეს იგი ფოსტლებისა და პიუჟამის მოსატანადაც კი, შინ მანქანით ნახევარი საათითაც არ გაეშვა: ახლავე, დაუყოვნებლივ უნდა დაწვეთო (დიდი მსახიობი თუ ბრძანდები, მკითხველო, ამის ქვეტექსტს იოლად გაშიფრავ: „ნომ გრძნობთ, ბატონო, როგორ ვუფრთხილდები თქვენს სიცოცხლეს?!“)... მაგრამ რაკი მას ათღლიანი წოლა-ანალიზებისას სერაიოზული სატკივარი არაფერი აღმოაჩნდა, როგორც მოვიდა უკანა სარკმელზე ფარდაჩამოფარებული „ვოლგით“, იმავე „ვოლგით“ სამსახურისაკენ მხნედ გასწია: ვერ გეტყვიტ ზუსტად, რა რანგის დიდკაცად ჩაითვლება იგი, ეს კია, მას შეუძლია თურმე ლურსმნის მოცემა, ონკანის, ცემენტის და, ასე წარმოიდგინეთ, ჩეხური უნიტაზისაც, ჩემი მკურნალი ექიმი კი სწორედ იმხანად ახლად მიღებულ ნაკვეთში სახლს იშენებდა...

არა, ის თავის საქმის დაკვირვებული სპეციალისტია და, ალბათ, მიხვედრილი კაციშვილიც, მაგრამ რაკი ჩვენი დროის ღირსეული შვილია და ჩვენი ქებული საბჭოური წესის ტიპური პროდუქტი... ო-ო, „იასნო დალშე!“

ამ ბოლო წლებში ქართულ პრესაში მოთავესებული კარიკატურებიდან განსაკუთრებით ორი მათგანი მომეწონა. პირველი ორი ნაწილისაგან შედგება, ორივეზე ქალი და კაცია გამოსახული, ოღონდ სხვადასხვა გარეგნობის მქონენი; წინათ: მამაკაცი მანდილოსანს ხელზე მოწიწებით ეამბორებოდა... ახლა: აბოლებულ სიგარეტზე, ქალს „ფაფუე“ ხელში თავმომწონედ, „სვეტსკად“ რომ უჭირავს, მამაკაცი თავის პაპიროსს უკიდებს...

მეორე კარიკატურა უტექსტოა, მაგრამ მასში ჩაქსოვილ აზრს ამჟამად ჩვენში 12-14 წლის, ცხოვრებაში უკვე გამოქეჟილ-გამობრძმედილი გოგო-ბიჭებიც იოლად მიხვდებიან: ცარიელი სავარძლის ორივე სახელურზე მოკრივის მძიმე და მრისხანე ხელთათმანებია წამოცმული, აბა გაბედეთ და ამ სა-

ვარძელზე ვინმე შემეცილეთ, ჩემს თანამდებობაზე ბევრს კი ვიჭირავთ თვალი, მაგრამ, იცოდეთ, შეგაკვდებით და არ დაემობო...

და მართლაც, ათასგვარ ღონეს იხმარს, ათასგვარ სიგლახეს ჩაიდენს, რაზეც გინდათ, ხელს მოგიწერთ, რასაც დააეალებთ, იმას იტყვის, ოღონდ სავარძელ-თანამდებობას ნუ გამოაცლით, და თუ მოხდა სასწაული და ათასში ერთი, ბევრი ყოყმანისა და აწონ-დაწონისა და ბოდნიშების მოხდის შემდეგ, სავარძლიდან მარელისის მაგარ სკამზე გადასვებს, „ზევით“ (ეს უკვე ჩემი ვარაუდით) იმის შიში აქვთ, ვაითუ, ამ ყოფილ ამხანაგს ბოდმისგან ტვინში — და არა ჭკუაში! — სისხლი ჩაეჭყეს და ცოდვა არ ავიკიდოთო...

განა არ იყო ასეთი შემთხვევები? ერთი მეცნიერი, ნამდვილი მეცნიერი, რომელიც თითქმის ოც წელწადას გახლდათ იმდენად არა ძალაუფლების მქონე, მაგრამ მაინც, ასე თუ ისე, ხელმძღვანელ, დიდად საპატიოდ მიჩნეულ თანამდებობაზე, რომლის ეშხის გამო მას თავს დაბლა უკრავდნენ, მთხოვნელები (როცა შენი თავი შენ არ გეკუთვნის, მათ ჩვენს ქვეყანაში, აბა, რა გამოლევს!) წელში ორად იგრიხებოდნენ (თუმცა მათ ბევრს კი ვერაფერს უკეთებდა), თავადაც, როგორც დელეგაციის წევრი, ზოგჯერ — მეთაურიც, ხან მოზამბიკის მაპუტუში დადიოდა, ხან ზამბიის ლუსაკაში...

და აი, ერთ დღეს ყოველივე ეს მას ხელიდან გამოეცალა და... მეცნიერებასაც გამოეცალა ერთ-ერთი მნიშვნელოვანი ბოძი...

ჰოდა, თუკი ეს შეიძლება მოუვიდეს ჭეშმარიტ მეცნიერს, მაშინ რალა მოუვა — მსგავსი „ტრაგედიის“ შემთხვევისას! — თანამდებობის იორღაზე წლობით შემჯდარ ცრუმეცნიერს, ცრუკომუნისტს, საერთოდ, ცრუმუშაკს?

ისე კი, ღირს კი, საერთოდ, მეცნიერი კაცი თავის საქმეს, თავის უშუალო მოწოდება-საქმიანობას მოსწყვიტო-მოაცლინო და სამოღვაწეოდ ისეთი დარგი ჩააბარო, რომლის გასაძლოლად ინსტრუქცია გიდევეს წინ და საკუთარი ჭკუა, რა დიდიც უნდა გქონდეს იგი, არაფერში მოსახმარია?!

ღირს განა კომპოზიტორი, მით უმეტეს თუ ნიჭიერი, მუსიკას ჩამოაცილო და მინისტრის ლაგამი ამოსდო? თანაც რა

გარანტია გაქვს, რომ იგი არ გაკენეტს ამ ლაგამს და მას სხვებს არ ამოსდებს და თავად ნოტებიანად მხოლოდ თავის ქეიფზე არ იმუსიკ-იკუნტრუმებს?!

ღიახ, უბედურება ის არის, დიდკაცობის სახელ-სახრავის ცდუნება ჩვენში იმდენად დიდია, რომ თითქმის არც ერთი მეცნიერი და არც ერთი კომპოზიტორი (ეს კი „უთითქმი-სოდა“) „სავარძელზე“ უარს არ ამბობს...

ერთმა წესიერმა სწავლულმა მითხრა, აი ჩვენს, ფიზიკის ფაკულტეტზე ისეთი ახალგაზრდები შემოდიან, რომლებსაც საფიზიკო-სამეცნიეროდ თავი თითქოს მართლაც უჭრით, მაგრამ ისინიც კი, პირველი კურსიდანვე, უკვე იმაზე ფიქრობენ, როგორ და სად გაძვრნენ ეგრეთ წოდებულ საზოგადოებრივ, საუფროსო ადგილებზე, რომ ამთავითვე ჩაუყარონ საძირკველი მომავალში გამორჩეულ უზრუნველ ცხოვრებასო...

ღიახ!

ამას წინათ საღამოს გაზეთმა ერთზე საიუბილეო, როგორც იტყვიან, თბილი სტატია მოათავსა: „მწერალი და მეცნიერი“.

როგორ ფიქრობთ, განა პატარა საქმეა, ერთდროულად მწერალიც ბრძანდებოდე და მეცნიერიც? „ეს“ კი არის, და არა მარტო ეს არის, იგი აგრეთვე... საბინაო-სამშენებლო კოოპერატივის თავმჯდომარეცაა!

კი, მაგრამ, როცა კაფელი სანთლით საძებნია, „სმესიტელს“ კი „მინოისკატელითაც“ ვერ წააწყდები, და კიდევ რა არ სჭირდება ფუნქულიორის სიმალღემდე აწვდილ ცათამბჯენს და... მაშინ როდისღა ასწრებს ეს ჩვენი იუბილარი, მწერალი და მეცნიერი, უკვე მოხუცი, თავის ორ ძირითად მუზას — მწერლობას და მეცნიერებას ემსახუროს?! ბარაქალა და აფერუმ მასი ვაშა და ვაშა!

საწყალი ივანე ჯავახიშვილი კი მხოლოდ მეცნიერებას, საწყალი რაფაელი მხოლოდ მხატვრობას, საწყალი ბეთჰოვენი მხოლოდ მუსიკას, საწყალზე უსაწყლესი ლევ ტოლსტოი მხოლოდ მწერლობას, ემსახურებოდნენ!

ჰოდა, საკვირველი ის არის, ასეთი ღარიბ-ღატაკნი — მარტო ერთი ღმერთის მსახურნი, როგორღა დარჩნენ აქამდე ხალხის მეხსიერებაში?!

განა ჩვენ გულით რაჟმე ვაქეობთ?...
ცალიერ ენად ვართ გადაკცეული!..

აკაკი

ადამიანმა ადამიანური სახე რომ შეინარჩუნოს და ღირსეულადაც ატაროს იგი, ამისათვის ბრძოლაში მაგალითის მიმცემნი ვინ უნდა იყვნენ, თუ არა ადამიანის სულის ინჟინრები, მწერლებს რომ შეარქვეა იოსებ სტალინმა?!

სულ აგერ ეხლა კი ერთმა ჩვენმა, უდავოდ მახვილგონიერმა ლიტერატორმა, რომელსაც ბასრი კალამი თანაბრად ემარჯვება მხატვრული სიტყვის თითქოს ერთმანეთის საწინააღმდეგო სფეროებში — კრიტიკაში და პროზაშიც, ქართველი მწერალი ერის უპირველეს ჭირისუფლად დაგვისახა...

ჭირისუფლობა აქ, ცხადია, ვიწრო, შინაურული გაგებით როდი იგულისხმება, — შენი მკვდარი ვითომ ცხარე ცრემლით რომ დაიტვირო და რვაასკაციანი საქელებხო სუფრა გაშალო:..

„პასიური პატიოსნება, რა თქმა უნდა, პატიოსნებაა, მაგრამ საზოგადოების განვითარებაზე ძალიან სუსტ გავლენას ახდენს.

ჩვენს ცხოვრებას, უპირველეს ყოვლისა, სწორედ ისინი ალამაზებენ, ვისაც შეუგნია მამულისა და ხალხის წინაშე თავისი ღვთიური ვალი; ვისაც პირადულზე მაღლა საზოგადოებრივი საქმე დაუყენებია და ერის მოჭირნახულის მანტია უმშვენებს მხრებს“—ო.

აქ რომელი სიტყვაც უნდა აიღოთ, სულ ბაჯაღლო ოქროსაგან არის ჩამოსხმული და აზრიც მთლიანად, რასაკვირველია, ოქროვარაყიანია.

მართლაცდა, პასიური პატიოსნება ყოველ ადამიანს, ყოველ მოქალაქეს მოეთხოვება, — არ იყო მატყუარა, გაიძვერა, უპირო; არ იყო ქურდი და ავაზაკი, ურცხვი და ზნედაცემული;

არ იყო მექრთამე, ხარბი, სახელითა და ქონებით გაუმაძღარი, — ყოველივე ეს უბრალო, ჩვეულებრივი, ელემენტარული პატიოსნების მაჩვენებელია; აქტიური პატიოსნება კი იმას ნიშნავს, რომ ყოველივე ზემოთ ჩამოთვლილთ და მრავალ და ბევრ სხვა ხინჯსა და სიგლაჩეს, ერს რომ აკნინებს და აქვეითებს, თავდაუზოგავად შეება-შეებრძოლო, და არა მხოლოდ ქაქანა სიტყვით, — ეს ისევე პასიური პატიოსნების გამოვლინება იქნებოდა, — არამედ საქმით; მხოლოდ მოქმედებით, რაც ყველაზე ნაყოფიერად და თვალნათლივ პირად მაგალითს ჩაქსოვება და მოერგება ხოლმე.

ჰოდა, ვინ შეიძლება იყენენ ამის მოთავენი, ამის მეწინავე მედროშენი, მაგალითის პირველი მიმცემნი, თუ არა ერის უპირველესი ჰირისუფალნი — ჩვენი მწერლები!..

და რაკი ასეა, ჩვენზე უფრო ბედნიერი განა შეიძლება იყოს კიდევ სადმე ერი?!

მილიარდიან ზღვა-ჩინეთს მხოლოდ ორი ათასი მწერალი ჰყავს, მასთან შედარებით ბაზალეთის ტბის ოდენა საქართველოს კი... ხუთასი!

ესე იგი ერის ხუთასი უპირველესი ჰირისუფალი, მხრებზე მანტიამოსხმული ერის ხუთასი მოჰირნახულე, ხუთასი სულიერი ქომაგ-გულშემატკივარი, საქართველოს ბედით გულაფორიაქებულნი და, რაც მთავარია, მისი მარადიული მერმისისათვის საქმით თავგამოდებული მებრძოლ-მეომარნი!..

! ტსს...

ო, ეს რა მომესმა? ასე მწარედ ამას ვინ ჩამჩურჩულებს? — შე მამაცხონებულო, თუკი ჩვენს სამშობლოს ამდენი ღირსეული შვილი თავს დასტრიალებს, ამდენი მესვეურ-მზრუნველი, ამდენი მოამაგე და მეურვე ჰყავს, მაშინ ჩვენი საერო საქმე რატომ ვერ მიდის ისე წინ, როგორც ჩვენ გაგვეხარდებოდაო...

არა, ეგებ მართლა სათვალავში მოცტყუევდით, სწორად ვერ დავთვალეთ და ამდენი სულაც არა გეყავს, ა?

მე პირადად დამთვლელად ოდნავაც ვერ გამოვდგები, თვლარაღაც ათამდე ვიცი, ამის მერე კი, ქვის ხანის დროინდელი ბანჯგვლიანი მონაგარიშესავით ვამბობ „ბევრს“...

ეს ათიც ახლა ძლივს, ძებნა-ძებნით, ბორძიკ-ბორძიკ, რის

ვაივაგლახით ჩამოვთვალე, „ბევრის“ სათქმელად კი ენა ვერას-
გზით ვერ მოვაბრუნე, ვერ დავიმორჩილე...:

ხომ არ ვცადოთ ხელახლა დავითვალოთ, ა?

ჩვენს დროში აღარავინ დავობს იმის თაობაზე, რომ დი-
ნოზავრები ჯერ კიდევ უხსოვარ დროში გადაშენდნენ... ეს აქ-
სიომაა თითქოს, მაგრამ მხოლოდ „თითქოს“, რადგან საიდან-
ღაც ახლაც გამოტყვრა ერთი კაცი ჩემი სახით, რომელიც ამ-
ტკიცებს, თუ სულ ისეთი დინოზავრი არა, მილიონი წლების
წინათ ჯერ კიდევ გაუქუქუჩიანებულ ჩვენს დედამიწაზე რომ
დაბოგინებდა, ყოველ შემთხვევაში მისი მინიატურული ნაირ-
სახეობა ახლაც ცხოვრობს ჩვენს დედაქალაქში ადამიანის, ნამ-
დვილი ადამიანის სახით, რომელიც, ბევრის სავალალოდ, პა-
სიური პატიოსანი როდია, აქტიურია და, აი, ამ „დინო-
ზავრს“, — ო. თოლორაიას; — რომელმაც ადრე არა ერთსა და
ორ კინოგანმანათლებელ-კინოფიკატორს, ფულის წყაროს
დაშრობით, ცრემლის ნაკადული აღვრევიანა, ამ რამდენიმე ხნის
წინათ ავგიუსის თავლის მსგავსი, ათეული წლების მანძილზე
„გაკრიალებული“ ქალაქის საბინაო განყოფილება ჩააბარეს.
სულ აგერ ახლა კი მას უფრო ახლოს საღამოს გაზეთში გავე-
ცანით.

მოდით, მისი წერილიდან მხოლოდ ორაბზაც-ნახევარი
ამოვიკითხოთ:

„ერთმა ცნობილმა მწერალმა ორ ადგილზე მიიღო
საცხოვრებელი ბინა და ამის შემდეგ იმასაც შეეცადა,
რომ ერთ-ერთ ძველ ბინაში არასრულწლოვანი შვილი-
შვილი დაეტოვებინა. ქალაქის საბჭომ სამართლიანად არ
შეუწყო ხელი მისი ახირებული სურვილის განხორციე-
ლებას.

თუ კარგად იცნობთ ამ მწერლის შემოქმედებას, აღ-
ტაცებული დარჩებით, როგორ გვესაუბრება ზნეობაზე,
სულის თუ ხორცის სიწმინდეზე, მამულიშვილობაზე, სი-
კეთეზე...

როცა მის ნათქვამს და ნამოქმედარს ერთმანეთს ადა-
რებთ, გაოცებული რჩებით ამგვარი გაორებით“.

ვინ არ იცის, რომ ზოგი მწერალი დიდია, ზოგი საშუალო და ზოგიც პატარა... ეს მწერალი კი, რაკი ცნობილია და რაკი მის წიგნებში ქადაგებას სულისა და ხორცის სიწმინდეზე აღტაცებაში მოეყავართ ხოლმე, უთუოდ დიდებს უნდა განეკუთვნებოდეს და, მაშასადამე, ერის უპირველეს ჭირისუფალსაც...

ჰოდა, თუკი ერის დიდი ჭირისუფალიც კი ასეთი ზრუნვა-სასოებით დასტრიალებს თავს ერსა და სამშობლოს, მაშინ განა მეტი მზრუნველობა მოეთხოვებათ საშუალო და პატარათ?!
ცოტა არ იყოს, საკვირველი ის არის, რომ ჩვენი პატივსაცემი დინოზავერ-ბინათუფროსი ამ დიდ შემოქმედს ზვიგენის ამ მადას რალაც ახირებულ სურვილში უთვლის და... თითქოს არც გაემტყუნება: მას აქამდე არათუ საქმიანი ურთიერთობა, — კაზმული სიტყვის ოსტატებთან უბრალო ნაცნობობაც არ ჰქონია და, აბა რას წარმოიდგენდა, თუკი ერის უპირველესი ჭირისუფალიც კინოთეატრში გამოქვერილ კინოვიტხანსავით ამღერდებოდა, თანაც მთელი ქალაქის დასანახავად და გასაგონად:

მე ჩონგური მისთვის მინდა,
რომ ჩემს მუცელს მსახურებდეს!

შვილიშვილისთვისო...

რა თქმა უნდა, შვილიშვილებზე ზრუნვა სასახელო, მოსაწონი, დიდად საქები საქმეა, მაგრამ... როცა შენ, ერის უპირველეს ჭირისუფალს, ერთადერთი შვილიშვილი გყავს, და არა ხუთი-ექვსით ხარ გარემოცული, იმ ერთთან, ბევრი ჭამისა და ძილისაგან ლოყები ყურთბალიშებს რომ მოუგავს, საქვეყნოდ ეურნალში კი არ უნდა „ჩაკარტიკედე...“

და არც შენ, ერის სულ დიდო ჭირისუფალო, ის ერთი შვილიშვილი შენთან ერთად ტელევიზორში არ უნდა გამოიყვანო და არ უნდა ათქმევიანო, ბაბუაჩემმა ჩემზე ლექსების მთელი წიგნი დაწერაო...

ეს, ჯერ ერთი, ამ პატარას უკვე ლაპობიდანვე აჩვევს გამორჩეულობას, მეორეც, — აბა, რა ქნან ათიათასობით ამის მნახველმა სხვა შვილიშვილებმა, რომელთაც ბაბუები მწერ-

ლები არა ჰყავთ და თავიანთ შვილიშვილებს ლექსების მთელ წიგნს კი არა, ორ სტრიქონსაც ვერ გაურითმავენ. რატომ უნდა ვაგრძნობინოთ მათ თავი დაჩაგრულად?

საერთოდ, ჩვენი ერის უპირველეს ჰირისუფლებს შვილი-შვილი — თანაც რაღაც ერთი, სულ დიდი ორი, — კულტად ჰყავთ ქაეული („გადასარევი ბოვში გეყავს!“)...

ერთმა ასეთმა, ერთხანობას თავისი ცხოვრება-კარიერის შენელებული დინამიკით განაწყენებულმა და ამიტომ განდგომილმა, შინაურულ საუბარში, როგორც ჩანს, გულისჯავრი ველარ დამალა და რესპუბლიკის მეთაურის მისამართით ბრძანა, მომცეს შვილიშვილისთვის ბინა და ამოვუდგები მხარშიო...

კი, მაგრამ, შე კაი კაცო, რაკი ამქვეყნად უცოდველი და შეუმცდარი, თუკი, საერთოდ, რაიმეს აკეთებ, არავინ არის; ჰოდა, ეს ჩვენი მეთაურიც, ვთქვათ, „ამაში და ამაში“ არ არის სწორი და მართალი, და შენ, რაკი მან, თუნდაც სულ უბინაოს, ბინა მოგცა, ამისათვის მას ერისათვის რაიმე საზიანო საქმეში მხარში უნდა ამოუდგე?!

ანდა... ამას წინებზე, დღიდან გაჩენისა, ყოველგვარ ნატვრა-საოცნებოს მოკლებულებმა, მუდამ დამტკბარი სიცოცხლით მოყირკებულ-გადაყირკებულმა ბატონიშვილებმა თავის ქეიფზე თვითმფრინავის მიმართულების შეცვლა მუქარით რომ სცადეს და ამ ცდაში, ოფიციალურ ცნობას თუ ვენდობით, არც ახლობლები დაინდეს და არც შორებლები, — როგორ, შენ, ერის უპირველესი ჰირისუფალი, ამ ამაზრზენ საქმეში რესპუბლიკის მეთაურს განზე უნდა განუდგე, რაკი შვილიშვილისთვის ბინა ჯერ კიდევ ვერ მორუცია, და მასთან ერთად საქვეყნოდ არ უნდა დაგმო („საქართველოს სადა ჰყავს შვილი დასაკარგავი...“) ერისათვის ეს სამტროზე სამტრო წინდაუხედავი უგუნურება და შენი შემყურე ქართველი ახალგაზრდობა, შენი მუცლისეული დუმლით, ერის უქკუო გაჩანაგების პოზიციაზე უნდა დააყენო?! მაშინ რატომღა უნდა გვიკვირდეს, თუკი განდგომილ-განაწყენებულთა ტვინშესაბრუნებლად იმედიანად წაიღიღინებენ ხოლმე:

რა აყმუვლებს ამ მუნიან მურისა?
ხომ არ შია და ან ნომ არ სწყურია?

გადაუგდოთ ბინა-სამსახურია
და გახდება ჩვენი ყმა-მსახურია!..

ეს ვისაც „აკლდათ“, მაგრამ ჩვენ ვხედებით ერის ისეთ ჭირისუფლებსაც, რომელთაც არასოდეს არაფერი არ ჰქვლიათ, „არც გროშები და არც ჭოშები“, და მაინც, ეს ნიჭიერთა შორისაც და სიბერეშიც კი, დიდკაცობის ქინი და მუდმივი შიში ხის კენწეროდან ხის ძირას დაბერტყებისა იმდენად ძალუშია მათში, რომ ღროდადრო, ძლიერთა გულის მოსაგებად, საქვეყნოდ ისეთ რამესაც განაცხადებენ, რომ ეს ძლიერებიც, ცოტა არ იყოს, ალბათ, უხერხულად გრძნობენ თავს...

ასე, მაგალითად, ქართველი ერის ჭირისუფალთა მეცხრე ყრილობაზე ერთმა აკადემიკოს-ჭირისუფალმა, უკვე განხორციელებულ საამაყო, სასიკეთო საქმეთა ჩამოთვლისას, პათეტიკურად განაცხადა (და დაიბეჭდა კიდევ):

„შეხედეთ რა სილამაზე გამოჩნდა ბარათაშვილის ქუჩაზე, ჩვენი დიდი პოეტის ძეგლით რომ არის დამშვენებული; ხალხთა მეგობრობისა და კომკავშირის მუზეუმის გახსნა, თ ბ ი ლ ი ს ი ს გ ა დ ა ქ ე ე ვ ა ს ი ს უ ფ თ ა ვ ი ს ა და წ ე ს რ ი გ ი ს ს ა ნ ი მ უ შ ო ქ ა ლ ა ქ ა დ...“

გადაქცევა... უკვე გადაქცევა...

ამაზე ჩვენი პრესა უკვე 60 წელიწადია ოცნებობს და ჩვენც ყოველდღე, გარდა კვირა საღამოსი, მოგვიწოდებს და გვეხვეწება ხოლმე, გადავაქციოთო...

სხვათა შორის, როცა დილის სხდომაზე ამ პატივსაცემმა ორატორმა გამოაცხადა თბილისი სისუფთავისა და წესრიგის სანიმუშო ქალაქად, სწორედ სხდომის დამთავრების ჟამს, შუადღისას, სანაგვე მანქანამ, რომლის ქურთმა მძღოლმა უკან დახვევისას თავი არ შეიწუხა უკან მოხედვით, კედელს მიაქეცყა თავის გზაზე მშვიდად მიმავალი, რაიმე ხიფათის სულაც არ მომლოდინე, ხნიერი დედ-მამის ერთადერთი შვილი — იმედი, მოსალამოებისას კი თვით მწერალ-ჭირისუფალთა პოლიკლინიკის ექთან მზია კ-ძეს, თავისივე სახლის ეზოში, ორმა სანიმუ-

შო თბილისელმა საყურეები ჩამოაგლიჯა და თან სცემა, რატომ გაგვიძალიანდიო...

თითქოს არც ამის აღუნიშნავობა ივარგებდა, აკი... „მე ვამაყობ, რომ თბილისელი ვარ“: ნაცემ-გაძარცული ქალის შემზარავ კვილზე ფანჯრებიდან ერთმა მეზობელმაც არ გადმოხედა არც საშველად და არც ცნობისმოყვარეობით...

და ეს მათ თითქოს არც დაეძრახებათ: არანორმალური ამბავი, თუ იგი ყოველდღიურ, ჩვეულებრივ ამბად გადაიქცევა, ადამიანი მას უკვე ისე აღიქვამს, როგორც ნორმალურს, როგორც არაგასაკვირალს.

ჩემს თაობას კარგად ახსოვს კომპოზიტორი კოტე ფოცხვერაშვილი; თუ იგი სადმე ფეხზე მდგომი ან მოსიარულე შეგხვდებოდათ, არ შეიძლებოდა გაოცებული თვალები არ მიგეპყროთ: მართლაც დინოზავრივით ბრგე, მოუხეშავი, ზოზინა და იმდენად მაღალი იყო, რომ ჩვენი პირველი რესპუბლიკის დროს გამომავალმა კარგმა იუმორისტულმა ჟურნალმა, „ეშმაკის მათრახმა“ ორ ნომერში მოათავსა მასზე შეგობრული შარჯი: ამ ზომის კუბოს, აბა, რომელი ქირისუფალი იშოვისო, ამიტომაც „მიცვლილ“ კომპოზიტორს დამწუხრებელი საზოგადოება შუაზე გადახერხილს მისვენებდა... ქვემოთ მიეწერათ „გაგრძელება შემდეგ ნომერშიო“... შემდეგი ნომრის კუბოში კი მხოლოდ გრძელი ფეხებილა ეწყო.

როცა ასაკის მიხედვით სიკვდილი ჯერ კიდევ შორს, შორს ვიდევს, და თან იუმორსაც ემეგობრები, ასეთი მოშავი ხუმრობა შენზეც კი, შენშიც ღიმილს გამოიწვევს, მაგრამ ეს უკვე ხუმრობას აღარ განეკუთვნება, როცა ახალგაზრდულ გაზნის შენ, ერის უპირველესი ქირისუფალი, იმსიგრძე ინტერვიუს მისცემ, ერთ ნომერში რომ ვერ დაეტევა და მომდევნო ნომერში გააგრძელებენ, მაგრამ ეს კიდევ არაფერია, ის უფრო „ბევრფერია“ ქირისუფალ-ინტერვიუერის დასახასიათებლად. როცა მომდევნო ნომერშიც წინა დღეს ჩახატულ სურათს ხელმეორედ ჩახატავენ და შენ ამას „თავმდაბლურად“ შეიფერებ კიდევ და მისადმი კეთილად განეწყობი...

ჰო, მაგრამ... საკუთარი თავის ასე სახატედ გადაქცევას სტალინიც არ მიმართავდა: ბელადის სურათს ცენტრალურა

პრესა მხოლოდ დროგამოშვებით ათავსებდა, ყოველდღე მის ბეჭდვას კი ჩვენი „კომუნისტიც“ თითქოს ერიდებოდა...

ო! ერის ჰირსიუფალიო, თანაც უპირველესიო... „ეს“ მსკოვანი ჰირსიუფალი, როგორც ჩანს, ჩვენს უთქმელადაც მიიჩნევს თავის თავს უპირველესად, თორემ ასე კატეგორიულად და ასე გაკვირვებით ამას სხვების გასაგონად მაინც არ იტყოდა:

— როგორ, მე და ჩემი შოფერი ამ ქვეყანას ერთ „ფორთოჩქიდან“ უნდა ვუყურებდეთ?!

კი, მაგრამ... თუ შენ, როგორც სიტყვაკაზმული მწერლობის ოსტატი, მართლაც შენი ერის, შენი ხალხის, შენი სამშობლოს ჰირსიუფალი ბრძანდები, მაშინ რატომ შენც და შენი შოფერიც ერთნაირად არ უნდა უყურებდეთ — ამ შემთხვევაში ყოველდღიური ცხოვრება იგულისხმება — ამ ქვეყანას?! მით უმეტეს, რომ შენ არა მარტო ერის ჰირსიუფალი ხარ, — ამავე დროს მისი დეპუტატიც ბრძანდები... ოქტომბრის რევოლუცია ხომ იმიტომ მოახდინეს, რომ ამ ქვეყნისათვის ჩვენ ყველას ერთი, საერთო, კრიალა სარკმლიდან გვეყურებინა?! დეპუტატი ხალხის მსახურიაო, არაერთხელ გაგვიგონია... თქვენი „ფორთოჩქის“ მიხედვით კი, ბატონო, თუ კაცი იმსჯელებს, უფრო ხალხია დეპუტატის მსახური...

ნ. ვ. გოგოლი რეგულარულად, თანაც უსახელოდ, იეკოგნიტოდ, უგზავნიდა ხოლმე ფულად დახმარებას პეტერბურგის უნივერსიტეტის ღარიბ სტუდენტობას... და ამას იგი იმიტომ კი არ შერებოდა, რომ სიმდიდრისგან დულდა და გამომოდულდა... როცა გარდაიცვალა, მის ბანაში ვერც ფული იპოვეს და ვერც საგარეო ტანსაცმელი: კუბოში იმ გაცვეთილ სერთუქში ჩაასვენეს, რომელსაც ყოველდღე იცვამდა...

ამერიკელმა „ერის ჰირსიუფალმა“ ჯონ სტეინბეკმა თავისი რომანის „მრისხანების მტევნებისათვის“ მინიჭებული პულიტცერის პრემია, გაკვირვებისას ხელდა რომ გაემართა, მთლიანად გადასცა ერთ თავის ღარიბ მეგობარს...

ფრანგი ჟან-პოლ სარტრი თავის ჰონორარებს მთლად როდი დებულობდა, — მხოლოდ მას მცირე ნაწილს, თანაც არა ერთბაშად, — ყოველთვიურად: მას არ უნდოდა რაიმე, განსხვავება ყოფილიყო მასსა და უბრალო ფრანგ მოსამსახურეს, ჩვეულებრივი ჯამაგირის შემყურეს შორის...

(ცოტა უცნაურიც კია, „დამპალ“ კაპიტალისტურ სამყაროში, როგორც ამას ჩვენი საინფორმაციო ორგანოები გვაუწყებენ ხოლმე, ადამიანი ადამიანისთვის მგელია, და ეს მგლები ერთმანეთს ცოცხლივ, შეუმწეარ-მოუხარშავადაც ჭამენო, ეს სარტრი კი არ უქადრისობდა, რომ მასაც და მის შოფერსაც ამ ქვეყნისათვის ერთი „ფორთოჩიდან“ ეცქირათ... თუმცა არა! — მწერალსა და მოაზროვნე სარტრს საკუთარი შოფერი არც არასოდეს ჰყოლია).

...არა, ეს ყველა ჩვენს ხუთას ჰირისუფალს არ ეხება, მაგრამ მათგან ოცს, ოცდაათს კი... აი, ვისი წიგნებიც აქ და ბევრ სხვაგანაც დასტობით რომ გამოდის, ვისი პიესებიც ათობით თეატრებში იდგმება აქაც და ბევრ სხვაგანაც, ვინც ჰონორარისა და ჯამაგირის გარდა „ხალხის სამსახურისთვის“ იღებს იმდენ თანხას, სარტრი რომ კმარობდა მთელი თვის მანძილზე, — ჰოდა, ჩვენ კი რამ შეგვიკრა კრიკა ისე, რომ, ჩვენს მშობლიურ სოფელში მაინც, მთელ ჩვენს სიცოცხლეში თუნდაც ერთი პატარა წყარო ამოვაჩუხჩუხოთ?.. ჩვენ ხომ ერის უპირველესი მანტიამოსხმული მოქირნახულენი ვართ, რომლებიც... მმ... პირადულზე მალლა ყოველთვის თურმე საზოგადოებრივ საზრუნავს ვაყენებთ!.. ანდა... საწერად შემართული ხელი განა ვითომ შეგვახმება, თუკი ვინმე, შვილებიან ღარიბს ამ ხელს შევაშველებთ და ფეხზე წამოვაყენებთ?!

ეგებ ბრძანოთ, სად არიან ჩვენს გალაღებულ ქვეყანაში ღარიბები, ხელმოკლე ოჯახებიო...

ამას წინათ ხარაგოულის რაიონის სოფელ ფარცხნალში მყოფს, თერჯოლიდან ერთმა გლეხმა მომაკითხა:

— თქვენთან მომასწავლეს, ბატონო... მითხრეს, მრავალშვილიანობის თათბაზე ისე ადვილად შედის შევარდნაძესთან, როგორც ხაბეიშვილიო... მეც, ბატონო, რვა შვილის მამა გახლავარ და... ძალიან მიჭირს... ოჯახობა ახლა მეცხრეზეა ორსულად და ვეუბნები, წადი, ქალო, რაიონში, მოიშალე მუცელი... რა იცი, შეიძლება ინამუსონ და ფული არ გამოგვართვან-მეთქი...

...არა, მას ჩემთვის არც სააბორტე ფული უთხოვია და არც... საერთოდ, ჩემს გზაზე ჯერ არ შემხვედრია ისეთი მრავ-

ვალშვილიანი, ფული რომ ეთხოვოს ანდა თუნდაც ქარაგმულად არაკი ჩამოეგდოს...

ჩემმა თერჯოლელმა სტუმარმა ეს კი მითხრა, რა ხანია ამდენი ამბავია ატეხილი ქართველების გამრავლებაზე, მე კი სოფლის მთავრობა ყურადღებას არაფერს მაქცევსო...

არ დავმალავ: მიუხედავად იმისა, ჩემამდე რომ მოსულყო, მან საკმაოდ დიდი გზა გამოიარა, და თან მოვიდა დიდი იმედებით, მისი ფიქრით, ასეთ დიდკაცთან, მე მაინც უკვე საუბრის დასაწყისშივე მის იმედებს ცივი ღვინო გადავასხი:

— ჩემო კარგო, თქვენთვის სწორად არ უთქვამთ. მე იმდენად პატარა კაცი ვარ, შევარდნაძე პირისპირ არც ოდესმე მინახავს... წარმოიდგინეთ, არც ტრიბუნაზე მინახავს, და ეს, ალბათ, იმიტომ, რომ საზეიმო დემონსტრაციებზე არასოდეს დავდივარ... თუმცა არა, ერთხელ ვიყავი, 37-ში, შიშით შებყრობილი, და მაშინაც გამოვიპარე...

ხაბეიშვილიო... ხაბეიშვილს კი მხოლოდ ერთხელ შევხვდი თეატრის ფოიეში, ქუთაისში, სულ რამდენიმე წუთით...

(ეს ჩემთვის დიდი გასაკვირისას, როცა მისი მეორე მდივნის, ვარდანაშვილის ქალის ფხიზელმა თვალმა და ქუთათური მწერლების ლიდერის კვიციანიძის შორსმჭვრეტელმა გონებამ ჩემი პიესა „პლატონი“ იდეურად ბინძურ და მანკიერ ნათიხნად მიიჩნის და, გასინჯვისას, მისი მოხსნა მოითხოვეს, ხაბეიშვილმა კი — დაილოცა მისი ოჯახი! — მაინც დართო ნება ეჩვენებინათ, რითიც, სხვათა შორის, საბჭოთა ხელისუფლებას შემოიღიარდე მიკრონითაც საძირკველი არ შერყევია არც თვით ქუთაისში და არც მაგაღანზე!).

გამომშვიდობებისას ჩემს მრავალშვილიან სტუმარს სიტყვა ჩამოვართვი, რომ მისი მეუღლე არავითარ შემთხვევაში მუცელს არ მოიშლიდა და მეცხრეს მეთესაც მოაყოლებდა...

ერთი კვირის შემდეგ კი, რაკი გულმა არ მომიტმინა, დაუპატიჟებლად ვეწვიე სოფელში და... მართლაც რა ნახეს ჩემმა უამრავი ავისა და გულშემზარავი ამბის არაერთგზის მნახველმა თვალებმა: პერუს ყველაზე მიყრუებულ სოფელში წითელკანიანი ინდიელიც არ იცხოვრებს ასე...

მე ამ სურათს არავის, მათ შორის ჩვენი ერის უპირველეს პირისუფალთაც, არ აეუწერ-დაეუხატავ, — ეს საკუთარი თვა-

ლით უნდა ნახო, და თუ ნახავენ, მაშინ... მმ... მაშინ, შეიძლება მთავრობასთან დაახლოებულმა გავლენიანმა ადამიანის სულის ინიერებმა, თუ თავად სინდისი არ შეაწუხებთ, რაიკომის მდივანი სიტყვიერად მაინც შეანამუსონ... მე ეს პირადად ვცადე კადეტ, როგორც ადრინდელ მდივანზე (ა. ბურჯანაძე), ისე დღევანდელზე (რ. მხეიძე), მაგრამ... როგორც რუსები იტყვიან, Ноль внимания, რაც, სხვათა შორის, სულაც არ გამკვირვებია: კვლავ, როგორც რუსები იტყვიან, Это у нас в порядке вещей, რაკი ანგარიშგასაწევი მანტიით არა ხარ კაცი შემოსილი...

(ყოველ შემთხვევისთვის ამ ქართველი რვაშვილიანი „ინდიელების“ მისამართს გაწვდით: თერჯოლის რაიონი, სოფელი ქვემო ალისუბანი, ციური და ოთარ ჯაბიძეები.

მისვლისას, შეუღობავ ეზოში, შეიძლება, ქათმებიც შემოგეგებონ და ინდაურებიც კი, მაგრამ ეს მათ უფრო გლეხური სიბეჭითეში ჩამოართვით, ვიდრე შეძლებულებაში... ხომ გახსოვთ, გოგია უიშვილმა საახალწლოდ გოჭიც დაკლა და გომიჭებიც გამოაცხო, მაგრამ იგი ამით დავით დროის კეთილდღეობით მაინც ვერ გაუტოლდებოდა).

მოდით, ახლა, ძვირფასო მკითხველო, ამ ჭირისუფლობას და ჭირისუფლებს საერთოდ მოვეშვათ და გადავიდეთ... თუმცა... არც ამის უთქმელობა ივარგებდა: ჩვენისთანა პატარა ერისათვის ხუთასი მწერალი — „ჭირისუფალი“ ერთობ ბევრი ხომ არ არის?!

ამას წინათ ერთი ქართველი გერმანისტი ზედაპირული შთაბეჭდილების მსხვერპლად სახავდა და ერთგვარი საყვედურით წერდა დასავლეთგერმანელ მწერალ ჰაგელშტანგეზე, რომელმაც რაღაც სამი დღე დაჰყო საქართველოში და...

ქართველები ბევრს ჭამენ და სვამენო (ვითომ ტყუილია?).

ღვინის დაძალევა იციანო (ვითომ ლალატობს ჭეშმარიტებას?).

ცოტა არ იყოს, ბაქიები არიანო (ვითომ დიდად აზვიადებდნენ?)

და რაც ჩვენთვის უფრო გულსატკენია,
მწერლები, რომლებიც აეროსადგურში დაგხდნენ, მა-
ინცდამაინც მწერლებს არ ჰგავდნენო...

ო-ო, ეს უკვე ისეთი ცილისწამებაა, რისთვისაც ეს ბატონი
რუდოლფ ჰაგელშტანგე, ლირიკოსი და პროზაიკოსი, ნამდვი-
ლად ღირსია იმისა, რომ ჩვენმა დიდმა, თანამდებობიანმა
მწერლებმა, აეროპორტში რომ შეხვდნენ მას, ასეთი გაუგონა-
რი დამცირებისათვის დუელში გამოიწვიონ და თბილისში დამ-
ზადებული ხანჯლის ფორმის, გამხმარი პასტით გატენილი კა-
ლამი, არც აცივონ, არც აცხელონ და... პირდაპირ ჩხუტონ ზედ
კიბში!

ისე, კაცმა რომ თქვას, თუკი ჩვენმა პირველმა ოცეულმა,
რჩეულმა მწერლებმა მასზე ასეთი უღიმღამო, უბადრუკი შთა-
ბეჭდილება დატოვეს, მაშინ ყველა ჩვენ, დანარჩენი 480 მწე-
რალი დასახვედრად აეროდრომზე რომ გავმწკრივებულებოყავით,
ჰაგელშტანგე ვითომ არ იტყოდა, ვინ არიან ეს ნაყარ-ნუყარა
ღვთის გლახებიო?!

ერთხელ, საკმაოდ დიდი ხნის წინათ, მწერალთა ერთ-ერთი
საკავშირო ყრილობის წინ, ერთბაშად, ერთი ხელის დაკვრით
30 კაცი და ქალი შეიწყალეს და გააოფიციალეს მწერლებად;
ეს იმ დროს უფრო იმიტომ, აქაოდა, რაც მეტი წევრი გვეყო-
ლება, დიდებ-მოზრდილ-მომცრო და ნამლევა-პატარებიდან,
ზოგიც მავედრებელ-მახვეწრებიდან, ზოგიც კი აგრესორ-მოჩ-
ხუბრებიდან, მით მეტი დელეგატი წავალთ მოსკოვსო...

ერთხანობას ქართულ ლიტერატურაში... ო-ო, არა შემოქ-
მედების სფეროში, — სადიდკაცო-საკომანდო სარბიელზე მნი-
შვნელოვანი პოსტების დაკავების მსურველთა იერიში იმდენ-
ნად მძაფრი და ძლიერი იყო, რესპუბლიკის კომუნისტური
პარტიის ცენტრალური კომიტეტის პირველი მდივანი, გადაშ-
დგარი გენერალ-ლეიტენანტი ვასილ მკავანაძე იძულებული
იყო ისევ „გადმომდგარიყო“ და სამწერლო ფრონტზე ძალთა
დისლოკაცია მოეხდინა, უკან ორგანიზებულად დაეხია და კომ-
პრომისზე წასულიყო: მწერალთა კავშირში... 12 (თორმეტი!)
მდივანი დაენიშნა — აერჩიათ!

(ახლა ექვსია!!! სხვათა შორის, როგორც სარწმუნო წყარო-

ებიდან შევიტყვე, ლილიპუტიაში, რომელიც საქართველოს არც მოსახლეობის რიცხვით და არც ტერიტორიით აღემატება, მწერალთა კავშირში მხოლოდ ორად ორი, უკამაგირო ლილიპუტი-მდივანი ჰყოლიათ).

ახლა ესეც ვიკითხოთ, მომადლიერების ასეთი პოლიტიკა ზიანს ხომ არ აყენებს ჯერ, კერძოდ, მწერლის სულს და მერე, საერთოდ, მთელ მწერლობას? მის პრესტიჟს ხალხის თვალში?

აგერ ახლა უკრაინის მწერალთა კავშირის თავმჯდომარე წერდა, ლიტერატურული პროდუქციის სიუხვით, უცხოეთის მწერლებთან შედარებით, ჩვენ უბრალოდ უსაქმურებად ჩავითვლებითო.

როცა იგი ამას ამბობდა, ეკვი არ არის, მან იცოდა, 36 წლის ამერიკელი მწერალი კინგ სტივენი უკვე ათამდე რომანის ავტორია, ოლონდ ეს.კი არ ვიცი, იცოდა თუ არა, რომ, მაგალითად, ჩვენი მსცოვანი მწერლის, მთელი თავისი სიცოცხლის მანძილზე მუდამ დალხინებულის, ახლა უკვე ოთხმოც წელს მიტანებული კონსტანტინე ლორთქიფანიძის მთელი ნაშემოქმედარი, აჰა, ძლივძლივობით, ოთხიოდე ტომს თუ მიაღწევს, მაშინ როცა მუდამ დევნილ-დაუღბინებელმა, 56 წლის ასაკში სიცოცხლემოთავებულმა მიხეილ ჯავახიშვილმა სამწერლო მოღვაწეობის სულ რაღაც 15 წლის მანძილზე ათამდე ტომი დაგვიტოვა, და რომ! დაეცლიათ 80 წლამდე ესუნთქა საბჭოთა ჰაერი (ეს გამოთქმა პაოლო იაშვილს ეკუთვნის, იგი თქმული იყო მწერალთა პირველ საკავშირო ყრილობაზე 1934 წელს), ვინ იცის, იმ ათს კიდევ რამდენ ერთს მიუმატებდა...

თქვენ, დაკვირვებულო მკითხველო, შეიძლება ბრძანოთ, რაოდენობა — ჰო, მაგრამ... ხარისხი, ხარისხიო...

ვინ უარყოფს, ერთი „ღონ კიხოტი“ სულ იყიდის ორასტომიან, დიდად ნიჟიერ ჟორჟ სიმენონს და ამდენივე ტომიან და ასეთივე დიდად ნიჟიერ აგატა კრისტის!

ერთი „მერანი“ სულ იყიდის ჩვენი საუკუნის ბევრი ქართველი პოეტის თუნდაც ფუთობით ლექსებს!

მწერალი, ცხადია, ფასდება მის მიერ შექმნილი სახეებით, და თუ ეს ასეა, არა მგონია, ბარნაბა საგანელიძე ანდა მეჭივაშაიძე ტოლს დაუდებენ არსენა მარაბდელს, ჯაყოს, კვაჰის, თეიმურაზ ხევისთავს, აბდულას, ჩანჩურას, გივი შადურს...

ვინ არ იცის, რომ საქართველოში ხუთასი მწერლიდან რამდენიმე ათეული თუ ამოირჩევა, რომელთაც ნამდვილი მწერალა შეიძლება ეწოდოს...

და რარიგ დასაწინაა, როცა ჭეშმარიტი მწერლის დრო და ნაჭი იხარჯება იმდენად არა შემოქმედებაზე, რამდენადაც თანამდებობა-ლიდერობის მისაღწევად გაძრომ-გამოდრომზე, „ჩინმენდლების“ მისაღებად სირბილ-ზრუნვაზე, საიუბილეო ვაქხანალიებზე და სხვა ათას წერილმანზე, რომლებიც მათ მსხვილმანებად და ტკბილი ცხოვრების ბალავრად მიაჩნიათ...

კი, მაგრამ, ტკბილია კი ასეთი ცხოვრება?! დროდადრო მაინც, ძილს ხომ არ გვიფრთხობს ხოლმე სინდისი, რომელიც მწერალს, ჩემი აზრით, როგორც ადამიანის სულის ინჟინერს, სხვა პროფესიების ადამიანებთან შედარებით, უფრო მეტი უნდა ჰქონდეს და არასოდეს იგი არ უნდა მიაძინოს? ფუმფულა ბალიში ხომ უდარდელი ხერხის პირველი მეგობარია?!

ჩემს ამ ნაწერში რაკი ჩვენი ცხოვრების უფრო უარყოფით მხარეებზე მაქვს კალამი გამახვილებული, ნუ იფიქრებს მკითხველი, რომ მე იმასაც ვიტყვი, რომ საქართველოში მარტო მწერლობით ვერ იცხოვრებ — ასე ვთქვათ, წმინდა მწერლობით, ესე იგი უსაყარძლოდ-უთანამდებებოდ, უსამსახუროდ...

რასაკვირველია, არა ყველა ის ხუთასი მწერალი და „მწერალი“, მე მხედველობაში მყავს მხოლოდ კარგი პოეტი, კარგი პროზაიკოსი, კარგი დრამატურგი (ცხადია, თუ პიესებს უდგამენ)... ეს კია, მტრების შეძენით შეშინებულ კრიტიკოსს ცოტა კი გაუჭირდება, მაგრამ... ჰონორარის მაქსიმუმს დაუმსახურებელი ქება-დიდების ნიაღვარშიც ხომ იძლევიან!

ვის არ ახსოვს, როგორ ჩიოდა პარიზიდან ეგნატე ნინოშვილი, რა ნაციაა ის ნაცია, რომლის მწერალიც შეიდკაპიიან პორციას ქამსო...

ახლა კი... ჩემი ახლო ნათესავი ქალი, ეკონომისტი-ფინანსისტი, ერთ-ერთი გამომცემლობის უმწიკვლო მუშაკი, როგორც გაავებული ზღვა ნაპირის დამცველ ვეებერთელა ბლოკს ეხეთქება ხოლმე, ისე ეხეთქება მისი გული, როცა... შოთა რუსთაველსაც უნდა „მისცეს“ 16-მარცვლოვან სტრიქონში ორი მანეთი და „ამასაც“ — ორი მანეთი დატეხილი ლექსის ორასოიან „და“-ში!..

მაშინ, როცა სულაც არ იყო დღევანდელივით ამდენი წყა-
რო ლიტერატურული ნაღვაწის ფულადობრივი ანაზღაურებისა
(კინო, ტელევიზია, რადიო; უთვალავი ჟურნალ-გაზეთი, მრავა-
ლი კონკურსი და ზოგი რამ სხვაც), მხოლოდ ლიტერატურუ-
ლი შრომით ირჩენდნენ თავს მიხეილ ჭავჭავაძევილი და გერონ-
ტი ქიქოძე, პაოლო იაშვილი და ტიციან ტაბიძე, გრიგოლ რო-
ბაქიძე და ლეო ქიაჩელი... გალჟტიონ, ტაბიძე (ცოტა ხანს),
კონსტანტინე გამსახურდია (ესეც ცოტა ხანს) და ნიკო ლორ-
თქიფანიძე კი მასწავლებლობდნენ, რისთვისაც ისინი ახლაც
კი, დიდი ხნის მიცვლილნი, მოწიწებით შუბლზე მთხვევის
ღირსნი არიან, აკი მათი საზრუნავი მოზარდი თაობის ღირსე-
ულ მოქალაქეებად აღზრდა იყო, — სამშობლოსადმი არაგაჭ-
რული, არაგამორჩენითი სიყვარულის გაღვივება-განმტკიცებას
ცდილობდნენ.

ივანოვი, როგორც იცით, ყველაზე უფრო გავრცელებული
გვარია რუსეთში. არიან იაკუტი ივანოვებიც, ჩუქჩი ივანოვე-
ბიც, ამ შემთხვევაში მე წმინდა რუს ივანოვებზე მოგახსენ-
ებთ... ასეთი გვარის მწერალი კი, საკავშირო მწერალთა კავ-
შირის ცნობარით თუ ვიხელმძღვანელებთ, რუსეთში სულ ხუ-
თიც არ დაითვლება, საქართველოში კი ერთი გვარის ხუთ მწე-
რალს, მარტო მთიდან თბილისში „შემოხიზნულთ“, სულ იო-
ლად ჩამოთვლით.

ჰოდა, ახლა ესეც ვიკითხოთ, ამ ხუთიდან, საქმეზე რომ
მიდგეს, ერთი მაინც კი წავა თავის მშობლიურ მხარეში ნორ-
ჩი ქართველების აღმზრდელად, მით უფრო ამჟამად, როცა
სკოლაში მამაკაცი მასწავლებელი ჟანგბადივით გვჭირდება?
ანდა იმ ხუთასი წევრ-მწერლიდან, ბევრიც რომ ეხვეწო, ერ-
თი მაინც კი წავა თუნდაც თავის სოფელში, რათა დათესოს
მოზარდ თაობაში ის, „რაც ერთხელ სულს დააჩნდების“?!

საამისოდ, მერწმუნეთ, ერთი უბრალო ექსპერიმენტის ჩა-
ტარებაც არა ღირს, — არ წავა არავინ! არც პარტიული ინტერ-
ნაციონალისტი, არც უპარტიო პატრიოტი!

სამაგიეროდ...

ო, რარივ გამიკვირდა, როცა გავიგე, რომ ერთი მართლაც
ცნობილი მწერალი არა მხოლოდ საქართველოში, ჯანმრთელო-
ბის მხრივ — არცთუ სულ სტამბოლის კაჟივით ჩამოკვეთილი,

თანაც ხნოვანებით ცაიტნოტში მყოფი და, რაც მთავარია, მატერიალურ-ფინანსურად ორივე ფეხზე ასწლოვან მუხასავით მდგომი, ჩამდგარა თურმე, წინათ რომ იტყოდნენ, „კაზინონი“, სახელმწიფო სამსახურში, თანაც ისეთში, რომლის გაძლოლა (აქი სხვებიც უძღვებოდნენ მას ათეული წლების მანძილზე!) საშუალო თავის მქონესაც იოლად შეუძლია: მართალია, ასეთი თავები თბილისის ქუჩებში ტროლეიბუსის ნახმარი ბილეთებივით როდი ყრია, მაგრამ რაიკომებში... ო-ო, ისინი თავსაყრელად მოინახებიან.

საქმე ის არის, რომ ჩვენს დროში თუ დიდჯამაგირიან, დიდმანქანიან, დიდკაბინეტთან, შენს თვალებში შემომჩერე ბევრხელქვეითიან სავარძლებში პატარაზე დიდი ანდა ამაზე უფრო მოზრდილი შემოქმედნი სხედან, ეს... საზოგადოებრივ მოღვაწეობად საღდება!

კი, მაგრამ...

საზოგადო მოღვაწე საზოგადოებას კისერზე უნდა აწვეს თუ თავისი კისერი საზოგადოების უსასყიდლო უღელში უნდა ჰქონდეს გაღებული?!

ჰოდა, ასეთ ამბებს უჩემკომენტაროდაც უკვე კარგად და უკვე დიდი ხნითაც შეჩვეულო მკითხველო, ხომ არ გამიწყრებით თუ ერთხელ კიდევ მოგაგონებთ ფილოსოფოსს პლატონს, რომლის ეროვნებამ ქართული გაამდიდრა მშვენიერი სიტყვებით — ბრძენი, სიბრძნე, ბრძნული:

საზოგადოებაში იფურჩქნება ის, რასაც საზოგადოება თავად ნერგავსო...

ნერგავსო, ნერგავსო... საზოგადოება თვითონ ნერგავსო...

თბილისის ერთ-ერთი ბიბლიოთეკის თანამშრომელი, ხალასი ინტელიგენტი, რომელიც თავისი საქმისა და ადამიანებისადმი სიყვარულით, დღევანდელი თვალსაზრისით, ჩამორჩენილ ქალად რომ შეიძლება მივიჩნიოთ, ზეცას შესთხოვს ხოლმე:

— ღმერთო, დაიფარე ჩემი შვილები ქონებისა და თანამდებობისაგან! ესენი გვიკარგავენ ჩვენ ადამიანურ სახეს!..

არაფერს არ უნდა შეეუშინდეთ, არა-
ფერი არ უნდა დაემალოთ, რადგან და-
მალით სენი კი არ რჩება, ძლიერდება,
ხრწნის საზოგადოებრივ ორგანიზმს და
სიკვდილს უმზადებს ერს.

იაკობ გოგებაშვილი

სიტყვაკაზმულობის იმ აკადემიკოსმა, ერთხელ რომ ბრძანა
და მე კი, სხვადასხვა სიტუაციასთან დაკავშირებით, არაერთ-
თხელ მომიხდა მისი ნათქვამის გამეორება, ჩვენ დიდი კულ-
ტურის ხალხი ვართო, ამას წინათ, ისევ ტელევიზიით გამოს-
ვლისას, კვლავ გაამდიდრა ჩვენი სიბრძნის-სალარო: ყოველი
ადამიანი ფიქრობს უკვდავებაზეო.

თქვენი არ ვიცი, მკითხველო, მე კი, შეიძლება, გამომეპარა,
ანდა, როგორც სმენადაქვეითებულმა, ყური ქარგად ვერ მოე-
კარი, ოღონდ ეს კია, — დიდზე დიდი ხანია არც დაბალი, არც
მაღალი ტრიბუნიდან არ გამიგონია, ვინმეს წარმოეთქვას მომ-
ხსენებლის მისამართით ანდა სხვა რომელიმე რიგითი ორატო-
რის მიმართ, წინათ სულ უბრალო, ჩვეულებრივი, მერე და მე-
რე კი საშიშრად ქცეული ეს ორი სიტყვა: არ ვეთანხმები (თუ
არ ვცდები, სიტყვა „კამათი“ აზრთა სხვადასხვაობის გამომ-
ვლადენებას, სიტყვიერ პაექრობა-ჯახსაც გულისხმობს).

რაკი ჩვენ, საერთოდ, შინაურული საუბარი გვაქვს და ტრი-
ბუნისაგან შორს ვიმყოფებით, თავზე თუნდაც მუგუზალი და-
მადონ, ამჯერადაც ვივთქვამებ ნაცარქექიასავით და ვიტყვი, —
არა, არ ვეთანხმები ახლახან დიდი ამბით ნაიუბილარი პოეტ-
აკადემიკოსის თქმულს, თითქოს ყოველი ადამიანი ფიქრობდეს
უკვდავებაზე, მით უმეტეს, თუ იგი ჩვენი ღროის ქართველია...

დღეს, როცა ბევრისათვის, უსაშველოდ ბევრისათვის გული
მხოლოდ ფიზიოლოგიურ ფუნქციას ასრულებს და მის ადგილ-
ზე, არსებითად, კუჭი, თანაც გაუმამლარზე გაუმამლარი კუჭი
ამოტივტივდა, როცა ნეომეშჩანობა მოსახლეობის უკლებლივ

ყველა ფენაში ღრმად, ბურღივით შეიჭრა და ისე მტკიცედ დამკვიდრდა, რომ ის არც საძრაახისად და არც დასაცინრად ითვლება, როცა სიყვარული მოყვასისადმი, თუ სიძულვილმა არა, ყოველ შემთხვევაში, ცინიკურმა გულგრილობამ შეცვალა, როცა შენი მშობელი ერისა და შენი სამშობლოს ბედი და ქირ-ვარამი აღარ გაღელვებს, არ გაწუხებს და ძილს არ გიფრთხობს... როცა შენ, მშრომელსა და მაინც სხვის შემყურეს, თანამდებობის მქონე მექრთამე-მომხვეჭელი თავბედს გაწყუვლინებს და გაიძულვებს აუგად მოიხსენიო ის ყოფა-წყობილება, რომლის უკეთესი, კონსტიტუციის მიხედვით, არ შეიძლება სადმე სხვაგან კიდევ მოინახებოდეს, —

როგორ, ასეთი ადამიანი უკვდავებაზე ფიქრისათვის მოიცილის?!

და თუნდაც მასთან შედარებით მეტ-ნაკლებად პატიოსანი, რომელსაც ერი და მამული მარადის პირზე აკერია, საქმით კი თავის ბევრი რამის შემძლეობას მხოლოდ პირადი გალაღები-სათვის იყენებს, —

სადღა დაუარჩება მას იმდენი ღრო, უკვდავებაზე იფიქროს?!

მე აღარაფერს ვამბობ ათასი ჯურისა და ათასი სახის სინდის და შუბლგარეცხილებზე, ქურდებზე, მძარცველებზე, მკვლელებზე, აბორტმახერებზე, და არც ერთი შვილის მშობლებზე, რომლებიც არათუ უკვდავებაზე, იმაზეც კი არ ფიქრობენ, თვითონ მათ ბუნება მიწის გასაპოხიერებლად რომ მიიბარებს, ხშირად, ძალიან ხშირად მარტოდმარტო, ბედის ანაბრად დარჩენილი უძმო და უღო, უფესვებო მათ შვილს რა მომავალს უმზადებენ...

ასე რომ, ყოველი ადამიანი, ეს ტყუილი ბრძანებაა, — არა, არ ფიქრობს ყოველი ადამიანი უკვდავებაზე...

ასე განსაჯეთ, როგორღაც მეექვსეება, თავად ამის მთქმელსაც ოდნავ მაინც რომ შეეწუხებინა ფიქრს უკვდავებაზე, მაშინ ის თავისი დამოკიდებულება-მოპყრობით საბაბს არ მისცემდა მისგან გამწარებულ გალაქტიონ ტაბიძეს დაეწერა მასზე, როგორც თანამდებობის პირზე: „მოსკოვს გაფრინდა ვერაგი...“ და ასე შემდეგ.

აი, კიდევ თუნდაც... უკვდავებაზე რომ ეფიქრა აწ განსვე-

ნებულ შემოქმედს (რა დარგისას — ზუსტად არ ვასახელებ), მაშინ იგი თავს სალაპარაკო-სათრეველად არ გაიხდიდა, „ეს და ეს“ რესტორნის დირექტორად დაანიშნინა და ამის საფასურად მისგან სამი ათასი მანეთი აიღო, თუმცა მას, ამ შემოქმედს, არც ნიჭი აკლდა და არც ფული, და არც გარს წვრილი შვილები ეხვია და ბინაც დიდებული ჰქონდა და იუბილეების გრანდიოზული „საბანკეტო განყოფილების“ გამართვისას შაურიც არ ეხარჯებოდა, საამისოდ მისი მშობლიური რაიონი იხდიდა (თუ ახლევინებდნენ?) ხარკს...

მე მესმის, ცოტა არ იყოს თითქოს უხერხულია და ლამაზიც არ არის იმქვეყნად წასული კაცის ასე მოხსენიება, მით უმეტეს ნაბეჭდი სიტყვით, მაგრამ, აბა, რას იზამ, როცა ძველი ღროის შეგონებას — მკვდარზე ან კარგი უნდა თქვა ან არაფერი, ჩვენი ღროის უკვდავების მოსურნე-პრეტენდენტებს ესეც უნდათ თავის სასარგებლოდ გამოიყენონ...

დაე, მათ აწ მაინც იცოდნენ, სიცოცხლეში ჩადენილი სიგლახე არც სიკვდილის შემდეგ მიეტევენათ, მათს ნაავკაცარს მშობლიური მიწა დიდების ძეგლად არ გადაეთარება.

არღვეიწყება არც კარგის, არც ცუდის, არც სიკეთის, არც სიბოროტის, არც მხალაობის, არც გმირობის, მით უმეტეს თუ ის ცრუმირს მიაწერეს სხვადასხვა კონიუნქტურული მოსაზრებით.

უკვდავება მხოლოდ კეთილი საქმეებით შეიძლება მოიპოვო აღამიანმა, იმ საქმეებით, რომლებიც ქმნილია შენი ერისა და შენი სამშობლოს სადიდებლად და საძლიეროდ; ვინც სიკეთეს თესავს, და ამას იმ მიზნით კი არ აკეთებს, რომ უკვდავყოს თავისი სახელი, — ქმნა სიკეთისა მისი სულის ორგანული მოთხოვნილება, და თუ ამას ოდესმე უკვდავება მოჰყვება; ამის შეგრძნება მისთვის, რაკი იგი აღამიანია და არა ანგელოზი, არ იქნება, ცხადია, გუნების მომწამვლელი.

უკვდავება პავლე ინგოროყვას მანამდეც მოპოვებული ჰქონდა, როცა უარი თქვა ჰონორარზე ფინანსურ გასაჭირში ჩავარდნილი გამომცემლობის სასარგებლოდ; ერთმა სხვამ კი, სიცოცხლეშივე უკვდავად აღიარებულმა და სიკვდილის მერე ამ მხრივ საკმაოდ ფესვებშერყეულმა, თავისი ორტომიანი თხზულებათა გამომცემისას ისეთი ლაღა დაადო ერთ პატარა

გამომცემლობას, რომ „კუზიანი“ ავტორი წელში კი გაიმართა-
გასწორდა, მაგრამ ისეც არატანწერწეტი გამომცემლობა სულ
დაკუზიანდა...

ჩვენს დროში საუკვდავებო სიგელ-გუჯრები ისე გააიფეს,
რომ ბევრ, მით უფრო ნაიუბილარ ერისკაცებს, ნამდვილად კი
თავისკაცებს, ეჭვი არ ეპარებათ, რომ რაკი ცხოვრებაში მრუ-
დე გზებით ყოველგვარ სანატრელს უნატვრელადაც მიაღწიეს,
ახლა, თუ ორივე თვალი არა, ცალი თვალი მაინც მთაწმინდის-
კენ უჭირავთ...

არა, ჯერ გული იქით კენ სულაც არ მიუწევთ, მაგრამ...
აი, მერე, სულ მერე... აი, როცა გადასცილდებიან იალაღებისა
მკვიდრის, 156 წლის მახმუდ ეივაზოვის ასაკს, რომლის, სხვა-
თა შორის, სიცოცხლის ზღაპრული ხანგრძლივობის მთავარ მი-
ზეზად იუმორისტი გერონტოლოგები იმას თვლიან, რომ იგი,
მახმუდ-აღა, არასოდეს არც ერთ კრებას და არც ერთ მიტრნგს
არ დასწრებია, ჩვენში მხოლოდ თავის დასაქნევად და ხელის
ასაწევად რომ მართავენ ხოლმე.

...საბედნიეროდ, ამ ბოლო წლებში მთაწმინდისკენ მიმავა-
ლი აღმართი მართლაც აღმართს დაემსგავსა, მანამდე კი...
ვინც მოასწრო, — მოასწრო! ესეცაა, ერთობ ბევრმა კი მოას-
წრო!

დიღუბის პანთეონს აღარ კადრულობდნენ, — ეცოტავებო-
დათ, აი ისე, როგორც ლილიპუტიაში... ბოღიში, საქართველო-
ში, მაგალითად, კულტურის დამსახურებული მუშაკის წოდება
ბევრს ორასი გრამი ჯონჯოლის ფასადაც არ უღირს და ყველას
ხელოვნების დამსახურებული მოღვაწეობა სწადია, თეატრის
ადმინისტრატორსაც კი, რომლის სახელოვნო მოღვაწეობა პა-
რიკის შოვნით და კონტრამარკების გაცემით იფარგლება...

თუმცა...

ესეც არის, თითქოს არც ამ „ყველას“ გაემტყუნება: თუკი,
მაგალითად, მაღლიერი საზოგადოების მიერ ჯერ ჩემმაში ჩაგ-
დებული და მერე იქიდან შავი იუმორის მოყვარულთა მიერ
ამოთრეული ამხანაგი, რომლის დამსახურება ხელოვნების წი-
ნაზე სულ ის არის, რომ სქესობრივი მომწიფების ასაკში ხრინ-
წყადის ნ-კაციან გუნდში მღეროდა, მერე კი ეს მომწიფებული
და, მგონი, გადამწიფებულიც, ხელოვნების მუშაკებს სალტი-

კოვ-შხედრინის „С фаршированной головой“—იანი გუბერ-
ნატორად, თავკაცად მოუვლინეს, — შეიძლება ბრძანდებოდეს
მელპომენას დამსახურებული მოღვაწე, მაშინ რატომღა უნდა
მოგვეჩვენოს უჩვეულოდ და უსაფუძვლოდ თუნდაც თეატრის
ადმინისტრატორის პრეტენზიაც ამ სფეროში, — ამას ყოველ
შემთხვევაში „ჩეჩმის სკოლა“ მაინც არ გაუვლია!

...მთაწმინდა.. მთა წმინდა, წმინდა მთა..

ჰოლად, მთაწმინდაზე უნდა იმარხებოდნენ მხოლოდ დიდზე
დიდი ადამიანები, რომლებმაც ერს დაუტოვეს მარად გაუხუ-
ნარი, ყოველ დროში ხელშესახები მემკვიდრეობა...

ვიცი, ამისათვის ბევრისაგან შეიძლება გავიკიცხო კიდევ,
მაგრამ მანც ვიტყვი: მთაწმინდაზე არ უნდა იმარხებოდნენ არც
ის პირნი, ვისაც პარტიული სტაჟი თუნდაც საუკუნოვანი აქვს,
და არც მსახიობები, რა დიდი ნიჭისანიც იყვნენ... მათი დილო-
ბა, განუმეორებლობაც კი, ხომ არაფრის მთქმელია ახალი და
ახალი თაობებისათვის, ვაკმართ მათ ბარში მდებარე პანთე-
ონი, მაგრამ მათ, უფრო სწორად, მათს ჭირისუფლებს, რო-
გორც უკვე ვთქვით, პანთეონი ხრიოკი საბოსტნე ნაკვეთის
ტოლფასადაც არ მიაჩნიათ, — ეგზომ ეპატარავებათ, თუმცა-
ლა... ზოგიერთ მათგანს ვერც გაამტყუნებთ: აკი პანთეონში (მთა
წმინდაზეც!) ნათესავ-ნაცნობ-მეგობრობის . გაძრომ-გამოძრო-
მის წყალობით ბევრმა ისეთმაც იპოვა სამარადისო სასუფევე-
ლი, რომელთაც ამა ქვეყანასა ზედა არაფერი დაუთესიათ, და
თუ მკიდნენ, — მკიდნენ სხვის დანათესს მარტო საკუთრივ
თავისთვის.

(სხვათა შორის, პანთეონში ზოგიერთს გვერდით ისეთი ცო-
ლიც მიუწვინეს, რომლებისგანაც სიცოცხლეში განაწამები
იყვნენ).

ყური მაქვს მოკრული, ფრანგებს ასეთი წესი აქვთო (და
თუ არა აქვთ, ეს ბრძნული ნაბიჯი, დაე, პირველად ჩვენ გადავ-
დგათ!): ყველას, დიდსა და პატარას, მარხავენ ჩვეულებრივ სა-
საფლაოზე; მერე კი, სულ ცოტა ნახევარი საუკუნის გასვლის
შემდეგ, ვინც ერის მეხსიერებაში წინანდებურად იბრწყინებს,
ესე იგი დროის გამოცდას გაუძლებს, მას პანთეონში გადაას-
ვენებენო...

ჩვენც რომ ასეთი წესი გვექონდეს, მაშინ სულ იოლად დავ-
რწმუნდებოდით, რომ სამთაწმინდოდ ჩვენმა პატარა ხალხმა
საუკუნეში შეიძლება მხოლოდ ორი-სამი კაცი წარმოშვას.

ღიახ, ჩვენც რომ ასეთი წესი გვექონოდა, მაშინ ილიასა და
აკაკის გვერდით სამარადისო განსასვენებელს ვერ იპოვიდა
ამის დამწერი:

„...დღევანდელი მშრომელი ხალხი, ე. ი. რომელსაც
დაბალი ხალხი ეწოდება თანამედროვე ენაზე, „ვეფხის-
ტყაოსანს“ ნაკლებათ ეტანება, და რაც დრო მიდის, მი-
სი ინტერესი კიდევ უფრო კლებულობს. „ვეფხის-ტყაო-
სანს“ უფრო ეტანება და გასავალი აქვს საზოგადოების
იმ ნაწილში, რომელიც დაჩვეულია უსაქმობას და რო-
მელსაც მოსწონს აღმოსავლეთის რაინდული ცხოვრება.

...დღეს მკითხველი წიგნში ეძებს აზრს, მიმართულე-
ბას და პასუხს ათასგვარ „დაწყველილ“ კითხვებზე, რომ-
ლებსაც მას წინ უყენებს ყოველდღიური ჰაპანწყვეტა.
ამჟამად, რომ „ვეფხის-ტყაოსანი“ მას დღეს ველარ
უშველის, იქ გამოხატული და დასურათებული გმირები
დღევანდელი მკითხველისთვის სრულებით გაუგებარი და
უსარგებლოა“.

ფ. მახარაძე.

„თხზულებანი“, ტომი მე-5, გვ. 166, 1926 წ.

საერთოდ, დიდი სიბრიყვეა შიში იმისა, რომ თუ სიცოცხ-
ლეში თავად არ ვიზრუნეთ, სიკვდილის შემდეგ დაგვექარგება
ჩვენი ესოდენი ღვაწლი და ამაგი...

ო-ო, ოღონდაც ეს ღვაწლი მართლაც „ესოდენი“ იყოს და...
მშვიდად ბრძანდებოდეთ, სანთელ-საკმეველი, ადრე თუ გვიან,
გზას გაიკვლევს და ჩრდილიდან სამზეოზე ლოცვა-კურთხევით
გამოგიყვანს...

ნიკოლოზ ბარათაშვილი გარდაცვალებიდან 48 წლის შემ-
დეგ, იმდროინდელი „ზაკკრაიკომ“ — „ნამესტნიკის“ ყოველ-
გვარი დადგენილების გარეშე ხალხმა, ხ ა ლ ხ მ ა განჯის გავე-
რანებული სასაფლაოდან გადმომასვენა დიდუბის პანთეონში,
მერე კი, ვაჟასთან ერთად, ციმციმ აიტანა მთაწმინდაზე...

ვერც დიდი ფულით, ვერც დიდი პარტიული სტაჟით, ვერც დიდად გავლენიანი, დაინტერესებული პირების ხელშეწყობით...

არა, პრემიას, თუნდაც რუსთაველის პრემიასაც კი მიიღებ და დახურულ კონკურსშიც გაგამარჯვებინებენ (აკი ავტორები დარბიან და აფრთხილებენ ხოლმე ჟიურის წევრებს: არ დაგავიწყდეთ, ჩემი დევიზია: „ვიცხოვროთ და ვიშრომოთ კომუნისტურად!“), მაგრამ უკვდავებას კი — ვერა და ვერა!

მადლობა უფალს, რომ ეს ასეა, თორემ ამა სოფელშივე ნაადრევად უკვდავებაში უკვე ჩარიცხულნი, „მერეც“, იმ სოფლიდანაც ხომ შეგვიკლავდნენ ხელში თავიანთი უძღვები მადლით...

ღიახ, უკვდავების მომცემი მხოლოდ დრო და ხალხია, — სხვა არავინ და სხვა არაფერი! „სხვამ“ შეიძლება მხოლოდ უკვდავების სუროგატი, მისი იმიტაცია მოგცეს, და ისიც დროებით. ისეთმა „სხვამაც“ კი, როგორც სტალინი იყო, ზევსს რომ უტოლდებოდა, ვერ უკვდავყო ერთი დიდი მწერლის საშუალო ღირსების ნაწარმოები: „Эта штука сильнее, чем «Фаяст» Гете... (ესეც არის, თუკი ეს მხოლოდ „მტუკაა“, თავისთავად ცხადია, გენიალურისა, მსგავსად „ფაუსტისა“, მას არაფერი ეცხება რა). „ჯურღაის ფარიც“, ეს საშუალოზე უფრო საშუალო კინოსურათი, მაინც ვერ ავიდა ხალხის საყოველთაოდ საყვარელ, სულისშემძვრელ კვარცხლბეკზე, თუმცა მას — რაც უპრეცედენტო შემთხვევა იყო — გამოცალკავებულად, სპეციალური დადგენილებით (როგორც ყოველთვის, აქაც „ხალხის მოთხოვნით!“) სტალინური პრემია მიენიჭა მის შემდეგ, როცა იმ წლის პრემიები უკვე რამდენიმე თვის წინათ იყო ჩამორიგებული.

ჰო, მაგრამ... ახსოვს კი ახლა ვისმე „ჯურღაის ფარი“, თუნდაც მის შემქმნელ სამშობლო-საქართველოში?!

ამავე დროს სტალინს არაფრად ეპიტნავენოდა დოსტოევსკი (უფრო ალბათ, „Бесы“-ს გამო) და არც „упадочнический“ ესენინი, რუსეთის ეს — ჩემი სუბიექტური აზრით — პუშკინისა და ლერმონტოვის შემდეგ ყველაზე დიდი პოეტი, მაგრამ დრომ — რასაკვირველია, არა იმ დრომ, რომელიც მრისხანე „ზევსმა“ ხელზე მოსამისახურედ, ლაქიად გაიხადა, —

მაინც თავისი გაიტანა: რუსეთში უკვდავებაშერყეულმა დო-
ტოევსკიმ უკვდავება ისევ აღიდგინა, ესენინს კი დევნის დრო-
საც ბევრი ვერაფერი დააკლეს; ოფიციალურ მდევნელებსაც
კი მისი პოეზია სასთუმალქვეშ ჰქონდათ ამოდებული და დრო-
დადრო, სულის საამებლად, მალულად კითხულობდნენ.

ოღონდ... ყოველივე ეს ისე არ უნდა გავიგოთ, თითქოს
საბჭოთა ზევსი ხელოვნებისა და ლიტერატურის სფეროში
მხოლოდ რისხვის დამტეხი და ლიტერატურულ-ესთეტიკურ
გემოვნებას მოკლებული ყოფილიყო...

არა!

მაიაკოვსკი ისევ მან გააცოცხლა; ცალმხრივი, ეგრეთ წო-
დებული პროლეტარული კრიტიკის მიერ არაერთხელ გვემულ,
სამწუხაროდ, საქართველოში ჭერჭერობით ნაკლებად ცნობილ,
უნიკიერეს მწერალს, მიხეილ ბულგაკოვს იარები, ცოტად თუ
ბევრად, ისევ მან მოუშუშა (სამხატვრო თეატრის მუზეუმში
ინახება დღიურები, რომელთა მიხედვითაც დასტურდება, რომ
სტალინს ბულგაკოვის „Дни Турбинных“ — 14-ჯერ (თოთხ-
შეტჯერ) უნახავს. საკვირველი კია, თუნდაც მარტო ათასგუ-
რი ოპოზიციებთან „დაკა-დაკაში“ სად პოულობდა ამდენ
დროს! „ჩაპაევს“ ჩვენების პირველ დღეებში იმდენად გულ-
გრილად შეხვდნენ, რომ „იზვესტია“ თითქმის უარყოფითი
(ხრ. ხერსონსკის) რეცენზიით გამოეხმაურა; სტალინმა საღამო-
თი ნახა ეს ფილმი და... მეორე დღით „პრავედაში“ მოწინავე,
მოწინავე სტატია გამოქვეყნდა სათაურით

«Чапаева» посмотрит вся страна!»

იტყვის ვინმე, რომ ეს არ ახდა?!

სტალინმავე გააცოცხლა და დაუბრუნა ქართველ ერს მა-
ხარაძისა და ბევრი მისი ავანჩავანის მიერ მრავალჯერ მიბეჭდი-
ლია ჰავკავაძე, — ყოვლად შეუძლებელია, რომ მისი მითითე-
ბა-ბრძანების გარეშე 1936 წელს გაზეთ „პრავედაში“ დაბეჭდი-
ლიყო დიდი ნაწყვეტი „კაკო ყაჩალიდან“, რომელსაც წინ უძ-
ლოდა ეს სტრიქონები, რომლებიც, უეჭველია, სტალინის ხე-
ლით იქნებოდა დაწერილი:

«Чавчавадзе Илья Григорьевич (1837—1907) — грузинский писатель и популярнейший в Грузии общественный деятель национально-революционного движения второй половины XIX века, автор поэм: «Отшельник», «Призрак», «Мать и сын», и «Разбойник Како».

Поэма «Разбойник Како» написана И. Чавчавадзе в 1860 г., в бытность его студентом Санкт-Петербургского университета, и резко направлена против крепостничества».

(«Правда» от 4 сентября 1936 г.)

ვაითუ, ძებნა დაუწყოთ და მიაგნოთ, ამიტომაც მოვერიდებ-ბი ზუსტი თარიღის აღნიშვნას და ვიტყვი ასე: ამას წინათ ერთი პოეტის „რჩეული“ გამოვიდა; ყდაზე მთლიანად აწერია ავტორის სახელი და გვარი, ტიტულზე კი... თითქოს იასავით როგორღაც მორცხვად, თითქოს შეპარებით, თითქოს მოსასინჯად, — მარტო სახელი!

ცნობილი პირის მხოლოდ სახელით მოხსენიება საქართველოში, როგორც ვიცით, ხალხისგან დიდზე დიდი პატივია, ამიტომაც არა მარტო ამ „რჩეულის“ ავტორს, ბევრ სხვასაც არ აძლევდა და არ აძლევს მოსვენებას აკაკის დიდება...

რაკი ცნოვრების პრაქტიკულ სარბიელზე, კეთილდღეობის ასპარეზზე ყველა მწვერვალს მიაღწიეს, ახლა შემოქმედებითი მწვერვალის დაპყრობაც სწადიათ, ოღონდ უწრიაპებოდ და უაღპენშტოკოდ, ოფლდაუდენლად მოპოვებული ტიტულების შემწეობით, მაგრამ... განა მთავრობის ბრძანებულება გაგზდის ნამდვილ სახალხო პოეტად?! თუნდაც შენი იუბილესთვის სპეციალურად დიდად მიჩნეული რეჟისორიც-დაიქირავო, რომლის საიუბილეო ფანტაზია „ამოდულდი მარგალიტოსავით“ ამოდულდება და ფერსთით ყვავილებთან ერთად მარგალიტივით ქალიშვილებიც მოგისვას...

ვგრძნობ, ამისათვის, ცოცხლებზე რომ აღარაფერი ვთქვათ, მიცვლილებიც კი გამებუტებიან, მაგრამ რაკი ბუხართან მარტოკა ვარ მოყუყუელი, გავბედავ და ვიტყვი: დღემდე ჭეშმარიტად სახალხო პოეტი მხოლოდ ერთი გვყავდა; ეს იყო აკაკი (შოთა ყოველ დროში და ყოველნაირ გარემოცვაში იყო, არის

და მარადის დარჩება, როგორც იტყვიან, კონკურსს გარე-
შე).

ღიახ, შენ შეიძლება იყო პოეტების პოეტი და, შეიძლება,
პოეტების მეფეც, შენ შეიძლება იყო ხალხის რომელიმე ფენა-
სათვის დიდად საყვარელი პოეტი, მაგრამ მთელი ხალხისთვის,
ყველა იმერ-ამერისთვის, სვანეთიდან თუ შ-ფშავ-ხევსურეთამ-
დე რომ იყო სათაყვანებელი, მაშასადამე, საყოველთაო სახალ-
ხო პოეტი, — ასეთი იყო მარტო აკაკი!

ყოველგვარი ორგანიზებული რეკლამისა და ყოველგვარი
თვითრეკლამის გარეშე!

დაქირავებული რევისორებისა და დაქირავებული კრიტიკის
დაფდაფების გარეშე!

გულისფიცარზე ჩამოსაკიდებელი ათასგვარი „ჩინშენ-
დლის“ გარეშე, რომლებისთვისაც ბევრს ახლა პიჯაკის ორივე
ბორტიც არ ჰყოფნის.

ყველაზე უფრო ნიშანდობლივი ის არის, რომ აკაკის პოე-
ზია ხალხმა იმ დროს აიტაცა, როცა მისი დიდი ნაწილი წერა-
კითხვის უცოდინარი, ანდა მცირემცოდნე იყო...

ამიტომ იყო იგი მისთვის აკაკი, ამიტომ იყო იგი ნამდვი-
ლად სახალხო, რადგან თავისივე ხალხის თანამედროვე კი იყო,
მაგრამ მის მიმართ მედროვე არ ყოფილა.

ვის არ უნახავს პირველი ქართული, იმ დროისათვის საკმა-
ოდ გრძელი სურათი, რომლის მსგავსს ჟანრობრივად ახლა კი-
ნოქრონიკას რომ აკუთვნებენ: „აკაკის მოგზაურობა რაჭა-ლეჩ-
ხუმში“. გახსოვთ ალბათ, აკაკის სანახავად და მასთან შესაბ-
ვედრად რა აღმაფრენით და რა სტიქიურად გამორბის ხალხი,
ქალი და კაცი, დიდი და პატარა, ზოგი ფეხით, ზოგი ცხენით —
სახლებიდან, ეზოებიდან, მინდვრებიდან, ყანებიდან...

ჰოდა, ახლაც იმოგზაურა რაჭაში სულმნათი მგოსნის თით-
ქმის ნაკვალევზე ურთმა ჩვენი დროის ცნობილმა პოეტმა, მაგ-
რამ... ვაი რომ, იმ ნაკვალევზე თავისი კვალი ზედაპირულადაც
ვერ აღბეჭდა, ვერ დააჩნია, თუმცა ადგილობრივ ხელისუფლე-
ბას საამისოდ, როგორც იტყვიან, ოპერატიული ღონისძიებანი
არ დაუკლია.

ღიახ, მარტო სახელით მოხსენიებას სხვადასხვა ხერხით ახ-
ლაც შეიძლება მიაღწიოს მეფანმა და მეფანმა, მაგრამ გაძრობ-

გამოძრომით მოპოვებული სახელობითი პარტივისცემა, ვაითუ, მოჩვენებითი გამოდგეს!

ასეა, მაგალითად, ჩემს მშობლიურ კუთხეში, ზემო იმერეთში: პირისპირ თავაზიანად მოგმართავენ, — გრიშა, ირაკლი, მოსე, კაპიტონ... ზურგს უკან კი პარტივისცემის ღირსად მართლა თუ არ მიაჩნისხარ — გრიშაია, ილაკრია, მოსია, კაპიტონა...

კიდევ ცოტა რამ დიდკაცებზე, ნადიდკაცარებსა და უკვდავებაზე...

იმ წლებში, როცა, რაფაუა-ბერიას „კარატისტების“ დევნით და მუქარით შეძრწუნებული, მალულად მოსკოვში ძმის ბინაზე, გერცენის ქუჩაზე ვცხოვრობდი, და მერეც, კვლავ ყოველწუთიერი დაჭერის შიშისგან შედარებით უკვე თავისუფალი...

ამ ქუჩას შუაზე ტვერის ბულვარი ჰკვეთს, რომლის ბოლოში მანტიაში გახვეული ტიმირიაზევის ძეგლი დგას, ბულვარის თავში კი ერთ დროს ჩაფიქრებული პუშკინი იდგა (მერე იგი ცოტა ზემოთ, უფრო გაშლილ ადგილზე გადაიტანეს, რასაც სხვათა შორის, ზოგიერთი „კონსერვატორი“ სტალინს ახლა ამასაც დიდ ცოდვად უთვლის).

ამ ბულვარის ცოტა ქვემოთ და მანეთის ცოტა ზემოთ გრანოვსკის ქუჩა მდებარეობს. ამ ქუჩაზე ცხოვრობდა მოლოტოვი (ცხოვრობს ალბათ ახლაც — 92 წლისა), და იგი, ამ რამდენიმე წლის წინათ ყოველ საღამოს ამ ბულვარში სეირნობდა: მას თან დაჰყვებოდა ხოლმე მისებრ ტანმორჩილი, ესეც ხნიერი, მაგრამ თავის თანამოსეირნეზე ბევრად უფრო ჭარმაგი, უბრალო გარეგნობის მამაკაცი...

ერთხელ მე მათ ჩავუსაფრდი...: გაცნობის მიზნით!

ღიახ, გაცნობის მიზნით, თუმცა ცხოვრებაში ნიადაგ მტკიცე წესად მქონდა და მაქვს, გავლენიანი თანამდებობის პირებთან ნაცნობობის ძაფების გაბმას ვერიდო, კარის მეზობლებთანაც კი...

ჩვენს ქვეყანაში ხომ, მით უმეტეს თუ მცირეფასეული ჭიანჭველა ხარ, ცოტა რაღაც კანონითაც რომ გეკუთვნოდეს, მის მისაღებადაც კი ათობით შენზე ზევით მდგომ მათხოვარივით ხელგაწვდილი უნდა ეახლო, უნდა დამციროდეს საბჭოთა ადამიანი, რომლითაც ასე „ამაყობ“ სიცრუით გამოტენილი გაზე-

თების ფურცლებზე, და თითქმის სასჯელად მოსჯილ თავყრილობებზე...

ახლა კი, აგერ, ბედმა მომგვარა... იმ თითქმის 25 წლის მანძილზე, როცა მოლოტოვი ჩვენს უზარმაზარ სახელმწიფოში მეორე კაცად ითვლებოდა, და თანაც, მომდევნო იყო ვისი? — სტალინი! — მე გულითაც რომ მეწადა ამეველო გვერდი ჩვენი დროისათვის შეუფერებელი, ჩემი არაპრაქტიკული ხასიათის ამ წამგებიანი ზნისათვის და ძალიანაც მეცადა დაეახლოვებოდი მას, — ან საიდან მივუდგებოდი, ან ვინ გამაქარებდა?! ახლა კი... დადის აგერ, ამ ბულვარში თითქოს ჩემსავით უმნიშვნელო, პატარა კაცი, რომელსაც აღარც შენი აღზევება შეუძლია და აღარც შენი დასამარება: „ერთ ბედ ქვეშა ვართ ლაბავ მე და შენ...“ ამიტომაც გაებედე და... აქცენტით ხელად მიცნო:

— А-а, Вы грузин?! Что ж, никогда не скрывал и сейчас не скрываю: я всегда питал слабость к грузинам.

— Это из-за Сталина, наверно...

— Пожалуй, да.

(რამდენადაც ვიცი, მოლოტოვი, რომლის საგარეო საქმეთა მინისტრობიდან მოხსნა ხრუშჩოვმა ტიტოს მოსკოვში ჩამოსვლის თითქმის წინაღულს „ზაკუსკად“ მიართვა, სტალინის გასაბახებელ აქციებში, კენჭისყრისას, თუ წინააღმდეგი არ იყო, ყოველ შემთხვევაში, თავს მაინც იკავებდა).

ამ ხანმოკლე საუბრისას ერთი წამით გონებაზე ლიბრისებური რაღაც გადამეკრა და, რაც არასოდეს მომსვლია ჩემს სპირიდონ მცირიშვილისებურ ცხოვრებაში, მაინცდამაინც სწორედ ახლა ჩემი თავი დიდკაცად წარმოვიდგინე, ჩემი თანამოსაუბრე კი — ფანტაზიით! — პაწაწკინად და წყალობის ნიშნად — ესეც, რასაკვირველია, ფიქრად! — მხარზე ხელიც დაეკარი და — ეს უკვე ცხადლივ! — გამამხნევებელი კილოთი კიდევ ვთხოვე და კიდევ ვურჩიე, თქვენ ისეთი გრანდიოზული ისტორიული ქართვეილები უშუალო მოწმე და მონაწილე ბრძანდებით და მრავალი წლის მანძილზე ისეთ ბუმბერაზ ადამიანს ედექით გვერდით, თქვენ მიერ ამის აუწერლობა მიუტევებელი ცოდვა იქნებოდა-მეთქი ისტორიის წინაშე...

— Ну и написал бы, но... А кто напечатает?!

დალოცვილმა ეს სიტყვები ისეთი გულსიწუხილით და ნალვლიანი ტონით წარმოთქვა, თითქოს იგი არც ოდესმე ყოფილიყოს ამ „ა კტო ნაპეჩატაეტის“ ერთ-ერთი შემომღებ-დაამკვიდრებელი...

(ამას წინათ მთავლიტი ღრმა მწუხარებით იუწყებოდა... ცარიზმის შავბნელ ღროში ცენზორს რომ ეძახდნენ, ახლა, ჩვენს გაციკროვნებულ ღროში კი — რედაქტორს... უფროსი რედაქტორის, ამის და ამის გარდაცვალებას. ჩემდა სავალალოდ, მხოლოდ ასე დაგვიანებით, სიბერეში, სამგლოვიარო განცხადებიდან შევიტყვე მთავლიტის სრული სახელწოდება: ბეჭდვითს სიტყვაში სახელმწიფო საიდუმლოებათა დაცვის მთავარი სამპარტველო.

კი, მაგრამ... ნეტავ ვიცოდე, რა სახელმწიფო საიდუმლოებას მოიცავდა, როცა ჩემი პიესებიდან აგდებდნენ, აი, თუნდაც, ასეთ ფრაზებს: „ჩვენდენი დიპლომი არავის არა აქვს მსოფლიოში!“ „როგორ, ახლა უკეთესი დროა? — სულ პირწმინდად გაირეცხეთ სინდის-ნამუსისაგან!“

მოდი და ნუ მოგაგონდება კაცს რაფიელ ერისთავი და მისი „ტეტიას ფიქრები“: „რა ვქნა, რა წყალში ჩავარდე, რით გამოვკვებო ცოლ-შვილი?“

და თან ზედ, ფურცლის მარცხენა კუთხეში, წითელი მელნით რომ მიაწერდა: „Дозволено цензурою. Цензор Р. Эрстов“.

ალბათ სალტიკოვ-შჩედრინიცი გაგახსენდებათ, რაფიელის თანამედროვე და რიაზანის ვიცე-გუბერნატორი, „История одного города“-ს და სხვა „დამაქცევარი“ — სატირული მოთხრობების შემთხველი).

გამოგიტყდებით: მე მემუარული ლიტერატურის ისეთი ცეცხლმოკიდებული მოყვარული ვარ, როგორც პრეზიდენტი რუზველტი გახლდათ დეტექტიურისა...

თუმცა ესეც მომეხსენება, რომელიც გნებავთ მემუარისტი, თითქმის უკლებლივ ყველა, ცდილობს თავისი თავი... აი, ისე ჯამოაჩინოს, როგორც ეს ახლა საქართველოში საყოველთაო წესად არის გადაქცეული: კაცი ოთხმოცი წლისა მიიცივალა, ნეკროლოგში მისი სურათი კი იმ ღროისაა მოთავსებული, რო-

ცა განსვენებული, პირობითად თუ ვიტყვით, სოფელ ჩუმლაყის „მეტეორში“ შუამარბს თამაშობდა...

ღიახ, მე ყველას ვურჩევ დაგვიწერონ მემუარები (გარდა ჩემი თავისა, „А кто напечатает?!“), ოღონდ იმ პრინციპის დაცვით, ზევით რომ მოგახსენეთ, თანაც ისეთი, — რაკი სრულ სიმართლეს არ უნდა ველოდოთ, — ფერ-უმარილით მხოლოდ ზომიერად რომ იქნება შელამაზებული.

სხვათა შორის, ამის თაობაზე მიხეილ ჭიაურელს, დიდად ნიჭიერსა და ბევრის მნახველს, პირდაპირ ბალღივით ვეხვეწებოდი, — წერა თუ გეძნელებათ, მე მიკარნახეთ, ავტორობის დარდი ნუ გექნებათ, არაფერს მივითვისებ-მეთქი... და თუნდაც მივითვისო, აბა ვინ დაიჯერებს, რომ, ვთქვათ, მე და სტალინი, მისივე კოდექსის განჩინებით, ხალხის მტერი და. მაშასადამე, მისი პერსონალური მტერიც, ასი საკონტროლო დვალის-ქვეშ დაწურულ ხვანჭკარას კრემლში ერთად ვწრუპავდით-მეთქი...

კინორეჟისორ მიხეილ ჭიაურელს ვინც ახლოს არ იცნობდა, ცხადია, მისთვის ძნელი წარმოსადგენია, რა უბადლო მთხრობელიც იგი იყო. მას, მაგალითად, შეეძლო ეამბნა სრულიად უბრალო, ბანალური ამბავი, აი თუნდაც ასეთი: როგორ შეაქდინა, ანუ, უფრო სწორად, როგორ შეიქდინა თავი უკარება, გოროზმა ბანოვანმა, — რომელი მოპასანი, რომელი ფლობერი მიუდგებოდა მას ფერებისა და სიტყვების შერჩევაში!

ჭიაურელი ბუნებისაგან უხვად იყო მომადლებული ელვარე კომედიური ნიჭით და ცოცხალი იუმორით, და რარიგ დასანანია, მისი, როგორც შემოქმედის მოღვაწეობა ისე წარიმართა, რომ ბოლოს ერთმა, მამაზე ხელაღებულმა ქალმა, ასე უდიერადაც კი მოიხსენია: „Спекулянт от искусства.“

როცა „ბერლინის დაცემის“ მერე სტალინთან ერთად ჭიაურელიც დაეცა, ამის მიზეზი კი, ალბათ, სხვა ამის მსგავს მიზეზებთან ერთად ისიც გახლდათ, რომ ზემოთ დასახელებულ ფილმში, ფართო კაბინეტში, სტალინის შემოსვლის მომლოდინე მისი თანამებრძოლები, დივან-სავარძლებში მსხდომნი... მერე ამათ რეჟისორს მიუტყევებელ ბრალდებად რომ წაუყენეს, სტალინის შემოსვლისას ფეხზე რატომ წამოგვაცენეო...

კი, მაგრამ, თქვე სახელმწიფოაშენებულებო, ახლა ასე რომ მოგეცათ გულს... შემოდის ბელადი, ხალხთა მამა და მასწავლებელი, შემოდის მილიონიანი არმიის მთავარსარდალი, შემოდის великий Сталин...

(აქვე გზად ამასაც შევნიშნავდი: პეტრე პირველს, ეკატერინე მეორეს „ველიკობა“ იმიტომ ხომ არ ჩამოერთვათ, რომ ამით სტალინი უფრო „გაველიკებულიყო“).

...შემოდის და... თითქმის ყველა თქვენგანი ასაკობრივად მასზე ათი-ოცი წლით უმცროსი ბრძანდებოდით, ყველას თქვენ თავი მოგქონდათ, რომ მის მოწაფეებად ითვლებოდით და... საკლასო ოთახში თავზე ქუდით და ცხვირში თითის კირტნით ტუტუცი მასწავლებელიც რომ შემოდის, სულ ცუდლუტი მოწაფეც კი ზეზე წამოხტება და...

ქარგი, რეჟისორი კიდევ ჰო, მაგრამ მსახიობს მაინც რაღას ერჩოდნენ, — სტალინის როლის მუდმივ შემსრულებელს ჭიკაურელის ფილმებში?

საწყალი მიხეილ გელოვანი, „სტალინამდეც“ ქართული სცენის მშვენიერი მსახიობი, სტალინს რატომ თამაშობდიო და... ამ უხიაგი ლოგიკით რამდენიმე წლის მანძილზე უმუშევრობით გულდაკოდილი ერთ დღეს — უცნაური კია, სწორედ სტალინის დაბადების დღეს, 21 დეკემბერს — გულს ისე შეეხეთქა, ხელოვნური, ფოლადის გულიც ვერ გაუძლებდა და...

დაეცლიათ ცოტა მისთვის იმ დიდ ბრძენკაცებს და... თუ მოისურვებდნენ, გელოვანი ახალ ბელადს ითამაშებდა.

ღიას, მსახიობი იმიტომ იბადება მსახიობად, რომ დღეს სტალინი განასახიეროს, ხვალ — ჰიტლერი, ზეგ — ჩერჩილი, მაზეგ — დარისპანი, ჭაყო, ფალსტაფი...

ალბათ შეამჩნიეთ, ახალ ბელადს-შეთქი... არა, არ წამოცდენია: იმხანად, სულ ცოტადა დააკლდა, რომ ხრუშჩოვიც გაბელადებულიყო; საქმე უკვე იქამდე იყო მიმდგარი, ვინ ვის დაასწრებდა და ნიკიტას პირველი ვინ გამოაცხადებდა...

ეს კია, პირველობის კია ჩვენს დიდ მსახიობს აკაკი ხორავასაც ღრღნიდა და, ცოტაც და, სამოციანი წლების დასაწყისში პროფკავშირების საკავშირო ყრილობაზე, ჩვენი დელეგაციის ბევრ სხვა წევრს რომ არ დაეშალა, აპირებდა კიდევ გამოსვლას და...

მერედა, რა წარსული ჰქონდა ამ დიდებულ, ახლანდელი-
ვით არა შავ-თეთრ ოტელოს, კარლ მოორს, იჩოს, ანზორს, ივა-
ნე მრისხანესი..

სტალინის დაბადების 70 წლის აღსანიშნავ იუბილეზე, დიდ
თეატრში, საქართველოდან ის მიესალმა ნაშუალოზე მომცრო
ტანის კაცს, რომელიც ყოველგვარი თეატრალური აქსესუარე-
ბის გარეშე იფერებდა და შვენოდა კიდეც ბელადობაც და
მსოფლიოს პირველი კაცობაც!

უცნაურია ადამიანი, უცნაურია განსაკუთრებით საბჭოთა
ადამიანი..

რუსთაველის თეატრში 1956 წელს გამართულ თავის საი-
უბილეო საღამოს, სტენაზე პირველად გამოჩენისას, როცა მა-
ყურებელთა დარბაზი, — როგორც ჩვენი დროის „მემატრიანე-
ნი“ ბევრ შემთხვევაში ურცხვად ცრუობენ და წერენ ხოლმე,
მე კი ამ შემთხვევაში სრულ სიმართლეს მოგახსენებთ, — მარ-
თლაც ლამის დაინგრა ტაშისაგან, ზორაეა-იუბილარი თავდა-
პირველად ჩვენ კი არ მოგვესალმა, პარტერსა და იარუსებზე
გაჭედდელ, სიხარულისგან სუნთქვაშეკრულ ხალხს, — გიორგი
სააკაძისებური პირველი მზერა იმ ლოჟას მიანათა, სადაც...
არა, იქ არ მსხდარან არც იმპერატორი ნიკოლოზ მეორე და
არც იმპერატრიცა ალექსანდრა ფიოდოროვნა, — იქ ისხდნენ,
ჩვენში უკვე დამკვიდრებული არასწორი ქართულით თუ ვიტყ-
ვით, მ ა ღ ა ლ ი, სწორით კი — დ ი დ ი პარტიული ამხანაგები,
დავით მჭედლიშვილი და ზინაიდა კვაჭაძე..

დროს არ უნდა გაუსწრო და არც უნდა ჩამორჩე. ორივე
შემთხვევაში წაგებული დარჩები. აი, მაგალითად, დროს ჩა-
მორჩენილმა მიხა ცხაკაიამ 1930 წლის 21 იანვარს „ზარია ვოს-
ტოკაში“ ლენინის ხსოვნისადმი მიძღვნილი წერილი მოათავსა,
რომლის არსი ის იყო, რომ, აი უკვე 6 წელიწადია საბჭოთა ქვე-
ყანა უბელადოდ არისო...

როგორ თუ მთელი ექვსი წელიწადი უბელადოდ ვართო,
იწყინა იოსებ სტალინმა და დროს ჩამორჩენილი ეს ძველთა-
ძველი რევოლუციონერი-ბოლშევიკი ამიერკავკასიას ფიცხლავ
მოაშორა და მოსკოვს, კომინტერნში გადაისროლა აფრიკის
ზანგებს შორის კოლონიური უღლის გადამგდებ დროის დამა-
ჩქარებელ სექტორში!

სხვათა შორის, სოსო-კობა-იოსები ასევე მოექცა, სტანის-ლაესკის აზრით, ბოლშევიკებში ყველაზე მეტად გამორჩეულ ინტელიგენტს, სამხატვრო თეატრის ერთგულ მეგობარს აბელ ენუქიძეს: ჯერ კურორტ პიატიგორსკის (თუ კისლოვოდსკის?) გამგებლად გადაიყვანა და ლამის მამათმავლადაც გამოაცხადა მხოლოდ იმიტომ, რომ მან ჯეროვნად არ შეაფასა ბელადის, სტალინის როლი ბაქოს არალეგალური სტამბის მოწყობაში, მერე კი, საერთოდ, ფიზიკურად გააქრო...

(პირშერცხვენილი და თავდახრილი ვთხოვ მომავალ მარქსისტ ისტორიკოსებს, ჩემს სულს აუგად ნუ მოიხსენიებენ ამ საისტორიო ფაქტების ჩემს მეხსიერებაში ამოქექვისა და მათი სამზეოზე გამოტანისათვის, რითაც მათ, ცხადია, პირიდან უთუოდ გემრიელი სადოქტორო ლუკმა ავართვი).

როცა ჭიაურელი ჩამოაცილეს ყოველგვარ ხელოვნებას და, კერძოდ, კინოხელოვნებას, იმხანად მოსკოვში ვიმყოფებოდი და, რაკი მას ადრე, უფრო, ალბათ, კონიუნქტურული მოსაზრებით მიტმასნილი ძმები და მეგობრები (ძმები — არაპირდაპირი გაგებით) სწრაფად ჩამოეცალნენ, მე მიხმობდა ხოლმე „ფიქრთგასართველად“ და, ერთხელ, ასეთი რამეც მომიტხრო: ოცდაათიანი წლების შუალედში, როცა გრამაფონის ჩამომავალი და ჩვენი დღეების ბევრნაირი „ფონის“ წინამორბედი — პატეფონი — იმდენად ახალი და იშვიათი ხილი იყო, რომ მე-17 პარტყრილობის დელეგატებს ძვირფას საჩუქრად დაურიგეს, სტალინმა თავის ბინაში რომელიღაც ფირფიტა დადო მასზე და როცა ნაცნობი საცეკვაო მუსიკა მოთავდა, ფირფიტაზე გულდინჯად ჩაიკითხა:

Грузинская лезгинка. Дирижер Айвазян.

მერე თურმე ნელი ნაბიჯით ფანჯრისკენ გაემართა და შეფიქრიანებულმა თითქოს თავისთვის ჩაილაპარაკა:

— „Грузинская лезгинка“... А при чем тут... Айвазян?!

დიახ, რა თავგამოდებული კოსმოპოლიტი და ინტერნაციონალისტიც უნდა იყო, როდისმე სისხლი მაინც თავისას იყივლებს!..

შეიძლება ის ამბავიც ამით უნდა აიხსნას, რომ სტალინმა თითქოს იგრძნო სიკვდილის მოახლოება და გარდაცვალებამ-

დე რამდენიმე თვით ადრე მისი აკენის დამრწევ საქართველოს
ქვია...

ჭიაურელმა ასეთი ამბავიც გამანლო:

— სტალინის გარდაცვალებიდან თვენახევარი თუ იქნებო-
და გასული, როცა ბერია ვინახულე ლუბიანკაზე და ვკითხე,
როდის გაუშვებდნენ ეკრანზე ჩემი და სერგეი გერასიმოვის
ერთობლივ, სტალინის სიკვდილისა და მისი გასვენების ამსახ-
ველ, დოკუმენტურ ფილმს... ამაზე ბერიამ პირდაპირი პასუხი
არ გამცა, წაიღრინა კი:

— Слава богу, наконец-то сдох этот старый хрыч!..

მე გამაცეცა მისმა ჩემთვის სრულიად მოულოდნელმა ამ
ვირულმა სიტყვებმა და პირველად მაშინ გავიფიქრე, უთუოდ
რალაც დიდი რამ იცვლება-მეთქი ჩვენს ქვეყანაში...

სინამდვილის ალალ-მართალი აღმწერელი საფრთხეში აგდებს თავის სიცოცხლეს, რადგან მას საქვეყნოდ გამოაქვს სიძარტლე.

ველპიუსი (გერმანელი მწერალი, 1762—1827)

1981 წლის 13 მაისს მთელი თბილისი ქუჩებში გამოეფინა („მთელ თბილისში“ აქ, ცხადია, ქართველებს ეგულისხმობ, აგრეთვე, სამწუხაროდ, ახლა ასე შეთხელებულ ქართველ ებრაელობასაც)...

სალამოს ცხრა საათიდან დაწყებული, ვიდრე... როგორც წინა საუკუნის ბელეტრისტები წერდნენ ხოლმე, — ვიდრე მტრედისფრად ინათებდა, ირგვლივ მთელ არემარეზე, ნარიყალადან გლდანამდე და ვაკიდან ვარკეთილამდე ისმოდა გამაყრუებელი ჟივილ-ხივილი, ცას აწვდილი მამხალეების სროლატყორცნა, ნუცუბიძის ფერდობზე და ლოტკინის მთაზე შეფენილი სახლების აივნებიდან თოფებოს ბათქაბუთქიც...

დიდი და პატარა, ნაცნობ-უცნობებიც ეხვეოდნენ და კოცნიდნენ ერთმანეთს... ხალხის ზღვაში, ხალხთან ერთად მანქანები განუწყვეტლივი საყვირ-სიგნალებით გზას სანტიმეტრობით მიიკვლევდნენ ქართველი ერის ახლანდელი უპირველესი სამლოცველო დიდუბის...

! ო, არა! ეკლესიისკენ არა, — სტადიონისკენ!!!

ამ აღტინებულ მასებს წინ მიუძღოდნენ პატარა სპორტული აღმებით და დიდი, სახელდახელოდ დატეხილ-მომტვრეული, ფოთოლმწვანე ტოტეებით, ღიპებდამწვენებული, ჭინსებიანი, თითქოს უკვე მობერებული ჭაბუკები (ბოდიში, მაგრამ... ღიპი და ჭინსი?! ჭინსი ამერიკელი კოვბოების, ასე ვთქვათ, ეროვნულ-პროფესიული სამოსელია და... ლაგამქვენეტ ბედაჟრზე ამხედრებული კოვბოი და... ღიპი?!).

არა მგონია, ადრინდელ, ფეოდალურ და ღვთისმორწმუნე

საქართველოში ასეთი ზარ-ზეიმით აღენიშნათ დიდგორის ბრძოლის მოგება, ანდა გამარჯვება ბასიანთან!

ჰოდა, ახლა ესეც ვიკითხოთ, ასეთი რა მოხდა, რამ ააფო-ფინა, რამ შეასხა ფრთები დედაქალაქის ნახევარ მილიონზე მეტ ქართველობას და, როგორც იქაურები გადმოგვეცემენ, ყველგან, ყველა სხვა ქართველსაც ჯერ კიდევ საქართველოდ მიჩნეულ საქართველოში?

ო-ო, ნუ იტყვიო!

ამ ზეისტორიულ დღეს თბილისის „დინამომ“ გაიმარჯვა „ქარლ ცეისზე“ და... მოიპოვა თასი! ევროპის თასი!..

„დინამომ“, „დინამომ!..“

(ღმერთო ჩემო, „ივერია“ ან „დიდგორი“, ან სხვა რამ ქართულოვანი სახელი მაინც ერქვას! სომხებმა თავიანთ პირველ გუნდს, „სპარტაკს“, სახელი თურქეთს მდებარე არარატზე შეუცვალეს, რის თაობაზე სტამბოლ-ანკარამ პროტესტიც განაცხადა, მაგრამ ეს, არარატს აქეთ, ყურად არავინ იღო).

ღიახ, ვუყურებდი თითქმის ნახევარკილოიანი, ლურჯზოლებიანი ტყავის ბურთის წყალობით უშველებელი ეროვნული სიამაყის გრძნობით გაბრუებულ ასიათასობით ქართველთ და შავი ფიჭრი გულს მისერავდა:

— ყოველივე სიკეთისა, და მათ შორის, ქკუის მომცემო დიდო ღმერთო, განა ჩვენზე ბედნიერი იქნებოდა კიდევ სადმე ერი, ასეთი ეროვნული ერთსულოვნების თუნდაც შეასედსაც რომ ვიჩენდეთ ჩვენი ჯილაგის, ჩვენი გვარტომობის სამარადისოდ სასიცოცხლო საქმიანობაში?!

გაზეთ „კომუნისტმა“ არცთუ ისე ერთმანეთისაგან ძალზე დაშორებული დროის მონაკვეთში ერთი და იგივე ავტორის ორი წერილი დაბეჭდა: პირველი — ერის გამრავლებისადმი მიძღვნილი, მეორე — ფეხბურთისადმი... ორივე, გაზეთის პირობაზე, დიდზე დიდი სტატია, ორივე თითქმის თანაბარი ზომისაა, გაზეთის ერთ მეოთხედს რომ მოიცავდა ცალ-ცალკე...

ჰოდა, როგორ უნდა გავვეგო ეს ჩვენ, უპირველესი ქართული გაზეთის ათიათასობით მკითხველს? ისე ხომ არა, რომ ბურთიც და ერის სამკვდრო-სასიცოცხლო ბედიც ერთნაირად უნდა გვაწუხებ-გვალელებდეს, ა?

კი, მაგრამ...

რა არის, ბატონებო, ბურთი?

(ეს კითხვა მე პირადად დიდი ხანია ტვენს მიხვრეტს, რის დამამტკიცებელ, სათანადო საბუთს ცოტა ქვემოთ წარმოვიღებთ).

ღიას, რა არის ბურთი?

გეთანხმებით, — სულელური შეკითხვაა, აკი ორი-სამი წლის ბაღმაც კი იცის, ბურთი სათამაშოა...

ბავშვმა კი, მაგრამ ჩვენ, უფროსებმა, მათმა მამებმა და ბაბუებმა ვიცით?!

როგორ ეს, სათამაშოა?!

რასაკვირველია, ვგრძნობ, ბურთის, ესე იგი ფეხბურთის ბაზისის ასე უპატივემლოდ მოხსენიებისათვის რისხვასა და ზიზღს მოვიმკი არა მარტო მათგან, ვინც აღმოსავლეთის ტრიბუნიდან მიუდგომელ, ობიექტურ მსაჯსაც კი ყურისწამლებად უკივის: „მეხაშე!..“ „აკუშერკა!..“

ასეთი რისხვა ერთხელ ხომ უკვე დამატყდა კიდევ თავს, რაკი არ ვიწამე, რომ ფეხბურთი „ქართული სულის გამობრწყინებაა“, თანაც რისხვა დამატეხეს, არა „საბოჟნიკ-საბოჟნიკის“ მძახებლებმა, — დიდმა მამულიშვილებმა, მაგრამ აქ, მგონი, სრული სიზუსტისათვის აჯობებს, თუკი სიტყვას ნაბეჭდ სიტყვას ვუბოძებთ:

— 1 „ოთხი ინტერვოუ

10 მაისს როგორც მოგეხსენებათ, თბილისის „დინამო“ დაამარცხა გასული საფეხბურთო ჩემპიონატის აუტსაიდერმა მოსკოვის „ლოკომოტივმა“. 4 შესაძლებლიდან სამი ქულა დაკარგა საკუთარ მოედანზე. ამ საგანგაშო მდგომარეობასთან დაკავშირებით ჩვენი კორესპონდენტი ეწვია ქართველ მწერლებს — კონსტანტინე ლორთქიფანიძეს, ბესარიონ ჟღენტს, ალექსანდრე ქუთათელს, კონსტანტინე გამსახურდიას და ინტერვიუ ჩამოართვა მათ.

კონსტანტინე ლორთქიფანიძე:

— ბატონო კონსტანტინე, რა მოსდის ჩვენს „დინამოს“, რაშია საქმე?

— ამაშია საქმე!

! ბესარიონ უღენტი:

— თბილისის „დინამოელები“, მადლობა ღმერთს, ჩვენი თეატრებივით ქართველ დრამატურგებს ვერ დააბრალებენ — პიესებს არ გვიწერენ და იმიტომ ვერ ვთამაშობთო.

! ალექსანდრე ქუთათელი:

— ასე „პირისპირ“ არასოდეს არ მდგარა ჩვენი „დინამო“ საფრთხის წინაშე.

! კონსტანტინე გამსახურდია:

— მე მრავალჯობის განმიცხადებია მაღალი ტრიბუნიდან (ამ საქმეში ყოველთვის ვაუკაცურად მიდგა მხარში დემნა შენგელაია), სანამ სოლოვიოვსა (მწვრთნელს, — კ. ბ.) და მის მწედრიონს დილეგში არ ჩააგდებენ და მერე ძელზე არ გასვავენ, არაფერი არ გამოვა მათი ასპარეზობიდან.

მახსოვს კარგი ასპარეზობაც... მე და ავეტიქ იმ წელს ზვარტნოცს ვისვენებდით, ისააკიანი.

ტფილისი, კოლხური კოშკი“.

რას იტყვით, ხომ დიდებული ინტერვიუა? რა კითხვა, რა პასუხების განსაკუთრებით ეს: — „რაშია საქმე?“ — „ამაშია საქმე!“

სხარტად და ბრძნულად, ოღონდ „ამაში“ რა იგულისხმება, ამის გაგება, სამხრეთის ტრიბუნებზე სიცხისაგან გათანგულ მჯდომთ, ცოტა გვიჭირს, თორემ ისე, საერთოდ, აბა ვინ არ შეამჩნევს ამ პასუხებიდან გამომდინარე დიდ სევდასა და დიდ გულისწუხილს იმის გამო, რომ ქართველი ხალხის ფიზიკური არსებობა — თურმე! — მისი ამქვეყნად ყოფნა-არყოფნის საკითხი ჩვენი „დინამოს“ მოგება-წაგებაზეა დამყარებული!

ამიტომაც აიღეს კიდევ ხელთ მეფე-პოეტის, თეიმურაზის ხმალივით ბასრი კალამი, მე კი...

რაკი, საუბედუროდ, თოთნმეტიოდე წლის წინათაც ისევ 14 წლის ონავარი ბიჭის გონებრივ დონეზე ვიდექი, — ეს დიდად სერიოზული, „საგანგაშო მდგომარეობით“ გამოწვეული ინტერვიუ რაღაც სახუმარო ნარევად მივიჩინე და დავშალე

კიდევ შემადგენელ ნაწილებად, შემდეგ ეს ნაწილები მოსატი-
რო-მოიუმორო საკებ მანქანაში გავატარე და მიღებული
ბრძნული აზრების ფარში მოსკოვში, რუსთაველის მინიატიუ-
რულ ძეგლთან (უფრო დიდის გაკეთებას გვიშლიდა კი ვინმე?)
ვითომ შეკრებილთა, სიტყვაკაზმული მწერლობის მოყვარული
პენსიონერთა სახელით, თავად მოსკოვში მყოფმა და იმ დროს
ჯერ კიდევ უპენსიომ, გაზეთ „ლიტერატურულ საქართველოს“
გავეზღავნე:

უფალო რედაქტორო
გურამ ფანჯიკიძე!

მოსკოვს გადმოხვეწილი ქართული მწერლობის მოყვარუ-
ლი პენსიონერები და აქა-იქ არაპენსიონერებიც, თქვენი გაზე-
თის უკანასკნელი ნომრის (15) მიღების დღეს საზეიმოდ შე-
ვიკრიბეთ ჩვენი დიდი წინაპრის რუსთაველის ძეგლთან (თუ
ძეგლის მაკეტან?) და ბევრი ოხვრა-ვაების შემდეგ გული და-
ვიწყნარ-დავიოკეთ „ლიტერატურული საქართველოს“ კითხვი-
თა და გალობით.

განსაკუთრებით სიამე მოგვანიჭა „ოთხმა ინტერვიუმ“.

თქვენს პატივცემულ კორესპონდენტს, აბა, რა დიდებულად
ჩაუნისკარტ-ჩაუმახვილა ჩვენმა სასიქადულო დიდმწერალმა,
შეშანიშნავი! რომანების „ძირს სიმინდის რესპუბლიკა“, „იმე-
რეთისა“ და „კოლხეთის ცისკრის“ მცოხნავმა... მხცოვანმა ავ-
ტორმა კონსტანტინე ლორთქიფანიძემ:

— ...რაშია საქმე?

— ამაშია საქმე!

ასე ხმალივით მოქნეულ და აღმასივით მკრელ პასუხს
ვერც ბერნარდ შოუ გასცემდა, ვერც მარკ ტვენი და ვერც ჯე-
რომ კ. ჯერომი, თუნდაც ენა ამის ძალღსაც ამოედგა!

ასე დიდებულად შეეძლო მხოლოდ ჩაენაკვიმატებინა სო-
ლომონ ზურგელისძეს, ლევარსი როხროხაძეს ანდა ევგენი
დვალს,² თუკი, რა თქმა უნდა, მათ ერთ გულდურად შეკრავდით,
და თან გორგოლ აბაშმაძის თავს გამოაბამდით, რომელი თავი-
თაც იგი სათავეში ედგა ქურნალ „ნიანგს“ — არნახული აყვა-
ვების პერიოდში („რა გვარი ხარ შენ? — ხაჭაპურიძე, ბატო-
ნო! — აბა ხაჭაპურის ქამა გეყვარება შენი“).

რამდენადაც ვიცი, უფალო რედაქტორო, თქვენ მეშვიდე ცაზე³ აგერ ახლა შედგით ფეხი და, მაშასადამე, ძალიან ახალგაზრდა ბრძანდებით, — შესაძლოა ევგენ-ლევარს-სოლომონისთვის ყური არც მოგიკრავთ, — მათ ძალიან კარგად იცნობდა ჩვენი საყვარელი თანამედროვე იონა ვაკელი, რომლის ორი კომედია „საქმიანი კაცი“ და „აპრაკუნე ჭიმჭიმელი“ ასე თბილად მოიხსენია შარშან „მნათობის“ ერთ-ერთ ნომერში ჩვენი ეროვნული კრიტიკის პატრიარქმა, ლაკონიური სიტყვის ოსტატმა და საოცრად ჭეხა-ძვირმა, X-ის გულისგამპობმა და Y-ის გულისგამხარებელმა, დაბადებიდან ქალარამ, მაგრამ დღემდეც კი სიგარეტით მულამ ცეცხლმოკიდებულმა და სხვებისთვის ცეცხლის მომკიდებელმა ბესარიონ ჟღენტმა, რომლის პასუხი თქვენი კორესპონდენტის კითხვაზე ერთხელ კიდევ ადასტურებს მის მაღალნიჭიერებას: კაცმა, რომელსაც არასოდეს ბურთისთვის ფეხი არ დაუტრყამს (თუკი, ცხადია, ბურთად ზოგიერთ მწერალს არ მიეჩნევთ), ინტუიციით შეუმცდარად წარმოიდგინა სტადიონი და ბრალი სწორი პროპორციით გაანაწილა ფეხბურთელებზე და მსახიობებზე და, ამჯერად, არც სულმა წასძლია დაერტყა მისთვის ჩვეული, ტრადიციული საჯარიმო დრამატურგთა კარში, რომელსაც, სხვათა შორის, უკვე მეორე სეზონია ასე ოსტატურად იცავს ვალერიან კანდელაკი,⁵ რომლის პიესის „ნაკრძალის“ თარგმნას მიცქევიჩის ენაზე ჩვენ წრფელი გულით მივესალმებით, ყველასათვის კეთილისმსურველ ბესოსთან ერთად.

ო, კემშარიტად საშვილიშვილო საქმე გააკეთეთ, უფალო რედაქტორო, როცა ინტერვიუ ჩამოართვით ჩვენს ღვაწლმოსილ ალექსანდრე ქუთათელს, მან თავისი პასუხით მისთვის ჩვეული მთრიდებით ერთხელ კიდევ მოგვაგონა, რომ სწორედ ის გახლავთ „პირისპირის“ ავტორი.

კონსტანტინე გამსახურდია?!? ო-ო, უკეთეს ნუგბარს, აბა, რომელი რედაქტორი არ ინატრებს თავისი გაზეთისათვის!

ზოგიერთ ჩვენგანს მრავალგზის მოუხსენია მისი გამოსვლა მაღალი ტრიბუნიდან (ბ-ნ კონსტანტინეს დაბალი ტრიბუნაც არაერთგზის აუმაღლებია თავისი გამოსვლით!), მაგრამ, ჩვენდა სამწუხაროდ, ჯერ ერთხელაც არ მოგვიკრავს თვალი, როცა...

„ყოველთვის ვაეკატურად მიდგა მხარში დემნა შენგელაია“.

ბატონი კონსტანტინე ცამდე მართალია, როცა სერიოზულად (და არა ხუმრობით!) შოითხოვს — დილეგში ჩააგდონ (და მერე... ძელზე გასვან!) სოლოვიოვი და მისი მაყრიონ-მხედრიონი: აკი ქართველი ერის ფიზიკური არსებობა, მისი ყოფნა-არყოფნის საკითხი ჩვენი „დინამოს“ მოგება-წაგებაზეა დამყარებული, ამას დიდი ხანია ჩაგვიჩინებს საქართველოში ყველა გაზეთი. კარგია, რომ მათ არც „ლიტერატურული საქართველო“ ჩამორჩა.

სხვათა შორის, ბატონ კონსტანტინესთან ერთად ჩვენც გვახსოვს კარგი ასპარეზობაც... აი, თუნდაც, როცა... ის და ავეტიქ იმ წელს ზვარტნოცს ისვენებდნენ, ისააკიანი!

ვაგლახ, რომ ვარპეტი ავეტიქ ვერ მოესწრო სწვეოდა ჩვენს დიდოსტატს იაზონის კოშკში!

უნდა გამოგიტყდეთ, უფალო რედაქტორო, თქვენი გაზეთის ამ ნომერში ჩვენ ძალიან მოგვეწონა აგრეთვე ქალბატონ მარგალიტა გოგოლაშვილის წერილში გაბნეული მარგალიტები დიდებისა და ბავშვებისათვის:

„სპექტაკლი ხალისიანი და გადამღები სანახაობა იყო“.

პირდაპირ აწ მუდამ ტკბილად მოსაგონარი, ბატონი გერონტის უებრო ქართულია, ოღონდ არ ვიცი, ქ-ნი მარგარეტი „გადამღებში“ „заразным“-ს გულისხმობს თუ „заразительным“-ს.

დაბოლოს, დაბეჯითებით გთხოვთ გადასცეთ ჩვენი დიდი მადლობა ენგურის ქალაქის ფაბრიკის მესვეურებს — ჩინებული ხარისხის ქალაქს უშვებენ, — ყველაფერს იტანს და მორცხვი (ბ) ქალივით არ წითლდება.

ამ ბარათს ვწერთ ბალშია გრუზინსკაიაზე, ბალში, ეწერთ და ვტირით, შევყურებთ. რა შოთა რუსთაველის სათამაშო ძეგლს, — ეს დალოცვილი ირაკლი აბაშიძის სიმალლისა მაინც იყოს პოსტამენტთანად!

დავშთებით მარადუამს თქვენი გაზეთის ერთგულნი მკითხველნი და სხვ. და სხვ.

აკილი,
1968 წ.
მოსკოვი

1. „შეშანიშნავი“ — ერთი ენაწლიფინა, მაგრამ ნიჭიერა მკვლევარის დამახასიათებელი გამოთქმაა.

2. ზურგიელიძე, როხროხაძე, დვალი — ამ საუკუნის პირველი მეოთხედის მოფილოსოფოსო — მოიუშორისტულო პერსონაჟები; ერთი ამათგანი რეალურად არსებული პიროვნება იყო: „რუსთაველის პარტიის“ დამაარსებელი და, მგონი, მისი ერთადერთი წევრი.

3. „მეშვიდე ცაზე“ — გურამ ფანჯიკიძის პირველი რომანია.

4. „საქმიანი კაცი“ და „აპრაკუნე ჭიშქიმელი“ იონა ვაკელის ერთი და იგივე კომედიაა, ოღონდ სათაურშეცვლილი; რაკი ჩვენი პატივსაცემი კრიტიკოსი მარტო სათაურებს იცნობდა, ისინი ორ სხვადასხვა ნაწარმოებად მიიჩნია და ქებაც, წაუკითხავ-გაუცნობლად, ორმაგად მიუზღო.

5. ვალერიან კანდელაკი — იმხანად მწერალთა კავშირის დრამსექციის თავმჯდომარე.

ამავე ბარათში, ლამის უკვე დამკვიდრებული საჯაყი ქართულით თუ ვიტყვით, ფიგურირ-ფუნქციონირებენ ბანოვანებიც (X და Y), რომელთა ასავალ-დასავლის გარკვევა-დადგენა, დაე დავუტოვოთ ჩვენს მერე მოსასვლელ თაობებს; ვილაცამ მაშინაც ხომ უნდა იცხოვროს პრინციპით:

ვთათხავ მე ღმეროს, ვაძაგებ ქრისტეს, —
სახელსაც ვიმკი, ჯიბესაც ვივსებ!..

...დიახ, როგორც ზემოთ უკვე მოგახსენეთ, გავუგზავნე და... როცა მიუღიათ, შაქარუკრავ ღვინისა და პირწმინდა კონაყის მწარმოებელი, მშრომელი ქართველი ხალხის „მყვლეფავი“ სარაჯიშვილის ყოფილ კოხტა შენობაში, ოციან-ოცდაათიან წლებში ეგნატე ნინოშვილის სახელობის, ამჟამად კი უსახელო მწერალთა მყუდრო სასახლეში ერთი ორომეტრიალი დატრიალებულა (მაშინ იმ „თეთრი სახლის“ „ხაზენი“ ჯერ კიდევ გაუგმირებელი გრიგოლ აბაშიძე გახლდათ)...

(აქ ჩემი აზრის მდინარებას წუთით შევწყლენებ და მას, ასევე წუთით, სხვა კალაპოტში გადავადგდებ, რადგან ვფიქრობ, ეს მის მდინარებას უფრო ანკარას გახდის: თითქმის სრულიად უვადოდ, თითქმის ერთხელ და სამუდამოდ ნახევრად რბილ სკამებზე და, მით უფრო, ტყავის სავარძლებში მსხლომნი ისე შეეჩვივნენ ათეულწლობით ერთმანეთის ხოტბა-დიდებას და აგრეთვე მომცრო და მოზრდილი, მოდილო და დიდებისგან ქებათა ქებას, რომ ჩვენი პრესა რა ხანია მარტო ტკბილეულით დახორავებული საიუბილეო ბანკეტის სუფრას წააგავს და კრიტიკოს-თამადას ხომ მარტო თავდრეკია პანეგირია აკერია პირზე...

შუა საუკუნეებში, ქალის კულტის ჟამს, რაინდები და მიწეზინგერებიც არ ამკობდნენ ასე გაშმაგებით თავიანთი ტრფობის რჩეულთ, ლაურებს და დულცინეებს!..

საჭურისებსაც არ აპყავდათ ასე ცამდე თავიანთი მბრძანებლები, შაპები და ხონთქრები!

ამიტომაც ახლა ათასში ერთხელ, თუკი ვინმემ, ცოლ-შვილზე და საკუთარ თავზე ხელს აიღებს და ოდნავ მაინც, რაღაც კრიტიკულად წაიკნავლებს და ისიც „დიდის“ მისამართით, — ო—ო, ღმერთი იყოს მაშინ თქვენი მფარველი! — ან, თუ გნებავთ, „მომცროს“ მიმართაც, სულ ერთია, ამის მერე წამკნავებელს ცხვირი გარეთ აღარ გამოეყოფა, და თითქოს არც ამ წაიკნავებულს, რა უსკამო და რა უსავარძლო კიანჭველაც

იყოს იგი, არ გაემტყუნება: რაკი მღერიე, ფალსიფიცირებული სიროფის ტბაში ბანაობს ყველა, — მე ვისი გლახად სახსენებელი კოჭი ვარო...).

...და ეს ჩემი თითქოს უწყინარი, ანტიპროვინციული ფარში მწერალთა „თეთრ სახლში“ უსაშველოდ მარილ-წიწაკ-მლოგვ მოყრილად მოსჩვენებიათ, ოღონდ 'ეს კია, არა ყველას: „მთვარის მომტაცებელს“ და „პირისპირს“ გაუცინიათ კიდევ. სამაგიეროდ „ამაშია საქმეს“ კი... უ-უ, ეს სალალობო ფარში კი არა, ბილწი ანონიმკააო!

„ანონიმჩიკის“ მიგნება კი სულ იოლი გამომდგარა, აკი იგი დამალვას არც აპირებდა, უფრო მეტიც: თუ მისი კალმის რჩეული ნაცოდვილგვის თუნდაც ნახევარტომეული ოდესმე გამოიცემოდა, ამ პროზაულ ფუნაგორიას მასში უეჭველად შეიტანდა (შეიტანს კიდევ, თუ დასცალდა, უფრო სწორად—თუ დააცალეს). ამიტომაც მისი ზუსტი ასლი ასე სათუთად დღემდე შემოინახა.

სხვათა შორის, ამ ამბავმა თქვენი ახლა უკვე გამომზეურებული „ანონიმჩიკი“ იმ არქიმედისებურ აღმოჩენამდე მიიყვანა, რომ იგი, „ანონიმკა“, თურმე, წინასწარ არც არავის უნდა წააქითხო (მან კი საქართველოს მწერალთა კავშირის „ელჩს“, მოსკოვში, ჩაუბუღებულა!), და რომ ბევრად სჯობს „ანონიმკა“ მანქანაზე გადაბეჭდო, ანდა სხვას, სანდო ვინმეს გადააწერინო, თანაც წერა-კითხვის შენზე უკეთ მცოდნეს (მაგალითად, ასე რომ მოქცეულიყო ეს ჩვენი ბედოვლათი მანონიმე, მაშინ ამგვარი სავაებო შეცდომა აღარც მოუვიდოდა: ერთ-ერთ ინტერვიუერზე („ამაშია საქმე!“), — რომელმაც თავისი ყველაზე საპროგრამო რომანი სხვადასხვა დროს, დროისა და ქარის მიმართულების შეცვლის მიხედვით, არაერთხელ „შეაპაჩინკა“ და სათაურიც ამდენჯერვე გამოუცვალა, — ხელმა როგორღაც წასძლია „მხცოვანის“ ნაცვლად „მცობნავი“ დაეწერა, რასაც ხაზი კი უმაღვე გადაუსვა, მაგრამ, როგორც ჩანს, იმდენად ნაჩქარევად და ზერელედ, რომ მხცოვანმა „მცობნავი“ სულ იოლად ამოიკითხა და... თურმე ისე აენტო, ვითარცა კვარი ნაძვისა, და ამ ბინძური „ანონიმჩიკის“, როგორც არაბოლშევიკი წევრის, გაძევება მოითხოვა თურმე მწერალთა კავშირიდან, რომლის შენობის ლამაზი გრეხილი რკინის კარი,

სხვათა შორის, ამ მეანონიმემ თავისი ანონიმური მოღვაწეობის მხოლოდ თითქმის 30 წლის შემდეგ შეაღო, როცა მისი ოთხი „ანონიმკა“ უკვე დადგმული იყო რუსთაველისა და მარჯანი-შვილის თეატრებში, ერთიც — მოსკოვში, და ისიც მიხეილ მრეველიშვილისა და გიორგი შატბერაშვილის წაქეზებით („ჩვენგან გარე-გარე რომ დადინარ ბომარშესავით, ვითომ რაო, ჩვენ ცუდი ბიჭები ვართ, კავშირში თუ ვირიცხებით?“).
ღიას, როგორც არაბოლშევიკი წევრის გაძევება-მეთქი, აკი...

მე ბოლშევიკის გარდა სხვა ვინმე
არ მიმაჩნია ადამიანად!

მართლაცდა, მისი ეს შარავენდმოსილი, უკვდავ-უბერებე-ლი სტრიქონი ახლაც ძალაში რჩებოდა მისთვის, აუშცა...

ამ სიტყვებმა, ო-ო, როდის, როდის დაიქუხეს!.. როცა ჯერ კიდევ, თუ სულ ცოცხლები არა, ყოველ შემთხვევაში ნახევ-რად ცოცხლები მაინც იყვნენ „ნამდვილი ადამიანების — ბოლ-შევიკების“ მიერ შერისხულნი: „მეფეთ გუნდრუკთკმეველი“ ივანე ჭავჭავიშვილი და „რეაქციონერი“ მიხეილ ჭავჭავიშვილი, „ნაფედერალისტალი“ შალვა ნუცუბიძე და „ნამღვდლარი“ კორნელი კეკელიძე, „შინაგანი ემიგრანტი“ გრიგოლ წერეთე-ლი და „წირვა-ლოცვაზე მოსიარულე, ღვთისმოსავი“ ლუარსაბ ანდრონიკაშვილი, „დამპალი შოვინისტი“ გრიგოლ რობაქიძე და აგრეთვე შავსიელი, ესე იგი საარჩევნო ხმას მოკლებული კულაკი (ორიოდე კვერცხმდებელი დედლისა, ხუთიოდე ყვინ-ჩილა-ვარიკას და ბოთლნახევარი რძის მეწველი თხის მეპატ-რონე), მეფის ყოფილი ნაპოლკოვნიკარი, ყოფილი აზნაური დავით კლდიაშვილი...

(ასეთი თავგამოდებული ბოლშევიკური შეძახილები დაუ-ფასდა კიდევ ბატონ კონსტანტინეს (გთხოვთ „ნაციონალისტ“ გამსახურდიაში არ აგერიოთ, — ლორთქიფანიძეს!): ეს ერთად-ერთი, სასწაულებრივი შემთხვევაა ჩვენი ქვეყნის პრაქტიკა-ისტორიაში, როცა უპარტიო კაცი (ისე, ჩურჩულით რომ ვთქვათ, გაპარტიულებას იმიტომ ხომ არ გაუბრბის, რომ საწვე-რო ანარიცხების გადახდით მძიმე ყულაბა არ შეუმსუბუქ-დეს?!) ათეული წლების მანძილზე საბჭოთა იდეოლოგიური —

დიახ, საიდეოლოგიო, და არა საგინეკოლოგო — ეურნალებინ, ხან ერთის, ხან მეორის — მთავარი რედაქტორია!)

...მაგრამ დავუბრუნდეთ იმას, რითაც ეს მონაკვეთი დავიწყეთ: ფეხბურთს!

დიახ, როგორც ჩანს, ყმაწვილობაში „შურდულის“ ცენტრ-ფორვარდს, ახლაც ბურთი ისე შორს დამირტყამს, გარკვეული დრო დასჭირდა, რომ იგი კვლავ ჩვენთან მოგორებულიყო...

ვფიქრობ, პოეტს გაფრენები, რასაკვირველია, ეპატიება, თუ რითმისათვის, თუ მეტაფორისთვის, თუ ჰონორარისთვის, გინდ გავრილა დერჟავინობისათვის...

ფეხბურთიც ერის ღონეა,
ძალაა მისი არსობის!

თუნდაც ბნელეთიდან სამზეოზე ჩვენი ასე გამოყვანა, განათლება-თვალის ახელისთვის!

აბა, როგორ!

ოი, უბედური, უბედური იაპონია!

რაკი იქ ფეხბურთმა ფეხი ვერ მოიკიდა, ამიტომაც არის იგი ასე დაკნინებული სულიერად და ფიზიკურად, ამიტომაც არ გააჩნია მას საკუთარი ნედლეულის ერთი კილოგრამიც და... ახია მასზე! — ის ბედკარული მხოლოდ იტალიას, ინგლისს, საფრანგეთს, ფედერაციულ გერმანიას უსწრებს წინ, ამერიკას კი, უ-უ, რა დიდად, დიდად, — მთელი ნახევარი ნაბიჯით ჩამორჩება, ჩვენ კი...

ო-ო, ჩვენთან შედარებით რა სახსენებელია, ბატონებო, უფეხბურთო იაპონია, ჩვენ, გენ-აცც-ვალეთ, ახლა მთელ დასავლეთსაც ზემოდან დავყურებთ...

— შეავსეთ თასი, ევროპის თასი,
დავლიოთ, დავლიოთ „დინამოს“ სადღეგრძელო!
დი-ნა-მო, დი-ნა-მო, დი-ნა-მო!..

ფეხბურთში მოგება-წარმატებანი ჩვენთვის, ქართველებისთვის, ბუნებით უღარდელი თვითკმაყოფილებით შეპყრობილი ხალხისთვის ისეთი ბანგია, რომელიც კიდევ უფრო გაგვაყოყ-

ლოჩინებს და იმ ზომამდე გამოგვათაყვანებს, რომ ჩვენს ეროვნულ თვალში უკვე დიდი ხნის წინათ ჩამდგარ საბედისწერო ღირეს სულაც ვეღარ შევამჩნევთ.

აი, ჩვენ მოგვიწოდებენ ხოლმე, შეისწავლეთ რუსული ენაო, და ამის ერთი თავგამოდებული მქადაგებელი მეც გახლავართ, და თუ ამ არცთუ სულ უნაცნობებო ქადაგმაც კი ვერ ჩაიგდო ხელთ „რუსულ-ქართული ლექსიკონი“, რომლის გამოსვლას ასიათასობით სხვა ქართველთან ერთად 25 წელზე მეტს სულმოუთქმელად ელოდებოდა, მაშინ რაღა ქნას, ვთქვათ, პირტიტველა სტუდენტმა, რომელიც პირველ ნაბიჯებს სწორედ ახლა დგამს ცხოვრებაში? ისიც 25 წელიწადი ელო...

არადა, მალთაყვის ჭაობში უფრო დაიჭერთ კალმახს, ვიდრე ყოველი ქართველისათვის ამ უსაჭიროეს წიგნს წააწყდებით სადმე მაღაზიაში!

რატომ?

მისი ტირაჟი 60 ათასია...

ეს მაშინ, როცა საფეხბურთო „ფორცა, იტალია“ ასი ათას ცალად მოეფინა „ფორცა“ საქართველოს, ხოლო მეორე, რუსულ ენაზე დაწერილი „არგენტინა“, ამაზე ნაკლები ტირაჟინტით როდი გაიჭრა წინ, გამომცემლობის კარში გოლის გასატანად!

თანაც ორივე ეს წიგნი სწორედ წიგნებია, და არა მკვლე ბროშურები!

ხშირად გვესმის ხოლმე, ქაღალდი არ გვეყოფნისო... კი, მაგრამ, ქაღალდი საშვილიშვილო რუსულ-ქართული ლექსიკონისთვის არ მოინახა და... „ფორცა, იტალია“, რა ნიჭიერადაც იყოს იგი დაწერილი, სულ დიდი, ორჯერ მეტად ხომ არ წაიკითხავთ, თანაც წასაკითხად მისი განათხოვრება ათზე და მეტოჯახზეც შეიძლება, ლექსიკონი კი, დღეში ზოგჯერ, ვინ იცის, შეიძლება, ათჯერაც დაგვირდეთ, და თუ ის საკუთრივ არ მოგეპოვებათ, გლდანში მცხოვრები ნაცნობ-მეგობრებთან ვაკეში ხომ არ გაიქცევით ანდა ამა თუ იმ სიტყვის ამოსაცნობად ბიბლიოთეკას ყოველთვის ხომ არ მიაკითხავთ?!

თვალში საცემია ისიც, რომ „არგენტინა“ არა, მაგრამ „ფორცა“ კი ისეთ ქაღალდზეა დაბეჭდილი, რომლის მაგვარზეც ეკატერინე მეორე თავის ყველაზე ძვირად ღირებულ, 250-

მანეთიან ბანკნოტებს ბეჭდავდა, თანაც მეტად მცირე რაოდენობით.

(სხვათა შორის, ხალხის, სულ ცოტა, ათჯერ დამაზარალებელი 1961 წლის ფულის რეფორმის ერთ-ერთ მიზეზად ნიკიტამ სახელმწიფოში ფულის დასაბეჭდი ქალაქის ნაკლებობაც დასახელა.

კი, მაგრამ... რა სახელმწიფოა ის სახელმწიფო, რომელსაც ფულის დასაბეჭდი ქალაქიც საძებარი აქვს?!).

...ერთმა ყოველმხრივ კარგმა ქალმა (მართლაც მანდილოსანმა, ძველი გაგებით!), გონიერმა და შორსმჭკრეტელმა, რომელიც თითქოს უზომოდ უნდა ამაყობდეს, რომ მისი ვაჟი პირველი ქართველია, ევროპის ფეხბურთელთა სიმბოლურ ნაკრებში რომ შეიყვანეს, ტელევიზიით მოურიდებლად განაცხადა, არ მინდოდა ჩემი შვილი ფეხბურთელი გამოსულიყო, ბურთი მაინც ბურთიაო...

არა, ამ ქალბატონის ვაჟი ფეხბურთელი რომ გამოვიდა, ამით არაფერი დაშავებია არც თვითონ მას, როგორც დედას, არც მის ძეს, როგორც მოქალაქეს, საქართველომ კი — ხომ გაიხარა და გაიხარა,

და მაინც,

არა და არა.

არ შეიძლება ტრაგიკულ სიტუაციაში ჩავარდნილი ერის პირველი, თავიდათავი საზრუნავი ბურთი იყოს, ან ჩაი იყოს, ანდა ყურძენი..

განა გაემტყუნება სომხეთის „ინტურისტის“ გიდს (დაექვეების შემთხვევაში წარმოგიდგენთ მას, ვინც ეს საკუთარი ყურით გაიგონა), თუკი მან ერეენის ქუჩაზე ნელა მიმავალ ავტობუსში მყოფთ, თითქოს სხვათა შორის, „ძმური“, სამგლოვიარო ხმით ამცნო:

— Грузины — вымирающая нация...

გეკითხებით, ეს მისი დიაგნოზი-განაჩენი ვითომ მცდარია ანდა ნაადრევია?

და თუ არც მცდარია და არც ნაადრევია, მაშინ...

რა დროს ბურთია,

როცა ბედი წყდება

ს ა ქ ა რ თ ვ ე ლ ო ს ი ა ..

შავი ჯვები და თეთრი კანჭები

ამ მოზრდილი თანამდებობის პირის კაბინეტის წინ უხილავი ასოებით დაწერილი განცხადებაა გამოკრული:

მთხოვნელთა მიღება ორშაბათობით
9-დან 3-მდე,
ქრთამის მომტანთა— ყოველდღე
9-დან 6-მდე,
(ორშაბათობით 3-დან 8 საათამდე).

ეს ამხანაგი ერთ ქალს, ხნიერსა და ნომარს, როგორღაც წინასწარ ენდო და კანონიერი საქმე, თითქოს კანონის ავლით გაუკეთა... ქალმაც სამაგიერო პატივისცემა დიდხანს არ დააყოვნა და თვალების აქეთ-იქით ცეცებით — აქაოდა, არაფერს დამინახოსო — საიდუმლოდ გადასცა შედარებით პატარა, მაგრამ სქელი შეკვრა და უკან ფეხაკრეფით, სწრაფად გამობრუნდა...

კაბინეტის მფლობელს სახე აემრიზა და გულს შემოეყარა: — ამ დალოცვილს, როგორც ჩანს, სულ სამმანეთიანებით გაუტენია და... რა დათვლის ახლა ამას?!

სულმა მაინც წასძლია, შეფუთულს ზონარი შემოაცალა, გახსნა და... ახლა ერთიორად შემოეყარა გულსაც და სულსაც: მასში აღმოჩნდა ძნელად საშოვნელი, მაგრამ თუ იშოვი — 33 კაპიკად ღირებული ტუალეტის ქალაღდი, წითელ ლენტშემოვლებული, რომელზეც ასეთი წარწერა იკითხებოდა:

„ნუ გავიწყდება, რომ შენა ხარ ადამიანი,
თანაც საბჭოთა ადამიანი!“

ისტორია გადმოგვცემს, პეტრე დიდმა ერთი თავისი შექრთამე გუბერნატორი სახარხობელაზე აათრია, რაკი იცოდა, რომის იმპერია ქრთამმა დააქცია...

პეტრეს ხსენებაზე...

კათანდარა ტანის თეატრალურ მოღვაწეს ალექსანდრე (საშა) მიქელაძეს ათი წელი მიუსაჯეს... ლენინის შეურაცხყოფასათვის!

ეს იმით გამოიხატა, რომ თქვა: პეტერბურგი პეტრე დიდმა ააშენა და არა ლენინმა, და ამდენად ამ ქალაქისთვის სახელის გადარქმევა ლენინგრაძზე უმაღურობა და სიბრყველიყო...

მოდით, ესეც ვიცოდეთ: დააბეზლა მიქელაძე ერთმა მისივე თანამოსაუბრემ, თავის თავს, და ზოგიერთი სხვაც, თეატრალურ მოღვაწედ რომ მიიჩნევს.

. . .

ისლანდია საქართველოსავით პატარა ქვეყანაა, მისი მოსახლეობაც, ჩვენთან შედარებით, ერთობ მცირეა, სულ რაღაც მილიონის მეოთხედს შეადგენს.

მთელი მისი ტერიტორიის დიდი ნაწილი ყინულოვან „ხმელეთს“ მოიცავს და ასეთი ბუნებისაგან ნაკლებად განებივრებული ქვეყანაა, მეთევზეობის გარდა, მეცხვარეობასაც მისდევს.

ახლა არ იკითხავთ, რამდენი ცხვარი ჰყავს ამ ერთ მუქა ხალხს ადრინდელი შაურის ოდენა საძოვრებზე (წინანდელი შაურის ფართობი ახლანდელზე დიდი იყო სიმძიმითაც)? თუ მარშან იქ ნამოგზაურები საქართველოს დელეგაციის ხელმძღვანელი არ ცდება — ორმილიონნახევარია, ცოტა ადრე გამოცემული ეკონომიკური გეოგრაფიის სახელმძღვანელო უფრო ნაკლებს ასახელებს, მაგრამ ამ მწირი ქვეყნისათვის ისიც დიდად უნდა მივიჩნიოთ, მით უმეტეს მაშინ, თუ გავითვალისწინებთ, რომ ხუთმილიონიან საქართველოს საძოვრებზე ამჟამად, თხების ჩათვლითაც კი, მილიონ ორას ოთხმოცდასამი ათასი ცხვარი ბალახობს.

ღიახ, ხუთმილიონიან მოსახლეობას ღმერთის მიერ საგულდაგულოდ გამოყოფილ ხავერდოვან მთასა და ბარში! სამაგიეროდ მხრებგაშლილი საქართველოს მეცხოველეობას ჭერ კიდევ 1980 წელს 23 მეცნიერებათა დოქტორი და 164 მეცნიერებათა კანდიდატი ამკობდა!

ესეც შენ, საბრალო ისლანდიაჲ — წამლადაც რომ დაგჭირდეს, შენ საქონლის არც დოქტორი და არც კანდიდატი ერთიც არ მოგეპოვება, ჩვენ კი... ჰოდა, ტრაბახში ნუ ჩაგვითვლი, თუ უირაფივით ყელს მოვიღერებთ და ზევიდან ქედმაღლურად გადმოგხედავთ.

სხვათა შორის, ამ ჩამორჩენილ ისლანდიაში წარმოდგენაც კი არ ჰქონიათ, რა არის საერთოდ ქურდობა, და იქ, თურმე არც მგლების ქაჭანება ყოფილა!

როცა მემორიალური დაფები უფრო მეტს მეტყველებენ, ვიდრე მათზე ამოიკითხნავთ:

ათონელის ქუჩა, 10:

ამ შენობაში მოთავსებული იყო სტამბა „ეკონომია“, სადაც 1920 წლის 3 ივნისიდან 17 დეკემბრამდე იბეჭდებოდა საქართველოს კომუნისტური პარტიის ცენტრალური და თბილისის კომიტეტების ყოველდღიური ორგანო, გაზეთი „კომუნისტი“.

მახარაძის ქუჩა, 5:

ამ შენობაში 1920 წელს მოთავსებული იყო საქართველოს კომუნისტური პარტიის ცენტრალური კომიტეტი და გაზეთი „კომუნისტი“ რედაქცია.

კომენტარი: ყოველივე ეს არსებობდა ბოლშევიკების სისხლის მსმელი მენშევიკების ბატონობის დროს!

გვიანდელი მინაწერი (1990 წ.): 1985 წლის 27 იანვრის გაზეთ „კომუნისტი“ შეგიძლიათ შეცნიერების დამსახურ-

რებული მოღვაწე-ლიტერატორის წერილში — „სამშობლო, დედის ძეძუი“-ში ამოიკითხოთ:

„ნიკო თორელი 1921 წელს მენშევიკების ამაღას გაჰყვა, როგორც იმ საგანგებო რაზმის წევრი, მენშევიკების მიერ გატანილი განძის დაცვა რომ ევალეზოდა. მას შემდეგ, რაც მენშევიკების მთავრობამ საქართველოდან გაზიდული განძის ერთი ნაწილი გაყიდა და პარიზთან ახლოს სოფელ ლევილში 1922 წელს მამული და ორსართულიანი სახლი შეიძინა, ამ სახლში თორელს ექვთიმე თაყაიშვილის გვერდით ერთი ოთახი უბოძეს“...

სწორედ რომ საკვირველია: მეცნიერების ამ დამსახურებულმა მოღვაწემ თუ ისიც კი იცის, თორელს თაყაიშვილს მეზობლად ოთახი მისცეს, რატომ ეს არ იცის, რომ საქართველოს ემიგრანტულ მთავრობას სამშობლოდან „გაზიდული განძის“ არათუ „ერთი ნაწილი“, — ამ განძიდან ერთი ოქროს ქინძისთავიც არც გაუყიდა და არც გაუსაჩუქრებია, — პირიქით, მას ცოტა რაღაც, მგონი, შემატა კიდევ...

ამასაც ვიტყვოდი, თუმც ვიცი, ასეთი „მკრეხელობისთვის“ შეიძლება ბევრის რისხვაც დავიმსახურო: ვერავითარი თორელი და, ასე განსაჯეთ, ვერც დიდად დიდი მოძღვართმოდვარი, განძმცველი ექვთიმე თაყაიშვილი რეალურად საწინააღმდეგოს ვერაფერს მოიმოქმედებდა, თუკი „მენშევიკების მთავრობა“ „საქართველოდან გაზიდული განძის“ გაყიდვას დააპურებდა...

. . .

1931 წელს თბილისში გამოიცა 56 გვერდიანი ბროშურა: „ნოე ჟორდანიას მეფის ოხრანის სამსახურში“.

მისი შემთითხნელი, „ისტორიკოსი“ გ. ხაჭაპურიძე ამის საფასურად და ასეთი დამსახურებისათვის გააპროფესორეს და მოხანებისას გაააკადემიკოსეს კიდევ...

. . .

გრიბოედოვის ქუჩაზე, სახლი № 18-ის ფასადს ასეთი დაფა ამშვენებს:

ამ სახლში ცხოვრობდა 1921—1937 წლებში.
ცნობილი ქართველი მწერალი
ტიციან ტაბიძე

ვერის დაღმართზე, სახლს № 21-ს კი:..

ამ სახლში 1913 წლიდან 1937 წლამდე
ცხოვრობდა გამოჩენილი ქართველი მწერალი.
მიხეილ ჯავახიშვილი

ცოტა არ იყოს, თითქოს უცნაურია: ამ ორმა სახელოვანმა ქართველმა მწერალმა პირი რატომ შეერეს და რაღა მაინცდა-მაინც ერთსა და იმავე წელს მიატოვეს თავიანთი ბუდეები? ამის მერე ნეტავ ჰად იმყოფებოდნენ? შემდგომი მათი ცხოვრების მიმანიშნებელი დაფები ქალაქში აკი ვერსად აღმოვაჩინე... ანდა, შეიძლება, სწორედ ამ საბედისწერო 1937 წელს განუტევეს მათ სული, ა?

სხვათა შორის, სულის განტევება შესაძლებელია მრავალნაირი გზით: საკუთარი ხელითვე მოსწრაფებით — თვითმკვლელობით, უბედური შემთხვევით, სიბერით, რაც ბუნებრივია, ძალდატანებით, რაც უკვე არაბუნებრივია...

...გამოიცვალა ხომ პოეზია,
მუზეები ცისკრის კარებს ალებენ,
მაგრამ ჩვენ სხვა დრო წამოგვეწია,
და სადმე მალე ჩაგვაძალღებენ...

ტიციან ტაბიძე

(გვიანდელი მინაწერი (1990წ.): ეს სტროფი მიეკუთვნება ლექსს „სერგეი ესენინს“, რომელიც დაწერილია 1926 წელს; თავის დროზე ამ წინასწარმეტყველური „ჩაგვაძალღებენისთვის“ არაერთი ღისხვა დაატეხეს პოეტს...

ასე განსაჯეთ, ეს სტრიქონები ამოღებულია 1985 წელს გამოცემულ ტიციან ტაბიძის ნაწერების საჯარო კრებულიდანაც კი... დასტურ, ამ „სრულში“ არ არის შეტანილი 1927 წელს დაწერილი, ახლანდელი დროისათვის, როგორც ჩანს,

შეუფერებელი, საქებარი ლექსი სტალინზე და არც ყველა დროისათვის შესაფერისი, საქებარი წერილი ნატა ვაჩნაძეზე).

კიდევ ერთი „სხვათა შორის“: ერთის სულის განტეგება ხშირად ახალ სულს ჰბადებს ხოლმე, ზოგჯერ კი — უკვე არსებული სულის სიცოცხლეშივე ცხონებას... თუკი ერთნი ცხოვრობდნენ 1937 წლამდე, მეორენი ცხოვრებას იწყებდნენ ათას ცხრაას ოცდა...

ფურცელადის ქუჩა, სახლი № 12:

ამ სახლში 1937—1976 წ. წ. ცხოვრობდა
ცნობილი ქართველი მწერალი და საზოგადო
მოდერნიზმის ბესარიონ (ბესო) დავითის ძე ჟღენტი

ეს არასტანდარტული დაფა — გამორჩეული ქვის მასალითა და ასოებითა — მიმაგრებულია დიდებულად ნაშენება, ძველი სახლის მარმარილოს სადარბაზოს თავზე, ამავე შენობის ეზოს ჭიშკრის თავზე კი — ესეც „სხვათა შორის“ მომიხსენებია, — სულ ბოლო დროს მიაკრეს სტანდარტული, შავი ლითონის დაფა, საიდანაც ვიგებთ, რომ ამ სახლში ძველი რევოლუციონერი ბარონ ბიბინეიშვილი ცხოვრობდა დღიდან საქართველოს გასაბჭოებისა, ვიდრე... მმ...

აქ, როგორც ძველი თბილისელი, არა მგონია ვცდებოდე, დაშვებულია — გა ნ გ ე ბ! — ერთი შეცდომა: კი, ბიბინეიშვილი დიახაც რომ ამ სახლში ცხოვრობდა, მაგრამ იგი თავის ბინაში არ შედიოდა ეზოდან შემოვლით (ბოლშევიკი-კაცი ნიკოლოზს, აბა, მარტო სხვების სასიკეთოდ ხომ არ ჩამოაგდებდა!), — პირდაპირ სადარბაზოდან თეთრი მარმარილოს კიბეს აუყვებოდა ბოლო, მესამე სართულამდე და...

ზუსტად ამ კიბით მიემართებოდა ხოლმე 1937 წლიდან, მთელი ორმოცი წელიწადი თავის ახალ ბინაში გამორჩენილი ქართველი მწერალი და საზოგადო მოღვაწე ბესარიონ (ბესო) დავითის ძე ჟღენტი...

ახლახან გარდაცვლილი კლიმენტი გოგიავა შედარებით პატარა მწერალი იყო და, ამიტომაც, ბესო ელენტივით არცთუ ისე გამოჩენილი გახლდათ, მაგრამ, როგორც ჩანს, გამოუჩენლობა და პატარა მწერლობა სულაც არ განსაზღვრავს თურმე ადამიანის პატარა სულს. ისტორიისათვის სწორედ იმ დაუეწყყარ 1937 წელს შეაძლიეს მას „ხალხის მტრის“ ბინა მარჯანიშვილის ქუჩაზე მდებარე სახლ ნომერ ოთხში, და მაინც მან, თითქმის სულ უბინაომ და უკვე ცოლშვილიანმა, იქ ფეხი არ შეადგა, რა მაცხოვრებს იმ კაცის ბინაში, ვისთანაც ერთად ვმუშაობდი რკინიგზელთა გაზეთში...

მეორე მწერალმა, უფრო ზუსტად — ნაკლებად ნაყოფიერმა პოეტმა (დ. გ.) კი სასოწარკვეთილების დეპეშა აფრინა პარტიის ცენტრალური კომიტეტის მდივნის ლავრენტი ბერიას სახელზე, დაიჭირეს ხალხის მტერი (ესა და ეს), და თუ მარჯანიშვილის ქუჩაზე, ვერის ხიდთან, მის ბინაში არ ჩამასახლებთ, იქვე, მტკვარში თავს დავიხრჩობო...

...ჩაასახლეს, რა თქმა უნდა, და როცა ეს ხალხის მეგობარი გამარჯვებულ-გახარებული აღიოდა თავისი ახალი ნავსაყუდელის კიბეზე და გზად შემოხვდა ჩამომავალი, ამ ბინიდან უკვე გამოგდებული, მისი, თუ მეგობრისა არა, ყოველ შემთხვევაში, ახლო ნაცნობი მწერლის, ახლა უკვე „ხალხის მტრის“ ატირებულ-აღრიალებული დაი და მისი 5 წლის დაობლებული ძმისწული, ამ დროს ბავშვს ხელიდან ვაშლი გაუვარდა და ადამიანის სულის ინჟინერმა კიბეზე ბურთივით დაგორებულ ვაშლს მსწრაფლ ხელი დასტაცა და, ალბათ, წართმეული ბინის საკომპენსაციოდ, მოფერების სიტყვების თანხლებით პატრონს გაუწოდა, რაზეც ბიჭუნას მამიდამ თავაზიან პროტესტს ხელი აუკრა და ვაშლი გაავდებინა, თან მიახალა, ამის ოროთახიან ბინასთან ერთად ამის ეგ ერთი ვაშლიც შენ გქონდეს, ჩახეთქე ისე, რომ გულზე მახრჩობელასავით დაგადგესო...

(სხვათა შორის, ამ დროიდან ბევრი დროის გასვლის შემდეგ, ხალხში პოეტად ნაკლებად ცნობილმა ამ პოეტმა, საქვეყნო საიუბილეო ზეიმის მოთავებისას, მწერალთა კავშირის პარტიული კომიტეტის მდივანს, მართლაც ნიჭიერ

და მართლაც ცნობილ პოეტს ი. ნ-ლს განაწყენებულმა უთხრა, რა არის, ყველა ორდენი თქვენთვის რომ ჩამოირიგეთ, რა იქნებოდა, ერთიც ჩემთვის მოგეცათო... ამაზე არა ერთი და ორი ორდენის უკვე მქონე იმ თანამდებობიანმა მგოსანმა მიუგო, ჩვენ ორდენებისთვის განავალში მუხლამდე ფეხი გვაქვს ჩაყოფილი, რისთვისაც შენ ჩემ-ჩუმაღ დაგვცინი და... კიდევ შენთვის მოგვეცა ჩვენი წილი ორდენით?!

სწორედ იმავე წელს და იმავე დღეებში მეორე სხვა მწერალი, უფრო ზუსტად ყოფილი პროლეტარული კრიტიკოსი. ვერის დაღმართზე „ხალხის. მტრის“ მიხეილ ჯავახიშვილის ხავერდგადაქლექილ საეარძელში, სასწრაფოდ, არიქა, სხვამ არავინ დამასწროსო, მოკალათდა როგორც ხალხის მეგობარი...

ვინ არ იცის, რომ ის იყო ყოველად უნიათო კრიტიკოსი, თუმცა ამას წინათ გაზეთმა „სამშობლომ“ თანამედროვე ქართული მწერლობის რამდენიმე მართლაც ბერძენის გვერდით ამის ფოტოპორტრეტიც მოათავსა როგორც ასეთივე ბერძენისა... სამაგიეროდ მეორე კრიტიკოსმა, სულაც არაუნიათომ, — ნამდვილად ნიჭიერმა და მუდამ ენაცეცხლმსროლელმა, მიხეილ ჯავახიშვილის დაბადების 80 წლის აღსანიშნავ საღამოზე საიუბილეო მოხსენების გაკეთება მოინდომა, მაგრამ...

ნურას უკაცრავად, მწერლის ქვრივმა მთელ საიუბილეო კომისიას და მის შესაძლო მგზნებარე მომხსენებელსაც ცივი წყალი გადაასხა, ეს იქნება უდროოდ დაღუპული იუბილარის ხსოვნის შეურაცხყოფა, მე ასეთ საღამოს არ დავესწრებიო...

(ალბათ ამ მანდილოსანს კვლევ თვალწინ დაუდგა ზემოხსენებული კრიტიკოსის 1937 წელს ჟურნალ „მნათობში“ გამოქვეყნებული...

„ის გარემოება, რომ გარეწარმა მის. ჯავახიშვილმა საბოლოოდ დაკარგა საბჭოთა მწერლისა და მოქალაქის სახე და მთლიანად ჩაეფლა მოლაღატურ-ჯაშუშურ მეშაობის კონტრავოლუციურ წუმპეში, იმით უნდა აიხსნას, რომ იგი ბოლომდე ერთგული დარჩა კონტრავოლუციური იდეებისა, რომლებითაც სულდგმულობდა „არიფონის“ კორპორაცია“).

რასაკვირველია, ჩვენს დროში და ჩვენს ქვეყანაში იოლი არ არის შენი პირადი „მე“ შეინარჩუნო, იყო ის, რაც ბუნებით ხარ, მაგრამ ზოგიერთი ამას ასე თუ ისე, მეტნაკლებად მაინც ახერხებდა...

ესენინმა თავი მოიკლა... მაიაკოვსკიმ თუმცა გაკიცხა ესენინი ასეთი ლაჩრული აქტისათვის; მაგრამ ოთხი წლისა და სამი თვის შემდეგ ისიც მის კვალს დაადგა... ფადეევმაც თავი მოიკლა... პაოლო იაშვილმა და გალაქტიონ ტაბიძემაც...

ო, წინასწარ ნუ ავფორიაქდებით და ნუ შევწუხდებით: ეს ქართველი პოეტი (კ. ბ.), 1942 წლის 23 იანვრის დღის 4 საათზე რუსთაველის პროსპექტზე სამოქალაქო ტანსაცმელში სამომავლოდ დიდ იმედებასებულმა რომ ვნახე და მეორე დღეს გამთენიის 4 საათზე კი — შიშით ენაწართმეულმა და სასიცოცხლოდ იმედდაკარგულმა შინსახკომის საიდუმლო-პოლიტიკური განყოფილების უფროსის ნიბლაძის კაბინეტის წინა ოთახში სულ „სხვა“ ტანსაცმელში, — თავს არ მოიკლავს!..

. . .

ერთხანობას ლენინგრადში უხეიროდ მუშაობდა საზოგადოებრივი ტრანსპორტი... არა, ათჯერ უფრო უკეთ, ვიდრე ამჟამად თბილისში, მაგრამ არცთუ ისე, როგორც ამ სახელგანთქმულ, ჩვენი საბჭოთა ქვეყნის მეორე ცენტრს შეეფერებოდა...

ქალაქის მამებმა იმსჯელეს, ითათბირეს, რა გზით გამოესწორებინათ რევოლუციის აკვან-ქალაქისთვის ეს შეუფერებელი სიმახინჯე და გადაწყვიტეს... ყველას, — ამ ყველაში პირველ რიგში საკუთარი თავიც იგულისხმეს, — ვისაც პერსონალური მანქანებით სარგებლობის უფლება ჰქონდა, დროებით მაინც, პრივილეგიებზე ხელი აეღო და გადაამჯდარიყო დემოკრატიულ ტრანსპორტში — ტრამვაიში, ტროლეიბუსში, ავტობუსში...

ჰოდა, როცა ამ დიდებმაც საკუთარ თავზე იწვნიეს ტრანსპორტთან დაკავშირებული „ვინტიკების“ ძნელად ასატანი წამებანი, პრაქტიკული გზებიც მალე გამონახეს ამ წამებათა აღმოსაფხვრელად...

„და ახლა იქ ვერ გაიგონებთ ხატზე გადასაცემისებურ იმ ზაფხედრებელს, რომელიც ჩვენში, სამწუხაროდ, წამდაუწუმ ისმის არა მარტო სამიმოსვლო სფეროს მისამართით:

„ღმერთო! როდისმე მაინც, ცოტა ხნით მაინც, ჩვენი უფროსებიც აცხოვრე ისე, როგორადაც ისინი გვაცხოვრებენ ჩვენს...“

საქართველოს ზოგიერთ რაიონულ ცენტრში ბევრად უფრო ხარისხიანი, გემრიელი პური ცხვება, ვიდრე მის დედაქალაქში. ჩემისთანა არამკითხვე უდიპლომო სოციოლოგი ამას იმით ხსნის, რომ იქაური ხელმძღვანელი ამხანაგები, რაკი პერსონალური ფურნე-თორნე ჭერ კიდევ არ გააჩნიათ, ყველასათვის განკუთვნილ პურს თავადაც მიირთმევენ და რაკი ხაბაზმა არ იცის, პურის რომელი გოგორა შეხვდება რაიკომის მდივანს, ყველა გოგორას აცხობს ისე, რომ მისი ნაშრომი აუგად ერთმაც არ მოიხსენიოს...

ზემოთ უკვე ვწერდი, საბჭოთა ადამიანების გონებაში რელიგიის ამოსაშანთავად მთავარი იერიში მღვდლებზე მიიტანეს-მეთქი, როგორც მატყუარებზე, მუცელგაღორებულეებზე, ფულზე დახარბებულეებზე...

პარალელურად ამისა იმასაც ვწერდი, რომ ათი წლის წინათ, როცა საქართველოში გვალვით დაუძლურებული ბუნებისა და დასიცხული ადამიანების გამაგრებელი პირველი თქვენი წამოვიდა, რაიკომის მდივანი ერთიც არ დარჩენილა ისეთი, თავის თანამდებობას შერჩენოდა; ასეთი მდივნები კი მანამდე, მთელი ოცი წლის მანძილზე სალოცავ ხატად გვეგზავნებოდნენ, მაგრამ, საბედნიეროდ, როგორც მღვდლებში ერივნენ თევდორეები და გაბრიელები, ისევე, ხალხზე მზრუნველი პარტიული „მღვდლები“ — რაიკომის მდივნები, კერძოდ, იმ ორმოცდაათიანი წლების დასაწყისში, როცა სტალინის აჩრდილი ჭერ კიდევ არ იყო სულ მთლად გამჭრალი, ძალზე იშვიათად, მაგრამ აქა-იქ მაინც გაიჭაქანებდნენ ხოლმე...

გულით მინდა ერთი ამათგანის გვარიც კი დავასახელო, მაგრამ ვშიშობ: რაიკომის მდივნობის შემდეგ მან ორი-სამი

ხელმძღვანელი ადგილი გამოიცვალა, ამ პოსტებზე კი როგორ იქცეოდა-იღვწოდა, ეს კი აღარ ვიცი; ჩვენი ყოველდღიური ცხოვრება ხომ ბუნებით დიდად პატიოსანსაც უკან ახევინებს, აუფერულებს, თუ პირდაპირ, შეუნიღბავად ვიტყვი — ზნეობრივად რყენის, ასე რომ, ჩემგან გაცემული კატურკაციების სიგელს, საერთოდ, თუმცა დიდი არაფერი ძალა აქვს, და მაინც, ერთობ ვერიდები ხოლმე შეუმოწმებლად საშთამომავლოდ მის ბოძებას...

...ამ ამხანაგმა, ერთ ზღვისპირა ქალაქში პარტიის თავკაცად ყოფნისას, როცა გაიგო რომელიღაც დაწესებულების დარაჯ ჩაჩიბაიას შვიდი შვილი ჰყავს, მივიდა მასთან შინ... და რაც მისმა თვალებმა იქ იხილეს, უსიამოდ შეძრა მისი სული: ეს სახლი კი არა, ოჩოფეხებზე შემდგარი, წაქცევის პირას მიმდგარი ქოხი იყო; შინ და გარეთ, ირგვლივ ყველგან ღუბჭირი სიღარიბისა და სიღატაკის კვალი შეიმჩნეოდა...

და მაშინ ქალაქკომის ახალგაზრდა, ენერგიულმა და სამართლიანმა მდივანმა იქვე, ადგილზევე, გადაუღებლივ მოიხმო ჩვენი დროის სოცდაგრები (ძველებისგან განსხვავებით ამათ გაკოტრების შიში არც დღით, არც ღამით, არასოდეს არ აწუხებთ, რადგან სახელმწიფოს გრძელ ჯიბეში და ხალხის გამოხეულ ქისაში მუდამ ხელს აფათურებენ).

...მოიხმო და ჩაჩიბაიას წვრილშვილიანი ოჯახის საკეთილდღეოდ, არსენასავეით, ვის რა შეაწერა და ვის რამდენი...

და როცა ამათ თავი მოიღარიბეს („საიდან, პატენი?“) და სცადეს თავი მამა აბრამის ბატკნებად მოეჩვენ-გაესაღებინათ, ქალაქის თავმა მათ ასეთი ლულლული თავშივე შეაწყვეტინა, რასაც თქვენ ერთ დღეში იპარავთ, ეს მისი მხოლოდ ნოლინოლი პროცენტიაო... თავის მხრივ კი ჩაჩიბაიებს ქალაქის ფონდიდან სამოთახიანი ბინა გამოუყო, რომელიც წითელმა სოცდაგრებმა, რაკი სხვა ვზა არ ჰქონდათ, მორთეს და მოკაზმეს...

ამ მრავალშვილიანმა ოჯახმა უფრო კიდევ იმითაც გაიხარა, რომ მას არც ძველი ფუძე მოუშალეს — მიწაზე ფეხის დასადგმელი, ეზო-ქოხიც შეუნარჩუნეს.

ახლა კი, თქვენის ნებართვით, მკითხველო, ცოტას გადავუხვევ და ერთ სხვა ფაქტსაც შემოგთავაზებთ უკვე დღევან-

დელი სინამდვილიდან: შეიძლება 14 (თოთხმეტი!) — კვადრატულმეტრიან ოთახში შეიდი სული ცხოვრობდეს? ერთმანეთზე მიყოლებული ხუთი პატარა ბავშვი და მათი ახალგაზრდა მშობლები?

თურმე შეიძლება! განა პირმოტეხილ ქილაში ხამსა ცოტა ეტევა?!

თბილისის ერთ-ერთ გარეუბანში ასე ცხოვრობდნენ წლების მანძილზე ქეთევან მექვაბიშვილი და ვასილ ფანქველაშვილი თავიანთი ხუთი ბიჭუნათი... მათ არაერთხელ სთხოვეს იმ რაიონის უფროსებს ერთი წესიერი თავშესაფარი გამოემეტებინათ, მაგრამ ვიდრე ეს სამარცხვინო ამბავი საქვეყნოდ არ გახმაურდა, მანამდე მოწყალება არავინ მოილო...

(ახლა ხომ მაინც ვრწმუნდებით, იმდენ უპირავ სიტყვას გამრავლებაზე, რაც ამჟამად რესპუბლიკაში იხარჯება, როგორ ჩამორჩება საქმე გასამრავლებლად!).

ჰოდა, მინდა შეგეკითხოთ, იმ პ ი რ ვ ე ლ ი გამწმენდი, საამო თქეშის მერეც, „აქა-იქ“ მაინც, კიდეც ხომ არ შემოგვრჩნენ ისეთი პარტმანდატიანი „მღვდლები“, თავიანთ „წირვალოცვას“ ერის სასარგებლოდ ძალზე რომ ამოკლებენ?

ისე კი, რა საამური იქნებოდა იმ პ ი რ ვ ე ლ თქეშს მეორეც მოჰყოლოდა, მესამეც და, საერთოდ ეს თქეში ხშირად და სისტემატურად რომ მოდიოდეს: აკი მძიმე, ჩამოხუთული ჰაერი შემდგომ ოზონით იფილტრება და ირგვლივ ცხოველყოფელი ჟანგბადი მატულობს, ურომლისოდაც წესიერ ადამიანებს სუნთქვა უჭირთ, და თუ ხანი მოგვიანდა, ერსაც მთლიანად ასთმა ემართება...

ღიახ, ფანქველაშვილები...

რაკი იმჟამად შეუძლოდ ვიყავი და შინიდან გასვლა არ შემიძლო, ისინი ჩემთან, შინ მოვიწვიე... მეგონა, მარტო მშობლები გამომეცხადებოდნენ, — მთელი „არმია“ კი დამეცა თავს!

ასეთ „თავდასაცემს“ ყველა ქართველს ვუსურვებდი: ხუთი ბიჭი!

ყველაზე უმცროსმა, სამი თუ ოთხი წლისამ, უკვე მომზადებული რაღაც ძღვენ-საჩუქრის გადმოცემა დამიპირა... რა-

ლაცინ-მეტეი, რადგან მე მას ისე დავუცაცხანე, მოტანილზე არც დამიხედავს, ძღვენი და საჩუქარი წესით მე უნდა მოგართვათ, და არა თქვენ-მეტეი...

ავტონეკროლოგისა არ იყოს, ინტერვიუ საკუთარ თავთან გონებაში უკვე ჩამოკენილი მაქვს, სადაც უხილავი ინტერვიუერის შეკითხვაზე, ცხოვრებაში რა გებრალემათ ყველაზე მეტად, ასე ვუპასუხებ: ბავშვი, რომელსაც სათვალე სჭირდება, ერთიორად კი — სათვალეიანი პაწია ბავშვი...

ამ ერთი ციციქნა ფანქველაშვილ-მეხუთეს კი სწორედ სათვალე ეკეთა, პაწია-პაწია სათვალე, და მერე, უფრო ამის გამო, ბევრიც ვინანე, ჩემი ხმამალალი გაგულისებით ხომ არ შევაშინე-მეტეი...

ეს ახალგაზრდა ცოლ-ქმარი, რაკი, როგორც იქნა, ბინა უკვე მიიღეს, კიდევ გვპირდება კვლავ და-ძმებით შემატონ სიხარული თავიანთ ბიჭუნებს (ამ სიხარულის ფასი ჯერჯერობით მათ არ იციან!), გაიხარონ თავადაც და გაახარონ საქართველოც!

(გვიანდელი მინაწერი (1990 წელი): ამჟამად ფანქველაშვილებს რვა ბიჭი და ერთი გოგონა ჰყავთ; ფიქრობენ კი, ძმებს ერთი ძმა კიდევ შემატონ ცხრა ძმა ხერხეულიძეთა მოსაგონებელ-სადიდებლად... აფერუმ მათს ქართველობას! — 12 სული ახლა ქალაქელთა ერთ ოჯახში კი არა, ფშავ-ხევსურეთის ზოგ მთელ სოფელშიც აღარ მოინახება).

ერთ გაზეთში ამოვიკითხე ლოზუნგისებური: „ბევრი შვილი: სახელმწიფოს ძლიერებაა!“

საბოლოო ანგარიშით, ეს, რასაკვირველია, მართლაც ასეა, მაგრამ რაკი ახლა ჩვენ ბუხართან ვზივართ, და არა ტრიბუნის მახლობლად, მოდით ერთი, უზედამხედველო ცეცხლის პირას მანც ნუ შევიბორკებით და ვიმსჯელოთ გულლიად: ვინც შვილს აჩენს, სულაც არ ფიქრობს, ამით სახელმწიფოს გააძლიერებო...

ბევრი შვილი, უწინარეს ყოვლისა, ოჯახის ძლიერებაა, და-

ძმების ძლიერებაა, მშობლების ძლიერებაა, დაბოლოს, ნათესავ-
მეგობრების ძლიერებაა!

ღიან, თუ ძლიერია ოჯახი, ძლიერია სახელმწიფოც. მაგრამ
ესეც გვახსოვდეს: სახელმწიფოს ს ა მ ხ ე დ რ ო ძლიერება სუ-
ლაც არ განსაზღვრავს მის ს უ ლ ი ე რ ძლიერებას. ოჯახის სუ-
ლიერი სიძლიერე პირდაპირ არის დაკავშირებული სახელ-
მწიფოს სულიერ ძლიერებასთან...

სხვათა შორის, როცა ფანქველაშვილებმა 14-კვადრატულ-
მეტრიან სათხებოს თავი დააღწიეს და სამზეოზე გამოვიდნენ,
მათით მერე ტელევიზიამაც ისარგებლა — „ირეკლამა“ და აგ-
რეთვე ერთმა არასქელმა ჟურნალმაც თავის საიუბილეოდ...

ამ საზეიმო შეხვედრებზე ხუთი ბიჭის — ფეხბურთის ნახე-
ვარი გუნდის ახალგაზრდა დედამ, როგორც ეს მოსალოდნელი
იყო (ამას, აბა, როგორ დაავიწყებიანებდნენ!), მშობლიური
მზრუნველობისათვის დიდი მადლობა მიაგო მშობლიურ კომუ-
ნისტურ პარტიას და მშობლიურ საბჭოთა მთავრობას მის მრავალ-
შვილიან ოჯახზე ესოდენი მშობლიური მზრუნველობისათ-
ვის!

ჰო, მაგრამ... ხომ არ აჯობებდა, ეს მადლობა ბევრად ადრე
რომ თქმულიყო, ა?

ახლა, ისევ თქვენი მოწყალე ნებართვით, მკითხველო,
კვლავ სწორ, ვაკე გზას დავადგები და გავაგრძელებ სიტყვას
იმ ზღვისპირა, შედარებით არცთუ დიდი და არცთუ პატარა
ქალაქის თავკაცზე.

ეს ის წლებია, როცა ნიკიტა ხრუშჩოვი ცხრაბალიანი ზღვა-
სავით ბობოქრობდა და დიდად თავს იწონებდა თავისი ზღვა-
ენერგიით, მე მას სამარეში ხომ არ წავიღებ, ჩემ ხალხს უნდა
მოვახმარო...

და მართლაც, ჩვენი დიდი საბჭოთა ხალხის საკეთილდღე-
ოდ სიბრძნეს სიბრძნეზე აფრქვევდა, — არა მარტო თეორიუ-
ლად, პრაქტიკულადაც... სიმინდს, ამ მინდვრის დედოფალს,
ლამის იაკუტიაშიც დაუდგა ტახტი... სოფლების მოსრა-მოსპო-
ბა მოინდომა და მათ ნაცვლად აგროქალაქების ერთი ხელის

დაკვრით ამორტყვევა-აღმოცენება, მაგრამ რაკი დარწმუნდა, ამას ერთხელ კი არა, ხელის დაკვრა სამჭერაც დასჭირდებოდა, ამჯობინა ჯერ ისევ ერთი ხელის დასაკვრელი საქმისათვის დაედგა თავი; არსად, ქალაქის ზონაში არსად ძროხა არ გააჰაჰანოთ, არც მეწველი, არც ბერწი, მოსპეთ და გაანადგურეთო...

ჰოდა, ისე, როგორც სხვას, ამ ბრძნულ დირექტივასაც წინ, აბა, ვინ აღუდგებოდა, და დაიწყო საყოველთაო, ათეისტ-ულ-მერთოებისაც კი, ცხადია, ფარული, ჩუმ-ჩუმი წყველა-კრულვა, მსგავსი იმისა, ზემოთ რომ მოგახსენეთ („ჩვენი უფროსებიც აცხოვრე, ღმერთო, ისე, როგორადაც ისინი გვაცხოვრებენ ჩვენ“...).

...იყო საქონლის ბლავილი და იყო ბავშვების ღრიალი...

...იღვრებოდა პირუტყვის თბილი სისხლი და იღვრებოდა პირმეტყველის მღუღარე ცრემლი...

იმ ზღვისპირა ქალაქში ძროხა ბევრ მოსახლეს ჰყავდა, ეზოებში ებათ და იქვე კვებავდნენ და იქვე წველიდნენ.

ქალაქკომის მდივანს ამ ჰკუთით სავსე დირექტივამ ლამის ჰკუთ შეურყია: აბა, რა ხელით მოუღლოს ბოლო, რა პირით, რა სინდისით წააგლიჯოს მარჩენალი ძროხები მშრომელ ადამიანებს, მათს ბავშვებს, მათს ღლაპებს?

სხვა არა იყოს რა, სწორედ ეს ძროხები აძლევენ ქალაქს რძეზე მოთხოვნილების 35 პროცენტს! თანაც ისინი სულაც არ ამახინჯებენ ამ კობტა ზღვისპირა ქალაქს, და, საერთოდ, მათი არსებობა თითქმის არც იგრძნობა: ესენი ერთგული, თავმდაბალი, მეწველი საბჭოთა ძროხებია და, არც პატრონთან ერთად და არც უპატრონოდ, ქალაქის ქუჩებში არხეინად არ დააბოტებენ, როგორადაც მათი გაზარმაცებული, წმინდანებად მიჩნეული კოლეგები ინდოეთის დიდ ქალაქებში.

...და მაშინ, ამ ფიქრებით აფორიაქებული ქალაქკომის მდივანი იჩენს ჩვენი ღროისათვის გაუგონარ, არნახულ მოქალაქეობრივ გამბედაობას — ცხოვრებაში ერთხელ მაინც იქონიოს საკუთარი აზრი, რომლის ორჯერ ორი ოთხობას ხუთიანზე შეფასებული სულელიც არ გაიხდის საკამათოდ და... ტელეფონით უკავშირდება საბჭოთა საქართველოს ყველაფრის მეთაურს, ამხანაგ ვასილ მყავანაძეს:

— ...მე ამას ვერ ვიზამ... გადამაყენეთ, მომხსენით, მაგრამ მე ამას ვერ ვიზამ...

ხანგრძლივი პაუზის შემდეგ, ეტყობოდა, ნაფიქრალი ხმა მოისმა დედაქალაქის შიო ჩიტაძის ქუჩის შემოგარენიდან... დაბალი, დაბალი ხმა, თითქოს ისეთი, სხვას რომ არ გაეგონა („რამდენ პარტიულ ცივანს აქვს, გენაცვალე, ყური დაცქვეტილი... აი, მაგალითად, ერთი ასეთი თავიდან ძლივს რომ მოვიშორე, იმ დღესვე მოსკოვს გადაფრინდა და უცხოეთში მომუშავე ერთ დიდად ანგარიშგასაწევ კაცს დაარეკინა, და მეც, აბა, რა მექნა, რაკი ხელთ სხვა ვაკანტური თანამდებობა არა მქონდა, უზნეო კაცს, თეორიულად, ყველაზე უფრო ზნეობრივი გაზეთი ჩავაბარე“...):

— კარგი, ოლონდ... ნურც იმას იტყვი, ამის ნებართვა მე რომ მოგეცი და ნურც შენ იყვირებ ქვეყნის გასაგონად, ასე და ისეო... სხვებმა არ წაგბაძონ...

ასეთი, თუნდ საქოქმანო პასუხიც კი იმ დროს, ვასილ მკეაენაძის მდგომარეობაში მყოფისათვის, დიდი ვაუკაცობა გახლდათ.

თუ გაიხსენებთ, „შავი წიგნის“ ფურცლებზე კრემლის ნამესტნიკს საქართველოში და კრემლისათვის არცთუ სულ სანდოს* (ამიტომაც ინიშნება ხოლმე მეორე მდივნად რუსი), ზოგი ცოდვა კი გამოვუქექე, მაგრამ არც ისეთი რამ მივივიწყე და მივაფუჩეჩე, რაც მას ჩვენს თვალში ამაღლებს.

აი კიდევ ერთი ფაქტი, რომელიც არ მოწმობს მის წვრილმანკაცობას: 1965 წელს მარჯანიშვილის თეატრში ერთი დიდად ცნობილი დრამატურგის საკმაოდ მდარე ღირსების პიესა დაიდგა („ცხოვრების ჭარა“).

თუმცა ერთ-ერთ მის მთავარ პერსონაჟს, ლოპიანეს, როგორც ახლა ვამბობთ ხოლმე — ნეგატიურს, აზრობრივად საერთო არაა მქონდა რა მკეაენაძესთან, ჩვენმა დიდად ნიჭიერმა კომედიურმა მსახიობმა აკაკი კვანტალიანმა, რუსულ ყაიდაზე რომ ეძახდნენ, ვასილ პავლოვიჩის გრიმი გაიკეთა და, განსაკუთრებით, მოჩაპლინო უღვაშებით სულ პირწმინდად დაემსგავსა მას...

ჩვენს დროში და ჩვენს ქვეყანაში თეატრში კი არა, სამსულიან ოჯახშიც რამე რომ გაფაჩუნდეს, — თუკი ეს შენს პი-

რად გაჭირვებას არ ეხება, რაც ახლა, ახლობლების გარდა, აღარავის აღელვებს, — ამბის გამტანი ყოველთვის გამოჩნდება, აქ კი ინციდენტი დატრიალდა „საერთო სახელმწიფო დონეზე“ და... ცხადია, აბა, ვინ არ იჩქარებდა, ერთგული ქვეშევრდომობით გული რომ მოეგო და ეს ამბავი ვასილ პავლოვიჩისთვის ეცნობებინა, მაგრამ პავლოვიჩს, თუმცა ყოველივე ეს, ბუნებრივია, არაფრად ეჭაშნიკა, და მაინც მან...

დიახ, საკვირველი ის არის, რომ, რესპუბლიკის მასშტაბით, ნომინალურად ამ მეფის ტოლა კაცმა არავითარი რისხვა და არავითარი ელქექი არ დაატეხა თავს არც თეატრს, არც თეატრალურ ცენზურას და არც მსახიობს...

სიმართლე მოგახსენოთ, მაშინ ამ ამბავმა იმდენად გამაცეცა, ერთხანობას დებილი ინდაურივით ძალად გამოსაკვებიც კი შევიქენი, — ეს რა ხდება, ამხანაგებო, ეს რა ამბავია, ბატონებო, ნუთუ ჩვენი ქებული, ჯანსაღი პროლეტარული დემოკრატია დამპალ და წყეულ ბურჟუაზიულს ემსგავსება-მეთქი...

ო-ო, ღმერთმაც ნუ ქნას, ღმერთმაც ნუ ქნას!

ასე წარმოიდგინეთ, თვალწინ ზარდამცემი ნიკოლოზ მეორეც კი დამიდგა, თებერვლის რევოლუციის წინა ხანებში პეტროგრადის ზოგიერთ გაზეთს თითქმის მუხლდაჩოქილი რომ ეხვეწებოდა, — გეთაყვათ, ცუდს ნურაფერს დაბეჭდავთ გრიგორი რასპუტინზე, იმპერატრიცა ალექსანდრა ფიოდოვნა ავადმყოფურად განიცდის მის ლანძღვა-გინებასო...

...და ისინი, ეს რედაქტორები, ხელმწიფეს მაინც არ ებუებოდნენ და, თვითმპყრობელობის გადარჩენის მიზნით, გრიშკაზე კვლავ ბეჭდავდნენ მამხილებელ-გამაბახებელ წერილ-ფელეტონებს (რასაც, სხვათა შორის, ჩვენდა საბედნიეროდ, ვერც გაუბედავდნენ და ვერც შეჰკადრებდნენ ვასილ პავლოვიჩის თანამეცხედრე ვიქტორია ფიოდოვნას რაღაც განძოქროულობის თითქოს მითვისებასთან დაკავშირებით ვერც „კომუნისტის“ რედაქტორი მკედლიშვილი და ვერც „სოფლის ცხოვრებისა“ — დავითაშვილი); მომაგონდა აგრეთვე „Энциклопедический словарь Ф. Павленкова“, გამოცემული 1899 წელს, ესე იგი მეექვსე წელს ნიკოლოზის გამეფებიდან: შესამოწმებლად კვლავ ჩავხედე ამ ზორბა წიგნში და, მადლობა ტეინის სისხლ-ძარღვების გამათართოებელ პრეპარატებს, მეხ-

სიერებას, მათი შემწეობით ჯერ ჩემთვის არ ეღალატა, ავი მას-
ში ახლაც ზუსტად იმასვე წავაწყდი, რამაც ჯერ კიდევ ახალ-
გაზრდობაში ვამაოც-ვამაოგნა: არა შავრაზმელის, არა სოცი-
ალისტის, უფრო, ალბათ, მონარქისტ პავლენკოვის ამ ერთტო-
მიან ენციკლოპედიაში — თანაც იმ უსასტიკესი ცენზურის
დროს — Здравствующий Император ნიკოლოზ მეორისა და
კარლ მარქსის სურათები მოთავსებულია... თანაბარი ზომისა;
რაც შეეხება ტექსტს, ყოვლისშემძლე თვითმპყრობელს, ნი-
კოლოზს ეძღვნება 22 სტრიქონი, ხოლო ყოველნაირი შეფე-
ების, მონარქიზმის, მოსისხლე მტერს — მარქსს... 35!

აქ, როგორც იტყვიან, კომენტარი ზედმეტია, და როგორც
ამბობს ხოლმე ტელევიზიით ჩვენთან გამომშვიდობებისას ერ-
თი საერთაშორისო მიმომხილველი-პროფესორი, გმადლობთ
ყურადღებისათვის!

...„ცხოვრების ჯარაჟ“, თუმცა იგი ოპერატიულად კი გამო-
ვხმაურა საიმდღესო ჩვენს ცხოვრებას, მაგრამ როგორც ნაკ-
ლებად სრულყოფილი დრამატული ნაწარმოები, სცენაზე
მტკიცედ ვერ დამკვიდრდა, რესპუბლიკის პირველი კაცის სამ-
დღურავი, თუმცა ჩუმი, მაგრამ მაინც სამღურავი, კი მოიმკო...

...და ახლა მის წინაშე თავი მეტად უხერხულად იგრძნო
ლოპიანეს როლის შემსრულებელმა და სთხოვა მკავანაძეს აუ-
დიენცია. მკავანაძემ გაუწვალებლად მიიღო იგი, და მასთან ერ-
თად — სიცილის დიდოსტატი ალექსანდრე ჟორჯოლიანი და
სიცილის ქვეოსტატი ვახტანგ ნინუა. საუბრისას ამ კომედი-
ურმა სამეულმა სცადა ბოდიშისებურად თავი ემართლებინა,
სწორი ცნობა არ მოგაწოდეს, ამხანაგო ვასილ, ჰოდა, კარგი
იქნება, თეატრში თუ მობრძანდებით და საკუთარი თვალით
დარწმუნდებით ამაშიო...

მკავანაძეს სპექტაკლზე დასწრების არც სურვილი გამო-
ჟთქვამს და არც სულ იუარია, თავაზიანი გამოთხოვებისას ეს
კი უთქვამს მოსულთათვის, რა ვიცი, მე თითქოს ცუდი არაფე-
რი გამიკეთებია საქართველოსთვისო...

როცა ამ ჩემმა საყვარელმა მსახიობებმა ცომედიური ნიჭი

უფრო იშვიათია, ვიდრე ტრაგიკული) ამ ვიზიტის ამბავი დეტალურად გადმომცეს, მე როგორღაც ერთი ისტორიული ფაქტი გამახსენდა, ისევე ნიკოლოზ მეორის ცხოვრებიდან: ერთხელ იმპერატორმა სინოდის ობერ-პროკურორი პობედონოსცევი მოიწვია ფინჯან ჩაიზე... აი, სწორედ ის პობედონოსცევი, რომლის მონურ მონარქისტობაზე, რეაქციონერობაზე, ავკაცობასიგლახეზე უამრავი რამ გვსმენია ახალ დროში მცხოვრებ ძველი დროის მეისტორიეებისაგან...

...დიახ, მოიხმო თავისი ერთგული ქვეშევრდომი ობერ-პროკურორი და ერთობ ზრდილად სიტყვა ჩამოუგდო საკმაოდ დიდი ხნის წინათ გარდაცვლილ ერთ, ალბათ, ცხადია, ღირსეულ პიროვნებაზე, — წმინდანებში შესარაცხიაო...

...და ოი, საკვირველებავ, ამაზე მეფის ჩინოვნიკმა, თუნდაც უმაღლესი რანგის მეფის ჩინოვნიკმა თავის მეფეს, იმ მეფეს, რომელსაც ლენინმა „Николай Кровавый“ შეარქვა, უპასუხა, წმინდანებში შერაცხვა, ხელმწიფეო, არც სინოდის საქმეა და არც მეფის, — ამას ხალხი წყვეტსო...

ხ ა ლ ხ ი ო !..

მინდა გამოცანა შევთავაზო მათ, ვინც ახლა 50-ისა და მეტი წლისაც არის: სულ მცირე ხნით მაინც, იქნებ წარმოიდგინოთ ამხანაგი სტალინი, რომელმაც მოიხმო რომელიც გნებავთ ამხანაგი და სთხოვა მას ამა და ამ ამხანაგის „წმინდანებში“ შერაცხვა, ანდა, რომელიმე უკვე არაამხანაგის „წმინდანებიდან“ გარიცხვა, — გამოცანა გვეკითხება, რას უპასუხებდა ანდა როგორ მოიქცეოდა ეს ამხანაგი, თუნდ უმაღლესი თანამდებობაც სჭეროდა მას და თუნდ რა ცხრაფუთიანი ქკუითაც ყოფილიყო იგი აღკურვილი?

ვისაც, შესაძლოა, შიშით ახლაც მუხლები აუკანკალდება, ხალხთა დიდი ბელადის წარმოსახვისას, ნება ეძლევა მის ნაცვლად რომელიმე სხვა დიდი თანამდებობის ამხანაგი წარმოიდგინოს, აი, თუნდაც, ამხანაგი ჩარკვიანი — ჩვენი რესპუბლიკის იმდროინდელი პარტიის მდივან-კაპიტანი, ანდა, თუ ესეც ეძნელა, მისი რომელიმე რაიკომის მდივან-მიჩმანი მაინც, აი, თუნდაც ამხანაგი ლუარსაბოვი — გამგებელი მილოტოვის რაიონისა...

რასაკვირველია, ამ შემთხვევაში გამოცანის მასშტაბი —

სტალინიდან ლუარსაბოვამდე — დაპატარავდება და მასთან ერთად, პროპორციულად, დაპატარავდება „წმინდანებიც“, როგორც შესარაცხავი, ისე გასარაცხავიც...

ეგრეთ წოდებული თბილისის ზღვის მახლობლად, მწვანე მთის ძირას, პერსონალურ პენსიონერთა პანსიონატია. სახელი, როგორც ამჩნევთ, ერთობ ამაღლებული აქვს, მაგრამ იგი, არსებითად, მაინც Дом престарелых-ის ნაირსახეობაა, ოღონდ ჩვეულებრივზე, შეიძლება, ცოტა უკეთესი.

ჰოდა, ამ, ასე თუ ისე, პრივილეგირებულ დავრდომილთა სახლში ერთი დიდად განათლებული, წესიერი ხნიერი კაცი (პ. გ.) იმყოფება, კაცი-მარქსისტი, ამ სიტყვის ძველებური, სრულყოფილი გაგებით.

როცა ის, არცთუ ისე ახალგაზრდა, პარტიის ცენტრალურ კომიტეტში პასუხსაგებ პოსტზე მუშაობდა, ერთხელ დილით, გაზეთის კითხვისას თავის კაბინეტში, დაბალი, მაგრამ მუქარით აღსავსე ხმა შემოესმა:

— Вы неправильно читаете газету!

აიხედა და... გააცივა წელში: თავზე ადგა „ასობი ადელის“ უფროსი ამხანაგი ხოშტარია, რომლის სტალინურ ფხიზელ თვალს ერთი გადავლებითაც კი შეენიშნა, რომ ამ ჭერჭერობით კიდევ ამხანაგს გაზეთი, კითხვისას, ისე გადაეყეცა, ბელადის დიდი სურათის ყურის ნაწილი გადაეცილში მოქცეულიყო...

ეს მას თუმცა სრულიად უნებლიეთ ყოველგვარი „ანტონის“ მოუფიქრებლად კი მოუვიდა, მაგრამ ახლა ფიცსა და თავის მართლებას რაღა ფასი ექნებოდა!..

ამხანაგ ხოშტარიების აზრით, რაც უთქმელად იგრძნობოდა, ეს იყო დიდი პოლიტიკური დანაშაული, ხელყოფა იყო ხალხთა მამის ავტორიტეტისა, რაიც... რაიც... რისთვისაც... მმ...

ჰოდა, ის დღე და, უფრო კი, ის ღამე თეთრად, შიშისზარის ქვეშ გაათენა ამ ჭერ კიდევ სათანადოდ გაუფორმებელმა ხალხის მტერმა... მას ეკვი არც ეპარებოდა, რომ დაიჭერდნენ, მაგრამ რაღაც სასწაულით არც იმ ღამეს „აიყვანეს“ და არც ამის

მერე, ელოდა კი, და ამ მუდმივ ლოდინში დაჰიანდა, დაავად-
მყოფდა სულიერად და ჯანში გაიტეხა ფიზიკურად...

ოცდაათიანი წლების დასაწყისში ჩემს ახლო ნაცნობს,
წლოვანებით ჩემზე ბევრად უფროსს, პროფესიით გაზეთის
კორექტორს, ქონებით კი — არც ვაჭარბებ და არც ვალამა-
ზებ — ისეთ პროლეტარს, როგორც მარქსს ჰყავდა წარმოდ-
გენილი „კაპიტალის“ წერისას, და თანაც სახელოვანი, თავა-
დის გვარის მქონეს, რაღაც მას ახლა ვეებერთელა მთის სიმ-
ძიმით აწვა დაქანებულ მხრებზე, იანვრის ერთ გრძელ ღამეს
საშინელი სიზმარი ძერასავით თავს დააცხრა: თითქოს სტალი-
ნის სიტყვაში მიუტევებელი შეცდომა გაჰპარვოდეს — ბელა-
დის გვარი გადატანისას შუაზე გაეყოს...

და როცა საკუთარ თავთან ბორჯვა-ბრძოლაში, თითქოსო
ბელმოკლულ, გააფთრებულ დათვის შეებაო, — კოშმარულ
სიზმარს თავი დააღწია და იგრძნო, აქამდე ოფლის მორევში
ცურავდა თურმე, და ასე შეუშრალეზლად, დაკერებულ-მი-
კერებული პერანგის ამარა, გონს გადასულივით სირბილით
სტამბისკენ გაექანა...

...შეაღო საამქროს კარი და... იმ პირველი, ანტიკური მარა-
თონელივით გულწასული დაეცა ცემენტის იატაკზე: გაზეთი
უკვე იბეჭდებოდა...

...გაუგონარი შიშინანობის იმ წლებში სიტყვა „დაპატიმრე-
ბის“ ნაცვლად ყველა ეხმარობდით — დაიჭირესო, რაც, ენობ-
რივი სიწმინდისა და აზრობრივი თვალსაზრისით, არა მგონია,
სწორი და მართებული იყოს: დაჭერა შეიძლება იმის, რაც
გარბის. ვერ იტყვი, მაგალითად, კუზე, დაიჭირესო.

ბერიამ ქართული მწერლობის მშვენება — მიხეილ ჭავჭა-
შვილი — ლოგინში, მძინარე დაიჭირა...

ვიდრე ქართველი ხალხი იარსებებს, „არსენა მარაბდელის“
დამპყრის სახელი, თუნდაც მარტო ამ ერთი ურჩხულობისთვი-
საც კი, მარად კრულვით და სიძულვილით იქნება ხსენებული...

ამბობენ, ჭავჭაშვილი მეგრელი რომ ყოფილიყო, ბერია
ხელს არ ანლებდაო, და რომ ვითომ მეგრელობამ გადაარჩინა

იმ გულისა და გონების შემზარავ 37-38 წლებში „ფაშისტი“ გამსახურდია, „თავადი“ შალვა დადიანი, „მენშევიკი“ ლეო ქი-აჩელი და „დაქაშნი ძმანი მათნი“ — დემნა შენგელაია და სი-მონ ჩიქოვანი...

ამ შეებნელი საქმის ვითარებას ახლა ვინ ეშმაკი გაარკვევს, ისე კი, მეოცე სუჟენეში, როცა ფეოდალური ურთიერთობანი შორეული წარსულის სამუხეუმო კუთვნილებაა, ქართველების დაყოფა-დანაწევრება მეგრელ-ქართლელ-სვან-გურულ-თუშ-აჭარლებად და კიდევ სხვად, — ჩვენთვის დიდი სამარცხვინო ამბავიცაა და დიდი უჭკუობაც.

კუთხურ პატრიოტიზმს რომ ვეძახით, ეს პატრიოტიზმი კი არა, ბოდიშს მოვითხოვ ამ სიტყვისთვის, ვირობაა ერის მი-მართ. მტკიცედ და გადაჭრით იმასაც ვიტყვოდი, რომ ამ საძ-რახისი უბადრუკობის მედროშენი, გონებაჩლუნგ ყვეყნთა გარდა, მეტწილად უნიკო და უმაქნისი ადამიანები არიან, ან-და მსხვილფეხობის მონატრე წვრილფეხა ავანტურისტები.

დღევანდელმა ანალგაზრდობამ, არა მგონია, მიახლოებით მაინც იცოდეს ამ ოცდაათიოდე წლის წინათ პროვოკაციულად შეთითხნილი „მეგრელების საქმისა“, რომელმაც არა ერთი და ორი ქართველი ლამის ფიზიკურადაც კი იმსხვერპლა.

„მეგრელებმა შეგვეპაო“, — სტალინის გულის სიღრმეში ამ ავი თესლის ჩამგდებნი სწორედ ის ელისაბედაშვილ-ეგნა-ტაშვილები იყვნენ, რომლებიც ნიკიერი საქართველოს ფონზე უფერულ კაცუნებად გამოიყურებოდნენ, მათი უღლის გამ-წვენი კი — მგელაძე-რუხაძეები — ოლონდ რესპუბლიკაში ხე-ლისუფლების მწვერვალზე მოქცეულიყვნენ, ამისათვის არ მო-ერიდებოდნენ არც...

აი, ახლა უკვე ერთი მივიწყებული პროლეტარული პოეტი რომ იფიცებოდა, მე დედას მოვკლავ, მამას დავახრჩობ, რევო-ლუციამ თუკი მიბრძანაო...

ამათ საამისოდ ბრძანება არც დასჭირდებოდათ.

თავისთავად დიდი სიბრყვე იყო, უმაღლესი სამეთაურო ადგილები ეთნოგრაფიული ნიშან-თვისებით რომ ნაწილდებო-და. ერთხელ, ამ პრინციპის მიხედვით, ცენტრალური კომიტე-ტის ერთ-ერთ მდივანად ისეთი კაციც მოხვდა, რომელსაც თა-ვიდან ბოლომდე „თხა და გიგოც“ არ წაეკითხა.

დაე ყველა მდივანი და ყველა მინისტრი სულ ქართლებში იყვნენ ანდა ლეჩხუმლები, თუნდაც წოვა-თუშნი, ოლონდაც იყოს ყველა ქვეიანი, ნიკიერი და პატიოსანი... ასეთებმა კი არ შეიძლება ერთნაირად არ იზრუნონ საქართველოს ყოველ კუთხეზე, მის ყოველ ეზო-ქარზე და მის ყოველ ადამიანზე, ფშაველი იქნება იგი თუ მესხი...

სამწუხაროდ, ახლა მემუარები თითქმის სრულებით არ იბეჭდება, და ეს ალბათ უფრო იმიტომ, რომ მათ თითქმის აღარავინ წერს.

ღმერთმაც ქნას, საქმე ისე იყოს, რომ მალულად წერდნენ და შთამომავლობას ხელნაწერის სახით მაინც უტოვებდნენ, რაც, მართალი გითხრათ, ერთობ მეექვება, — ჩვენ ხომ ახლა პეპელასავით ერთი დღით ვცხოვრობთ ხოლმე, არც წინ ვიყურებით, არც უკან...

(საკუთარი ყურით მაქვს მოსმენილი ხელოვანთა სასახლეში 1936 წელს მიხეილ ჯავახიშვილის საჯარო გამოსვლიდან: „ამ დღეებში 56 წლისა შევსრულდი და უკვე დროა მემუარების წერას შევუდგე“).

არადა, ბევრი რამ იკარგება ისტორიისათვის. ჩემ მიერ ზეპირი გამოკითხვის გზით მიკვლეული მონაცემებით, შეიძლება დაბეჯითებით ითქვას, რომ სტალინი ბოლოს მიხვდა კიდევ, რომ მეგრელების საქმეს“ სიმართლის სუნი არ უდიოდა, და რომ მას მიქელ-გაბრიელი არ წამოწეოდა, მის მოთავეებს, ალბათ, მადლობას არ მიაგებდა.

მეგრელები საქართველოს ყოველთვის მტკიცე ბურჯად ედგნენ, და ეს ახლაც ასეა (გადაგვარებულ-გააფხაზებულეების გამოკლებით, მაგრამ ამათში ლაღიძეები და წერეთლებიც ხომ ურევია!). მარტო ის რად ღირს — ამაზე აღრეც ვწერდი — ჩვენი ქვეყნის სხვა კუთხეებთან შედარებით, მრავალშვილიანობა, აჭარის შემდეგ, ყველაზე მეტად სამეგრელოში შეინიშნება.

სვანეთშიც.

უკვე კარგა ხანია გამოუცხადებელი ომი მიმდინარეობს იმის თაობაზე, როგორ გამოითქვას და დაიწეროს: რუსთაველი თუ რუსთველი...

ამ „ომში“ არათუ მეცნიერთა გარკვეული ნაწილი ემხრობა „რუსთველს“, — ამას წინათ „რუსთველებისთვის“ მხარის ასაბმელად ოთხგვერდიანმა „ნიანგმაც“ კი გამოყო ფენი: როგორც ჩანს, სატირულ-იუმორისტულ ლიტერატურაშიც კი უკვე ცდილობენ დაამკვიდრონ „რუსთველი“, ალბათ, იმ პრინციპით, რომ... გრძელი გვარი მოკლედ ითქმის, ამით არის გვარი კარგი..

მე, რა თქმა უნდა, რუსთველიანაში ჩემი თავი მეოთხედი კაპიკის საღირალ დილეტანტადაც არ მიმაჩნია და, აბა, როგორ შევებდავ ჩვენს სათაყვანო აკაკი შანიძის აზრს თუნდ პატარა-პატარა, ზღვის ტალღებით გაბანილი, სუფთა-სუფთა, თეთრზე თეთრი კენჭიც კი ვესროლო, მაგრამ როგორც, ასე თუ ისე, გათვითცნობიერებულ მკითხველს, მაინც მგონია, რომ რუსთველობა არათუ რამეს შემატებს რუსთაველს, — ზიანსაც კი მიაყენებს.

ქართველი ხალხი, სულ ცოტა, ეს ორი საუკუნეა ისე შეეჩვია — რუსთაველიო, ახლა მისი გადაჩვევა სარუსთველოდ ფუჭი შრომა და ფუჭი გარჯა იქნება...

ან კი, ეს ვითომ ასე აუცილებელი და საჭიროა გინდ მეცნიერებისათვის და გინდა ხალხისთვის? თანაც, თუ ამას პრობლემა დაერქმევა, — იგი უკვე აღარც არის მარტო ჩვენი საშინაო საზრუნავი...

რუსთაველის ორჯერ სამსოფლიო ეუბილემ, საქართველოს გარეთ „ვეფხისტყაოსნის“ მრავალ და მრავალ ენაზე თარგმნა-გამოცემამ საყოველთაოდ აახშიანა და დააკანონა „რუსთაველი“...

ჰოდა, ისეც დაგვიანებით და ჰირის ოფლის ღვრით ძლივს გავედით მსოფლიო ასპარეზზე, რაც ყველა პატარა ერისათვის ძნელად მისაწვდომი ოცნებაა და... ახლა ყველა ჩვენს უცხოელ მოკეთე-მკითხველებს ვამცნოთ, ბატონებო, თურმე ვცდებოდით, ჩვენი დიდი-პოეტის გვარი რუსთაველი კი არა, რუსთვე-

ლი ყოფილა, და თქვენც ყველგან, სადაც რუსთაველი გიწე-
რიათ, რუსთველზე გადაასწორეთ-თქო?!

(გვიანდელი მინაწერი (1990 წ.): ამის ირგვლივ უფრო
დაწვრილებით იხილეთ ჩემი წერილი „რუსთაველი“, რომე-
ლიც, ავტორის ხანგრძლივი წვალების შემდეგ, როგორც იქნა
დაბეჭდა ვახტანგ ჭელიძის „ლიტერატურულმა საქართველომ“
(8 მარტი, 1984 წ.).

ორიოდე წლის წინათ ჩვენს პრესაში ერთი დიდად პატივსა-
ცემი, მართლა აკადემიკოსის სტატია დაიბეჭდა, რომელშიც
იგი ამტკიცებდა, მე-14 საუკუნეში მცხოვრები მხატვარი და-
მიანე... დამიანე კი არაა, — გერასიმე იყო, და მოითხოვდა სი-
მართლის აღდგენას გერასიმეს სასარგებლოდ და დასადგენად.

მე მგონია, თუნდაც ასეც იყოს, მაინც აღარ ღირს, აქამდე
რასაც დამიანეს ვაწერდით, ასეული წლების გასვლის შემდეგ,
გერასიმეს მივაწეროთ, და არც სადისერტაციო თემის მაძიე-
ბელ პირს უნდა ჩავაგონოთ, რომ დამიანეს გაგერასიმება მის
გაკანდიდატებას უმალვე გვირგვინს დაადგამს.

მთავარი ის კი არ არის, დამიანე გერასიმე იყო თუ ნიკი-
ფორე, მთავარი და არსებითი ის არის, რომ დამიანე ქარფე-
ლი იყო, თანაც „ისეთი“ ქართველი, რომ ახლა ამის გამო —
ჩვენს გახარებას! — სომხებიც არ გვედავებიან.

გვარებთან დაკავშირებით აქვე გაკვრით იმასაც შევნიშნავ-
დი, რომ ქართული გვარები, რომლებიც მთავრდება „ია“-ზე,
როგორც, მაგალითად, გვარამია, ჭანტურია, სალია, კვარაცხე-
ლია და მრავალი სხვა ამისთანანი, რუსულად ისე არ უნდა
იწერებოდეს, როგორც ახლა იწერება (და იბეჭდება): Гвара-
мня, Чантурия... არამედ Гварамия, Чантурия...

ასეც წერდნენ კიდევ თავიანთ გვარებს ლინგვისტიკასა და
რუსულ-ქართულ ორთოგრაფიაში ისეთი გაწაფული მეცნიე-
რები, როგორიც იყვნენ ვარლამ Топурия, სიმონ Джанашиа.

ეს სულაც არ იქნება მიბაძვა თუ თარგის გადმოღება მეგ-
რული გვარის მქონე გააფხაზებული ქართველებისგან, რომ-
ლებიც ამ სფეროში ჩვენზე მეტ მიხედვრილობას იჩენენ.

თემქის დასახლებაში მცხოვრები ერთი, თბილისის უნი-
ვერსიტეტდამთავრებულის და, მაშასადამე, პლიუს საშუალო
ჯანათლების მქონე პირის, პერსონალურ პენსიონერთა პანსიო-
ნატის დირექტორისადმი მიცემული

„განცხადება

მოგახსენებთ, რომ თქვენი ტერიტორიის ზედა განაპირა
მხარეს მქონდა მიწის ნაკვეთი შემოკავებული 12 წელია,
რომელიც მოყვა თქვენი ტერიტორიაზე. დაახლოებით
200 კ. მეტრი. აღნიშნული ტერიტორიაზე გთხოვთ შემი-
ნარჩუნოთ ოჯახის საჭიროებისათვის ხილი და ხეივანი.
გაძლევთ პირობას ჩემი ხელით დავამუშავებ მიწის ნაკ-
ვეთს მოვიყვან სხვადასხვა სახეს ბოსტნეული ყოველ-
წლიურად ჩავაბარებ თქვენი ორგანიზაციას კვების
ბლოკს საერთო წესით. საჭიროა წყალი და ცოტანაკელი
თქვენი დახმარება.

„განცხ: (ხელმოწერა)“

იმედი მაქვს, მენდობით: აზრის გამომხატველი ყველა ატ-
რიბუტი, ბრუნვა თუ სასვენი ნიშანი (თუ მისი უნიშნობა)
ყველაფერი-ყველაფერი „განცხ“-ადებლისა აბსოლუტურად
ზუსტად გადმოვიწერე, რათა თქვენ, ჩემი არ იყოს, დაგბადე-
ბოდათ უუბრალოესი კითხვა:

ამის და სხვა მისებრ ათი ათასების გონება წლითიწლობით
ჯანათლებით (???) რომ არ დაებნელებინათ და დროულად
აღმოეჩინათ მათთვის „წყალი და ცოტანაკელი თქვენი დახ-
მარება“, მიწა საშრომლად და სოფელი საცხოვრებლად, აბა,
რა საპრესტიჟოაო, — არ ჩავგონებინათ და ქალაქად არ ჩამო-
ერეკათ, განა ქვეყანა ახლა სურსათის სიუხვეზე იოცნებებდა
და განა საჭირო იქნებოდა აგიტაცია-მოწოდება

„ყოველ ეზო-კარს, ყოველ კომლს — საკუთარი
სასურსათო პროგრამა“?!

წავლენ თუ არა ახლა ისინი „უკან“, ეს ჯერ კიდევ ამ ოთხასი წლის წინათ განჭვრიტა შექსპირმა:

დამტკბარ წუმპეზე ვინც გაცვალა მიწის სურნელი,
ის უძვირფასეს ატლასებსაც დაფლეთს ძაძვებად.

ღიახ, ეს მხოლოდ კონსტანტინე ლორთქიფანიძის აჩქარებული დასკვნით... „მთას დაუბრუნდა მთიელი“

არადა... უგლებ-უსოფლოდ არ არის პური, უგლებ-უსოფლოდ არ არის ხორცი, არ არის რძე, არ არის კვერციხი...

„საქართველოს დაღუპავს ცრუგანათლება“, — ეს სიტყვები დიდი გულისწუხილით ამოთქვა ერთმა ჩემმა ახლო ნაცნობმა, მართლა სწავლულმა და მართლაც პატრიოტმა ლეონიდე კამარელმა ამ ოცდაათი წლის წინათ...

გვიანდელი მინაწერი (ივლისი, 1990 წელი): ამ „განცხადების“ დაწერიდან თითქმის ათი წლის შემდეგ თბილისის ერთ-ერთ გაზეთში ამოვიკითხე აღმაფრენის გამომხატველი შეძახილ-სათაური:

„გადავაქციოთ ქუთაისი საუნივერსიტეტო ქალაქად!“

ცოტა მოგვიანებით სხვა გაზეთში კი — უფრო აკადემიურად წარმონათქვამი:

„...ამ და სხვა სახის პრობლემის გადაჭრა შესაძლებელია ბათუმის შოთა რუსთაველის სახელმწიფო პედაგოგიური ინსტიტუტის სახელმწიფო უნივერსიტეტად გადაკეთებით“.

(ხაზგასმა ავტორისაა, ერთმანეთზე მიყოლებული ეს ორივე „სახელმწიფო“ მისივეა...

დასტურ, საბჭოთა სახელმწიფოში არა მარტო უნივერსიტეტს, — ყველაფერს, გარდა ოჯახისა, ეკლესიისა, სასაფლაოსი, ნეტავ რატომ უსწრებს ხოლმე წინ „სახელმწიფო“... როგორ, ჩვენს ქვეყანაში კერძო უნივერსიტეტებიც არსებობენ?)...

ღიახ, გადავაქციოთ... გადავაკეთოთ...

ჯერ ის ერთი, სატახტო უნივერსიტეტიც კი ვერ დაგვიმსგავსებია, თუნდაც მიახლოებით, ნამდვილ უ...უნი...

(ო-ო, მყავდეს ცხენი, თუნდაც შეუკაზმავი, მაშინ ამ ფრაზას მივიბუღ-მოვიბუღად მაინც დაეამთავრებდი და კედელზე მიტყულებდის ან შემეშინდებოდა „სწავლას მოწყურებული“, ჩვენი „შეშანიშნავი“ ახალგაზრდების მხრივ, რომლებიც თავიანთი პაპიკო-დედიკო-ბაბუკა-ბებიკოების სარღლობით მეცნიერების ტაძრის აღებას (თუ დანგრევას?) ქვების ბათქაბუთქით რომ ცდილობენ...).

ჩვენ — ვინ არ იცის! — სამღებრო სარბიელზე რა დიდებული ოსტატებიც ვართ! აი, მაგალითად, ჯერ იყო და, უსახური „პლენანოვი“ ფუნჯის ერთი მოსმით „გაეაღმაშენებლეთ“, ამას წინათ კი ამ სიგლახეს უარესი სიგლახე მივუმატეთ: ათასი რკულის, ჯოლომოლო მობაზრეებით მუდამ სავსე უგვიანო, მუდამ ნავიანი ჯერ სადგურის და მერე ჩელიუსკინის ქუჩა თამარ მეფის გამზირად გადავღებეთ, თითქოსდა ამით დიდი თამარი ერთიორად გადიდდება, ამაღლდება ჩვენს, ვაი, რომ მართლაც „დასაფსებ“ თვალეში, ქუჩა პროსპექტისგან რომ ვერ გაურჩევია...

პოეტი, რომელიც აგერ ახლა ტელევიზიაში „გამოუშვეს“, არ ეკუთვნის იმ ნაკადს, რომელმაც მწერალთა კავშირის მდინარე, თავისი წვერობით, კიდევ უფრო წყალუხვი გახადა. იგი, ამ მხრივ, საკმაოდ სტაჟიანია და, თუ ცოდვას არ დავიდებთ, ამავე დროს ნამდვილი პოეტიც არის და, შეიძლება, ასე კატეგორიულად და უაპელაციოდ ამიტომაც გაგვაცნო თავისი კრედიტ-მრწამსი: „მე პატივს ვცემ იმ ადამიანს, რომელიც რასაც ფიქრობს, იმას ლაპარაკობს“.

ჩვენი დროისათვის ამ გაუგონარი ვაჟკაცური, შესავალი აღსარების შემდეგ საკუთარი პოეზიის მარგალიტები საახალწლო თოვლის ფანტელელებით გადმოგვაყარა, რომელთაგანაც მე პირადად გონებაში უფრო ეს ორი სტრიქონი ჩამებეჭდა, რამეთუ ისინი ჩვენს სადღეისო სადარღებელს უშუალოდ ეხმიანებიან:

მე ისიც მყოფნის ჰაერს რომ ვსუნთქავ,
მე ისიც მყოფნის მზეს რომ ვუყურებ!

ო, ნეტავი ჩვენც ასე, ჩვენც, ჩვენც!..

ნეტამც ასე უმტკივნეულოდ, ასე ბარის დაურტყმელად, თოხის მოუქნევლად გადაგვაჭრევინა ჩვენი კერძო, ინდივიდუალური სასურსათო პროგრამა!

თუმცა ვილაც-ვილაცეები იმასაც ამბობენ, რომ ამ მგოსან-მა მშვენიერად იცის, არც მზე ჩაქრება და არც ჰაერი გამოილევა, — ყოველ შემთხვევაში მისი სიცოცხლის მანძილზე, — და მაინც, ერთი დიდი თანამდებობის პირს კაბინეტისა და ბინის ტელეფონი იმდენჯერ აუწყრიალა, სმენა დაუქვეითა, და ბოლოს ამანაც ამჯობინა დალლილი ხელი ჩაეჭნია და გაეცა განკარგულება, რათა მისი პოეზია ორმაგი ტირაჟით გამოეცათ.

და გამოსცეს კიდევ!

...და პირველ რიგში, და ეს, ცხადია, არც საკვირველია, — თანახმად მისივე მრწამსისა, აკი რასაც ფიქრობს, იმასვე წერს და ლაპარაკობს თურმე, — მადლიერმა ავტორმა წიგნი თავის დიდ მოამაგეს სულ რჩეულ-რჩეული საქმები სიტყვებით შეკონილი მიუძღვნა, ოლონდ... ჰმ... ცოტა უცნაურად ის გვეჩვენება, რომ თითქმის ზუსტად ასეთივე ეპითეტებით და „მართლა პატივისცემით“ ბევრი სხვა „სახელოვანი მამულიშვილი“ და „საქვეყნო საქმისათვის თავდადებული“ შეამკო და მათ შორის მისი სახლის მახლობლად მდებარე გასტრონომიული მაღაზიის გამგე და იმ სექციის გამყიდველიც, სადაც, მართალია, არცთუ ისე ხშირად, როგორც ახალი მთვარე, მაგრამ დროდადრო მაინც გამოჩნდება ზოლმე თუ ძეხვეული, თუ ხორციეული, თუ ფერმის რახიტინი ქათამი, დიდ სადღესასწაულო უქმე დღეებში — ბულგარული ბრინჯაც კი!..

ჰოდა, რაკი ჩვენი მუტრიბ-ჩანგოსნისათვის ჩვეულებრივი ამბავი ყოფილა ილაპარაკოს ის, რასაც ფიქრობს, ცხადია, წერითაც წერს იმას, რასაც გულში გაივლებს, ამიტომ:..

„საბჭოთა ვაქრობის უანგარო მუშაკს, სპეტაკ და ნამდვილ ადამიანს“...

ო-ო, ამ ნამდვილი ადამიანების მიმართ ქება-დიდების დი-
აპაზონს, მე მგონია, კიდევ უფრო გააფართოებდა, თავისი პო-
ეტური თხზულების გამოსვლამდე რომ წაეკითხა ერთი უმაღ-
ლესი სასწავლებლის ესთეტიკის კათედრის დოცენტის წერილ-
ში — „როგორი უნდა იყოს გამყიდველი?“ — შემდეგი რამ:
გამყიდველს მოეთხოვებაო

„თავაზიანობა, ტაქტი, ინიციატივა, ხასიათის სიმტკი-
ცე, ენთუზიაზმი, საქმიანი ეთიკა, სიმარდე, იუმორის
გრძნობა, სასიამოვნო გარეგნობა, სალი მსჯელობა, გულ-
წრფელობა, ფიზიკური გამძლეობა“.

(გაზეთი „თბილისი“, 21 მაისი, 1982 წ.)

დიახ, როგორც ხედავთ, კარგი გამყიდველის სახელი რომ
დაიგდო, ამისათვის საჭიროა, თურმე, თავაზიანობა (აღბათ,
სულ ცოტა, პროფესორ-აკადემიკოს ვახტანგ ბერიძისა), ტაქტიც
(ამისივე), ინიციატივა (სტალინისა), ხასიათის სიმტკიცე (ამი-
სივე), ენთუზიაზმი (პირველი ხუთწლეულების შრომის გმირები-
სა), საქმიანი ეთიკა (თვით ამ წერილის ავტორისა), სიმარდე
(ფეხბურთელი მესხისა, — თუ მაშის არა, შვილის მაინც), იუ-
მორის გრძნობა (მარკ ტვენისა), სასიამოვნო გარეგნობა (თუ
ქალია — მედეა ჯაფარიძისა, თუ კაცია — ჯორჯ გორდონ ბაი-
რონისა), სალი მსჯელობა (იმანუილ კანტისა), ფიზიკური გამ-
ძლეობა (კიდაობაში თხუთმეტგზის მსოფლიო ჩემპიონ არსენ
მეკოკიშვილ პლიუს ხუთგზის მსოფლიო ჩემპიონ ლევან თელი-
აშვილისა, — სხვათა შორის, ორივე საგარეჯოელისა!), გულ-
წრფელობა (აი იმ ფილოსოფოს დიოგენისა, ბოჰკაში რომ
ცხოვრობდა და ალექსანდრე მაკედონელის კითხვაზე, რას
ისურვებ, ყველაფერს გიბოძებ, რასაც კი მოთხოვო... ჰოდა, ის
კი არ სთხოვა, მსგავსად ჩვენი ღროის ისეც დიდბინიან მარ-
ქსისტ ფილოსოფოსებისა, შენი ცხენი ბუცეფალი რო გაქენ-
დება, იმოდენა ბინა გამოძიყავი ვაკეშიო, — გვერდით მიდექ,
მზეს ნუ მიჩრდილავო...).

აღბათ შენიშნავდით, სევდით შეპყრობილო ჩემო მკითხ-
ველო, პატივცემულ დოცენტს ამ ჩინებული ღირსებათა ჩა-
მოთვლისას. ორი რამ გამორჩა:

პირველი: რა განათლება უნდა ჰქონდეს გამყიდველს, დაბალი, საშუალო თუ უმაღლესი? ვფიქრობ, დამეთანხმებით: ასე ყოველმხრივ იდეალურად შემკული ადამიანი, ცხადია, თავს მხოლოდ და მხოლოდ უმაღლესით დაიმშვენებს, ოღონდ საწუხარი ის არის, რომ ამ უმნიშვნელო, მცირეხელფასიან თანამდებობაზე იკრძალება, წესით, უმაღლესდიპლომიანთა მიღება (სახელმწიფომ თქვენს სწავლა-განათლებაზე დიდი ფული დახარჯაო), თუმცა, ესეც არის, ყველა მათგანი მაინც ახერხებს სულ იოლად გაარღვიოს არა იმდენად კაპრონის ეს სავაჭრო ქსელი და მტკიცედ დამკვიდრდეს მცირე ხელფასიან, მაგრამ მაინც სანატრელ პოსტზე, მით უმეტეს, რომ მერე და მერე, მათთან ურთიერთობაში, თუნდაც წლების მანძილზე, არავის, არავის ეჭვიც არ აღეძვრება ხოლმე მათი განათლების უდაბლესობაში...

მეორე: გამორჩა აგრეთვე პატიოსნებაც...

ეს კი შენთვის, ძვირფასო მკითხველო, — მკითხველზე უფრო მყიდველი რომ ბრძანდები, — ვიცი, არცთუ ისე პატარა ამბავია, გულცივად გვერდი აუარო, თუმცა შენ არც მოითხოვ... აი, ნოქარს რომ აღარ ვეძახით, რაკი ყველა მათგანი ათი-თერთმეტი წელიწადი თუ სკოლაში, თუ ხუთი წელიწადი უმაღლესში ირიცხებოდა და ამიტომ ნიშნად მოწიწება-პატივისცემისა, — გამყიდველიო (რა თქმა უნდა, არა კაცობის გამყიდველი, არა სინდისის გამყიდველი)...

ღიას, შენ არ მოითხოვ ამათგან არც სასიამოვნო გარეგნობას და არც საღი მსჯელობის უნარს, იუმორის გრძნობას — ხომ არა და არა, აკი ამის დამწერისა და დამბეჭდავის იუმორიც ჩვენ ყველას, ო, ალბათ, მსყიდველობითი უნარიანობის ბოლო დღემდეც ისე გაგვყვება, რომ თავზეც გადაგვივა...

პოდა, ახლა მათ ჩვენი ასე დიდად გამხიარულებისათვის (სიცილი სკლეროზს გულს უპობს თურმე!), მადლიერების ნიშნად, მათივე ბრძნული აზრების კიდევ უფრო განსამტკიცებლად, ერთ მნიშვნელოვან ციტატას შევთავაზებ და წყაროსაც მიუთითებ, რამეთუ, ვაითუ, ამის მიუთითებლობა ჩემი კალმის წვერს ცილასწამებაში, ლაყაფსა და ჩმახში ჩაეთვალოს:

„იყო ადამიანი — ბევრს ნიშნავს, მაგრამ იყო
დახლის მუშაკი — ეს უფრო მეტს ნიშნავს“.

(ქალაქ თბილისის კალინინის რაიონის კომკავში-
რული კონფერენციისადმი მიძღვნილი ბუკლეტი.
1977 წ.).

ღიას, საწყალი ლევ ტოლსტოი, უბედური ილია ჭავჭავაძე,
ბედკრული იაკობ გოგებაშვილი...

ისინი არ იყვნენ დახლის მუშაკები და, მაშასადამე, ადამიანობით ჩვენი დროის დახლის მუშაკებამდე, ცხადია, ვერც ამაღლდებოდნენ...

მინდა ერთი საგულისხმო ამბავი გიამბოთ ჩვენი გუშინდელი ისტორიიდან, რომლის მწვავე აქტუალურობა ამ თითქმის უკვე ნახევარი საუკუნის მანძილზე არათუ არ შენელებულა, — უფრო შემაშფოთებელი ფორმითაც კი შეიმოსა...

ომი უკვე მოთავებული იყო და ჩვენი ქვეყნისა და ჩვენი დროისათვის მიჩნეული ნორმალური, ადამიანური ცხოვრება თითქოს დგებოდა კიდევ ჩვეულ კალაპოტში, მაგრამ დროდადრო, კანტიკუნტად, თბილისელებს მშვიდობას და ძილს უფრთხობდნენ ქურდები, მხოლოდ ღამის ქურდები, — იმ წლებში გაქურდვას დღისით, აბა, რომელი თავზე ხელაღებული გაბედავდა (ახლაბან კი რუსთავეში ერთ სახლში ერთ დროულად ხუთი ბინა გატეხეს); დღის სინათლით მხოლოდ წვრილფეხა ჯიბგირები სარგებლობდნენ, ყაჩაღობა-ბანდიტობა კი იშვიათობა გახლდათ.

...და მაინც, მოსახლეობა ერთსაც რომ არ გაემწარებინა, თბილის-ქალაქის მილიციის უფროსმა გრიგოლ ჭელიძემ გადაუდებელ მიზნად დაისახა რამენაირად შეეღწია ქურდების „პოლიტიბუროში“ და... შეაღწია კიდევ და თავის ხელით გააგორა მათი ბელადი ნალბო, წრიპა, კაფანდარა ნალბო, რომელსაც, მიუხედავად სუსტი აღნაგობისა, თავის წრეში, ქურდული გაგებით, ბევრი სასახელო ოპერაციის ჩატარების წყალობით, ხელთ უსაზღვრო ავტორიტეტის კვერთხი ეპყრა.

გრიგოლ ჭელიძე კარგი ქართველი ვაჟკაცი იყო, და მაინც, არა მგონია, მისებრ ვაჟკაცი დღევანდელ ჩვენს მილიციაში ახლაც არ მოინახებოდეს, მაგრამ საქმე ის არის, რომ არავის ასეთი „თვითნებობისთვის“ გრიგოლ ჭელიძე არ დაუსჯია და არც იმისთვის, რომ მისი განქარგულებით, მოკლული სამი დღე და ღამე ეგდო ბებელის მოედანზე ყველას სახილველად, პირველ ყოვლისა კი, ცხადია, მისი „კოლეგების“ თვალსაჩინოებისათვის, რამაც ის შედეგი გამოიღო, რომ იმ დღიდან ქალაქში მკვეთრად იკლო „დაობლებულთა“ თარეშმა...

ღიახ, ჰუმანიზმის დროშას მაშინაც ისე აფრიალებდნენ, როგორც ახლა, მაგრამ მაშინდელი ჰუმანიზმი მეტწილად საზოგადოების ამწიოკებელთა სასარგებლოდ როდი მოქმედებდა, თუმცა ესეც არის, იმდროინდელი სტალინური საზოგადოება, მართლმსაჯულების ორგანოების ჩათვლით, დიდად განსხვავდება დღევანდელისაგან: მრუდე, საძრახისი გზით ფულდამგროვებლნი იმხანად, სიმციარის გამო, იოლად დაითვლებოდნენ, თანაც ისინი თხუნელასავით მიწაში იყვნენ შემძვრალნი, ახლა კი მათ სათვალავიც არა აქვთ, თავსაც კი იწონებენ და სულაც არ ერიდებათ, ფულით სავსე ქისა კოჭებში თოფივით გესროლოს და გაგაგოროს...

ღიახ, მასობრივი ძარცვა-გლეჯა მხოლოდ საზოგადოების ნაძირალებმა როდი გაიხადეს იოლ ხელობად, და მათ ასე მომრავლებას, რასაკვირველია, ხელი იმანაც შეუწყო, რომ ფარული, შენიღბული, „პატიოსანი“ ძარცვა-გლეჯა საზოგადოების მრავალ „ზედაპირელთა“, „რჩეულთა“ საქმიანობის საგნად იქცა; არსებითი განსხვავება კი მათ შორის შეიძლება მხოლოდ ის არის, რომ ეს უკანასკნელნი გაძარცულთა სიცოცხლეს იშვიათად თუ ხელყოფენ, პირველნი კი ასეთ იშვიათობას მაინცდამაინც დიდ ანგარიშს არ უწყევენ.

ჩემს თაობას ახსოვს სტალინის 1932 წლის 7 აგვისტოს კანონი, რომლის ძალით 10 ათასი მანეთის სახელმწიფო ქონების მითვისებისათვის დახვრეტას უსჯიდნენ (დღევანდელი კურსით — ათასი მანეთისათვის!), ახლა კი... აგერ კაცმა 218 ათასი „გაიმასქნა“ (ძველი კურსით ორი მილიონ 180 ათასი მანეთი), და ამასთან ერთად სრულიად უდანაშაულო, წესიერი ადამიანის სიცოცხლეს შეიწირა — ფულით გალადებულ-გათამა-

შებულმა, ჩვენი დროის ამ კომუნისტმა ტარიელ მკლავაძემ მას ერთი ისეთი შემოჰკრა — თავით ბეტონის კედელს მიანარცხა და... საწყალმა კაცმა ჩვენი და თავისი მკვლელის ჰირიცი წაიღო, ხალხისა და ქვეყნის ხარჯზე ამ გამილიონებულ, „უცაბედ მკვლელს“ კი საბჭოთა ჰუმანურმა (!) სამსჯავრომ საბჭოთა ჰაერის სუნთქვის შესაძლებლობა მაინც შეუნარჩუნა...

პოდა, ჩვენ კიდევ გვიკვირს, რა სენი და რა ეშმაკი შეგვიჯდა ასეთი, რა ხდება ეს, რით აიხსნება ეგრეთ წოდებულ განვითარებული სოციალიზმის საქართველოში ამდენი მკვლელობა? თანაც, მეტწილად წინასწარ გააზრებული, აღრიხანად მოფიქრებული, ზოგჯერ დაქირავებული მკვლელების „ხელის გასვრითაც“... რევოლუციამდელ, ჩამორჩენილ, თითქმის გაუნათლებელ საქართველოში კი, როგორც გადმოგვცემენ, კაცის კვლა ძვირად თუ მოხდებოდა...

მართალი გითხრათ, რატომ იყო ასე აღრიხან საქართველოში — არ ვიცი, რატომ არის ასე დღევანდელ საქართველოში, ეს კი ვიცი: მკვლელმა იცის, და ამაში მას ეჭვიც არ ეპარება, — მოკლავს და თვითონ ცოცხალი დარჩება... შეიძლება მიუსაჯონ რვა, ათი, უკედღურეს შემთხვევაში — თუ ეს ახლა ჩვეულებრივად ქცეული ამბავი საქვეყნოდ ძალიან განხმაურდა, — ცამეტი-თხუთმეტი წელიწადი, რომლის, ესე იგი სასჯელის, სრულად მომხდელიც ჯერ არავის უნახავს...

აი, საშიში მაშინ არის, თუ ორ კაცს, ანდა მეტს, ყელს ღორივით გამოლადრავს და მერე მათ სიამით და ნეტარებით ასო-ასო აკებ-აკუწავს...

განა საამისოდ ცოტა მაგალითის მოყვანა შეგვიძლია ჩვენი, მხოლოდ ქართული... ალალ-მართალი... სასამართლოს პრაქტიკიდან?!

...ერთმა თეთრმეტწვილიანმა და მეთორმეტეზე ორსულმა ქალმა მესტიიდან ტელეფონით შემარცხვინა, რანაირი მამული-შვილი ბრძანდებით, სვანეთი არ გინახავთ, რა იქნება, გვესტუმრეთ ჩვენს ახალ სახლში, რომლის საძირკველი თვითონ თქვენ ჩადგითო...

არა, აღრეც, ვიდრე ეს მაღლიანი ქალი სირცხვილში ჩამაგდებდა, ვაპირებდი სვანეთის მოვლა-მონახულებას, მაგრამ გუ-

ლით ავადმყოფს სიმალლის შიში მბორკავდა, ახლა კი... გავიფიქრე, თუ ამით დამტკიცდება ჩემი სიყვარული და თავდადება საქართველოს მთა და ბარისადმი, და ეს მთა თუნდაც ცისკიდურზე იყოს გამოკიდებული და იგი თუნდაც კუბოდ მექცეს...

...ჰოდა, იქ, ცათა სწორი სევანეთის ერთი მკვიდრი, ჰკვიან და ნამდვილად განათლებული (უნივერსიტეტის ისტორიის ფაკულტეტმართლადამთავრებული) და, ასე განსაჯეთ, ხელმძღვანელ ამხანაგებში რომ ითვლება, გამომიტყდა: სევანეთში სისხლის აღება კი აღმოვფხვერთ, მაგრამ... მას, ერთგვარი დადებითი მხარეც ჰქონდა: მკვლელმა რაკი იცოდა, რომ ნათესავები მოკლულის სისხლს არ შეარჩენდნენ, მოკვლასაც ერიდებოდაო...

არა, ეს არ უთქვამს, მაგრამ, ვფიქრობ, იგულისხმა: სისხლის აღების წესის დროს ამდენი მკვლელობა ვის გაეგონა, სად იყო...

სხვათა შორის, სისხლის აღება პირველად სევანებს არ შემოუღიათ, და არც კორსიკელებს თავიანთი ვენდეტათი; მას ძველი ებრაელები მიმართავდნენ ჯერ კიდევ როდის...

ამბობენ, თათარს უთქვამსო: ქართველებს რომ ერთმანეთი უყვარდეთ, მთელ ქვეყნიერებას დაიპყრობდნენო.

„შავი წიგნი“, როგორც ბევრი ირწმუნება, რაკი ხელიდან ხელში გადადის, თანაც ისეთ პირთა ხელში, რომლებსაც არათუ პირადად ვიცნობ, — ქუჩაში მათთვის, შეიძლება, გვერდიც არ ამივლია, ამიტომაც, ბუნებრივია, არ შემეძლო დამედგინა იმ მკითხველის ვინაობა, რომელმაც ჩემს წიგნში მოყვანილ ერთ ციტატაში — «Чай требует колоннального труда», колоннальный колоссальный-ზე გადამისწორა.

არა მგონია, იგი ჩაის მოყვანისა და მისი დამუშავების სპეციალისტი ბრძანდებოდეს; უფრო, ალბათ, ის გაიფიქრა, რომ ეს მემანქანის შეცდომაა, რომელიც შემდეგ ავტორსაც გაეპარა, ამიტომაც დამლო პატივი და...

ჰო, მაგრამ... ეს არც მემანქანის შეცდომაა და არც ავტო-

რის უგულისყურობის შედეგია, ასეა ორიგინალში — ნიკოლოზ მეორის, დღევანდელი ენით თუ ვიტყვით, რეზოლუციაში...

1968 წელს ქორდანიას სახელობის ინსტიტუტმა ხანგრძლივი დაკვირვებისა და მეცნიერული კვლევა-ძიების მერმე, ზემდგომ ორგანოებში დასაბუთებული მოხსენებითი ბარათი წარადგინა იმის თაობაზე, თუ რა მანერე ფიზოლოგიურ გავლენას ახდენს ქალის ორგანიზმზე ჩაის... არა, სმა კი არა — კრეფა, კრეფა...

მაგრამ ეს ბარათი, როგორც ჩანს, მსეთ საიმედო უჭრაში ჩაქეტეს, რომლის ერთადერთი გასაღები ზუთი ციფრითაა გასაიდუმლოებული, რომელთაგანაც ზუთი კი არა, — ერთიც თუ დაგავიწყდა, მერე მისი გაღების იმედი ნულარც გექნება, — მაგიდა ნაწილებად უნდა დაიშალოს, — ამის მოთავე კი აქამდე არავინ გამოჩნდა, და ეს თითქოს არც უნდა გვიკვირდეს: სახელმწიფო ქონებას ბარბაროსულად ზომ არ მოეპყრობიან...

შარშან ერთი თმაქალარა გურული ქალი, რომელსაც ქორდანიას ინსტიტუტში არც ოდესმე უმუშავია და, საერთოდ, ბულალტერიის გარდა, არავითარ სხვა მეცნიერებას არ იცნობს, და რომელსაც გურიაში, შავთმიანობა რომ გაუფრინდა, მის მერე ფეხი აღარც დაუდგამს, ახლა კი იქ, რაკი მოამაგე ახლობლის სატირალში წაუსვლელობა დიდ უმადურებად ჩათვლებოდა...

...და როცა თბილისში დაბრუნდა, მის მოთქმით გაოცებას, მეზობლებში თუ სამსახურში, ბოლო არ უჩანდა:

— ნენა, ნენა, ამდენი ჭლარკი ქალი მარტო ერთ გასვენებაში, ერთ სოფელში რა ჩემმა თვალმა ნახა!.. ნუთუ გურიის ბუნებამ შექქენა ისინი, ნენა!..

მე იმ „ჭლარკი“ სოფლის სახელი კარგადაც დავიხსოვე, მაგრამ რა პირით დავასახელო, რა ხელით გავუქაწრო გული იმათ, ვინც იქ „მწვანე ოქროს“ კრეფს...

საქართველოს ტერიტორია 70 ათას კვადრატულ კილომეტრს მოიცავს, ინდოეთისა — 3 მილიონ 300 ათას...

საქართველოს მოსახლეობა 5 მილიონია, ინდოეთისა — 610 მილიონი...

საქართველოში ჩაი იკრიფება მაისიდან ოქტომბრამდე; იკრიფება ყოველგვარ ამინდში — თავსხმა წვიმაში და პაპა-

ნაქება სიცხეშიც, ინდოეთში კი მთელი წლის განმავლობაში საამისოდ იდეალური კლიმატური პირობებია...

...და მაინც, ჩვენ, კიანჭველა საქართველოს, იმდენი ტონა ჩაი გვევალება მოვიყვანოთ, რამდენიც მოჰყავს სპილო ინდოეთს... მერედა, შეიძლება განა, ხარისა და ხარაბუხას ერთ უღელში შებმა იმ ვარაუდით, რომ ჰაპანს თანაბრად გასწევენ?!

ესეც არის... რატომ ვივალებთ ჩვენი ერთი პატარა ნაკვერცხლით მთელი საბჭოთა ქვეყნის უზარმაზარი სამოვრის აღულებას?

ჰოდა, ახლა კი თავადვე განსაჯეთ, რამდენად სწორი იყო ის უცნობი მკითხველი, რომელმაც, არსებითად, მე კი არა, — მძიმე, „კოლონიური შრომააო“, ამის პირველ მთქმელს ნიკოლოზ მეორეს შეუსწორა... ამბობენ, კაი კაცი კი არ იყო ნიკოლოზიო, მაგრამ, რაც უნდა იყოს, მაინც მეფე იყო, იმპერატორი და... ამანაც კი არ გაგვიმეტა და შეგვიცოდა... ახლა კი, ამ ძმობის ხანაში ჩვენი შემცოდებელი ჯერ არავინ ჩანს... გამოჩნდება კი?! ან ვახსოვართ ვისმე?!

„ნენა, ნენა, ამდენი ჯღარაკი ქალი გურიისში...“

ეს ერის ტრაგედიაა, რომ „მწვანე ოქრო“ უკვე გურიისაც გადმოსცდა და ახლა ლამის სავენახე ზესტაფონს შეაღწიოს...
ლმერთო!

დაიფარე სვანეთი მაინც, ამ მწვანე ოქროსაგან და ყველა სხვა ფერის ოქროსგანაც!

მუხლმოდრეკილი გევედრები, მამაზეციერო, ნუ აღმოაჩენ ჩვენში, — ნურც მთაში, ნურც ბარში, — ნურავითარ წიაღისეულს და ნურავითარ ზედაპირისეულს, რამეთუ ზომიერებას მათს მოპოვებაში ჩვენ მაინც ვერ დავიცავთ, ყოველგვარი ნამეტანობა კი, ჰამაში იქნება იგი თუ ჰანცგამწყვეტ შრომაში, ჯღარკავს ადამიანს ფიზიკურად და აუკუღმართებს სულიერად...

რუსეთის კომუნისტური პარტიის მე-12 ყრილობაზე, რომელიც 1923 წლის აპრილში შედგა, ერთმა იმ დროს დიდად ცნობილმა ბოლშევიკმა თქვა:

«Мы должны создать такое дешовое государство, чтобы ни один крестьянин не упрекнул нас, что вы содержите хоть одного бездельника».

მე არ ვასახელებ ამ ორატორის გვარს, რაკი არ ვიცი, რე-
აბილიტირებულია თუ არა იგი... და თუნდაც არც იყოს, მისი
ეს აზრი არსებითად ლენინის შემდეგი გამონათქვამიდან მომ-
დინარეობს:

**«Мы должны свести наш госаппарат до макси-
мальной экономии. Мы должны изгнать из него
все следы излишеств».**

ჩვენ კანონითაც კი ვებრძვით მუქთახრობას, მუქთახორე-
ბად კი მივიჩნევთ იმათ, ვინც არ მუშაობს, მაგრამ აქეთ-იქით
თუ მივიხედ-მოვიხედავთ, თუნდ ზერელედ დავაკვირდებით,
აღმოჩნდება, რომ ბევრზე ბევრ არაფრისმკეთებელსაც ვინა-
ხავთ თურმე.

ამაში ბრალი მათ არც მიუძღვით; ეს კია, როცა კაცი ფას-
ანაზღაურებულ მცონარეობას შეეჩვევა, იგი მერე და მერე,
საერთოდ, შრომის ხალისსაც კარგავს.

დასავლეთში, როგორც ამბობენ, მილიონობით უმუშევარ-
ია, ოღონდ არ გვეუბნებიან იმას, რომ ისინი ხელების გაუნ-
ძრევლად, უქმად ყოფნას მძიმედ განიცდიან, თორემ ისე...
რაკი ბევრი ჩვენგანი ყოფილა იმ ქვეყნებში, მოდიოთ და ნუ
ვიტყვიოთ, კაპიტალიზმის ეს ნაბიჯვრები უკან შარვალგამოხეუ-
ლები დაიარებიან და შიმშილით კუჭი უხმებათო.

დღევანდელ ამერიკაში, როგორც ჩვენი პრესა ნიადაგ გვა-
უწყებს, მილიონობით ღარიბ-ღატაკია; ეს იმას მოწმობს, რომ
იქ ამ ბოლო ნახევარ საუკუნეში ხალხის კეთილდღეობა სულ
უკან და უკან წასულა; ოციან წლებში კი, ჩემი ყმაწვილობი-
სას, როცა ჩვენს ქვეყნებს შორის დიპლომატიური ურთიერ-
ობა ჯერ კიდევ აღდგენილი არ იყო, ამერიკა მაინც გვიგზავ-
ნიდა — უსასყიდლოდ! — ნახმარი ტანსაცმლით და ფეხსაც-
მლით სავსე ბარდანებს, რომლებითაც თბილისში სალდათის
ბაზარზე სომხები ვაჭრობდნენ. მე უმეტესად იმ ნაცვამ-გამო-
ნაცვალში გავიზარდე. მათში ძალიან ხშირად ისეთ რამესაც

წააწყდებოდი, რომელსაც არც ეტყობოდა, რომ მის პატრონს იგი დიდხანს ეცვა... მე, მაგალითად, ასეთ ცინცხალ გოლფ-შარვალში ტოლებში გამოჩენის ისე მერცხვინებოდა, თითქოს ჩემთვის გოგონას კაბა ჩაეცვათ: არ მინდოდა კუჭით პროლეტარი ბიჭუქელა მილიონერის ბიჭუნას დაემსგავსებოდი, ამიტომაც ჩემი დაჟინებული თხოვნით დედაჩემი მას მუხლებთან მანუეტებს შეაჭრიდა ხოლმე.

სწორედ რომ უცნაურია, კაცმა სიბრძნის ასაკსაც გადავაბიჯე, და მაინც, დღემდე ვერ მომისაზრებია, ამერიკაში, სადაც საბჭოური სტატისტიკით, 35 მილიონი ულუკმაპურია, 12 მილიონი უმუშევარია, 21 მილიონი უფლებააყრილი ზანგია, მილიონობით წერა-კითხვის უცოდინარია, მოსახლეობაში სრულიად თავისუფლად 22 მილიონი ცეცხლსასროლი იარაღი ტრიალებს და, ფული თუ გაქვს, გინდა ტანკსაც შეიძენ და მოაგორებ შენს ეზოში, — ქონებრივად ასეთ უთანასწორო ქვეყანაში რატომ არ ხდება მაინც რევოლუცია?

პროლეტარული, ოქტომბრისნაირი რევოლუციის ძირითადი მამოძრავებელი დევიზი ხომ ეს არის (მეპატროს საყველპუროდ ნასწავლს, თუკი მარქს-ლენინ-სტალინის დიდ სოციალურ თეორიებს ჩემი უფიცობით ვაუბრალობ): შენ, წყვეულ ექსპლუატატორს, ყველაფერი გაქვს და მე, საწყალ ექსპლუატირებულს, არაფერი მაქვს, და ეს პირუკუ უნდა შეცვალოს ჩემ მიერ მოხდენილმა რევოლუციამ: მე ყველაფერი მქონდეს და შენ არაფერი გქონდეს!

ალბათ იტყვი, თუ ასეა, დროთა განმავლობაში, დიალექტიკის კანონით, ესეც უნდა შეიცვალოსო...

ჰო, მაგრამ... პროლეტარიატი თუ მოექცევა სახელმწიფოს სათავეში, ასეთი მეტამორფოზა არასოდეს არ მოხდება: ცხონებულ სტალინს ბევრი არც უფიქრია, ისე შეიმუშავა და დაუტოვა მარადღეამს სახელმძღვანელოდ მსოფლიოს ყველა კომუნისტს ისეთი მეთოდი, რომლის წყალობით კონტრარევოლუციონერები თავს ვერც ვერასოდეს წამოყოფენ: სწორედ თავში, თავში ისე უნდა ჩასცხო და ჩააფარო მათ, რომ გონიერება მარადის აგონიად ექცეთ!

...დიახ, დასავლეთში ადამიანი უმუშევრობით უფრო მორალურად იტანჯება, აკი შრომა მისთვის არა მარტო ფიზიკუ-

რი მოთხოვნილებაა, — სულიერიც, ამიტომაც ასე თავგამოდებით მიისწრაფვის კიდევ, რომ წადილი გულისა აისრულოს...

ო, ნეტავი ვგავდეთ მათ შრომის სიყვარულით, ანდა ისინი მაინც გვგავდნენ ჩვენ შრომისადმი გულგრილობით, მაშინ თავს მაინც ვიმართლებდით, ეს საერთო, ადამიანური ნიშან-თვისებაა-თქო, ახლა კი...

არა, ყოველთვის ასე როდი იყო საქართველოში! გლეხკაცი, თოკით ზეზე მიბმული, ბრეკ-ფერდობზე რომ არ დაგორებულყო, ქვიშნარს თოხს უბაგუნებდა და უბაგუნებდა, დილაუთენია დგებოდა და დაკოჭრებულ ხელებს გვიან შეღამებულში თუ მოასვენებდა...

არა, ბევრი ახლაც დგება დილაადრიანად, რათა დარწმუნდეს, მისი თბილი, შემოსავლიანი ადგილი ისევ ადგილზეა თუ არა, — ო, რამდენია ჩასაფრებული მის მისატაცებლად!..

სინეკურა, სინეკურა!

(ამ სიტყვის ახსნა იხილეთ მიხეილ ჭაბაშვილის „უცხო სიტყვათა ლექსიკონში“).

რა ღირს დაბადება და სიკვდილი თავილისში?

ო-ო, ძალიან ძვირი, ძალიან ძვირი (ისე, როგორც მთელ საქართველოში).

ერთმა ჩემმა მკითხველმა, ახლებურად მედიცინის დას რომ ეძახიან და წინათ — მოწყალების დას (ჩვენს დროში და ჩვენს ქვეყანაში მოწყალება-შებრალება, აბა, რა სახსენებელ-წასახალისებელია, გასაწყლება-შეუბრალებლობა — კი), ერთ დიდ ცხოვრებისეულ შეცდომაში გამომიჭირა:

— თქვენ რომ წერთ, ბატონო, ერთ ქალზე, სამასი მანეთი დაუჯდა მშობიარობაო, ფასს რატომ დაუკელით? მე შვილი-შვილის დაბადება... ხუთასი მანეთიდან შინ ცხრა მანეთი ძლივს მომყვა... ეჭიმმა, ჩემი ქალიშვილი მისი მორიგეობის დროს რომ მოლოგინებულყო და ფული ჩემგან თავად აედო, და არა მის შემცვლელ ეჭიმს, მშობიარობის დასაჩქარებლად რაღაც ნემსიც კი გაუკეთა და როგორც ოჩან ცხენს მათრახს რო გადაუჭერენ, სალანძღავი სიტყვებით ისე უყვიროდა, გაიჭიფხე, გაიჭიფხე, შე დეგენერატოო...

ღიახს!.. ახლად დაბადებული რომ განბანონ, — ფული უნდა მისცე, ძუძუს მისაცემად რომ მოგიყვანონ, ამაშიც ფული უნდა მისცე, თუ ტირილი შემოგესმა და შეწუხდი, სხვისიც რომ ტიროდეს, შენი ღლაპი ტირისო და... აქაც ფული უნდა იძრო...

ამევსო და გადამევსო ერთხელ მოთმინების ფიალა და საქვეყნოდ შევკვივლე, ესაა უფასო მკურნალობა?! ესაა თქვენი კონსტიტუცია?! ქვეყანა ავაშენოთო... ქვეყანა კი არ ააშენეთ, — დაანგრიეთ და დააქციეთ და გაათახსირეთ ხალხი...

ეს ხანდაზმული, თითქოს ყაჩაღანა, ქალი, როცა შედარებით დამშვიდდა და გონს მოეგო, ძალზე შეშინებულყო, ვაითუ, დამიჭირონო...

— ღმერთი, რჯული, სამართალი.. მე ეს პარტიისა და

მთავრობის მისამართით არ მიტყვამს, მე ეს ამ ციგნების გასაგონად წამომცდა...

თან, თურმე, იმის შიშის ზარიც უსერავდა გონებას, ვაითუ თეთრ, ქათქათა სამოსელში გახვეულმა ამ რუხმა მგლებმა შეილიშვილი დამიწყველონო...

ღიახ, საქართველოში ექიმობა, ეს უადრესად კეთილშობილური, ზნეობრივად სპეტაკი პროფესია, თითქმის ყველაზე უფრო წამხდარ ხელობად გადაიქცა.

ასეთი შედარებისა და კატეგორიული განზოგადებისათვის მედიცინის მსახურნი, ექვი არ არის, უთუოდ შემრცხავენ, მაგრამ...

როცა ოპერაციაში მასწავლებელს მისი ნამოწაფარი ფულს ააღლეტს, — არც ასეთი თქმის მოგერიდება, თუნდაც ასეთები მედიკოსებ-თეთრხალათიანებში ბევრი არც იყოს.

ღიახ, როცა ექიმობას არათუ გამდიდრების, — „გადამდიდრების“ წყაროდ მიიჩნევენ, მაშინ...

სხვათა შორის, არა ყველა სახის ექიმობას!..

ზესტაფონში ერთმა პატიოსანმა ექიმმა ქალმა (კი, პატიოსნებიც ურევია მათში, ოღონდ... ასში ერთი) შემომჩივლა, ჩვენ, ხნიერები, უკვე მივდივართ, შემცვლელებს კი ვერავის ვხედავთ, — ფთიზიატრებს, რენტგენოლოგებს, თერაპევტებსაც კი... ყველას გული — ჭიბის გზით! — გინეკოლოგობისა და ქირურგობისაკენ მიუწევსო...

მართლაც! ერთმა ჩემმა ნაცნობმა, ახალგაზრდა თერაპევტმა, მანამ არ მოისვენა, სანამ თავისი საექიმო პროფილი გინეკოლოგობაზე არ გადაახურდავა, დედაჩემის დინასტია მინდა გავაგრძელოო...

ჰო, მაგრამ, ასეთი რა სასახელოა და რა სადინასტიაო აბორტმანერობა?

ესეც არის, სახელს, პატივისცემას სასიქადულოს, ვილა დაეძებს? „რას ამოგვიჩემეთ, ბატონო, რას გვემართლებით, ფულს ძალათი ზომ არ ვართმევთო...“

ფულს ხელისძალათი ბანდიტები ართმევენ, და ისიც, დიდფულიანებს, ამათთვის კი, თეთრ სამოსელს ამოფარებული შავსინდისიანებისთვის, გარჩევა არ არის, შენ, მშობიარე, შვიდ-

თუმნიანი დამლაგებელი ხარ თუ ყოველმხრივ გალალებული, პირთამდე სავესე გასტრონომის გამგე...

„ძალათიო...“

სახაფანგე გარემოცვაში თუ ჩამაგდებ, გამოძალვა ბევრით როდი განსხვავდება წართმევისაგან.

ეს ამხანაგი, რომელსაც, სამსახურის მიხედვით, ქურდების დაქერა ევალება, რაღაც რვა თვის მანძილზე ორჯერ თვითონვე გაქურდეს; პირველად ღამით: წაიღეს თორმეტი ოქროს ბეჭედი (ეს — დაზარალებულთა სიტყვით, დამზარალებლებმა კი, ნადავლი, ალბათ, უფრო ზუსტად აღწუსხეს)... და როცა მეორედ „გაწმინდეს“ ღლისით, დიასახლისს ეთქვა, რაღა აზრი აქვს ღლე იქნება თუ ღამე, ანღა კარის ჩაკეტვას, აწი სულ ღიდ ღავტოვებო...

სხვათა შორის, ამ ქალბატონის ერთშვილიან-ღედისერთა ქალიშვილს, მუსიკის მასწავლებელს, „შავი წიგნი“ წაეკითხა და მკვავე გუნებაზე დამღგარიყო, არ მოსწონებოღა...

აბა ამისთვის ვის რა დავძრახება, ყველას ერთნაირად, შეიძლება, ვერც „ვეფხისტყაოსანმა“ გაუღოს გულისკარი, მაგრამ მე, ალაღად გამოგიტყდებით, ავტორის თავმოყვარეობამ საღღაც მაინც გამკენწლა და დავინტერესღდი, კონკრეტულად, რა არ მოეწონა?..

საერთოდ არ მომეწონაო; აი, მაგალითად, ბევრი მეორე შვილსაც რომ არ ყოღიობს, ამაში ქალი როღია ყოველთვის დამნაშავეო; ერთ ჩემს მეგობარს, „ამის და ამის“ რძალს, ძალიანაც უნღა ჰყავღეს მეორე, მაგრამ ქმარი ნებას არ აძღვეს, და არც მამამთიღი ურჩევსო...

ჰმ, არც მამამთიღი ურჩევსო...

მერეღა, მკითხველო, რომ იცოღდეთ, რა მამამთიღი, ვინ მამამთიღი!..

არა, შვიღი სულ მუღამ, აბა, რას გაგიგონებს, მით უფრო შენგანვე გამეცნიერებული შვიღი, მაგრამ შენ მაინც... როგორც მამამ, როგორც მამამთიღმაიც...

ვაი, სირცხვიღო!..

ვაგღახ, საქვეყნოდ რომ არ გამომაქვს მისი ვინაობა და ტიტუღები, „ამას და ამას“ რომ ამოვაფარე... გვარი მისი რომ შემოგავსმათ, ეკვი არ მეპარება, გულს შემოგეყრებათ და იტყ-

ვით, როგორ, ეს ხომ ის დიდი ერისკაცია, ის დიდი მამული-
შვილი, ტრიბუნიდან და პრესაშიც რომ გვიქადაგებს ხოლმე
უმწიკველო ზნეობაზე, ერის შეუბღალავ მამაშვილობაზე, სამ-
შობლოსათვის თავდადებაზე, ის, ვისაც ჩენი რესპუბლიკის
პირველი დიდებული, ამხანაგი შევარდნაძე, ლამის პირველ სა-
ათზეც არ ეტყვის მიღებაზე უარსო...

ღიახაც რომ, ღიახაც რომ. ის გახლავთ!

ო, გმადლობ შენ, უფალო, ჩემი ერთგული ინფორმატორის
მეცადინეობით ასე რომ გამანათლე, მაგრამ, ხომ იცი, „გული
კრულია კაცისა, ხარბი და გაუძლომელი“, — ეგებ ამ საიღუმ-
ლოსაც ამიხადო საბურველი: მაინც, ასეთი აგრესიული პოზი-
ცია რატომ დაიჭირა ჩემს ნაშრომში გამოთქმული სევდიანი
აზრების მიმართ უკვე ორმოც წელს მიტანებულმა, ღვთაებ-
რივი მუსიკის, მუ-სი-კის, ერთშვილიანმა მასწავლებელმა?

...ო-ო, ბოლოს და ბოლოს, ღმერთის წყალობით და ჯვა-
რედინი გამოკითხვით ესეც გაირკვა: ამ ერთშვილიანის დედი-
სერთა დედის — ესეც ასევე! — დედისერთა დედა, თურმე,
გინეკოლოგი ყოფილა, ანუ ჩვენებურად... მმ...

სავარაუდებელია, რომ ქურდებმა, ვიდრე „საქმეზე“ წას-
ვლას დააპირებდნენ, ამ ვითარებას ზედმიწევნით აუღეს ალ-
ლო და არ დაიზარეს შეჭიდებოდნენ აბორტმახერის ცხრასაჯ-
ლიტურიან მუხის კარს, და არა „შავი წიგნის“ დამწერის ფიც-
რულისას, რომელსაც ლამის საფოსტო ყუთის გასაღებიც მი-
უღდგეს...

ღედაჩემმა ცხრა შვილი შობა, მისი „გინეკოლოგი“ წელში
ორად მოხრილი მულანო გახლდათ; წერა-კითხვის ამ გაუგებელ
ქალს ცხრიდან, ერთიც არ შემოჰკვედომია, თუმცა ხელთ არც
სტერილური მაშები ეჭირა, არც ტკივილის გამაყუჩებელი
პრეპარატები გააჩნდა და არც მელოგინეს — „აჩუ, ცხე-
ნოო,“ — უკიოდა... ერთი თუნგი თბილი წყალი, სპილენძის
ტაშტი, რომელიც მეტწილად ფაცხა-ქოხებში სოხანეზე იღო
(მისთვის, ვინც არ იცის: სოხანე დატკეპნილი მიწის იატაკია).

სხვათა შორის, სწორედ ამ მულანომ უბებიავე შუა ცეცხ-
ლის მახლობლად სამუელ (ნოე) ბუაჩიძეს და კიდევ ამის ათ
და-ძმას... ამათ ღედას ალვასი ერქვა, ეს სახელი ღირსია დახ-
სომებისა თუნდაც იმიტომ, რომ მისი მრავალრიცხოვანი ოჯა-

ხი სულაც არ ჰგავდა რომელიც გნებავთ დღევანდელ ოჯახს, სადაც დიდიან-პატარიანად ყველა კომუნისტია: სამუელი მგზნებარე ბოლშევიკი კი იყო, რომელიც ლენინს პირადად იცნობდა და მიმოწერაც ჰქონდა მასთან, მაგრამ მან თავისი ბოლშევიკური ცეცხლით მაინც ვერ აღანთო ვერც ერთი თავისი ძმა: ზოგე მათგანი მენშევიკი დადგა, ზოგი — ნაციონალდემოკრატი, ზოგიც — ფედერალისტი, ერთიც — არარსებულნი გლახთა პარტიის მიწის მუშა, ერთიც — შავი ქვის მრეწველი (ამათგან ყველაზე უმცროსმა, დავითმა, 1921 წელს კოჭორთან, საქართველოს დამოუკიდებლობის დასაცავად, თავი შეაქლა მომთაბარე ბოლშევიკებს)... რაც მთავარია, ყველა ისინი პატიოსნები იყვნენ, თუკი, რა თქმა უნდა, პატიოსნებად ჩაითვლებიან არაკომუნისტური და, მაშანადამე, ანტიხალხური პარტიის წევრები...

...დაახ, უწიგნურ ბებიქალ მელანოს თავისი ხანგრძლივი სიცოცხლის მანძილზე მართო ჩემს სოფელში შვიდასამდე ბავშვი ეყოლებოდა ჭიპშეჭრილი, რომლებიდანაც, ვიმეორებ, ერთიც არ მოხუთვია, რადგან ყველას თავის გულის სითბოსა და სიყვარულს ანათლავდა და სულაც არ ფიქრობდა, მელოგინეს რას ააღლეტ-აართმევდა... მისი გასამრჯელო ახალშობილი ქართველის ომახიანი ტირილი იყო.

არა, ომახიანად ახლაც ტირიან...

როცა გალის სამშობიაროში ვირთხებმა ჩვილი დაქბინეს, მასთან ერთად დედაც ატირდა „ომახიანად...“

ახმეტის სამშობიაროში ოთხი ახალშობილი თითქმის ერთდროულად ისე გამოეთხოვა ამქვეყნიურ სამოთხეს, ჯერ თვალებიც არ ჰქონდათ რიგიანად გახელილი. მიზეზი? სრული უგულისყურობა თანამედროვე საგინეკოლოგიო იარაღით აღკურვილი მედიკოსების მხრივ...

შეიძლება ამის მიზეზი ისიც იყო, რომ ამათ ჯიბეებამდე ახალშობილთა ხელმოკლე დედებს ხელი ვერ მიუწვდათ...

ბარემ ესეც ვიცოდეთ, რათა გული ოდნავ მაინც დავიმშვიდოთ: თბილისთან შედარებით რაიონში მშობიარობა (ოღონდ არა ტყუბისა) უფრო იაფი ჯდება: იქ მომხარებელ-მახარობლები — „ბიჭი გყავს, ბიჭი!“ გოგო არ ჯობია ბიჭს?!“ —

უფრო ცოტანი არიან და, მაშასადამე, ისე ხშირად არ უხდება გაბედნიერებულ მამას ჭიბეები გადმოაპირქვეავოს...

რატომ შინ არ იმშობიარებთ-მეთქი, ვკითხე ერთხელ ამ არსად გამოკრული პრეისკურანტით ერთ შეწუხებულ ახალგაზრდა ქალს, ორსულობას რომ გაუბრძის, რადგან აბორტი უფრო იაფი უჯდება, — ვინ იძლევა ამის უფლებას, თუ შემთხვევით მოულოდნელად შინ მოილოგინე, სულ ერთია, მაინც რაიონში უნდა წახვიდე და დაწვე მათთან შენი თოთოიანითო...

სწავლა სიბერემდეო, — მე ეს აქამდე არ ვიცოდი.

ეს კი ვიცოდი: ევროპა-ამერიკაში პოლიციელებს სპეციალურად ასწავლიან, როგორ აღმოუჩინონ საექიმო დახმარება მშობიარეს ექსტრემალურ სიტუაციაში...

საინტერესოა, ასეთი სწავლება ჩვენშიც რომ იყოს, მილიციელები მომკივან მშობიარეს ქალაღდს, ლენინი რომ ახატია, „მანამდე“ მოსთხოვდნენ თუ „მის“ მერე?..

...აი, მიიცვალა ადამიანი, და თუ ის... არა, მას უკვე აღარ ძალუძს „ჩოთქს“ ხელი ჩამოჰკრას და თვითონვე იანგარიშოს თავისივე გასვენების ხარჯები...

და თუ მისი ჭირისუფალნი არასმქონე, ლარიბნი არიან...

ო-ო, ეს სიტყვები ნაბეჭდ ლიტერატურაში, სცენაზე და რადიო-ტელევიზიაში აღარ იხმარება, მათ მკაცრი ამკრძალავი ტაბუ ადევთ, მაგრამ, რას იზამ, ჩვენს სინამდვილეში ასეთები... მმ... „აქა-იქ“ კიდევ მოინახებიან, და ვისაც ამის არ სჯერა და ამას ცილისწამებად ჩამითვლის, გაისარჯოს და ხანდახან მაინც შეიხედოს ხილბოსტნეულის მაღაზიებში — რამსიგარძე რიგი დგება ხოლმე იქ, ბაზართან შედარებით ბევრად-ბევრად უხარისხო ხილზე და მწვანილეულზე, მაგრამ იმავე ბაზართან შედარებით უფრო იაფზე...

შეიძლება ჩვენმა დაკვირვებულმა, ობიექტურმა სოციოლოგებმა ამ ხალხის რიგში დგომით მოყვარულობით და მისი სიზარმაციით ახსნან, ბაზარში წასვლა ეშორებათო, სადაც არა-ზარმაცები, სხვათა შორის, ნაირ-ნაირ ხორაგეულს ფასის და უკითხავად, შეუუვარებლად ყიდულობენ და ათავსებენ მანქანების საბარგულებში.

...ღიას, მიიცვალა ადამიანი, თუ მისი მომვლელ-მზრუნველ-

ნი მარტო ალალი ლუკმის შემხედვარენი არიან... ო-ო, მერედა, მარტო პატიოსნება ხომ არ გააპატიოსნებს მიცვალებულს? ეს ბალზამირებაო, ეს...

არა, არ ჩამოვთვლი, და არა იმიტომ, რომ გრძელი სია გამოგვივა... იაპონელები შეხვედრისას, რომელიმე მათგანს შინ თუნდაც მიცვალებული ესვენოს, ერთმანეთს მაინც ღიმილმორეული ესაუბრებიან, — ყველას ისეც უთვალავი დარდი აქვს და კიდევ ჩემი სევდა თავზე რაღას მოვახვიო, — ასევე მეც, ჩემი მკითხველი შავი საფიქრალით რატომ დავტვირთო, ამას კი ვიტყვი მოკლედ, საბჭოთა ქვეყანაში მიწა, მგონი, მხოლოდ სასაფლაოზე იყიდება, და მას ერთი სახელმწიფო ფასი აქვს; თბილისი, მართალია, როგორც ვიცობ, საბჭოთა სახელმწიფოში კი არის, მაგრამ საფლავის მიწას, სამი არშინი ფართობი რომ სჭირდება, ორნაირი ფასი ადევს, — სახელმწიფო, რომელიც ფიქტიურია და ფაქტიური — კერძო, რაც ვრცელდება აგრეთვე დამარხვასთან დაკავშირებულ ყოველნაირ სხვა „აქსესუარ-რიტუალებთან“: ეს შოფერს — კუბოს მოტანისთვისო, ეს მუშებს — კუბოს ბინაში ატანისთვისო, ეს — სამარის გაქრისთვისო, მიცვალებულის სამარეში ჩაშვებისთვისო, მისთვის მიწის მიყრისთვისო, და, ვინ მოთვლის, კიდევ რამდენი, რამდენი წვრილმანი გამოხტება ხოლმე, რომლებიც, მათი თვითდამკანონებლების ნება-სურვილით, მსხვილმანად საღდება და გინდა-არ გინდა, ასეთად უნდა იწამო, რამეთუ სხვა გამოსავალი, ბევრიც რომ იხტუნო-იწრიალო, არ არის და არ არის...

ეს მუხის კუბო მაინც რაღას შემოიღეს, რომლის სახელმწიფო ფასი... 350 მანეთია! ვფიქრობ, არ გაგიჭირდებათ წარმოიდგინოთ, რა იქნება მისი მალული ფასი, თუკი იგი მხოლოდ „დახლს ქვემოდან“ იყიდება...

ჰოდა, რაკი იგი საპრესტიჟო სასახლედ ითვლება, ყველა ჩვენგანი, ხელმოკლე და „ხელგრძელიც“, აკი ერთიც და მეორეც წამხედურა კულაბზიკაა, ვცდილობთ ერთმანეთს არ ჩამოვრჩეთ ჩვენი მიცვალებულის პატივის მიგებაში...

ო, ადამიანის სიბრძნე რარიგ იზეიმებდა, თუ ამ მუხის სასახლეებში მარტო მათ ჩაასვენებდნენ, რომელთა გასვენების ხარჯებს, ჩვეულებრივ, სახელმწიფო კისრულობს ხოლმე და არ იყიდებოდეს ისინი „კერძო პირებზე...“

გაზეთში გამოცხადებაც დიდ ფინანსურ ტვირთად აწევს მცირეხელფასიან ჭირისუფალს... რა ქნას, არ გამოაცხადოს და... გადაათრეს, იტყვიანო, გამოაცხადოს და... 40 მანეთი! ეს ზოგიერთისთვის ჯამაგირის ერთი მესამედია, ზოგიერთისთვის — მისი ნახევარიც კი...

ცოტა არ იყოს, თითქოს უხერხული ისიც უნდა იყოს, რომ გაზეთ „თბილისში“ ზოგჯერ სამოცზე მეტი სამგლოვიარო განცხადებაც კი იბეჭდება, რომლის შემოსავალი — სამოცი გამრავლებული ორმოცზე — 2400 მანეთს აღწევს, მაშინ, როცა იგივე გაზეთის ერთი ნომრის ერთხელ და სამუდამოდ დადგენილი საავტორო ჰონორარი 180 მანეთს არ აღემატება.

ეგებ ესეც სიბრძნე იქნებოდა, უფრო ხელმისაწვდომი რომ გახდეს, სამგლოვიარო განცხადებას ფასი თუ დააკლდებოდა, მით უმეტეს, რაც დრო გადის, მით უფრო და უფრო კლებულობს განცხადებათა მოცულობა (თუმცა ნებადართულია მოხსენიება გარდა მშობლებისა, მეუღლეებისა, შვილებისა და დები-ძმებისა, — აგრეთვე პაპა-ბებიებისა, რძლებისა, სიძეებისა, შვილიშვილებისა, დედამთილ-მამამთილ და სიდედრ-სიმამრისა).

წავიკითხოთ ზოგიერთი მათგანი, რამდენადაც მათში ერთგვარი დემოგრაფიული სურათი თვალსაჩინოდ აირეკლება:

„შვილი მარინე მესხი, ძმა კონსტანტინე ვაჩნაძე, ოუწყებთან, რომ გარდაიცვალა ეკატერინე დავითის ასული მესხი. დაკრძალვა თბილისში“.

(მიაქციეთ ყურადღება: არც ძმა, არც და, არც ქმარ-შვილი, არც ცოლ-შვილი)...

„დედა ნაზიბროლა, ბებია კატუშა, ბაბუა კარლო მიქანაძეები იუწყებთან, რომ გარდაიცვალა ია (კოკრო) კალანდაძე. დაკრძალვა თბილისში“.

(როგორც ხედავთ, გარდაცვლიათ ერთადერთი შვილი და ერთადერთი შვილიშვილი... დარჩენილთ... ღმერთმა დიდი მხნეობა მისცეთ და დიდხანს, დიდხანს იცოცხლონ, მაგრამ... ოდესმე მაინც... ვილა ეყოლებათ გამს... მმ...).

„და საშა მექანარი, ბიძაშვილი თაშარ ასათიანი ოჯახით იუწყებთან, რომ გარდაიცვალა ირაკლი ალექსანდრეს ძე მექანარი. დაკრძალვა თბილისში“.

(მეტი არც ძმა, არც და, არც ქმარ-შვილი)...

„შვილი ანიკო, შვილიშვილი გიგი იუწყებთან, რომ გარდაიცვალა ეკატერინე ზაქარიას ასული ასლანიშვილი-მაზმიშვილი. დაკრძალვა სოფ. ყარაღაჯში (ქასპის რ.)“.
(არც დედას, არც შვილიშვილს — არც დები, არც ძმები)...

„შვილი მარო, შვილიშვილი ლეილა კეთილაძე იუწყებთან, რომ გარდაიცვალა გაიანე კონსტანტინეს ასული ტერელაძე-გოგაძე. დაკრძალვა გოჩა-ჯიხაიში (წულუკიძის რ.)“.

(გთხოვთ შეადაროთ ქალაქი და სოფელი ერთმანეთს, რაიმე განსხვავებას მათ შორის, ალბათ ვერ აღმოაჩენთ).

დიახ, ასეთ კუდმომწეარ განცხადებათა ფასი 40 მანეთიაა ...ო-ო, ძვირფასო მკითხველო, ბოლოს და ბოლოს, თქვენთან ერთად მეც, რასაკვირველია, არა იმდენად სამგლოვიარო განცხადების ფასი მაწუხებს, — ეს, შეიძლება, სულ მუქთადაც ვაქციოთ, მაგრამ... ამ ზარდამცემ „კუსტარულ დემოგრაფიას“ რა ვუყოთ, ასე დაუნდობლად და ხმამაღლა რომ გააკვივის ვაზგენების გასახარებელ „Умиряющая нация“-ს?!
გ ვ ი ა ნ დ ე ლ ი მინაწერი: ზემოთქმულის დაწერიდან. ორი წლის შემდეგ აქლემმა ჩოქვით ერთხელ კიდევ მომაკითხა: გარდამეცვალა და-ძმებში ყველაზე უფროსი მარტოხელა და...

სამგლოვიარო განცხადებას თურმე უკვე აღარ ზღუდავენ: მასში ახლა შორეული ნათესავი კი არაა, — თუ გნებავს, ბერნარდ შოუ და ონორე დე ბალზაკიც მოიხსენიე, — ვინ არის დამშლელი, ოღონდ... ყოველ სიტყვა-ხსენებაზე ორ-ორ მანეთს უნდა ჩამოხვიდე...

ზოგიერთი საპრესტიჟოდ მიჩნეული ყვავი-ჩხიკვის მამი-

დაშვილებიანი განცხადება ორას მანეთამდეც კი ჯდება (ერთი გაჭიმული სამგლოვიარო განცხადების საფასური — მთელი სამხიარულო გაზეთის საავტორო პონორარის ტოლი!).

...და თუშცა ჩემი და, პირობითად თუ ვიტყვით, სპარტანულად გასვენდა, — უმუხისკუბოდ, უმუსიკოდ, უგვირგვინოდ, სულ რაღაც 15-კაციანი მოსაგონარი ჭირის პურის თანხლებით, — და მაინც, გასვენების ხარჯებმა თუ მათ საბაზრო ფასებით ვიანგარიშებთ...

ო-ო, ღმერთმა აგარიღოთ ეს აქლემი და ეს ანგარიშიც, გინდ კერძო და გინდ სახელმწიფო პრეისკურანტით, ისე კი, თუ პატივს დამდებთ და მენდობით, რაკი შე უკვე ვიანგარიშე...

ერთობ ძვირი ღირს სიკვდილი თბილისში (ისე, როგორც მთელ საქართველოში)!..

მარტო კუბოს, უბრალო კუბოს ღირებულება 131 მანეთია, ჩემისთანა კაცის კაი ერთი თვის პენსია...

და მაინც...

ჭიხვინებენ ცხენები,
ჩვენ არ მოგვესვენება...
ქართველები გახლავართ,
კარგად მოგეხსენებათ.

ღმერთო, შენ გაუნათე
ერს სიცოცხლის მიზანი
და უმრავლე ჩვენს მამულს —
ლეკნი ალგეთისანი!..

მთავარეპისკოპოსი თადეოზი.

1983 წ.

უსარგებლოდ გატარებული ცხოვრება
ნაადრევი სიკვდილია.

გოეთე

ერთმა ჩემმა კეთილისმღომელმა მკითხველმა, რომელსაც ქსეროქსზე გადატანილი „შავი წიგნი“ ბევრზე ადრე წაეკითხა, შეშფოთებით და შიშით მითხრა; ეს რა დაგიწერიათ, ნუთუ არ გეშინიათ, თქვენ საშინაო პოლიტიკასაც ეხებით და... არ იცით, რა უყვეს პროფესორ წიბახაშვილსო?..

ვიცოდი, რასაკვირველია, ვიცოდი; გაზეთ „კომუნისტში“ იმხანად უკვე ყოფილ ამხანაგ წიბახაშვილს ამხანაგმა ნინიძემ ბღღვირი აადინა და ცხვირი მიუნაყა, მეტიც ეკუთვნისო... უნივერსიტეტიდან გასაგდებიც კი არის, მაგრამ რაკი ჩვენ ჰუმანისტები ვართ, ჭერჭერობით ეს ვაკმაროთო.

ნინიძის იმ გრძელი, შემაჩვენებელი წერილიდან ის კი გავიგეთ, რომ მეცნიერების ცნობილი მსახური „ანონიმებს“ წერდა თურმე, ოლონდ... ჩემი ერთი კომედიის, „ავი ძაღლის“ „წამყვანი“ პერსონაჟი ვანო ლაითაძეც წერდა ამგვარი ყადის „თხზულებებს“, ოლონდ ჩვენ, მაყურებლებმა, ვიცოდით მათი შინაარსი და მიზანიც, ნინიძის დამსჯელი განჩინების მიხედვით კი ჩვენ, მკითხველებმა, ვერა და ვერ შევიტყვეთ, მაინც რას შოიდავდა ამ მეცნიერის „ანონიმური შემოქმედება“...

კი, მაგრამ... განა შეიძლება ადამიანს საქვეყნოდ სამოქალაქო სიკვდილის განაჩენი გამოუტანო ისე, რომ; მოსამართლის გარდა, არავინ იცოდეს, კონკრეტულად რა ბრალი ედება მას?

თურმე შეიძლება!

პროფესორ გიორგი წიბახაშვილს არ ვიცნობ პირადად, და, საერთოდ, არც ოდესმე ცალი თვალითაც არ მინახავს, მაგრამ მე არც სოკრატე მიხილავს, მაგრამ ვიცი, იგი სიკეთისა და სინდისიერების მქადაგებელ-მთესველი იყო...

ხალხს არაფერი არ ემალება, და თუ ის, ზოგჯერ, ცხელ

ფაქტს უმაღლვე ვერ ჩასწვდება, და ვაგლახ, მის გაცივებასაც ვერ მოესწრება, დედააზრს მისას ისტორია მომავალი თაობებისათვის მაინც შემოინახავს.

რა არის „ანონიმკა“, დასავლეთში ეს ახლაც არ იციან, სხვათა შორის, არც მეფის რუსეთმა იცოდა... ერთადერთი „ანონიმკა“, ნიკოლოზ პირველის დროს რომ დაიწერა და ალექსანდრე პუშკინს გაეგზავნა, რქიანი ბრძანდებით, დიდზე დიდი უბედურების დამტრიალებელი გამოდგა: ჯერ კიდევ ახალგაზრდა, უბადლო გენიოსი იმ ქვეყანას გაუყენა...

დიან, „ანონიმკა“ მხოლოდ ჩვენი, საბჭოური ცხოვრების კანონზომიერი პირმშოა, და მას მასები, ძალიანაც რომ ეცადონ, ვერ აღმოფხვრიან, მისი ძირიან-ბუდიანად ამოძირკვა მარტო მასების წინამძღოლთ შეუძლიათ.

და თუ მას თავგამოდებით არ ებრძვიან ისე, როგორც, მაგალითად, ჭირს, ალბათ იმიტომ, რომ „ზოგი ჭირი მარგებელიას“ სიბრძნით ხელმძღვანელობენ.

ქვეყნად ცოტა როდი იწერება მართალი „ანონიმკები“, რომლების იქითაც მართალი ადამიანები იმალებიან იმის შიშით, რომ არა აქვთ იმედი სიმართლის ზეიმისა...

არა, საბოლოოდ სიმართლე თითქოსდა იმარჯვებს კიდევ, მაგრამ ეს, უკეთეს შემთხვევაში, დამწერის, სიმართლის მადიებლის, უსასრულო ტანჯვა-წამების მერმე, უარეს შემთხვევაში კი, და ბევრად უფრო ხშირად, — ჩვენი სამუდამო მიძინებიდან დიდი ხნის გასვლის შემდეგ, როცა ძვალნი ჩვენი ვედარც სიხარულს აღიქვამენ და ვედარც სევდას.

რამდენადაც მსმენია, გიორგი წიბახაშვილი ომის მონაწილეა, ტანკისტი...

როგორც არა ნაომარ კაცს, ნუ დამეძრახება: მე პირადად ტანკში უბრალოდ ჩაჯდომაც კი გულადობად შესახება, ტანკით ბრძოლა კი, როცა ირგვლივ რეალური ჯოჯოხეთია, რაოდენ მამაცობას მოითხოვს, ეს, ალბათ, მხოლოდ ტანკისტებმა იციან...

ჰოდა, ასეთი „ყოფილი“ მამაცი, ახლა კი ისეთი პროფესორი, რომელსაც ვერ შეჰბედავ მატრიკულში ოცდახუთმანეთიანი ჩაუდო, უვიცს ცოდნის დამადასტურებელი ნიშანი რომ ჩაგიწეროს, — რამ აიძულა მისთვის ასეთი არასაკადრისი საქმიანობისათვის ხელი მოეკიდა?

ამბობენ, უტელეფონობამ გაამწარაო... მერე? ამისათვის „ნინიძეებმა“, ცხადია, ზემოდან უფრო დიდი „ნინიძეების“ დავალებით, ისე უნდა „დააყრუონ“, რომ ტელეფონი სულაც აღარ დასჭირდეს?!

მის ქუჩაზე, მის მეზობლად, მის გვერდით, მეხინკლეს, ტაქსისტს, გამყიდველს, ქურდ უსაქმურს და ქურდ საქმოსანს, აი მათ, რომლებსაც ომიანობისას ხელთ „უგლავოი“ თოფიც არ სჭერიათ, — თუ არ აკლიათ ტექნიკის ეს მონაპოვარი, რატომ უნდა იყოს იგი ათეული წლების მანძილზე საოცნებო საგანი ოთხწლიან ომში რაღაც სასწაულით გადარჩენილი ტანკისტ-სათვის, ამჟამად უნივერსიტეტის არა ვითომ, — ნ ა მ დ ვ ი ლ ი პროფესორისთვის?!

აგერ ახლა მოსკოვის „იზვესტიამ“ მთელი ჩვენი დიდი ქვეყნის მასშტაბით შეგვარცხვინა, რედაქციას საშუალება არა აქვს თბილისში პროფესორ ამონაშვილს დაუყავშირდეს — ლურმე ტელეფონი არ უდგასო...

აღფაბეტის მიხედვით თუ ვიმსჯელებთ, — ამონაშვილი — არუთინიანი — ტელეფონის ცნობარში შეგიძლიათ დათვალოთ 225 არუთინოვ-არუთინიანი, რომელთა შორის, არა მგონია, ერთი მაინც ერიოს თუნდაც ვითომ პროფესორი (აღრე უკვე ვწერდი, სომეხ ინტელიგენციას თბილისში საარსებო საფუძველი გამოეცალათ-მეთქი), პროფესორ ამონაშვილის სახელი კი კარგა ზანია პირზე აკერიათ უმალლესი სკოლების საკავშირო მინისტრით დაწყებული და პედაგოგიური მეცნიერებათა აკადემიის პრეზიდენტით დამთავრებული.

ნამდვილად ნიჭიერი აღამიანები მრავლად დიდრიცხოვან ერებშიც არ იბადებიან, და თუ ჩვენისთანა პატარა ერში მათი სათვალავი უფრო მწირი იქნება, ეს ბუნებრივ, კანონზომიერ მოვლენად უნდა მივიჩნიოთ.

ჰოდა, ნიჭიერ აღამიანებს — შეიძლება თვალში საცემი არა, მაგრამ უხილავი მოვლა-პატრონობა მაინც უნდა ეწეოდეთ, და ეს არა მარტო ნათესავ-მეგობრების მხრივ, თვით ხელისუფლების მხრიდანაც...

ღიახ, როცა თავი ასე მოგვაქვს პაატა ბურჭულაძეთი, ცისანა ტატიშვილით, ჯანსუღ კახიძეთი, — მათი ჩვენი ერის შვილობა რაკი გვეამაყება, და სამართლიანადაც გვეამაყება, მაშინ

იმაზეც უნდა ვფიქრობდეთ, რომ ჩვენს დროში, როცა შინი-დან გამოსვლის შემდეგ ყოველ ფეხის ნაბიჯზე ხიფათი გვე-მუქრება, ეს ჩვენი რჩეულნი მაინც ავაცილოთ საშიშროებას... შეიძლება გაიცინოთ კიდევ, მაგრამ მე მაინც ვიტყვი: ასეთ სამეფულს, მაგალითად, თვითმფრინავით ერთად გაფრენის უფ-ლება არც უნდა მიეცეს.

(რაკი სიტყვამ მოიტანა, ამასაც შევნიშნავდი: თქვენ რომ შევარდნაძე ბრძანდებით, პარტიის ცენტრალურა კომიტეტის პირველი მდივანი, ისეთ იშვიათ მომღერალს, როგორც პაატა ბურჭულაძეა, ნიქსა და დროს საოპერო თეატრის პარტკომო-ბაზე კი არ უნდა ახურდავებინებდე, — წადი, ბიძია, ერთი მა-ინც რომელიმე უცხო ენა შეისწავლე, მომავალში სასიმღეროდ, ვინ იცის, სად მიგიწვიონ და გამოგადგება-თქო...).

...დიახ, ჩვენი, საერთოდ, ასე ფეხმოკიდებული უსულგუ-ლობისა ანდა ბრმა შემთხვევის გამო ტალანტით ნამდვილად მირონცხებულები არ უნდა დააკლდნენ არც ერს, არც ქალაქს!

ამჯერად ხელოვან-შემოქმედებზე ყურადღებას, რასაკვირ-ველია, უფრო იმიტომ ვამახვილებ, რომ ხალხში მათ ასჯერ მეტი სახელი და პოპულარობა აქვთ, ვიდრე სხვა სამოღვაწეო დარგების წარმომადგენლებს, მაგალითისთვის, აი თუნდაც ენათმეცნიერ თამაზ გამყრელიძეს, ანდა ჰიდროტექნიკოს ცოტ-ნე შირცხულავას...

სხვათა შორის, ასეთი „ბედის უსამართლობა“ მარტო ჩვე-ნი დროის დამახასიათებელი არ არის, ასე იყო წინათაც, და არც მომავალში შეიცვლება.

! პროფესორი გიორგი წიბახაშვილი, მართალია, არ არის არც უნიკალური დირიჟორი და არც უნიკალური მომღერალი, მაგ-რამ იგი ის პიროვნებაა, რომელიც ქართულის არმცოდნეს აყ-ვარებს ქართულს და რუსულის არმცოდნე ქართველებს აყ-ვარებს რუსულს; დიახ, იგი არის პატიოსანი და დარბაისელი სწავლული, რომლის შრომები მართლაც შენაძენია ჩვენი კულ-ტურისათვის...

სულ რაღაც რამდენიმე დღით ადრე „ნინიძეების“ მხრივ მის შერისხვამდე, „ლიტერატურულ საქართველოში“ ბევრს გვქონდა ბედნიერება წაგვეკითხა მისი ღრმავაზრიანი სტატია თარგმანის თაობაზე... ამის შერე რამდენიმე დღე-ღამე შეემა-

ტა ისტორიის მარადისობას და რამდენმა „მტკვარმა“ ჩაიარა ვერის ხიდქვეშ, გ. წიბახაშვილის გვარი კი, როგორც ავტორისა, ნაბეჭდ ფურცლებზე აღარ შეგვხვებდრია, მისი გონიერული წერილები ერთიც აღარ წაგვიკითხავს...

ნუთუ ასე უეცრად გამოიფიტა მისი აზროვნების უნარი და ამოიწურა მისი ცოდნის მარაგი?! ან იქნებ... მმ...

რადიშიჩევმა მე-18 საუკუნეში თავის „ღია ანონიმკაში“ („მოგზაურობა პეტერბურგიდან მოსკოვს“) ბატონყმობისა და, საერთოდ, მონობის წინააღმდეგ გაილაშქრა, სამარცხვინო ბოძზე გააკრა მემამულეთა, მოსამართლეთა და, საერთოდ, იმდროინდელი ადმინისტრაციის „სამოდურული“ თვითნებობა, და ამ „ცილისწამებისათვის“ მას სიკვდილი მიუსაჯეს, მერე ეს განაჩენი ათი წლით ციხბირში გადასახლებით შეუცვალეს, მერე ისევ „გადმოასახლეს“ და... ნაკატორალაი კაცი საკანონმდებლო კომისიაში შეიყვანეს კანონების შესამუშავებელ-დასადგენად!

და ნუთუ გიორგი წიბახაშვილმა, ნატანკისტარმა პროფესორმა, თავი ისე შეირცხვინა და ცილისწამებაში რადიშიჩევს ისე დიდნდ გადააქარბა, რომ შეწყალებას ვეღარასოდეს ეღირსება და მასთან ერთად ჩვენც, მისი პატივისცემელი მკითხველები?!

ისე კი, ეს ამხანაგი ნინიძე ასე თავგამოდებით რომ ებრძვის „ანონიმჩიკებს“, თვითონ რატომღა ეფარება გამოგონილ გვარს? რატომ დიაცივით იფარებს არაგამჭირვალე პირბადეს და თავისი სახის ვაჟკაცური ნაკვთებით არ წარდგება „კომუნისტის“, სულ ცოტა, მილიონი მკითხველის წინაშე? ეგებ ვილაცის და რაღაცის მასაც ეშინია, ა?

ო-ო, თუ ასეა, მაშინ რა მიზეზით ქელავს შიშისათვის „ანონიმჩიკ“ წიბახაშვილს?!

ყოველი, რომელი გინდეს თქუენ, რადთა გიყონ კაცთა, ეგრეცა თქუენ ჰყვით მათა მიმართ...
(მათე, 7, 12).

ანუ, „კომუნისტური“ ენით თუ ვიტყვით: ნუ უზამ სხვას იმას, რასაც არ უზამ საკუთარ თავს...

იოსებ იმედაშვილი ძალიან კარგად მახსოვს ზურგზე მოგდებული ნაბდით და ბიბლიური წვერით, მაგრამ მარტო ამით როდი იყო იგი ჩემთვის მოკრძალებული პატივისცემის ღირსი: მე კიდევ მოვესწარი მის „თეატრსა და ცხოვრებას“, როცა ეს უურნალი, უკვე სულთმობრძავე, უკანასკნელ ნომრებს ითვლიდა გაიშვიათებული პულსივით...

მახსოვს ამ უურნალის ბოლოდროინდელი რედაქცია, ახლაც რომ, „ზარია ვოსტოკას“ გვერდით, ღილებს მალაზიას, ოღონდ მის მერე იგი, ასე თუ ისე, გააფართოვს, ასე რომ, ახლაც იგი უფრო ვიწროდ უნდა წარმოიდგინოთ, — ორი კუბო რომ დაიდგას სიგრძეზე და მათ გასწვრივ დადგმულ სკამებზე წვალებით რომ ჩამოსხდნენ ქირისუფლები, ვაი, კუბოს არ გავეხახუნოთო...

სწორედ სკასავით ამ ვიწრო, მაგრამ ფუტკრების სკასავით მხოლოდ სიკეთისა და სიტკბოს შთესავ, იოსებ იმედაშვილის, ქართული თეატრისა და ქართული მწერლობის წინაშე დიდად ნაამაგარ „თეატრსა და ცხოვრებას“ აქ აევო წესი 1926 წელს და სწორედ აქედან...

არა, კი არ გამოასვენეს, — გადაათრიეს ძველი ქვეყნის რომელიღაც სანაგვეზე, როგორც ჭუჭყიანი, ფეხის საწმენდი ნატომრალი ჩვარი.

...და აი ახლა, მაისის ერთ მშვენიერ დღეს მსახიობთა სახლში გაიმართა ამ „ჩვარის“ სულსჩამდგმელის მოსაგონარი საღამო, მისი დაბადების ასი წლის აღსანიშნავად.

ჰოდა, აბა როგორ არ წავიდოდი, და წავედი არა იმიტომ, რომ, ჩემდა დასანანად, სულ ბოლო დროს გაცნობილ, ამჟამადაც, სიბერეშიც წმინდა ქართული სიღამაზე შემორჩენილ მის ვაჟს, გაიოზს მოვჩვენებოდი...

არა, ეს ჩემი სულიერი მოთხოვნილება იყო, ჩემი შეუმჩნეველი დასწრებით (არათუ სცენაზე, წინა რიგებშიც კი, თუ, საერთოდ, შესაძლებელია ადგილის არჩევა, არასოდეს არ ვჯდები), მხოლოდ ჩემს გულში მინდოდა ახალგაზრდობის დროინდელი ჩემი სიყვარული გამომეხატა ქართული თეატრისა და მწერლობის ამ გუთნისდედისა და ღამის მეზრისადმი, არც ადრე დალხინებულ, მაგრამ ბოლო წლებში მაინც, უფრო მეტად სამსალანასვამი მამულიშვილისადმი...

(აკაკის უთქვამს შებლგაპობილ დიმიტრი ყიფიანზე, ალბათ, თავის თავზეც და, საერთოდ, მისი დროის ყველა სულგამწარებულ... „ვის უნახავს საზოგადო მოღვაწე, ცხოვრებით დამტკბარი?“—ო.

ო, ბულბულო საქართველოსავ, წამოდექი; წამოდექი და მთაწმინდიდან წუთნახევრით მაინც გადმოხედე შენს ცა-ფი-რუბ-ხმელეთ-ზურამუხტ სამშობლოს: ახლა მის ცის ქვეშ ერთ-საც ვერ მონახავ ისეთ საზოგადო მოღვაწეს... ცხოვრებით დატკბობა რა არის, — ბადაგის მორევში ბუზივით რომ არ ნეტარებდეს!).

...დიახ, იმ საღამოს ჩემი ჩუმი სიყვარული კი გამოვხატე თაფლის სათელივით ჩამოქნილი, წმინდანებში შესარაცხი სა-ერო კაცისადმი, მაგრამ... შინ მაინც თითქოს ნაცემ-ნაბეგვი, დალურსმული ჩექმიანი ფეხით გათელილი დავბრუნდი: თურ-მე იოსებ იმედაშვილს ჩემი ძმაც, პროლეტარული კრიტიკოსი ბენიტო ბუაჩიძეც უწამლავდა სიცოცხლეს, ებრძოდაო „თეატ-რსა და ცხოვრებას“ კლასობრივი პოზიციებიდან...

იმ დროს ჩემი ძმა ოცი-ოცდაერთი წლისა თუ იქნებოდა, მე კი ჯერ კიდევ არაფერი გამეგებოდა არც თეატრისა და არც ცხოვრებისა, საბავშვო ჟურნალ „ნაკადულის“ კითხვას, ალბათ, რიკ-ტაფელას თამაშს ვამჯობინებდი...

და მაინც, ახლა, თითქმის სამოცი წლის შემდეგ, უკვე ბე-რიკაცს, პიონერიც რომ არასოდეს ვყოფილვარ, სირცხვილი მწვავს, ჩემი ძმა ასე გაკიცხვით რომ იხსენიება; აკი დარბაზში ზოგმა ნაცნობმა ჩემკენ ისეთი თვალით მოიხედა, თითქოს ძმის დანაშაულის თანამონაწილე მეც ებრძანდებოდინ... მათ, ცხა-დია, ბევრად არც არაფრად აინტერესებდათ, ბენიტო ბუაჩი-ძე ამ ბრალდებას მართლაც იმსახურებდა თუ არა, და თუ იმ-სახურებდა, მაინც რა დოზით?

აბა, ერთი მიბრძანეთ, თუმცა ამას კი არ აბრალებენ, მაგ-რამ მაინც: შეეძლო კი ქუთაისელ, 18 წლის, ჯერ კიდევ თით-ქმის მოზარდს, თუნდაც სერიოზულს, 1923 წელს მიეხურა თბილისში საყმაწვილო ჟურნალი „ჭეჭილი“, რომელსაც, აკა-კი რომ ბრძანებს, ისეთი საზოგადო მოღვაწის შვილი და თა-ვდაც მამასავით შეურყვნელი სინდისით სავსე, მოაზროვნე აკადემიკოსი ახლა, აი ასე რომ იგონებს:

„მიყვარდა „ჭეჭილის“ კითხვა: ჩემ დროს უკვე აღარ გამოდიოდა, მაგრამ გეჭონდა ოცდახუთი წლის კომპლექტი, ასე რომ, ჩემთვის ეს ამოუწურავი წყარო იყო. არ ვიცი, არის თუ არა ჩვენს პედაგოგიურ ლიტერატურაში სათანადოდ შეფასებული ეს მშვენიერი, დიდად შინაარსიანი ეურნალი“. (ვახტანგ ბერიძე).

...როგორ? 1930 წელს 25 წლის პროლეტარულმა კრიტიკოსმა ბენიტო ბუაჩიძემ გადააკეთა ერთხელ წვითა და დაგვიტოვა დაარსებული თბილისის უნივერსიტეტი დღენაკლულ პედაგოგიურ ინსტიტუტად და მანვე განდევნა მისი სამეუფოდან — როგორც ეს მართლაც აკადემიკოსი წერს:

„ივანე ჯავახიშვილი, გრიგოლ წერეთელი, ფილიპე გოგიჩაიშვილი, მიხეილ პოლივექტოვი, ლუარსაბ ანდრონიკაშვილი და კიდევ რამდენიმე თვალსაჩინო პროფესორი, როგორც უმაღლესი სკოლისათვის შეუფერებელნი და მავნენი“?!

ღიახ, ივანე ჯავახიშვილი — მავნე!!!

იოსებ იმედაშვილს ებრძოდაო, — ასე დასავგობ რამეს კი, მაგრამ ჯერ არსად თქმულა და, ალბათ, არც არასოდეს იტყვიან, რომ ბენიტო ბუაჩიძე, მახვილი გონების პატრონი, ჩინებული ორატორი და გამორჩეული სამეთაურო კაცი (ამიტომაც წაიყვანეს სრულიად ახალგაზრდა მოსკოვში პროლეტარულ მწერალთა საკავშირო ასოციაციის მეორე მდივნად), თავის „დიდკაცობისას“ მუდამ მხარში იდგა გალაქტიონ ტაბიძეს, იმ დროს პრივილეგიური პროლეტარული მწერლებიდან პირველმა შეაგება საქებარი სიტყვა „რევოლუციისკენ შემობრუნებულ“ მიხეილ ჯავახიშვილს; იგი პირველი გამოვიდა ჭირიანობის უამს „შავი კაცის“, ილია ჭავჭავაძის დასაცავად, რისთვისაც ფილიპე მახარაძის (აგრეთვე გიორგი ყურულაშვილის) გულისწყრომა დაიმსახურა და საქართველოს პროლეტარული მწერლების ასოციაციის მდივნობიდან მოახსნევიანა...

რამდენიმე ციტატა ფილიპე მახარაძის ერთი წერილიდან („მდგომარეობა თანამედროვე ქართულ მწერლობაში“; კრებული „ბრძოლა კლასიკოსებისათვის“. 1931 წელი):

„ილია ჭავჭავაძე, ყველა მისი ნაწერების და ყველა იმ დოკუმენტების და მასალების მიხედვით, რაც მისი ცხოვრების შესახებ მოიპოვება, მუდამეამ ტ ი ვ ი უ რ ი თ ა ვ ა დ ი და მ ე მ უ ლ ე ი ყო თ ა ვ ი დ ა ნ ვ ე და ბოლომდეც ასეთივე დარჩა“. (ხაზგასმა აქაც და ყველგან ავტორისა).

„ამას წინედ სრულიად შემთხვევით მე წავაწყდი ამხ. ბ. ბუაჩიძის ნაწერების ზოგიერთ ადგილებს, სადაც იგი იძლევა ი. ჭავჭავაძის და მისი ჯგუფის მწერლების დახასიათებას.

ამხ. ბ. ბუაჩიძის ერთ-ერთ ნაწერში, რომელიც გამოქვეყნებული იყო 1927 წ., ჩვენ შევამჩნიეთ ორი ადგილი, სადაც შემცდარი და მარქსისტიკისათვის ყოვლად მიუღებელი შეხედულებაა გამოთქმული: „მ ე ს ა მ ო ც ე წ ლ ე ბ ი ს ქ ა რ თ უ ლ ი ლ ი ტ ე რ ა ტ უ რ ი ს ძ ლ ი ე რ ი ნ ა კ ა დ ი ხ ე ლ ს უ წ ყ ო ბ დ ა დ ი ბ რ ძ ო დ ა (!?) ბ ა ტ ო ნ ყ მ ო ბ ი ს წ ი ნ ა ა ლ მ დ ე გ ო“ (იხ. „ლიტერატურა და თანამედროვეობა“, გამ. 1927 წ. გვ. 14).

„...ამხ. ბუაჩიძე საშინლად ცდება, როცა ამტკიცებს, რომ ი. ჭავჭავაძე ბრძოლას აწარმოებდა ბატონყმობის წინააღმდეგო.

ეს მართალი არაა, ეს სიცრუეა. ამ ზღაპარს ბოლო უნდა მოელოს“.

„ი. ჭავჭავაძე იყო: წ ა რ ჩ ი ნ ე ბ უ ლ ი თ ა ვ ა დ ი ს შ ე ი ლ ი, მ ე მ ა ძ უ ლ ე და გ ლ ე ხ ე ბ ი ს მ ე ბ ა ტ ო ნ ე. იგი იყო მ უ შ ე ბ ი ს ა და გ ლ ე ხ ე ბ ი ს ე ქ ს - ბ ლ ო ა ტ ა ტ ო რ ი. როგორც მწერალი, ი. ჭავჭავაძე იყო რეაქციონერი. მ ე მ ა ძ უ ლ ე ბ ი ს ი ნ ტ ე რ ე ს ე ბ ი ს უ ე რ თ გ უ ლ ე ს ი დ ა მ გ ვ ე ლ ი, ფ ე ო დ ა - ლ უ რ ი ს ა ქ ა რ თ ვ ე ლ ო ს ჰ ა თ ა ყ ვ ა ნ ე ბ ე ლ ი და მ ო ნ ა რ ქ ი ს ტ ი“.

„ამხ. ბუაჩიძე არ იცნობს იმ საგანს, რაზედაც სწერს, თორემ ასეთ ვ ე ლ უ რ რ ა მ ე ს არ დასწერდა. იგი სახელს უკეთებს და ავტორიტეტს უქმნის ქართულ ლიტერატურაში რეაქციონერ მწერლებს, და უწინარეს ყოვლისა იმათ ბურჯს და მებაირახტრეს ი. ჭავჭავაძეს. ეს უნდა

ითქვას კატეგორიულად, მთელი სიმკვეთრით და ეს მით უმეტეს, რომ ამხ. ბუაჩიძე კომუნისტური პარტიის წევრია. პარტია ვერ მისცემს მას უფლებას პარტიის შიგნით ხელი შეუწყოს ჩვენი პარტიის ძველი და ახალი მოწინააღმდეგეების შეხედულებათა გავრცელებას“.

კიდევ ერთი ციტატა, სასხვათაშორისო, სულ სხვა ავტორისა და მოგვიანო დროისა:

„ამხ. ლ. ბერიას მოხსენებაში მოცემულია სავსებით სწორი და ამომწურავი შეფასება იმ გამხრწნელი და მავნებლური მუშაობისა, რომელსაც ქართულ ლიტერატურაში აწარმოებდა ბ. ბუაჩიძის ჯგუფი — კონტრრევოლუციური ავერბახელობის ეს პირწავარდნილი ფილიალი“ (ბეს. ჟღენტი, „მნათობი“, № 6-7, 1938 წ.).

დიახ!

როგორ? ბენიტო ბუაჩიძე 1937 წელს 32 წლის ახალგაზრდა ზვარაკად რომ შეიწირეს, და მაინც მოასწრო დაეტოვებინა, თუმც, დღევანდელი თვალსაზრისით, მრავალი მოსაზრება — შედომით სავსე რამდენიმე წიგნი, დახვერტის შემდეგაც უხუთავდა სულს, მაგალითად, დავით კაკაბაძესა და ლადო გუდიაშვილს? პირველი, როგორც ფორმალისტი, კოსმოპოლიტი, ფიზიკურ განადგურებამდე რომ მიიყვანეს, მეორე კი ქაშვეთის მოხატვისათვის ამბიონიდან კი არა, — წითელმაუდგადაფარებული ტრიბუნიდან ხანგრძლივი დროით რომ შეაჩვენეს და ლუკმაპური სანატრელი გაუხადეს?!

ნურაგინ იფიქრებს, ძმის ასე ხსენებით შავის თეთრად გასაღებას ვცდილობდე, ანდა მარტო მას ვიცავდე, — მე ამით უფრო იმის თქმა მინდა, რომ იმ დროს, ისე, როგორც ახლა, ჩვენს დროში, წვეთი წყალიც არ იღვრებოდა დიდი პარტიული ამხანაგების მითითებების გარეშე, იმათ უნებართვოდ, ვინც საერთო პოლიტიკას ქმნიდა და წარმართავდა, და თუ მოხდებოდა სასწაული და ვინმე გაბედავდა და დაღვრიდა, მაშინ... (კვლავ შეავლეთ თვალი ზემორე ციტატებს). ასე რომ, ამჟამად მარტოდენ ლიანდაგის რიგით მსახურთ ნუ მიიჩნევენ ერთადერთ დამნაშავეებად უახლეს ისტორიაში დიდი სარ-

კინიგზო კატასტროფებით გამოწვეული მსხვერპლიანობის მიზეზების გამოძიებისას...

ჩემი მორიდებული თხოვნა იქნებოდა, ამ კვლევისას, იმდროინდელი მეისრე-დამაქცევართა დანაშაულის სიმძიმის შესამსუბუქებლად ნუ დაივიწყებენ იმ გარემოებას, რომ მათ არაერთხელ თეორიულად გაგონილი, მაგრამ პრაქტიკულად, ჯერ არსად ნანახი სოციალისტური საზოგადოების შენების გაწამაწია-ორომტრიალში გულით მაინც სწამდათ ის, რასაც აკეთებდნენ... ისინი დღევანდელი „საზოგადო მოღვაწეებით“ „დამტკბარი ცხოვრების“, „რბილი სავარძლის“, ნაირფერი „ვოლგის“ ხელში ჩასაგდებად და მერმე კი მათი ხელიდან არგასამუვებად როდი იბრძოდნენ და არ აკლავდნენ ერთმანეთს თავს, და ყოველივე ამისათვის ადამიანობიდან მაიმუნობამდე არ მცირდებოდნენ.

მაპატიოს მკითხველმა, თუ ზომაზე მეტად აღელვებულმა მწარე-მწარე სიტყვებსაც დავესესხე და განზეც გადავუხვიე... მართლაცდა, ღირდა კი ერთი უსაბაზოდ გაშავებული პროფესორისა და ჩემი გაწითლების ამბების ასე შორიდან მოყოლა და მათი ერთმანეთთან დაკავშირება?

მე მაინც ვფიქრობ, რომ ღირდა: ამის წამკითხველმა, ძალაუფლებით აღჭურვილმა, დიდი თანამდებობის მქონე პირებმაც, თუნდაც ხანდახან, იქნებ ჰორიზონტისკენაც გაიხედონ ზოლმე და ისე აწონ-დაწონონ თავიანთი საქმიანობა, მათმა დღეს მრუდედ გადადგმულმა ნაბიჯმა, უსამართლოდ და დაუფიქრებლად დღეს მათმა თითის დაქნევამ და ხელის აქნევამ მერე, მომავალში, სირცხვილი არ აჭამოს და არ გააწითლოს მათივე შვილები და შვილიშვილები, დები და ძმები, მოკლედ — ახლობლები და, ვისაც დიდი ხნის სიცოცხლე უწერია, თავისივე საკუთარი თავიც...

ძველი ბერძნები ამბობდნენ:

„ყველაზე დიდი სიმთვრალე ძალაუფლებით დათრობაა“.

იყო კი ახლო წარსულში ისეთი შემთხვევები, როცა ასეთ, თურმე, ყველაზე ძალუმ სიმთვრალეს უძალიანდებოდნენ?

მოდით, ამ კითხვას დუმილით ვუბასუხოთ და ნურც აწმყოს შევეხებით, ახლა ნუ შევეხებით, — როცა იგი შორეულ წარსულად იქცევა, მხოლოდ მაშინ...

„...დედაცაჲ უმთავრესად უნდა ემსახუ-
რებოდეს ოჯახს და შვილების აღზრდას.
თუ ამას ღირსეულად შეასრულებს,
დიდს, ძალიან დიდ საქმეს გააკეთებბ,
დიდს ამავს დასდებს თავის ქვეყანას“.

კ ა ჟ ა

„Я в долгу перед вами, багдадские небеса“, — ვლადიმერ მაიაკოვსკიმ ისტორიაში ასე უკვდავყო პატარა ბაღდათი და მისი წყნარი ზღვასავით მოლივლივე ლურჯი ცა.

(ამთავითვე შევნიშნავდი: თვითონ მაიაკოვსკი წერდა, ბაღდათში დავიბადეო, და თუ ჩვენ ვწერთ ახლა, მაიაკოვსკში დაიბადა მაიაკოვსკიო, ვითომ ეს, ცოცხალი რომ იყოს, მაიაკოვსკის გულზე მოეფონებოდა? ჯერ კიდევ მისმა დამ, ლიუდმილამ, ამ გადარქმევის თაობაზე როდის მითხრა: „Несуразность это..“

ამაზე არანაკლებ ბრყვეული უაზრობა როდი იყო ისიც, რაც ახლა ჩემი თაობის ბერიკაცებსაც აღარ ახსოვთ, და ეს არა მათი მეხსიერების დაობების წყალობით, — იმ დროიდან არასოდეს ამაზე არსად გასაკიცხი სიტყვა ერთიც არ თქმულა, უფრო, ალბათ, მივიწყების გამო: 1935 წელს თბილისის აღმასკომის თავმჯდომარე სიმონ ჯუღელი რაღაც უცნაური მიზეზით გარდაიცვალა და... მისი, როგორც ძველი ბოლშევიკის, ხსოვნის უკვდავსაყოფად გვარი მისი შეარქვეს იმერეთის იმ კოხტა ქალაქს, რომელიც საქართველოში ერთი მეტად პოპულარული სიმღერითაც იყო ცნობილი... ასე რომ ჩვენ მაშინ ახლებურად უნდა გვემღერა:

ო ჯუღელო, ო ჯუღელო, გშორდები-ი...

შო-რს მი-ვდივარ, შორს მივდივარ, ნახვამდის...

ვაიმე-ე ჩე-შო, ვაიმე ჩემო ვენახო-ო,

შვილ-დე წე-ლიწადს, შვილ წელიწადს ვერ ვნახო-ო...

საბედნიეროდ მოხდა სასწაული, ის „უცნაური მიზეზი“ გა-
ირკვა, თანაც საქმოდ მალე, და საუკედავეყოფოდ გამიზნული
ამხანაგი მთაწმინდიდანაც ჩამოასვენეს და ჩვენც წინანდებუ-
რად ავმღერდით:

ზეს-ტა-ფონო, ზესტა-ფონო, გშორდები-ი...).

მაიაკოვსკის რაიონში მევენახეობას მისდევენ... ჯერ კიდევ
მისდევენ... სხვა რაღაცეებსაც მისდევენ, რომელთა მდგომარეობა,
როგორც წინათ ამბობდნენ ხოლმე, არცთუ სულ აღ-
ჩუხეა, რაც, ბუნებრივია, ერთობ აწუხებთ აქაურ თავკაცებს...
ვისარგებლოთ მათი ერთი გასაუბრებით, რომელიც, ცხადია,
ისე არ დაიბეჭდებოდა, რომ თავიანთი ნასაუბრევი არ შეემოწ-
მებინათ:

„საზოგადოებრივ მეურნეობაში კვლავ მეტად დაბალია
ყურძნის საპექტარო მოსავლიანობა — 33,3 ცენტნერი.
მოსახლეობაში კი ეს მაჩვენებელი 100 ცენტნერს აღემა-
ტება. ყურადსაღები სხვაობაა!“

არა, ეს ბოლო ორი სიტყვა მე არ მიმიწერია. ისე კი, მარ-
თლაც ყურადსაღები სხვაობაა, — სამჯერ მეტი!

შერედა, რატომ ხდება ასე, — უკვე სამოცი წელია ვინ არ
იმტვრევს ამაზე თავს, ვინ არ ეძებს ამის მიზეზს, მაგრამ იგი
დღემდე ვერავის მოუნახავს, მათ შორის მეც, ვისაც თავი
გონებაბრჯგუდ სულაც არ მიაჩნია.

ეს კია, თითქმის ყოველი წლის შემოდგომას მაგონდება
ხოლმე კოლექტივიზაციის პირველი წლების რუსთაველის თე-
ატრის ერთი, ასე ვთქვათ, საკოლმეურნეო სპექტაკლი „სალ-
ტე“: იქ ერთ, ახლად გაკოლმეურნებულ გლეხს პარტიული
ხელმძღვანელი უსაყვედურებს, შენს ყოფილ გიშერას რატომ
მეტ ჩალას უყრი, ვიდრე სხვა საქონელს, ეგ დეკლუი უკვე
ხომ შენი აღარ არის, კოლექტივისააო... — კოლექტივის კია,
მარა, რაკი ჩემი იყო, სხვებზე უფრო ახლაც ეგ მიყვარსო.

ო, ეს სიყვარული!..

დალოცოს ღმერთმა კოლექტიური სიყვარული, მაგრამ...

პერსონალური სიყვარული... ჰმ, წყეულიც იყო პერსონალური სიყვარული, სულს რომ გვიხუთავს, გრძელ ნაბიჯს არ გვადგმევინებს, გრდემლზე მთელი ძალით უროს არ გვარტყმევინებს, კომუნისმს გვიგვიანებს...

საერთო ნახირში გაერთიანების შემდეგ რამდენი ჩალა შეიქაბა, რამდენი წყალი დაილია, რამდენი ჭკუის გამფილტრავი ლექტია წაგვეკითხა კოლექტიური სიყვარულის სადიდებლად, და მაინც, არ იქნა და არა ჩვენი შემობრუნება ნათელი ნიშანსვეტისაკენ...

ეს რაკი ისეთი ღრმა თეორიაა, რომლის სიბრძნეს ჩემებრ კაცების გოგრა ვერ ჩასწვდება, დაუებრუნდეთ ისევ მაიაკოვსკის რაიონის პრაქტიკულ საქმიანობას:

„განა შესაწყნარებელი და სასურველია, რომ 16 ფერმის გამგიდან მხოლოდ სამია უმაღლესდამთავრებული, თანაც არაპროფილით“.

ო, ეს, ცხადია, არც შესაწყნარებელია და არც სასურველია. სწორედ ეს იყო მიზეზი, რომ გაკოლექტივიზაციამდე მეჯოგე კვარაცხელიებში ერთიც არ იყო უმაღლესდამთავრებული ბენითალი, და ამიტომაც ვერ ართმევდნენ თავს ზაფხულობით დიდძალი პირუტყვი გადმოერეკათ სამეგრელოდან ზემო იმერეთის მალალმთიან რკინისჯვრის საძოვრებზე და იქვე ეკეთებინათ ფუთობით ისეთი რძიანი სულგუნი, რომლის უგემური გემო ახლაც ახსოვთ ზაქარია და შალვა ბუაჩიძეებს, პირველ კომკავშირელებს, ეკლესიების გუმბათებიდან ჯვრებს ძირს რომ ყრიდნენ შეძახილით — „აბა თუა ღმერთი, თუ ბიჭია, გამაშეშოს!“

...ანდა ბერულავები, სულ რაღაც სამიოდე კაცი, იმიტომ ვერ პატრონობდნენ მელრუქში შვიდასსულიან თხების საკრებულოს, რაკი განათლების პროფილით არ იყვნენ ვეტერინარიის მეცნიერებათა კანდიდატები და იყვნენ მცირემცოდნენი...

„რაიონს აკლია რუსული ენის მასწავლებლები, რის გამოც წინა წლებში თვეობით არ ისწავლებოდა ეს საგანი“.

რუსული ენის ახალგაზრდა მასწავლებელს, რომელიც თბილისში სამსახურს ეძებდეს, არავის ვიცნობ, მაგრამ ერთს, უცხო ენისას, კი; ეს ქალიშვილი უკვე 25 წლისაა, არცთუ დაღბინებული ოჯახიდან გახლავთ, არცთუ კალმით ნახატია, და მისი სახლის წინ ხელისმთხოვნელთა არცთუ ოცეული დგას, და მაინც, როცა შეეკითხნენ, დასავლეთ საქართველოს ერთ-ერთ მომცრო, კობტა ქალაქზე, — იქ თუ გათხოვდებიო, დიდად იწყინა, პროვინციაში რა მაცხოვრებსო...

ჰოდა, თუკი ბაღდათზე ბევრად უფრო მიმზიდველ ქალაქშიც არ უნდა გათხოვება უკვე არცთუ ისე ახალგაზრდა ქალბატონ მადონა ჰკუთახელიძეს, იგბ, — ყურები რომ გვაქვს გამოქედლი, — ჩვენს საამაყო თბილისს დატოვებს და მიაკოვსკის რაიონში იცხოვრებს და იმასწავლებლებს?!

შემდეგ:

„განვლილ სამ წელიწადში ყოველ ას ძროხაზე ნამატის სახით მიღებულია მხოლოდ 63 ხბო, რაც საშუალო-რესპუბლიკურ მაჩვენებელს 7-ით ჩამორჩება“...

თვლა, მით უმეტეს, ასის ფარგალში, ცხადია, უთუოდ გეცოდინებათ და... ას ძროხაზე მხოლოდ 63 ხბო?!

ო-ო, შეწუხებულა, დიდად შეწუხებულა ამის გამო რაიონის უფროსობა, ხუმრობა-საქმე ხომ არ გახლავთ, რესპუბლიკურ მაჩვენებელს 7-ით ჩამორჩება!

რასაკვირველია, ყოველმხრივ ეცდებიან, რომ ეს ჩამორჩენა პირნათლად დაძლიონ და აამოძრავონ აგრეთვე ყველა რეზერვი, რათა მელორეობის ფერმამ თავი არ შეირცხვინოს და

„ხუთწლედის ბოლოსთვის მიაღწიოს საპროექტო სიმძლავრეს — 6.000 ლოს“.

ბალიან შორიდან კი დავიწყე, ჩემო სულგრძელო მკითხველო, — ძროხებიდან და ლორებიდან, ახლა კი, მოდი, ამ ძროხებისა და ლორების მომვლელ-მომშენებლებზე გადავიდეთ... სხვათა შორის, ამაზე საუბარს რაიონის თავკაცები რატომღაც თავს არიდებენ, — ცნობებს გვაწვდიან მეცადინი სტატისტიკოსები:

„...არ იზრდება შობადობა და მოსახლეობის ბუნებრივი ნამატის მიხედვით მაიაკოვსკის რაიონს ერთ-ერთი ბოლო ადგილი უკავია მთელს რესპუბლიკაში“.

მაიაკოვსკის რაიონში 30100 სული მცხოვრებია. მარნეულის რაიონში კი... 99900! ესეც ვიცოდეთ, ორივე რაიონი ტერიტორიულად თითქმის თანაბარფართობიანია.

აღნიშნული ცნობები 6-7 წლის წინანდელია; საინტერესოა, ამ ბოლო 6-7 წლის მანძილზე რამდენად იმატა მოსახლეობამ მარნეულის რაიონში და რამდენჯერ... ი კ ლ ო ბაღდათისაში?

თქვენ ზემოთ უკვე წაიკითხეთ ტრაგიკული სტრიქონი: „განვლილ სამ წელიწადში ყოველ ას ძროხაზე მიღებულია მხოლოდ 63 ხბო“.

მხოლოდო, მხოლოდო...

რა სამწუხაროა, რა სამწუხაროა!..

ახლა ამასაც გავეცნოთ:

„...ბოლო წელიწადში ოფიციალურად იქნა აღრიცხული ხელოვნური აბორტის 900 შემთხვევა“.

ეს, რაც ოფიციალურად იქნა აღრიცხული, და რაც ოფიციალურად ვერ აღრიცხება, შინაურულ-ფარული?! თანაც ბაღდათელები მარტო თავის რაიონს ხომ არ არიან მიჯაჭვულნი?!

ერთსაც და მეორესაც დავანებოთ თუნდაც თავი, — ოფიციალური ცნობით შემოვიფარგლოთ:..

900 აბორტი! 30-ათასიან წმინდა, შეურეველ ქართველ მაცხოვრებელზე 900, ცხრასი აბორტი!

(გვიანდელი მინაწერი (1990 წ.): მოსკოვის გაზეთ „ტრუდს“ მოჰყავს ცნობები, სად, რომელ ქვეყანაში რამდენი აბორტი კეთდება: ხუთზე ცოტა მეტ მილიონიან მთელ ფინეთში... 13 ათასი! დიახ, ერთ ნამცეცა ბაღდათთან შედარებით ვეებერთელა ფინეთში — მხოლოდ 13 ათასი)...

...ამ საუბარში რაღაც არ იგრძნობა, რომ ამ მეორე ამბით (არა ხბორების, — ახალშობილთა კლებადობით) რაიონის ხელ-

მძღვანელობა ცოტათი მაინც იყოს შეწუხებული და აფიქრებ-
დეს ბედი მომავალი მევენახეებისა, აქი ამ არემარეზე მევენა-
ხეობა სოფლის მეურნეობის მთავარი დარგია...

სხვათა შორის, იქვე ვკითხულობთ, ოღონდ მე პირადად ვერ
მივხვედრილვარ, ეს საამაყო, თუ არცთუ მაინცდამაინც:..

„მაიაკოვსკის რაიონს ერთ-ერთი მოწინავე ადგილი უკა-
ვია რესპუბლიკაში პენსიონერთა რაოდენობის მხრივ“.

აქ რომ მოწინავეობა შეიცვალოს წამყვანობაზე, რომელ
სიტყვასაც მეტწილად უადგილოდ ხმარობენ ხოლმე სწორედ
„მოწინავეის“ ნაცვლად, ამ შემთხვევაში უფრო ზედგამოჭრილი
ხომ არ იქნებოდა... „მაიაკოვსკის რაიონს, მოსახლეობის დაბე-
რების მხრივ, წამყვანი — პირველი ადგილი უკავია მთელ რეს-
პუბლიკაში!“

ანდა, აბა, წამყვანი როგორ არ იქნება, თუკი 30-ათასიანი
სოფლის, სოფლის მოსახლეობა, არასრული ოფიცია-
ლური მონაცემითაც კი ყოველწლიურად ცხრაას მომავალ
პენსიონერს მოსპობს ჩანასახშივე...

და ეს, ვიმეორებ, ოფიციალურად კეთდება რაიკომის, რა-
ილმასკომის, რაიჯანმრთელობის განყოფილების თვალწინ და
ცხვირწინ — მათსავე რაისაავადმყოფოში!

თუმცა სულ მთლად, მგონი, არც ამ „რაი-რაიებს“ გაემ-
ტყუნებათ: როცა შენი საერო, საქვეყნო მოღვაწეობა, შენი სა-
ნიმუშო რაიკომობა „ზევით“ უფრო იმით ფასდება და იზომე-
ბა, გეგმის გადამეტებით რამდენი ღორი მოაშენე და ას ძრო-
ხაზე 70 ხბო მაინც თუ მიიღე, და არა იმით, ნებადართულ
მკვლელებს რამდენი ჯერ თვალაუხელებელი ქართველი გამოსტა-
ცე და რამდენ ჰქუათხელიძეს ჩააგონე წამხედურობით გამოწ-
ვეული და უკვე ღრმად ფეხგადგმული შვილიერების ნაცვლად
უძეობის დამლუპველი იდიოტიზმი...

ღიახ, მაიაკოვსკის რაიონში მევენახეობას მისდევინ.

ჯერ კიდევ მისდევენ...

ასევე, საქართველოს სხვა რაიონებშიც ქართველები ბევრ
რამეს... ჯერ კიდევ მისდევენ...

ჩვენი ქვეყნის პირველი დემოგრაფი, პროფესორი ბ. ურლანისი, რომელმაც ამ თხუთმეტიწლიან წლის წინათ გამოაქვეყნა სტატია „Берегите мужчин!“, მკითხველ: საზოგადოებაში ყუმბარასავით რომ გასკდა და, თავდაპირველად, მეტწილად ქალებმა, სასაცილო პარადოქსად მიიჩნიეს, მერე კი, მის უდავო ქეშმარიტებაში მალე ყველანი დავრწმუნდით, 1981 წლის აპრილში, თითქოს სპეციალურად, ქართველი ხალხის თვალის ასახელად, წერს შემდეგს:

«Грузинская женщина уже давно начала ограничивать свою рождаемость и планировать число детей. Так, например, совсем молодые грузинки в возрасте 25—29 лет 5 лет назад рожали 155 детей (на 1000 женщин), а теперь 132 ребенка. В следующей возрастной группе, т. е. 30—34-летних, число рожденных из 1000 женщин уменьшилось за 5 лет с 88 до 80. Особенно сильно сократили свою рождаемость грузинские женщины в возрасте 35—39 лет: с 40 детей (на тысячу женщин) до 26, т. е. почти вдвое за 5 лет».

(Журнал «Наука и жизнь»)

ასეთ, ცხადია, არაერთხელ შემოწმებულ, ზუსტ ცნობას გვაწვდის. სხვა ეროვნების დიდი მეცნიერი, დიდი დემოგრაფი, და არა მხოლოდ თვალსა და გულს მიმნდობი, „აკვიატებული იდეებით“ მანიაკურად შეპყრობილი ნაციონალისტი, ვინმე კ. ბუაჩიძე“...

ჰოდა, თქვენ, პეი, საქართველოს რესპუბლიკის თავკაცებო, ამხანაგებო და ბატონებო, როცა „შავი წიგნის“ ეს მეორე ნაწილიც პირველივით გამოგვეგზავნებათ და ბალტიისპირელი ურლანისის ამ სტრიქონებს წაიკითხავთ, ნუთუ არ შეძრწუნდებით, არ აფორიაქდებით, ნუთუ იმ დღესაც, მაინც მხიარულ გუნებაზე შემოუსხდებით სუფრას, რაკი ჩაის გეგმა შეასრულეთ, ყურბენი დააბინავეთ, ქურთების კეთილდღეობაც კიდევ ერთი საფეხურით ამაღლეთ, თქვენი შეუწელებელი, ყოველდღიური რუდუნებით კი ცხვრებსაც ამატებინეთ და ღორებსაც.

კი, ყველაფერი ეს უთუოდ ერთობ სასიხარულოა, მაგრამ... იქნებ იმითაც დაინტერესდეთ, სახელგანთქმული დემოგრაფის ამ შემზარავი ცნობის შემდეგ საქართველო წელში კიდევ უფრო გაწყდა, თუ...

მერწმუნეთ, კიდევ უფრო გაწყდა და წყდება, რადგან ამის საწინააღმდეგოდ მიმართული თქვენი ღონისძიებანი, რომლებიც ამ ბოლო დროს დაისახა, მცირეც არის და ზედაპირულიც; რაიონის მეთაურთ მოსახლეობის ბუნებრივ გამრავლებაზე ზრუნვა არც ახლა ევალებათ, მათთვის ეს საგანი, ასე ვთქვათ, ფაქულტატიურია: გსურს ისწავლე, არ გსურს — ნუ ისწავლი; გამრავლდები — ხომ კარგი, არ გამრავლდები და... კისერიც გიტეხია!

ამიტომაც არის, რომ ურლანისის გამოანგარიშებით, ქართველი ხალხი აღსასრულისკენ არა ნელზე ნელი ნაბიჯით მიდის, — ასე შეიძლება წახვიდე მაშინ, როცა საუკუნის მანძილზე იკლებ რაღაც ერთეული პროცენტით, მაგრამ როცა შემსთვალის დახამხამებაში — სულ რაღაც ხუთი წლის მანძილზეც — კატასტროფულად მცირდები და მცირდები, მაშინ ამოწყვეტისკენ ტატიით კი არ მიდიხარ, დაოთხებული ცხენივით მირბიხარ...

თვალით, ვთქვი ეს წამია, დიახ, თვალითაც შეიძლება დაინახო თურმე რთული, სტატისტიკური ციფრების მოუშველიებლად, შენი ეროვნული უბედურების ასავალ-დასავალი...

დასავლეთ საქართველოს ერთ, შედარებით, პატარა ქალაქში გახლდით. ავტობუსში მესამე თუ მეოთხე განეგებაზე ხნიერი, ხელჯობიანი ქალი ამოვიდა: წინ მიიხედა, უკან მოიხედა — ერთხელ, ორჯერ... მანქანა უკვე შევსებული იყო და ვერსად დასაჯდომი ადგილი ვერ შენიშნა და არც არავინ მოინდომა დაეთმო მისთვის ადგილი...

აღშფოთებულს მკითხველს, ვგრძნობ და მესმის, ახლა რა ღრმად ამოიხრეთ და თქვით, ო, როგორ გამგელდა ხალხი. როგორ გადაგეარდა, ახალგაზრდობამ რა პირწმინდად დაკარგა ზრდილობა, თავაზიანობა, სულ მცირედი მსხვერპლის გაღების სურვილიც კი...

შემოდავებას არ ვაპირებ, მართალი ბრძანდებით, ოღონდ ამ შემთხვევაში, მხოლოდ ამ შემთხვევაში თქვენი ეს სუსხიანი

მსჯავრი მართებული არ არის: იმ ავტობუსში, ვინც უკვე იქ-
და ყველა, ახლად ამოსულზე, ხნიერი იყო...

ჰოდა, იმ ერევენელმა გიღმა, „უმირაიუშიო“ რომ ამოიძახა
ჩვენზე, ამას ესეც რომ მიუმატოს — „Грузины — нация ста-
риков“, — განა გაემტყუნება?! ფაქტის აღნიშვნისათვის განა
მის მიმართ გულში ბოღმა უნდა ჩაეიდოთ?

ჭიათურის მახლობლად, სულ აგერ ახლა, ხუთი ახალგაზრ-
და, მომავალი მამები და ჯარისკაც-გენერლები, ერთ მანქანაში
მსხდომნი, ხუთივე გაღეშობები, გაჩერებულ სატვირთო მან-
ქანას შეასკდნენ და ხუთივე დაიღუპა...

როგორ, როდის და საიდან შეეგვსოთ ეს სიცარიელე?
მთელ იმ თვეში, ქალაქის მცხოვრებლებში ბაია სამიცი არ და-
ბადებულა...

...ქუთაისში, მარტო ურიცხის ქუჩიდან შვიდი მიცვალებუ-
ლი გაიტანეს, მათ ნაცვლად კი იმხანად იმ გრძელ ქუჩას ერ-
თი ახალშობილიც არ შემატებია...

ერთმა, რუსთაველის პრემიის ლაურეატმა, კინორეჟისორ-
მა, ტროლეიბუსიდან ჩამომავალს თვალი რომ შემასწრო და
უცხოური შავი სათვალე ერთგვარი უპირატესობის გრძნობით
და თითქოს დაცინვითაც კი მომაპყრო, — მითხრა, ოცი წელი-
წადია დემოკრატიულ ტრანსპორტში ფეხი არ შემიდგამს, სულ
ტაქსით დავდივარო...

მე კი თბილისის ტაქსი ტყავისგამძრობ ფუფუნების საგნად
მეჩვენება და, საერთოდ, არც ამას და არც სხვა, ფუფუნებას-
თან თუნდაც ცოტათი მიახლოებულსაც კი, არც ოდესმე ვეტა-
ნები, ტრამვაი-ტროლეიბუს-ავტობუს-მეტროში კი (მართალია,
ვიჭყლიტები, მაგრამ... — ეს თქმით არ მითქვამს, გავიფიქრე)
თავს ისე ვგრძნობ, თითქოს ბიბლიოთეკაში, საინტერესო წიგ-
ნებს შორის ვიმყოფებოდე, — ვცადე მეც მომეკლა მისთვის
გული, — მწერალი და რეჟისორი, მსახიობი და მხატვარი ხალხ-
ში უნდა ტრიალებდეს და შეუმჩნეველად აკვირდებოდეს მას
და არა ოც-ოცი წლობით ტაქსისტის ქენჩოს მისჩერებოდეს-
მეთქი...

ისე კი, მართლაც, ამ „ბიბლიოთეკაში“ — ხშირზე ხშირად
მჯდომარეს რამდენჯერ მიოცნებია, ღმერთო, ნეტავი ერთი

ქართველი ორსული ქალი მაინც ამოვიდოდეს, სიხარულით აფოფინებულმა ადგილი რომ დავეთმო-მეთქი...

საქართველოს დედაქალაქში ასეთი ბედნიერება მხვდა მხოლოდ ერთხელ: ახალგაზრდა ქალს, რომელსაც უქამრო, ფართხუნა კაბა ეცვა, ჩემი ადგილი პატარა ბიჭის სიცქეციტით შევთავაზე, მაგრამ ნუ იტყვიტ... თურმე ეს გაშლილი, ხალვათი, განიერი კაბა იმიტომ კი არ აცვია, რომ არ არსებული ნაყოფი არ შეაწუხოს, — მაისის ბალივით ახლად შემოსული მოდა ყოფილა, რომლის დამწიფებაც მე გამომპარვია...

. . .

ამ ბოლო დროს ჩვენი ერის სააგონიო ვითარებას თითქოს ბევრი მკურნალი გამოუჩნდა: ტელევიზია, რადიო, პრესაც... რესპუბლიკის წინაკაცმაც შეაჩერა ხალხის ყურადღება ჩვენი ამ საბედისწერო სატყვიერის ირგვლივ; მრავალშვილიანობის დაფასების ნიშნად ერთი ასეთი სასახლო ქართველი ქალი ბათუმში, პრეზიდენტში გვერდითაც მოისვა, მაგრამ, სამწუხაროდ, ასეთი თეატრალურ-დეკორაციული ზომები პრაქტიკულ შედეგს ვერ გამოიღებენ...

ეს კია: გლდანში ერთ სამშვილიან, ცხადია, ქართველ ქალს ამ ამბებამდე როგორღაც ესირცხვილებოდა, ჩემს მეზობლებს ყველას ერთი თუ ორი შვილი ჰყავს, მე კი სამიო, — ჰოდა, ეს „სიბევრე“ ახლა მას უკვე აღარ ეჩოთიერება.

ესეც თითქოს უკვე კარგი შედეგია, მაგრამ ღირს კი ამგვარი უმნიშვნელო წარმატება-მიღწევით თავი მოვიწონოთ, თავი დავიმშვიდოთ, ამის იმედად დავდგეთ?

არსებითად არაფრის მთქმელი სიტყვიერი აგიტაცია უწამლებს განა, უმკურნალებს განა ავადმყოფ ერს, ერს, რომელმაც თითქმის სულ ერთიანად დაკარგა ეროვნული თვითშეგნება, ერს, რომელიც მარტო საერთდღეისო ინტერესებით ცხოვრობს, ერს, რომლის ასე უზომოდ აზღვავებულ ქალაქელი მოსახლეობისათვის ჩეხური ფერადი უნიტაზი ამქვეყნიურ ღმერთად იქცა, ეგრეთ წოდებული სახალხო ინტელიგენციის საამაყოდ კი — საზღვარგარეთული ტაში ჩვენი თეატრებისათვის!

...ერს, რომელსაც ჰგონია, რომ დედობა კი არა, — ქალთა ჭადრაკი იხსნის მას გადაშენებისაგან...

როცა ჩვენმა მსოფლიო ჩემპიონმა წააგო დაწყებითი პარტია არაქართველ პრეტენდენტთან, ტელევიზიით სათვალთანმა ჰადრაკის კომენტატორმა დამშვიდება დაგვიწყო, ნუ მივეცემით, ამხანაგებო, სასოწარკვეთილებას, ნაადრევად იმედს ანუ დავკარგავთო...

მე ამაზე სიმწრით გამელიმა, დალუპვის უფსკრულს დავცქერით და არ ვეძლევიტ სასოწარკვეთილებას და...

არა, მე სათვალავში ჩასაგდები, შეიძლება, დიხაც არ ვიყო, და თუ დღეს ჩემპიონი ვართ, ეს ჩვენთვის მართლაც მთავარზე მთავარია, აკი ტყუილად ხომ არ ვაშენებთ, ნაცვლად სოფლებისათვის ასე დიდად საჭირო გზებისა და ხიდ-ბოგირებისა, — ჰადრაკის სასახლეებს წყალტუბოში, საგარეჯოში (მამისგან მიტოვებულმა ბოზი ფიშერმა თავისით, წიგნით თუ ისწავლა პატარა, ფეხმოტეხილ მაგიდასთან ჰადრაკის ფიგურების მისვლა-მოსვლა, ამიტომაც „წააგო“ ათობით ძიძის მიერ გამოზრდილ საბჭოთა დიდოსტატებთან: 6:0, 6:0, 6:0!)...

აბა ვის არ უხარია, როცა მოპაექრეთა შეხლა-შემოხლისას მისი აზრი იმარჯვებს, ასეთი გამარჯვება მეც, რა დასამალა, მახარებს, მაგრამ, გთხოვთ მერწმუნოთ, თუ ჩემი ყვავ-ყორნის ჩხავილი ჩემი ხალხის საზიანოდ მართლდება-ხოლმე, მე ეს დიდად, დიდად მალონებს...

პირველ წიგნში უკვე ვწერდი, ქალთა ჰადრაკში არავითარი ქართული ფენომენი არ არსებობს-მეთქი, სხვა ერისანიც თუ ჩვენსავით მოინდომებენ და ჩვენსავით დაეწაფებიან... და აი, ერთმა ლენინგრადელმა ქალიშვილმა, ტომით ებრაელმა, ჩვენი, სადერდოფლო ტახტის მოსურნენი, ყველანი ზედიზედ რომ „წააწვინა“... სხვათა შორის, ორი კვირით ადრე ქართველთა ამ „ეროვნულ ტრაგედიაზე“, ჩვენმა ახალგაზრდულმა გაზეთმა ერთ ამთვანზე გენიოსის სიგელი გულუხვად გასცა და თან სინანულიც გამოთქვა, ჩვენ, ქართველები ამ გროსმაისტერით რატომ ისე არ უნდა ვამაყობდეთ მსოფლიოში, როგორც ვამაყობთო რუსთაველით... დიხ, ასეთ სიბრძნეს გთავაზობს ფსიქოლოგიის თუ სოციოლოგიის, მგონი, პროფესორი...

ო-ო,

რა გვეჰადრაკება,

როცა ბედი წყდება

საქართველოსი..

გვიზველე, მამაუფალო..

სვაზილენდი ყველაზე პატარა სახელმწიფოა სამხრეთ აფრიკაში. მის მეფეს, სობზუზ მეორეს, ასი ცოლი ჰყავს და ექვსასი შვილი. მაგრამ ეს ერთი ხელისგულისოდენა ქვეყანა ამით როდია ჩვენთვის საინტერესო, — საკვირველი ის არის, რომ ჩვენგან განსხვავებით, ამ ჯერ კიდევ თანამედროვე ცივილიზაციის ფეხაუდგმელ ქვეყანაში ავტომანქანები თუმც ერთობ მომრავლებულია, მაგრამ მათი ტარების, ექსპლოატაციის კულტურა ბევრად მალა დგას, ვიდრე, როგორც ხშირად გვარწმუნებენ, უძველესი ცივილიზაციის მქონე საქართველოში.

სვაზილენდის გზებზე დიდი ასობით წარწერილი ტრანსპარანტები მძღოლებს აფრთხილებენ:

! გახსოვდეთ,

ხუთი წლის მანძილზე ჩვენს გზებზე სამასი სასიკვდილო

შემთხვევა მოხდა...

ეს ცოტა დანაკლისად როდი მიაჩნია იმ ხალხსაც კი, რომელიც დღემდე ინარჩუნებს პატრიარქალურ წყობას, რომელმაც არ იცის, რა არის აბორტი, არ იცის, რა არის მკვლელობა, რომელსაც არ უსწრაფავს სიცოცხლეს ლოთობა და ნარკომანია, რომელსაც სწამს საიქიო ცხოვრებისა, და მაინც არ ესწრაფვის მოუსაველეთისაკენ.

სამასი „ავტოსიკვდილი“ საქართველოში ხუთ წელიწადში კი არა... სულ ცოტა, სამი თვის ნორმაა, მაგრამ ამაზე ჩვენი მაგისტრალები ღუმან, — ვაითუ ეს აშბავი მოზამბიკში ანდჰეთიოპიაში შეიტყონ და მათს თვალში კომუნიზმის მშენებელთ სახელი გაუტყდესო; ჩვენში ხომ არაფერი არ ხდება ადამიანიშ

საზიანოდ, არც ბუნება გვერჩის და არც ბუნების მეფე, კაცად წოდებულნი!

1979 წელს რკინიგზის ნატანებ-ბათუმის გადასარბენზე უსაზარლესი კატასტროფა მოხდა... იმდენად საზარელი, რომ ზუსტად ვერც კი აღირიცხა, რამდენი მგზავრი ცოცხლად ამოიწვია-ამოიბუგა.

ნაცვლად იმისა, რომ დამნაშავენი საქვეყნოდ გაესამართლებინათ და ჩვენ, შეძრწუნებული ხალხი, სასამართლოს ყოველი სხდომის კურსში ვყოფილიყავით, რათა ამით ყველას გაგვეგო და ჰქუა გვესწავლა, რა მოჰყვება, რკინიგზაზე მაინც, რკინისებური დისციპლინის დარღვევას, მხოლოდ ტელევიზორით, ისე, სასხვათაშორისოდ გვამცნეს განაჩენი — პატიმრობის ამდენი და ამდენი წელი მიესაჯათ...

კი, მაგრამ... ტელევიზორს ერთდროულად მთელი ქვეყანა ხომ არ უყურებს, თანაც მართო ტელევიზიით გაცნობა რაიმე მნიშვნელოვანისა, ეს თითქმის ყინულზე დაწერილს წაავაგს...

...თქვე მამაცხონებულებო, პარაგვაიში ავტობუსი გადაბრუნდაო, ორი მოკვდა და სამი დაშავდაო, ამას ჩვენს გაზეთებში დიდი ამბით, სასენსაციოდ თუ ბეჭდავთ...

ჰო, მაგრამ, მამაშვილობას, ეს რა ჩენი სადარდებელია, პარაგვაიში თუ ურუგვაიში ავტობუსი გადაბრუნდა თუ გადმობრუნდა, მით უმეტეს, რომ ასეთი შემთხვევები იმ ქვეყნებში არცთუ ისე ხშირად ხდება, ჩვენთან კი ამგვარი უბედურებანი, როცა ორი და სამი კაცი კი არა, — ხუთი და ათიც იღუპება და მილიციის სწორუბოვარი მპიორი გიული აბულაძე, რომელსაც, ექვი არ არის, ჩინებულად მოეხსენება, პარაგვაის მალამოთი სჩენი პრილობები არ განიკურნება და არც დაამდება, ორ-სამ თვეში ერთხელ თუ გახსნის წარბს და გვეტყვის, „გიხაროდენ“, ჯუშინ საქართველოს გზებზე და მაგისტრალეებზე არავინ დალუპულაო...

წყალტუბოს საშენ მასალათა საწარმოს კოლექტივი ღრმად მწუხარებით იუწყება, რომ გარდაიცვალნენ
 ხუტა გიორგის ძე
 კვანტალიანი
 თინიკო ხუტას ასული
 კვანტალიანი
 ანზორ ნოდარის ძე
 შალამბერიძე.
 ნოდარ ანზორის ძე
 შალამბერიძე.
 ნადია შალვას ასული
 შალამბერიძე.
 დაკრძალვა 12. VIII ქუთაისში,
 ბესიკის, 2.

ავტოკატასტროფებში იულიტება მამა და შვილი, ცოლი და ქმარი, მთელი ოჯახებიც, მაგრამ სამგლოვიარო განცხადებებში, ერთგვარ ძვირად ღირებულშიც კი (როცა დაწესებულება აცხადებს) გამაფრთხილებელ სიტყვა „ტრაგიკულს“ ვერ ამოიკითხავთ, — გარდაიცვალნენო; თითქოსდა, ვთქვათ, ეს სამი ადამიანი სუფრას უსხდა და ტკბილი საუბრისას ჯერ ერთმა ჩაქინდრა თავი და ამოისუნთქა უკანასკნელად, მერე მეორე მოეშადა საამისოდ და... მესამესაც, აბა, სხვა რაღა დარჩენოდა, — მიჰყვა მათ!

განა არ აჯობებს, ისევ ჩვენი დღეგრძელობისთვის, მოსაჩვენარ, დიდად. ცივილიზებულ ქვეყნის პრესტიჟს არ გამოვეკიდოთ და მაგალითი აფრიკის იმ „უკულტურო“ სვაზილენდისგან ავიღოთ, რომელიც ყოველ რამდენიმე კილომეტრის შუალედზე აფრთხილებს თავისიანებს, ესა და ეს თავზებულალებლობით ავტოკატასტროფის მსხვერპლი გახდა, და თუ გინდა სიცოცხლეს არ გამოეთხოვო, შენ მაინც ნუ გაიმეორებ მის სიგლახესო...

მე მგონია, ასეთი შეგონება ჩვენ უფრო გვკვირდება, ჩვენ, რომლებსაც არც ედემ-სასუფევლისა გვწამს რამე და არც ელდორადო-სალხინებლისა...

ამას კი ვწერ, ჩემო მკითხველო, მაგრამ ესეც მკითხეთ, მჯერა კი, რომ ჩვენი გამაფრთხილებელი წარწერები, ეგრეთ წო-

დებულები იდეურ-აღმზრდელობითი მუშაობა თუ ღონისძიებანი, თუნდაც სიტყვა „ტრაგიკული“ მოვიშველიოთ, — ესენი გვიხსნიან, ესენი ჩაგვიდებენ ჭკუას იმ უთაურ თავში, რომელი თავითაც ახლა საქართველოში ავტომესაჭეთა სულ ცოტა 80 პროცენტი დანავარდობს და ინავარდებს, სანამ კისერს არ მოიჩუებს და სხვებსაც არ მოტეხს?!

ბოლო წლების ცხოვრების პრაქტიკამ გვიჩვენა, რომ ეს ფუჭი ოცნებაა, და ამ ოცნების განუხორციელებლობას კი საკანონმდებლო ორგანოების ღრმა ძილი უწყობს ხელს და, ცხადია, ისინიც, ვისაც ეს ორგანოები ექვემდებარებიან.

ფაქტი უკომენტაროდ: „...როცა ტრამვაი გაჩერებულია და ხალხი ადი-ჩამოდის, მაშინ არავის არ აქვს უფლება არ დაელოდოს საზოგადოებრივი ტრანსპორტის დაძვრას. მაგრამ ასე როდის მოიქცა სატვირთო ავტომობილის მძღოლი ქიშვარდ მერმანიშვილი, მან თბილისში დილით ხუთი დეკემბრის ქუჩაზე, სადაც საგზაო ნიშანია — „ფრთხილად — ბავშვები!“ გაჩერებული ტრამვაის ვაგონიდან ხალხის გადმოსვლას არ დაუცადა, სატვირთო ავტომობილის სვლა არც კი შეანელა და ადგილზევე მოკლა ორი მეოთხეკლასელი გოგონა“ (გაზეთი „კომუნისტი“, 28. 11. 82).

„შევი წიგნის“ პირველ ნაწილში მთელი, გულისმომკვლელი თავი მიუძღვენი ჩვენი პატარა ქვეყნისათვის აურაცხელ ფათერაკთა შომტან ავტომობილიზაციას; იქ ყველაზე მეტად მთვრალ მძღოლებს მიუზღვე საკადრისი, მაგრამ მიაქციეს კი ამას ყურადღება მათ, ვისაც შეეძლოთ ეს უმტკივნეულები საკითხი — თავის სიმწვავეთ თითქმის თანაფარდი აბორტმახერობისა — დროულად, თავისი ქვეყნისა და თავისივე ხალხის სასიკეთოდ მოეგვარებინათ?

ექვი არ შეპარება, რომ მათ საქართველო და ქართველი ხალხი ჩემზე ნაკლებ არ უყვართ, მაგრამ...-

ო, ეს პრესტიჟი და ეს მუნდირი!..

აბა წამოსცდენოდა ეს მათთან დაახლოებულ რომელიმე ლიტერატურულ ღენერალს, და არა ჩემებრ ჭიალუა ჯარისკაცს... მაგრამ რა ქნას, როგორ მოიქცეს ეს ჯარისკაცი, თუკი ღენერლები დუმან?! მათგან აიღოს მაგალითი და არ წარმოთქვას გულდასერილმა, — მიიხედ-მოიხედეთ, განა ომისდროინდელ სა-

ქართველოში შეგხვედრიათ ამაზე მეტი შავოსანი, რამდენსაც ახლა, 40 წლის შემდეგ, მის არემარეზე ხედავთ?

(გენერლისა და ჭარისკაცის, ამ ორი დიდად განსხვავებულ სამხედრო პირის ხსენებაზე...)

პირველი მსოფლიო ომის შემდეგ დასავლეთში დიდად გახმაურდა ერთი რომანი, რომლის ავტორის გვარი ველარ მომიგონებია, სათაური — კი (თარგმნილია რუსულად): „Генералы умирают в постели“.

ძველ საბერძნეთში ერთი პატრიოტი, კოჭლი ახალგაზრდა მთავარსარდალს გამოეცხადა თხოვნით, ბრძოლის ველზე გამოიშვითო... უარი უთხრეს, ცალფეხა ხარო... მაშინ ამ ახალგაზრდამ ასე მოუქრა: მეგონა, ომში ჭარისკაცი საბრძოლველად გჳირდებოდათ, და არა იმისათვის, მტრის დანახვისას კუდამოძუებულს მოეკურცხლაო...).

„შავ წიგნში“ უკვე ვწერდი, სხვადასხვა ქვეყანაში დასჯის რა ზომებს მიმართავენ მთვრალი მძღოლების ჳკუაზე მოსაყვანად; იმ „შოდველებულ“ ცნობებს, ახალსაც წავამატებ:

ავსტრალიაში მთვრალი მძღოლი ხანგრძლივი პატიმრობით ისჯება, მათს გვარებს — შესარცხვენად! — პრესაშიც აქვეყნებენ.

(სხვათა შორის, კარგა ხანს ასე იქცეოდა „თბილისიც“, მაგრამ შედეგი — შემარცხვენელი! — არავითარი)

ახლა ამ გაზეთმა უფრო „მკაცრ“ ზომას მიმართა: გავაკრათ სამარცხვინო ბოძეო და... მთვრალი თუ ლოთი მძღოლების სურათების ბეჭდვას მიჳყო ხელი! თანაც როგორის? უყურებ მათ და უნებლიეთ ფიქრი გიპყრობს, ეს პორტრეტები ნიჭიერმა ფოტოხელოვანმა სააკოვმა ხომ არ გადაიღოო...

ერთი რომელიმე მაინც ჳგაედეს მოხულიგნო დამნაშავეს! წვერგაპარსულები, თმადავარცხნილები, ზოგი ლეონარდო და ვინჩის ჳოკონდას გამჳირდავი ღიმილითაც კი შემოგვეცქერის...

სწორედ რომ საკვირველია: რამდენი ღირსეული ადამიანი ოცნებობს გაზეთში თავისი გამოსახულება იხილოს, და ეს ოცნება — ისიც ზოგიერთს! — ნეკროლოგში თუ აუხდება, ამათ კი, ლოთ ავტოამწიოკებლებს... „მობრძანდით, ინებეთ, გვიმსახურეთი..“ ესენიც... „გაღამილეთ, გაღამილეთ, გამიცნოს ხალხმაო“...).

მლაიზიაში მთვრალ მძღოლს, თუ ცოლიანია, ცოლთან ერთად ციხეში სვამენ; ტერიტორიით ჩვენზე სამჯერ მცირე და მოსახლეობის მხრივ თითქმის ჩვენოდენ სალვადორში კი... ულაპარაკოდ სიკვდილს უსჯიან!..

ღიახ, სიკვდილხ...

„ცხადია, მძღოლთა შორის ალკოჰოლიზმის წინააღმდეგ ბრძოლის ეს მეთოდი ყველაზე ეფექტიანია“. — წერს იუმორ-გარევიტ ფრანგული საინფორმაციო ბიულეტენი, საიდანაც ეს მონაცემები ამოვიღე.

კი, ბატონო, ვიცი-ვიცი, რომ ჩვენ დიდი ჰუმანისტები ვართ (სხვა ქვეყნებში კი სულ... სადისტებია!) და მთვრალ მძღოლს არათუ სიცოცხლე უნდა წაართვა (თუმცა, რამდენი მათგანი ართმევს სხვებს სიცოცხლეს!); და არც ცოლთან ერთად ციხეში უნდა ჩასვა (თუმცა რამდენ ცოლს აცმევენ ისინი შავებს!), მაგრამ ამით მაინც დასაჯე:

სიმთვრალეში მეორედ შემჩნევისას ჩამოართვი სამუდამოდ მართვის უფლება და ჩამოართვი ულაპარაკოდ მანქანაც!

მოდით, მამულიშვილნო, ვიკმართ გაუთავებელი თავისქება და ეროვნული ტრაბახი აღმატებით ხარისხში და ერთხელ მაინც ჩავიხედოთ თანამედროვეობის რეალურ, პირუთვნელ სარკეში: ჩვენსაირი ხალხის თავხედ, თავაშვებულ, უტიფარ, წამხდარ, უზნეო მძღოლებს ამ სენისაგან ვერავითარი სხვა წამალი ვერ განკურნავს!..

ათასმანეთიანი ჯარიმაც კი! (ახლა „სასემიჩქო“ ათმანეთიანს ახდევინებენ!).

დასაელეთში, რომლის ყოფით კულტურას დღესდღეობით ჩვენ ახლოსაც ვერ გავეკარებით, ოღნავ ნასვამ მძღოლსაც სასტიკად სჯიან, ჩვენთან კი რამდენჯერმე ხელჩავლებულ ლოთსაც კი, სულ დიდი, შეიძლება ჩამოართვან ერთი წლით, თუნდაც, ვთქვათ, სამი-ხუთი წლით მართვის უფლება, და ესეც, ფაქტიურად, ფორმალურად, აკი იგი ამის მერეც უმოწმობოდაც აღმა-დაღმა, ზოგჯერ კვლავ ნაბახუსევი, თავადერილი და აქენებს თავის „პირის ზიარებას“...

ნორვეგიაში კი ერთხელ, მსუბუქად ნაღვინევი ტახტის მემკვიდრეც არ დაინდეს და როგორც გადაკრულს, საპყრობილეში უკრეს თავი, საქართველოში კი... მართალია, უფლისწულე-

ბი არა გვეყავს, მაგრამ ისეთი „წულები“ და „ბატონიშვილები“ კი თავზე საყრელად მოგვეპოვებიან, რომელთა აღვირახსნილობის ასალაგმავად, ისევ და ისევ მათივე სასიცოცხლოდ და, საერთოდ, მთელი საზოგადოების საკეთილდღეოდ, წლიდან წლამდე მრისხანე კანონს ველოდებით, მაგრამ მის შემოღებას ამდენი ხანია პირი არ უჩანს (მარტო ერთი რესპუბლიკისათვის სეპარატული კანონის გამოცემის უფლებას მოსკოვი არ მოგვეცემსო), და თუ ოდესმე შემოიღეს, იმ დროისათვის, ალბათ, ბევრი ჩვენგანის შესანდობელიც კი, მივიწყებოხს გამო, აღარც შეისმება...

თითქოსო არც გაემტყუნებათ, რაკი ჩვენი პრესა იმითაც კია გახარებული, რომ...

„წლეულს რვა თვეში თბილისში მოხდა შარშანდელთან შედარებით ნაკლები — 424 საგზაო-სატრანსპორტო შემთხვევა, რომლის დროსაც დაიღუპა 50 და დაშავდა 534 კაცი. ამავე დროის მანძილზე შემთხვევების ადგილიდან გაიქცა, და მიიმალა ათობით მძღოლი, რომლის დროს დაიღუპა შვიდი, ხოლო დაშავდა 95 კაცი... საერთოდ კი გამოვლინდა მოძრაობის წესების დარღვევის 195,383 შემთხვევა. მათ შორის ავტომანქანას მართავდა 1583 მთვრალი“ („კომუნისტი“, 25. 10. 82).

ეს მხოლოდ რვა თვეში და მხოლოდ შარშანდელთან შედარებით, თანაც მხოლოდ თბილისში.

ახლა ესეც წარმოვიდგინოთ, მთლიანად საქართველოში მთელი წლის მანძილზე რამდენი ავტოსიკვდილი და რამდენი ავტოსგან გახეიბრებული უნდა დავითვალოთ და რამდენით მეტი იქნებოდა ასეთი უბედურებანი შარშან, თუკი ეს წლევეანდელი შარშანდელზე თუნდაც ნაკლებია?!

კი, მაგრამ... თუ ასე უმოწყალოდ დავიხოცეთ და დავსახიზრდით, თანაც, უმეტეს შემთხვევაში, სიცოცხლის ჯან-ლონით სავსე ასაკში, თუ ასე უდროოდ ავტომობილის ბორბლებით ჯვარი დაესმება უკვე დამშვენებულ ჩვენს სიცოცხლეს, მაშინ რაღა აზრი აქვს ჩვენს დაბადებას, ჩვენს გაზრდას, ჩვენს სწავლას, ცხოვრების ასპარეზზე გამოსვლას?!

ვფიქრობ, მკითხველისათვის საინტერესო იქნება, იგივე გაზეთი როგორ აჯამებს ამ რვა თვის „უხვ მოსაველს“:

„დიდია მორალური და მატერიალური ზარალი. ათობით

ოჯახი დაობლდა და დაქვრივდა, რამდენი ადამიანი სამუდამოდ დახეიბრდა, შრომის უნარი დაკარგა, სახელმწიფოშიც დიდი ზარალი განიცადა“.

ხედავთ და გესმით? დიდია თურმე სახელმწიფოს ზარალიც! მერედა, რას ფიქრობს სახელმწიფო, ამ შემთხვევაში საქართველოს რესპუბლიკა, ამ ზარალზე, რომელსაც, ყოველგვარი სხვა ზარალისგან განსხვავებით, ვერაფრით, აბსოლუტურად ვერაფრით და ვერასოდეს ვერ აინაზღაურებ?!

თუმცა... მმ... ეგებ ტყუილად ვეძლევით პანიკას, ა? აბა ერთი რუსულ გაზეთსაც მოვუსმინოთ:

„შარშან საქართველო ჩვენს ქვეყანაში პირველ ადგილზე გავიდა საგზაო-სატრანსპორტო შემთხვევათა რაოდენობის კლების მიხედვით და რესპუბლიკურ სახელმწიფო ავტოინსპექციას თავისი არსებობის მანძილზე პირველად მიენიჭა გარდამავალი დროშა“. („მოლოდიოე გრუზიი“, 11. 9. 82).

ამ სიხარულს თავის ინტერვიუში ის დიდი თანამდებობის პირი გვიზიარებს, რომელსაც, შეიძლება, უკვე ჩააბარეს საქართველოს „გზებზე და გზაჯვარედინებზე“ „დიდრუანი“ მიღწევისათვის ეს დიდი ჯილდო!

რასაკვირველია, აღნიშნული ფაქტის სისწორეში ექვს, აბა, როგორ შევიტანთ, და ჩვენც, შავებით შემოსილი ათასობით დაობლებულები, დაქვრივებულები, გახეიბრებულებიც... მმ... შეეხარით და შეეცოცინებთ ამ გარდამავალ წითელ დროშას, ოღონდ... ცოტა თითქოს გვიკვირს კი, თუკი საქართველო გამოვიდა „ამ გზებზე“ პირველ ადგილზე, მაშინ რომელია ადგილი და რა ფერის დროშა მიეკუთვნათ, მაგალითად, ბალტიისპირეთის რესპუბლიკებს, კერძოდ ესტონეთს, სადაც არათუ მძლოლი, ქვეითიც კი, მანქანის ჰაჭანება სულაც რომ არ ჩანდეს, ვიდრე წითელი შუქი არ ჩაქრება და მწვანე არ აინთება, არავინ, არავინ (გარდა სავაჭროდ ჩასული ქართველისა) ქუჩას არ გადაკვეთს!...

ვინ იცის, ეგებ ეს არის მიზეზი, რომ ამ საამო ცნობის ჩვენებრ ოტროველა წამკითხველს როგორღაც ტვინს უბურღავს ბილწი, ცილისმწამებლური შეკითხვა: ახლა რამდენი დაუჯდათ და კიდევ რამდენი დაუჯდებათ ეს დროშა — წითელი! — მომავალ წელსაც რომ შევიწარჩუნოთ?!

ერთმა კონებრივად და მეცნიერულად უცენზო, მაგრამ გონებაგახსნილმა მოხალისე სოციოლოგმა ამას წინათ მკითხა, აი, მარქსისტულ-ლენინური თეორიის მიხედვით, სახელმწიფო ბოლოს და ბოლოს, კომუნისზმის დადგომისას, ხომ უნდა მოკვდეს-გაუქმდეს; ჰოდა, თუკი ამჟამად, კერძოდ საქართველოში, როცა სახელმწიფო სრულ ძალაშია, და მაინც, ირგვლივ ენით ძნელად ასაწერი ამდენი სისაძაგლე სუფევს და ტრიალებს, რაღა იქნება მაშინ, როცა კომუნისტური სახელმწიფო დასჯის ფუნქციებს დაკარგავს, და ჩვენ ყველანი თავის ნება-ქეიფ-ხუმტურზე ვიქნებით მიშვებულნიო...

არ დაგიმალავთ, ეს კითხვა იმდენად რთულად მომეჩვენა, მოსაუბრეს ვთხოვე პასუხის მოსაფიქრებლად ერთი წლის ვადა მოეცა, გულში კი ჩავილაპარაკე: ამ ერთ წელიწადში ან შენ გაგიტანს გალეშილი ან ცეტი ვინმე რეტიანი, ან მე გამიტანს, და მაშინ არც მე დამჭირდება ამაზე პასუხის გაცემა, და არც შენ მისი მოსმენა-შეთქი...

კიტა ბუაჩიძე
1982 წელი.

პოსტსკრიპტუმი: ალბათ იკითხავთ, ამ რვა წელიწადში ჩვენს „გზებზე და გზაჯვარედინებზე“ ნუთუ ოდნავ მაინც არ წაიწია ჩვენი ეროვნულ-საზოგადოებრივი შეგნებაო... არა! უფრო გაუარესდა, კიდევ უფრო გაუარესდა... თბილისის შინაგან საქმეთა სამმართველო იტყობინებოდა:

„განვიღო კვირაში (9-დან და 15 ივლისის ჩათვლით) თბილისში (ეს მარტო თბილისში — კ. ბ.) მოხდა 8 საგზაო-სატრანსპორტო შემთხვევა, დაიღუპა 2, დასაახირდა 14 კაცი. სახელმწიფო ავტონისპექციის მუშაკებმა გამოავლინეს საგზაო მოძრაობის წესების დარღვევის 3028 შემთხვევა, ტრანსპორტს მართავდა 25 მთვრალი მძღოლი, 75 — უნომროდ, 110 — ტექნიკური დათვალეირების გარეშე, რეგისტრირებულია 284 ავარიული სიტუაცია, 49 მანქანა აბინძურებდა ჰაერს, ათ-ათი მანეთით დაჯარიმებულია მოძრაობის წესების 2.026 დამრღვევი“.

...ეს ვინც გამოავლინეს, და ვინც ასცდა გამოვლინებას? მათი რიცხვი გამოვლინებულთ, ალბათ, სულ ცოტა, სამჯერ მაინც აღემატება...

3 ივლისის გაზეთ „თბილისის“ მხოლოდ ერთი ნომერი სამგლოვიარო განცხადებით ორ სამ-სამსულიან ოჯახის ამოწყვეტას გვაუწყებდა...

ჩვენი რესპუბლიკის თავკაცებს ეს რომ თვალში მოხვედროდათ, ვფიქრობ, რა მშვიერნიც უნდა ყოფილიყვნენ, როგორც დიდად შეშფოთებულნი, იმ დღეს სადილს პირს არ დააკარებდნენ და ამჯობინებდნენ სასწრაფოდ ეთათბირათ ავტომობილისგან ერის ხსნა-გადაჩენის უმკაცრესი სამართლიანი კანონის შემუშავების გადაუდებლობის თაობაზე...

მით უმეტეს, რომ, მგონი, უკვე დაგვიდგა ის ნანატრი დრო, როცა საამისოდ მოსკოვის თანხმობა — „დალოცვა“ საქირო აღარ არის...

და თუ, ვინიცობაა, ჩვენი ახალი მამები, უწინდლებივით, არც ახლა მოგვაპყრობენ ყურს...

მაშინ შენ მაინც მოგვხედე, მამაუფალო!..

21 ივლისი, 1990 წელი

გ ვ ი ა ნ დ ე ლ ი. მინაწერი (1990 წლის დეკემბერი): „შავზე შავი წიგნის“ ეს ნაკვეთი ამ სახით დაიბეჭდა გაზეთ „კომუნისტში“ 1990 წლის ივლისში; რესპუბლიკის იმჟამინდელ თავკაცებს იგი თვალში უეჭველად მოხვდებოდათ, მაგრამ, როგორც ჩანს, დიდად არ შეშფოთებულან...

ახლა ისლა დაგვრჩენია ვიფიქროთ, რომ ჩვენი ახალი, ეროვნული მთავრობა მაინც, შეებრძოლება საკადრისად ერის ავტომკვლელებს, დაუსჯელობის იმედით ასე არხეინად, ურცხვად და ველურად რომ დანაეარდობენ საქართველოს ოღრო-ჩოღრო შარაგზებზეც კი...

ორ ადამიანს შეუძლია ერთმანეთის გა-
დარჩენა იქ, სადაც ერთი იღუპება.

ო. ბალზაკი

ვფიქრობ, არ დაეკვდებით, მე ბრმა არა ვარ და, თითქოს, არც ბეცი ვარ, და ჯერ არც გამადიდებელი შუშა მჭირდება. ყველა იმ კარგის დასანახავად, რაც ჩემს სატრფიალო სამშობ-
ლოში კეთდება და ხდება, და თუ მათზე „შავი წიგნის“ ამ მე-
ორე ნაწილშიც ყურადღებან არ ვამახვილებ, ეს მხოლოდ იმით
აიხსნება, რომ საამისო, ზოგჯერ უკიდევანოდ გაზვიადებული,
ხოტბა-დიდების სიმღერები ისეც ბევრი გვესმის დილით თუ
სალამოთი, ზემოდან თუ ქვემოდან, მარჯვნიდან და მარცხნი-
დან...

ტანძიაში ხუთიოდე ბავშვისათვის სკოლის გახსნაც მნიშვნე-
ლოვან ეროვნულ საქმედ მიმაჩნია, ასევე დიდი ეროვნული
საქმეა აქარლების ჩამოსახლება მესხეთში, და, საერთოდ, ამ
კუთხისათვის განსაკუთრებული ყურადღების მიქცევა; აგრეთ-
ვე თუშ-ფშავ-ხევსურეთისაკენ პირის მიბრუნებაც, ოღონდ
ამის ირგვლივ ამდენი დაფდაფი ნაადრევი ხომ არ არის? ორად
ორი კომლის დასახლების თაობაზე თითქმის არ უნდა გვე-
თქმოდეს, აღორძინდა სოფელიო...

სხვათა შორის, როგორც კი ამ აღორძინების სადღეგრძელო
შეისვა, სწორედ მაშინ ერთმა ხევსურმა ლიტერატორმა ივაჟ-
კაცა და გვამცნო: „ფშავ-ხევსურეთში მოსახლეობა კატასტრო-
ფულად კლებულობს, პირდაპირ რომ ვთქვათ, ამ მხარეში მო-
სახლეობა გამოილია“.

ეს რომ პანიკური გადაქარბება არ არის, იქიდანაც ჩანს,
რომ მაგალითად, მწერალთა კავშირის წევრთა ცნობარში შე-
გიძლიათ ამოიკითხოთ ამ მხარიდან გამოსული ხუთი ერთი
გვარის მწერალი; ეს მაშინ, როცა თვით უზარმაზარ რუსეთშიც
არ არის ხუთი ი ვ ა ნ ო ვ ი ლიტერატორი, თუ, რასაკვირველია,
ემ გვარის მქონე იაკუტებს და ჩუქჩებს არ ჩავთვლით.

...საგარეჯოში უდაბნოს გამოცოცხლება-განაშენიანებაც, რა თქმა უნდა, საშვილიშვილო საქმეა, იქ აღმართული „სი-
ცოცხლის სვეტიც“ ღირსშესანიშნავია, მაგრამ, რა ვქნა, მკრე-
ხელობასა და უმადურობაში არ უნდა ჩამეთვალოს, თუკი მას
ტელევიზიის დიქტორივით („მოამბე“, 1982 წლის 12 ივნისი)
„ქართველი ერის მ ა რ ა დ ი უ ლ ი ს ი ძ ლ ი ერის სიმბოლოდ“ არ
მივიჩნევ.

ახლა ვერავითარი სიმბოლო, თუნდაც იგი ათენის აკროპო-
ლის მარმარილოსაგან გამოიკვეთოს, ვერ უზრუნველყოფს
ქართველი ერის მარადიულობას. საამისო გარანტი მხოლოდ
და მხოლოდ ჩვენი შვილები და ჩვენი შვილიშვილები არიან,
თანაც ერთი და ორი კი არა...

ერს მაგალითი სჭირდება, და ეს მაგალითი, თუ გვინდა,
რომ ის შთამბეჭდავი იყოს, უწინარეს ყოვლისა, ზემოდან უნ-
და მომდინარეობდეს.

მერე? ვხედავთ კი ვინმე მათგანისგან საამისო, მისაბამ მა-
გალითს?

ერთს, რომელზეც არ ითქმის „ვინმე“, — სახით და გვარით
მას ბევრი იცნობს, აკი რესპუბლიკაში იგი სათვალავით ნო-
მერ... არა, მის თავს არც ნომრით გაგიძღვანებთ და არც თა-
ნამდებობით, ვიტყვი ისე, როგორც საერთოდ ჩვენში ამბობენ
ხოლმე: დიდი კაცია!

ჰოდა, რაკი ამ დიდ კაცზე ბევრი რამ არის დამოკიდებული,
თუ როგორ და რა გზებით გადაიჭრება საქართველოს სააწმყო
და სამომავლო მტკივნეული პრობლემები, ბევრი წვალების
შემდეგ, როგორც იქნა, ბ ი ნ ა ზ ე მივაწვდინე „შავი წიგნი“
(ბინაზე, ვინძლო მერმე, რომ თავი არ ემართლებინა, ჩემს აპა-
რატს არაფერი გადმოუციაო), და როგორც მისმა მძახალმა
გადმომცა, მოეწონა ძალიან, მაგრამ ეხეც უთქვამს, მოსკოვი,
მოსკოვიო...

ბოდიშს კი ვიხდი ამ შინაურული სიტყვისათვის, მაგრამ...
როგორ, მოსკოვი გაგვიკეთებს ჩვენ — შვილებსა და შვილი-
შვილებს? მოსკოვის იმედად დავდგეთ ამ სამკვდრო-სასიცოცხ-
ლო საქმეში?!

ამ ყველაშათვას დასანახავ ამხანაგს ერთი შვილი ჰყავს და
ერთადერთი შვილიშვილი...

მარტო ერთი შვილი რომ იყოლიე, კარგი, ბატონო, მაშინ ახალგაზრდა იყავი და იმის შეგნება არ გაგაჩნდა და არ გესმოდა, ამით როგორ მტრობდი საკუთარ შვილსაც, საკუთარ თავსაც და საქართველოსაც, მაგრამ ახლა? ეს შენი, თუ შორს გავიხედავთ, დანაშაულებრივი, საძრახისი შეცდომა ახლა შვილსაც გინდა გაამეორებინო? მაინც რა გიშლით ხელს?

ეგებ ბინა არ გყოფნით, ა?

ეგებ საკვები შემოგაკლდათ, ა?

ეგებ ჩასაცემელ-შესამოსელი შემოგეხათ, ა?

თქვენი ნომენკლატურის კაცს არაფერი ამგვარი რამ არ აკლია და, ვფიქრობ, არც თქვენ დაიკლებთ: სახელმწიფო, მმართველ პარტიაში მხოლოდ კარგი ცხოვრებისათვის შედიან, თეთრი ყვავი კი ბუნებაში ჭერ არავის უნახავს.

ერთ ხნიერ მანდილოსანს და ახლაც ლამაზს (ეგებ ამ ქათინაურით მომიტევეს მისი ამბის ასე, მთელ დუნიაზე გამოფენა!), თანამდებობით დემოკრატიული ტრანსპორტით „გადაადგილ-გადმოადგილება“ რომ არ უხდება და სხვა მოვალეობებთან ერთად ერის გამრავლებაზე ზრუნვა უშუალოდ ევალება, „შავი წიგნის“ გაცნობისას ეთქვა, ამის წამკითხველ ქართველს ნუთუ მშვიდად დაეძინება, მე მთელი ღამე თვალი არ მომიხუჭავს, გულის გასამაგრებლად დროდადრო ვალიდოლს ვლებულობდიო...

ცოტა მოგვიანებით მან ეს თავისი, აფორიაქებული სულიერი განწყობილება (და არა განწყობა, — მნიშვნელობით განსხვავებულ ამ ორ სიტყვას ბევრი ახლა ერთმანეთში რომ ურევს და ამჯობინებს დიმიტრი უზნაძის „განწყობა“ უფრო იხმაროს, რათა თავი ღრმა განათლებულად მოგვაჩვენოს), მგრძნობიარე ლექსითაც დაგვიდასტურა, ოღონდ ესეც არის, ამ პოეტურ პროპაგანდა-აგიტაციას, თუნდაც ჭეშმარიტი პოეზიითაც გასხივოსნებულს, განა უფრო არ აჯობებს, როგორც მრავალთათვის ერისქალად ცნობილმა, მისცე ხალხს ცოცხალი მაგალითი — შენი შვილები მესამე ბავშვზე მაინც დაიყოლიო?!

ეგებ მაშინ, ამის შემხედვარე წყალტუბოელი, ნახევრად სოფლელი, ნახევრად ქალაქელი, ქმრის „შანსიანობით“ ჰალვა-მარშელადისგან გამილიონებებული, ოთხშვილიანი სირანა ამბარცუმიანის კარის მეზობელი ქართველი ქალი, ჩვენს სევედი-

ან საყვედურსა და დაჟინებულ თხოვნა-ხვეწნაზე, იყოლიე მესამე შვილი-თქო, უდარდელი სიცილ-კისკისით არ გვიპასუხებდა, მარტო მე ხომ ვერ გავამრავლებ ქართველ ხალხსო...

ჩვენ-მეთქი... დიახ, ჩვენ!..

ამ ყოფნა-არყოფნის, ერის საარსებო საკითხის ირგვლივ, გასულ კვირას, ტელევიზიით ერთი მეტად პატივისცემი, უკვე თითქმის მოხუცი ნამასწავლებლარი გულშიჩამწვდომი სიტყვებით გამოგვესაუბრა...

ძნელია, რა თქმა უნდა, ძნელია შენს უბედურებაზე, თანაც საოჯახო უბედურებაზე, საჯაროდ ყველას გული გადაუშალო, მაგრამ თუ ეს შენი მამულისა და შენი ხალხის საბედისწერო სასწორის პინას აქეთ, გადარჩენისკენ თუნდაც ერთი მიკრონით გადმოსწევს, მაშინ ამას, ვფიქრობ, არ უნდა მოვერიდოთ... ამ კარგ ადამიანს კი სიცოცხლე ჭერ კიდევ შუა ხნოვანებაში მოეშხამა: ერთი შვილი ავტოკატასტროფამ იმსხვერპლა, მეორე კი... არა, რაკი თვითონ არ ინება, მეც არ მივცემ თავს უფლებას სხვის სულში დაუკითხავად ხელი ვაფათურო; ისე კი, ეს ამბავი, არათუ ერთშვილიანობის, — ორშვილიანობის ხშირზე ხშირი ტრაგიკულობა, ბევრს ჩააფიქრებდა, რასაკვირველია, გონიერთ, მხოლოდ გონიერთ...

სწორედ გონიერთათვის გავიმეორებდი კიდევ ერთხელ, — აღზრდას, უეჭველია მნიშვნელობა აქვს, მაგრამ არა გადამწყვეტი...

ერთი და ორი ბავშვით რომ იფარგლებიან, — კერძოდ ჩვენი დღევანდელი ფსევდოინტელიგენცია, მეტწილად კარგი აღზრდის იმედით საზრდოობენ; გაუგონიათ, ბავშვი დაუწერელი დაფაა, რასაც დაწერ, ის წაიკითხებაო; ანდა, ეს ცნობილზე ცნობილი და ძველთაძველი, — ო-ო, თქვენი ალუ უკვე ორი კვირისა ყოფილა, და თქვენ მისი აღზრდა უკვე ორი კვირით დაგიგვიანებიათო, — ბავშვებზე, მოზარდ-დიდებზე და საკუთარ თავზეც ხანგრძლივი დაკვირვების შედეგად მე ამ სააღმზრდელო რჩევა-დარიგებას, ერთსაც და მეორესაც, იუმორისტულ ლიტერატურას ვაკუთვნებ, და თუ ამას ანგარიში არ გაეწევა, ცხადია, არ გამეხარდება, აკი ეს ჩვენს ეროვნულ შეგნებას მოგებას არ მოუტანს, მაგრამ გაკვირვებით არც ის გამიკვირდება, თუნდ ესეც შემომძახონ:

— შენ ჰეი, აფხანიკო, აბა ასეთი ვინა ბრძანდები, რომ და-
გიჯეროთ, უანა-უაკი რუსო ხარ თუ პრაფისორი ამონაშვილი?!

...სტალინზე უკეთესი აღმზრდელი ვინ შეიძლება მოინახოს
კაცობრიობის ისტორიაში? — ეს ხალხთა მამა მილიონებს თა-
ვის ჰკუთნებ ზრდიდა, მაგრამ აი, მისმა ქალიშვილმა, რომლის
აღზრდა არც მამას, არც კრემლის სანიმუშო ბავშვთა, ჯერ ბა-
გას, მერე ბაღს, მერე სპეცსკოლას, და არც მის თითქმის მუ-
დამ თანმხლებს, საგანგებოდ შერჩეულ აღმზრდელ გენერლებს,
არათუ ორი კვირით, — დღე რა არის, ერთი საათითაც არ და-
უგვიანებიათ, მაგრამ...

ჩვენი საბჭოთა დროისათვის — და ჩვენი საბჭოთა ქვეყნისათ-
ვის ასე საიმედო სრულყოფილად აღზრდილმა სვეტლანა ჯუ-
ლაშვილ-სტალინა-ალილუევამ, როგორც კი იხელთა დრო, მამის
აშენებულ ქვეყანას ერთი მაგარი ჰიტლაყი ჰკრა და ესეც რომ
არ იკმარა, ღვიძლი მამის — მეოცე საუკუნის მსოფლიოს ყვე-
ლაზე საკვირველება-კაცის — თავისმომჭრელი მოგონება-მემუ-
არებით გაახარა ჩვენი პლანეტის ყველა ანტიკომუნისტი... უფ-
როსმა შვილმა კი, იაკობმა, რომელიც არათუ იზრდებოდა მა-
მის კალთისა და ზედამხედველობის ქვეშ, — მამას წელიწად-
ში მოძულეებული ობოლივით, ძლივს ერთხელ-ორჯერ თუ იხი-
ლავდა (მენდეთ, — 1934 წელს მე მას რამდენჯერმე შევხვედ-
რივარ სტალინის, ადრეც და მერეც, მეგობრის, ყოფილი
მღვდლის, პეტა კაპანაძის ვაჟის ბინაზე მოსკოვში, ლუბიანკა-
ზე), — და მაინც მან, საგანგებოდ სულაც არაღზრდილმა, უფ-
რო — თვითაღზრდილმა, მამა არ შეარცხვინა და მისი საქმი-
სათვის უდრტვინველად თავი დადო ტყვეთა ჰიტლერულ ბა-
ნაკში...

...სულ აგერ ახლა თბილისში ბევრი გაცეცდა, სულით და
გულით ამ კომუნისტს, დეპუტატს, დიდ პარტიულ ამხანაგებ-
თან ერთობ დაახლოებულ პირს, როგორ და საიდან გამოუვიდა
ასეთი „ანტი“ ქალიშვილი, რომელიც მამის კვალს არ გაჰყვა,
თავის კვალმა კი მშვენიერი ბინიდან ერთ, ჩემთვის კარგად
ნაცნობ, „კომუნალურ სავანეში“ მიიყვანა...

კაცს ძალაუვნებურად გაგონდება თითქმის ზუსტად ასი
წლის წინანდელი ისტორია: რარიგ გატყდა წელში პეტერბურ-
გის ყოფილი გენერალ-გუბერნატორი ლევ პეროვსკი, როცა

შეიტყო, რომ მისი „სოფიკო“ მეთაურობდა ალექსანდრე მეორის მკვლელობას, თითქოსდა თავისი ქალიშვილი მან კი არა, — სტეფანე ხალტურინმა აღზარდა, მუშა-დურგალმა, ამაზე ერთი წლით ადრე ზამთრის სასახლეში აფეთქება რომ მოაწყო).

...ტელევიზიამ ამ ცოტა ხნის წინათ კახეთში ხელთ მოიგდო კაცის მკვლელის მამა, აი ისეთი, ჩვენდა საბედნიეროდ, ჯერ კიდევ რომ შერჩენია მშრომელი გლეხკაცის იერი, გარეგნობითაც და სიტყვა-პასუხითაც...

ცოტა მიკიბულ-მოკიბულად კი ჰკითხეს, მაგრამ ამ მიკიბვაში მაინც გამოსჭვივოდა შენიღბული საყვედური: სად გქონდა, კაცო, თვალები, რატომ აღზარდე კაცის მკვლელი შვილიო...

ვინ არ იცის, თუ პირწმინდა პათოლოგიასთან არა გვაქვს საქმე, მკვლელსაც არ ექაშნიკება შვილიც ავკაცობის გზას თუ დაადგება, ჰოდა, ტელეეშაფოტზე ლამის გაკრული ეს კახელი გლეხი უტრემლო თვალებით, მაგრამ ცრემლიანი ხმით თავაუღებლივ ალულლულდა:

— აბა რა ვიცი... ერთნაირად კი იზრდებოდა ეგეცა და მისი ძმაცა, თანდილაცა... ეგ ეგეთი გამოვიდა, ისა კი... კაცს კი არა... ბარბალობაა დღესა... კარგი საქციელის ქათამია, დედაჩემო, ღმერთი გვიწყენს, ნუ დავკლავთო...

ადრეც ვწერდი და კვლავ გავიმეორებ: ადამიანი თუმც თანდაყოლილი ბუნება-ხასიათით იბადება, მაგრამ მის, ასე ვთქვათ, გაკარგება-გაცულებაში სოციალური გარემო, სახელმწიფოში გაბატონებული საზოგადოებრივი სისტემა მცირეოდენ როლს როდი ასრულებს...

ახლა ჩვენს ირგვლივ უთვალავ დამნაშავეთა შემყურე, შეძრწუნებულ ხალხში ხშირად გაიგონებთ, პასუხი დამნაშავე შეილის მშობლებმაც უნდა აგონ, თვით სასამართლოს წესითაც კი, და არა მარტო მცირეწლოვან დამნაშავეთა დედოკო-მამიკოებმაო...

მართალი გითხრათ, არ ვიცი ამის თაობაზე ჩემი მოსაზრება რა პირით გამოვთქვა... ვთქვა, რომ ეს არათუ იურისპრუდენციის თვალსაზრისით, — უბრალო საზოგადოებრივი მორალის მიხედვითაც არ იქნებოდა გამართლებული, მაშინ ვაითუ, ჩემმა „მეგობრებმა“ ბრძანონ, თვითონ არის პასუხისგებაში მისაცემი და ამიტომაც არ ეპიტნავენა ასეთი კანონის შემოღებაო...

თავს არ ვიმართლებ, ურიელ აკოსტასავით სამსჯავრო-სინაგოგაში თავზე ნაცარს რომ იყრიდა და ტანზე პერანგს იხვევდა, მეც მასსავით...

— „დამნაშავე ვარ, დამნაშავე ვარ, დამნაშავე ვარ!..“

ერთი იმიტომ, რომ ერთი შვილი მყავს, მეორეც იმიტომ, რომ მისი აღზრდა არათუ ორი კვირით, — თითქმის 13 წლით ღვაგვიანე (და თუ რატომ მოხდა ასე, ეს გრძელი ისტორიაა და მისი ახლა აქ მოყოლა უხერხული იქნებოდა; ამის დრო მაშინ მოვა, როცა თქვენი მონა-მორჩილი წვალეების ამა ქვეყნიდან ზოგისთვის „უღროოდ“ წავა, ზოგისთვის... „სწორედ რომ დროულად... დაავგიანა კიდევ“...).

...დიახ, „დამნაშავე ვარ, დამნაშავე ვარ“... 18 წლის განმავლობაშიც კი ჩემს ვაჟს ვერაფერი ვერ შევაცარე ის, რაც მე მიყვარს... თუ იტყოდით, ეს იმის ბრალია, რომ მას დედა არაქართველი ჰყავსო, მე გიპასუხებდით: ეს, შეიძლება, მართებულად არის, მაგრამ არც სულ...

ალექსანდრე სუმბათაშვილს დედა რუსი ჰყავდა, რუსულ გარემოში იზრდებოდა და სიცოცხლის ორ მესამედზე ბევრად მეტი რუსებში გაატარა, ქართული ენა ეძნელებოდა, და მაინც, სულით, გულით, შუა რუსეთშიც მყოფიც, ნამდვილი ქართველი გახლდათ, და მოსკოვის ქართველთა სათვისტომოსაც თავმჯდომარეობდა...

მე, რა თქმა უნდა, მინდა ჩემმა შვილმა ჩემი ერის ქალი შეერთოს და შეიღებოდეს ქართულ სკოლაში მიაბაროს, რომ...

მოკლედ, მინდა ცოტათი მაინც შემიწყოს ხელი იმაში, რასაც ვწერ და რასაც ვემსიხურები, მაგრამ, ჩემდა სავალალოდ, საამისო თანადგომას ჯერჯერობით ვერაფერს ვხედავ, თუმცა... ვინ არ იცის, თუ კაცს დანახვა არაფრისა უნდა, სარკეშიც რომ ზაინდოს, საკუთარ თავსაც ვერ დაინახავს...

ჩვენს დროში შემზარავ, წინათ ცივი გონებისთვისაც ძნელად წარმოსადგენ ამბებს ისე შევეგუეთ, აღარც კი ვიცით, რა უნდა მოხდეს კიდევ ისეთი, რომ გული ჩვენი მიჩვეულზე უფრო მეტად შეძრას და სულს მოსვენება სულ ერთთავად დაუკარგოს, მით უმეტეს, რაღაც ორიოდ სიტყვით ნაამბობმა...

არადა, ამ გრძელი ისტორიის გრძლად მოყოლა გაზრდიდა ამ ხელნაწერის მოცულობას და გააძვირებდა ქსეროქსზე მის გადატანას.

(რაკი ფარულად, მაინც შიშით ბეჭდავენ, გვერდში 20 კაპიკი უნდა მისცე, და როცა ერთხელ სტეფანე-ოსტატს...

— ძალიან ძვირია, ამდენი სად შემიძლია... ეს საერო საქმეა... ქართველი არა ხარ?! დამიყელი, 15 კაპიკს მოგცემ.

— რომ დამიჭირონ?!

— როგორ? აბაზს თუ მოგცემ — არ დაგიჭერენ და... სამ შაურს თუ მოგცემ — დაგიჭერენ?!).

...შარშან, სამტრედიის რაიონში, კერძო მანქანამ ერთი საწყალი წესიერი კაცი გაიტანა, ხუთი შვილის მამა, გვარად ფახურიძე (ეს გაგვაკვირვებს? ერთი კი არა, — ჭგუფ-ჭგუფად რამდენი გააქვთ და რამდენი იღუბება!)...

გამტანმა, ყოვლად სინდისგარეცხილმა კაცმა („ჩემი რა ბრალია, ვერ გადამისწრო“...) მართლმსაჯულების მიხვეულ-მოსხვეულეებში იმდენი იჩაღიჩა, სასჯელი მსუბუქი მიიღო, და ამ მსუბუქი სასჯელიდანაც მსუბუქად გამოძვრა და არც მამითობლების სასარგებლოდ შეწერილი ალიმენტიდან მანეთიც არ გადაიხადა, არა მაქვს და რა მივცეო: თვალში საცემი სიმდიდრე — მანქანა სასწრაფოდ გაყიდა, ბევრი ძვირად ღირებული ნივთიერი მშობლებზე და ძმაზე გაასხვისა, ცოლს ფორმალურად გაეყარა, რათა ალიმენტი ღვიძლ შვილებს უხადოს და...

ესეც კი დაიკვება, ახლა ინვალიდობას გავიკეთებ და რასაც ფახურიძეები მიიღებენ, ამასაც ვნახავო...

ასეთ „კანონ-სამართალზე“ ჯავრს ფახურიძის მეუღლე სულ მალე გადაჰყვია და... ხუთი მცირეწლოვანი ბავშვი დარჩა უღედოდ და, არსებითად, სრულიად უპატრონოდ, აკი არც სასოფლო საბჭომ და არც კოლმეურნეობის გამგეობამ ობლებს არათუ რაიმე მატერიალური დახმარება გაუწია, — უბრალო ადამიანური ყურადღებაც არ მიაქცია (ჰოდა, შოდი და იცხოვრე ასეთ ქვეყანაში!..).

ჯერ კიდევ დედა ცოცხალი ჰყავდათ, როცა, გავიფიქრე, ჩემი მცირე შესაძლებლობის ფარგლებში დაეხმარებოდი პატარა ფახურიძეებს; რაკი ავადმყოფობის გამო თავად არ შემეძლო, ვთხოვე ორ ახალგაზრდა მწერალ ქალს გამგზავრებულიყვნენ სამტრედიის რაიონის სოფელ ახალსოფელში და გადაეცათ ათას ხუთასი მანეთი მატერიალურად და მორალურად გაუბედურებული ბავშვებისათვის... მაგრამ მათ ცივი უარი მტკიცეს, არა იმიტომ, რომ წასვლა დაეზარათ, — თქვენ რაც აქამდე გააკეთეთ-გაიღეთ, ჩვენი დროისათვის ესეც ზღაპარია, თქვენგან — კმარა, ჩვენ ახლა თქვენზე ბევრად-ბევრად დიდფულიან მწერლებს ჩამოვეუვლითო...

ღიახ, სწორედ ასეც ქნეს, ოლონდ... ოლონდ... მათდა გასაოცრად, ალილოზე მათ ჩამოვლას შინიშალური ფინანსური შედეგიც არ მოჰყოლია.

პირველმა, ვისაც წაუმღერეს, — „თქვენი ოჯახი აივსოს ბარაქით და კარაქითა!“ — ილია-აკაკი-იაკობის პორტრეტებიან თავის კაბინეტში თბილი საღმით კი მიიღო, მაგრამ როცა ვიზიტის მიზეზი მოხსენდა, მოსულთ ცივად მოუქრა: იმ ფახურიძეებზე სახელმწიფო იზრუნებსო...

რასაკვირველია, ცხადია, რა თქმა უნდა, ეს ყველამ ვიცით, სახელმწიფოს ჩვენზე დიდი ჯიბე აქვს, მაგრამ... ზურიკელა ვაშალომიძეს ამქვეყნად მარტო თვალით უხილავ, აბსტრაქტულად არსებულ სახელმწიფოს იმედად რომ ეტანტალა და მისი უღედმამო გული თვალხილულ, კონკრეტულ ილიკო და ილარიონს არ გაეთბოთ, — ცხოვრებაში ისეთი კაცი გამოვიდოდა, როგორიც გამოვიდა?!

გახსოვთ? ზურიკელა და ხატიას სიმინდზე გადასაცვლელად

ქურქი და ჩექმები რომ მიჰქონდათ, დამშეულებს სოფელ ნაბელღავში შემოაღამდათ და სრულად უცნობი გლენჯაკის ქიშკართან...

„— ღამის გათენება გვინდა, ბიძია!“ „— მობრძანდით, ბიძიებო, მობრძანდით“, — შუბლგახსნილი შეეგება მათ ბაბილო ვაშაყმაძე... — „ამ ვირს რა ვუყო, ბიძია?“ — შეეკითხა ზურიკელა. „— მოხსენი კეხი და გოუშვი ეზოში... დილამდე ცოტას წაიბალახებს“...

მასპინძლებმა მარტო ვირზე როდი იზრუნეს, — ლუკმას მონატრებული ახალგაზრდები ავახშმეს-დააპურეს, ლოგინიც გაუშალეს, დილით კი იმ დროისათვის ჩხრიალა ყვითელი ოქრო-სიმიინდიც გაატანეს და ამის სანაცვლოდ არც ჩექმები და იტოვეს და არც ქურქი.

როგორ ვიფიქროთ, აქამდე უცნობი, ახლა კი მშობლებივით ახლობელი ადამიანების სიკეთე უფრო ნაკლებად აღიბეჭდებოდა ზურიკელა-ხატისა მესხიერებაში, ვიდრე სახელმწიფოს ღონისძიება, თუნდაც ამას, სახელმწიფოს, მათს კარზე ერთი კი არა, — სიმიინდი თუნდ ათი ბათმანიც გადმოეტვირთა?!

(უკვე ვგრძნობ — ვგრძნობ, რარიგ უხარია ჩემს მოძულე მკითხველ-აბორტმახერს, უმეტრებაში რომ დამიჭირა: ხატის წამყვან-მომყვანი ზურიკელა ვაშალომიძე კი არა, — სოსოია მამალაძე იყოო...)

ო, კი, მაგრამ... თითის მოკაქვან მაინც არ ვაპირებ: სოსოია მამალაძე ზურიკელა ვაშალომიძის ტყუპის ცალივით ზუსტი ანაბეჭდია)...

ღიას, მაგათზე სახელმწიფო იზრუნებსო... ნუ დაგვაფიწყდება, რომ ეს ამბავი ზურიკელა-სოსოიას ომიანობისას გადახდათ, ეამსა შიმშილობისას, ახლა კი, როცა ქონებრივად გაღლებულნი ვართ, სულიერად ასე რამ დაგვაგლახავა?!

„მე თქვენ განთავისუფლებთ სინდისისაგან“, — გამოუცხადა თავის ხალხს ევროპაში ერთმა, აწ უკვე კისერმოტეხილმა დიქტატორმა, მაგრამ იგი ამაში სხვა ხალხებისადმი გერმანელების დამოკიდებულებას გულისხმობდა, ჩვენთვის კი ჭერ, მგონი, არც ლეონიდ ბრეჟნევს და არც ედუარდ შევარდნაძეს

არ უბრძანებიათ — განთავისუფლებთ სიკეთის ქმნისაგანო, და ნუთუ ჩვენი თავი ამისგან ჩვენივე თაოსნობით გავითავისუფლებთ?

...ერთმა ცხრა შვილისა და მეათეზე ფეხმძიმე ქართველმა ქალმა, რევოლუციამდე თავადის ქალობით რომ შეეძლო ეამაყა, აუტანელი საბინაო პირობებით გამწარებულმა, შეამტვრია მუხიანში პირველ სართულზე ოთხოთახიანი ბინა და... რაკი ჩვენში ყველაფერი... მმ... კანონიერებაზეა დაფუძნებული და არასოდეს კანონი... მმ... არ ირღვევა, ამ წვრილშვილიან ორსულ ქალს კანონის ძალით გამოსახლება დაუპირეს...

...და გაიქცა ეს ატირებული, შეშინებული, თითქმის წკიპზე მისული ორსული ქალი ერთ ისეთ... აი, რომლის რანგის პირებზე დიდ, საზეიმო შეკრებილობაზე თავმჯდომარე ასე რომ აცხადებს, „სიტყვა ეძლევა ჩვენს სახელოვან მწერალს... ამას და ამას“.

(ჩვენში ხომ სულ უცნობს, საჭირო თუა, ცნობილად გვაცნობენ, ნამდვილად ცნობილს კი, ო, მის სახელ-გვარს მქუხარე ეპითეტი თუ არ წარუმძღვარეს, ისე, აბა, როგორ მოიხსენიებენ!

ერთ თეატრალურ ქრონიკაში ესეც კი ამოვიკითხე: „სპექტაკლს დგამს ნიჭიერი რეჟისორი... ესა და ეს“.

ჯერ სპექტაკლი არ დადგმულა, არ გვინახავს და... ნიჭიერების თამასუქს აძლევენ უკვე!).

...სწორედ იმ დღეებში ამ სახელოვანმა მწერალმა ვრცელი წერილი გამოაქვეყნა ჩვენი უნუგეშო დემოგრაფიული მდგომარეობის ირგვლივ და... ეს ცხრაშვილიანი და მეათეზე ფეხმძიმე ქალი, ამ წერილის წაკითხვით სიხარულისგან აფოფინებული, — თუ მიშველის, სწორედ ეს მიშველისო და...

ამანაც თავის ფართო კაბინეტში გულგაშლილად მიიღო, დიახ, მიიღო იმ სახელოვანმა კაცმა, რომელიც მწერლობას და თანამდებობას ერთდროულად ყოველთვის ღირსეულად ართმევდა თავს, და ახლა ქვეყანას არა მარტო ზოგადად იცნობს, — მის ბევრ ძლიერთანაც ახლო ურთიერთობაშია; ჰოდა, მწერლობა თუნდაც არ მოვიშველიოთ, მისი ახლანდელი თანამდებობის პირს, ანგარიშს აბა ვინ არ გაუწევს, მით უმე-

ტეს ისინი, ვისზეც დამოკიდებულია მუხიანში შესახლებისა და, იშვიათ შემთხვევაში, გამოსახლების ამბავიც...

...და მართლაც, არაგაფანტული ყურადღებით მოისმინა ამ დიახაც გაგანია ცეცხლში ჩავარდნილი ქალის სათხოვარი, ჩაქრობით კი... „რა ვქნა, ამ საქმეში მე ვერაფერს დაგეხმარებით, მე არაფერი შემიძლიაო“...

...და როცა ასეთი მანუგეშებლობით კიდევ უფრო გულზე ცეცხლდამოკიდებული, ცხრა შვილის დედა და მეთათზე ფეხმძიმე, სკამიდან წელმოწყვეტილი მძიმედ წამოდგა და, ვიდრე კარამდე მივიდოდა, კაბინეტის პატრონში, როგორც ჩანს, თანამდებობის პირზე მწერლურმა მაძიებლობამ იძალა და ჰკითხა, კი, მაგრამ, ცხრა შვილს რას აკმევთო, — ცეცხლსო, — მოკლე იყო პასუხი...

ეს ამბავი ამით არ მთავრდება; როცა აღმასრულებელი ხელისუფლების ორგანოები ერთხელ კიდევ მუქარით შიადგნენ გამოსახლებლად მეთათე ბავშვზე უკვე მოლოგინებულ ქართველ ქალს, საიდანღაც და როგორღაც მისი წვალების ამბავი შეეტყო ერთ ისეთ უთანამდებებო და იმდენად უსახელო მწერალს, რომ მისი გვარი ამ ათშვილიანს არც ოდესმე გაეგონა...

და მაინც, იგი მის გვერდით დადგა და, ასე განსაჯეთ, ძალით, „ყაჩაღურად“ შესახლების ამბავიც კი მოუწონა: — მაგრად დადექით, არც ერთი თქვენი გამომსახლებელი არ ღირს თქვენი მეთათე ბავშვის შიბაქადაც კიო...

უფრო მეტიც: როცა ამ ათშვილიანს ერთმა გველენიანი თანამდებობის ქალმა, დახმარების ნაცვლად, მძიმე ბრალდებასავით პირში მიახალა, შენ ამდენი შვილი იმიტომ გააჩინე, რომ ბინა გინდოდა მიგედოო, მაშინ ამ უსახელო კალმოსანს ხიხინა ხმა ომახიანზე შეეცვალა:

— პრესა ჩვენ ხშირად მოგვაგონებს და ტრიბუნებიდანაც არაერთგზის გაგვიგონია, ბავშვები პრივილეგიური კლასიაო... და თუ თქვენ, მრავალი შვილის დედებო და მამებო, ამ პრივილეგიების მოსაპოვებლად გააჩინეთ ამდენი ბავშვი, — ვაშა თქვენს ქართველობას და დიდება თქვენს ეროვნულ ვაჟაკობას! განა უკვე არ არის დრო, რომ ჩვენ ჩვენივე სამშობლოში მცხოვრები უმცროსი „ძმის“ — ქურთებისგან ვისწავლოთ ჰკუპა, რომლებიც უკვე ამთავითვე ემზადებიან სულ ახლო მო-

მავალში თავზე წამოგვაჯდნენ, როგორც რიცხოვნობით უფროსი „ძმა“, ჯერ თემქა-გლდან-მუხიანის მასშტაბით, მერე კი, სხვა ჩვენს „ძმებთან“ ერთად, წითელი ხიდიდან ფსოუს ხილამდე...

(ნაწყვეტი ბარათიდან, რომელიც გაეგზავნა ელუარდ შევარდნაძეს:

...თოიძის ქუჩაზე (№ 41) ორ პატარა ოთახში ცხოვრობს 37 წლის თამარ ჩიქოვანი; ეს ქალი ჩემთვის, ცხადია, იმით როდი არის უნიკალური, რომ იგი 37 წლიაა, — ამ ქართველ ქალს შედარებით ასეთ ახალგაზრდა ასაკში უკვე ჰყავს ცხრა შვილი და ამჟამად მეთათემა ფეხმძიმედ (მამა დაეღუპა ფრონტზე 1945 წლის... აპრილში, თვით თამარი კი დაიბადა იმავე წლის მაისში).

უკიდურესმა უხეირო საბინაო პირობებმა, რომლებიც წლობით გრძელდება, აიძულებს ეს გუგულივით მშვიდი, წვრილი შვილების დედა „იერიში მიეტანა“ მუხიანის დასახლების ერთ-ერთი მადლივი შენობის პირველ სართულზე მდებარე ბინაზე, და ახლა მას, როგორც კანონის დამრღვევს, კანონის ძალითვე გამოსახლებას უპირებენ, მაგრამ ხომ არსებობს, როგორც ხშირად ამბობენ ხოლმე, მორალის დაუწერელი კანონიც!

მე არ მინდა ვისარგებლო ერთი, პირადად ჩემს თვალში, საკმაოდ სახელშერცხვენილი პირის გამოთქმით, მაგრამ, რა გაეწყობა, ამ შემთხვევაში ოქტომბრის რაიონის აღმასკომის თავმჯდომარე ბაკურაძეზე პირდაპირ ზედგამოჭრილია...

ღიას, ამ „როსტომ-ხანმა“, დახმარებისათვის მასთან მისულ ჩიქოვანის ქალს, ნახევრად ზრმისთვისაც კი შესამჩნევად ფეხმძიმეს, დასაჯდომად სკამის შეთავაზების ნაცვლად მის სიტყვაზე „გამიწიეთ ანგარიში, მე ქართველი ქალი ვარ“, მკვახედ მიახალა „ქურთი და ქართველი ჩემთვის სულ ერთია!“-ო.

რაკი ზედმიწევნით კარგად ვერკვევი ჩვენი დღევანდელი ცხოვრების ასავალ-დასავალში, — თანამდებობით აღქურვილი, საჯაროდ ამგვარად მოლაპარაკე შეიძლება

დიდად მაინცდამაინც არც გავამტყუნოთ, აკი მას ასე, მისთვის ძვირად ღირებული სკამ-სავარძელი ალაპარაკებს, მაგრამ თუკი ის პრაქტიკულ საქმიანობაშიც ყოველთვის ამ საზომით მოქმედებს, მაშინ დაე, ნურავის ნუ გაუკვირდება, როსტომ-ხანის აჩრდილსაც თუ მოვიხმობთ და არც იმის თქმა მოგვეერიდება, რომ საქართველო იყიდებოდა და იყიდება დღესაც!..

ამ რამდენიმე წლის წინათ რკინიგზელი, ექვსშვილიანი ოთიაშვილი, სამილიციო აქტის ენით თუ ვიტყვით, ძალით შესახლდა მტკვრისპირას მდებარე რკინიგზელთა სახლის ერთ-ერთ ოთხოთახიან ბინაში, რომელიც განკუთვნილი იყო უკვე ასაკოვან ერთშვილიან, თანამდებობის მქონე „ამხანაგისთვის“, და როცა ოთიაშვილებთან მივიდნენ გამოსასახლებლად, უსამართლობით ძუ ლომივით გამძვინვარებულმა დედამ თოთო, შეექვსე ლლაპი ესროლა კარში ჩამდგარ კანონის დამცველთ, — სხვა დროსა და სხვა სიტუაციაში კი არაერთგზის კანონის დამრღვევთ, — კიდევ კარგი, რალაც ბედად მაშინ ყველაზე პატარა, ძუძუმწოვარა ოთიაშვილი გადაარჩა და, საერთოდ, სხვა, ყველა ოთიაშვილიც გადაურჩა გამოსახლებას ვალენტინა ტერეშკოვას მზრუნველი ჩარევის წყალობით!

კი, მაგრამ...

ბატონო ედუარდ, საქართველოში ისედაც იშვიათობად ქცეულ ქართველ მრავალშვილიან დედებზე ვალენტინა ტერეშკოვა უნდა ზრუნავდეს მოსკოვიდან? —

საქმით, რასაკვირველია, საქმით, თორემ სიტყვით, ცარიელი სიტყვით ვინ არ „ზრუნავს“ ჩვენში ახლა მათზე!

თამარ ჩიქოვანი მრავალშვილიანებისათვის ბინების მისაცემ სიაში რიცხვით მესამოცეა, და ამ სიაში, მისამდე, იგი ერთადერთი ქართველი ქალია, — ცხრა შვილის დედა, მეთათზე ორსული (მეშვიდე თვეშია)...

ჰოდა, თუ ეს ტრაგედია დატრიალდა, რალა რეალური ფასი ექნება ამის მერე თქვენს თბილ სიტყვებს ჩვენი ხალხის გასამრავლებლად?!

თქვენი ერთი, არა ყველას გასაგონად, შეუმჩნეველად თქმული სიტყვა, — ოღონდ დროზე თქმული! — საკმარისი იქნება, რომ ეს ტრაგედია არ დატრიალდეს...

არ იტყვიტ ამ ერთ სიტყვას და... ქართველი ხალხის ისტორიაში ეს ისეთ ლაქად მოგვეცხებათ, რომელიც არასოდეს არ ჩამოირეცხება.

კ. ბუაჩიძე.

8 ნოემბერი,

1982 წელი

(გვიანდელი მინაწერი: ჟუმბერ პატიაშვილი, ცენტრალური კომიტეტის პირველ მდივნობისას, მრავალშვილიანებს პატივით და გულისყურით ეპყრობოდა; მან, მაგალითად, მართო ჩემი თხოვნით და შეტყობინებით, სახლები აუშენა ხარაგოულის რაიონში უჩა ხარაძეს, თერჯოლისაში — ოთარ ჯაბიძეს; ვრცელი ბინა მიაცემინა თბილისში ექვსშვილიან აზა მანჯავიძისთვის, აგრეთვე ზუთშვილიანი ღვთისმსახური მირიან იორამაშვილი იმ დროს შეასახლა ოთხოთახიან ბინაში, როცა რელიგია ხალხისთვის ჯერ კიდევ ნარკოტიკულ თრიაქად ითვლებოდა).

...მილიცია მუხიანში ჩიქოვანის ქალს არც ისე, არც ასე აღარ სწევვია, სამაგიეროდ ოქტომბრის რევოლუციის მორიგი თარიღის შემდგომ კვირას მას ტელევიზია ეწვია და, როგორც მოსალოდნელი იყო, ტელეჟეპორტიორების დარიგებით, დიდი მადლობა მიაგო კომუნისტურ პარტიას და საბჭოთა მთავრობას მრავალშვილიანებზე ასე თავდადებული ზრუნვისათვის...

მალე მას გმირი დედის წოდებაც უწყალობეს, ცოტა მოგვიანებით კი ქალთა ეურნალმა იგი ბარტყებიანად, თავის ფურცლებზე გამოხატა, წერილიც დაურთო, საიდანაც ის შევიტყვეთ, რომ იმ ათასი მანეთით, რომელიც მიუძღვნია მისთვის ვიღაც ერთს (რომლის გვარი ველარ მომიგონებია), — ამ ფულით ჩემი შვილებსათვის ბიბლიოთეკას მინდა ჩავეყარო საფუძველიო...

სხვათა შორის, მე ეს ღირსეული ქართველი ქალი გამოსახ-
ლების მუქარის ციებ-ცხელების დროსაც მოვიწინებულე და ამ
ციებ-ცხელების გამონელების ჟამსაც; რაკი უკეთესი რამ არ
მომეძევებოდა, და რაც უნდა იყოს, მაინც წიგნად ითვლება, —
ჩემი წყალწყალა კომედიების კრებულიც მივართვი და, აბა,
რას ვიფიქრებდი, რომ მისი ბავშვების ბიბლიოთეკაში ამ ქურ-
ნალის ორი მესვეურის, ორი მართლაც ცნობილი პოეტის ერთ
წიგნსაც ვერ წავაწყდებოდი, და ვერც ლექსთა კრებულებს იმ
დიდი ერისკაცებისა და პოეტებისას, რომლებიც ქურნალის
ამავე ნომერში ჩასურათებული არიან თავიანთ მსუქანლოყება
შვილიშვილებთან ჩახუტებულნი: თვლას ვერ ავუფედი — ორ
ბაბუას სამი, სამი ბადიში!

ასეთ... ჰმ... სიმრავლისას, არც მათ და არც ჩვენ, მკითხვე-
ლებს, ეპვი ნუ შეგვეპარება, რომ ქართველთა მომავალ თაო-
ბებში მათი პოეზია ახლანდელივით... ჰმ... ხელიხელთ იგოგ-
მანებს!..

...გამომშვიდობებისას, როცა ერთხელ კიდევ თვალი შევაკ-
ვლე ცარიელ თაროებს, მუხიანელ წიგნის მოყვარულ — ამ გმირ
დედან უტყუარი პრაქტიკული რჩევა მივეცი: სულ ცოტა, თუნ-
დაც რაიკომის ინსტრუქტორობას თუ მიადწევთ, მაშინ ნახაეთ,
თქვენი ბიბლიოთეკა რა სწრაფად აივსება არათუ ამ პოეტ-
ერისკაცებისა და ერისქალების მიერ მოძღვნილი წიგნებით,
არამედ ყველა იმათი ნაწერებითაც, ვინც...

„სიტყვა ეძლევა ჩვენს საამაყო“... ამას და ამას... „ერის
მოამბეს, დიდ მამულიშვილს, სამშობლოზე ზრუნვაში ძილგა-
ტენილს“, და ამიტომაც დღე-ღამეში მხოლოდ 24 საათი რომ
სძინავს (ბოლო ეს სიტყვები ფიქრით ვუთხარი)...

...ღიახ, ყველას გვინდა ქვეყნის თვალი ვიყოთ, გვინდა თვა-
ლი ჩვენზე რჩებოდეთ, და თუ ამ დროს ვინმე ავთვალა გამოგ-
ვიხტა და გაგვთვალა იმით, რომ წინ ისეთი სასრკე დაგვიდო,
რომელიც არ გვეპირფერება, არ გველაქუცება, ფეხქვეშ არ
გვეგება და თავს არ გვიქონავს...

ნუ, ნუ!..

რა დროს წყენაა, რისხვის ფრქვევაა,
როცა ბედი წყდება

ს ა ქ ა რ თ ვ ე ლ ო ს ი

Иностранный язык есть оружие в
жизненной борьбе.

К. Маркс

ახლა ისე, როგორადაც ივანე კერესელიძის „ცისკრის“ ავტორებს სჩვეოდათ მიემართათ, მეც მათებუარად...

ჩემო სულგრძელო მკითხველო, მართალია, კი დაგღალე, მაგრამ მაინც, შენი ზნეკეთილი დასტურით ორიოდ ნაბიჯით უკან დავიხევ, რათა ხელმეორედ დავუბრუნდე და ამით საბოლოოდ მოვათავო კიდევ საუბარი იმ „სადავო მუხლის“ ირგვლივ, რომლის ჩემ მიერ შეფასებამ გულისწყრომა გამოიწვია დალაგებულ ჰქუისმქონე „კონსტიტუციონალისტთა“ შორისაც კი.

ასე, მაგალითად, ერთმა მათგანმა, ჰემმარიტად გულმხურვალე პატრიოტმა, მისაყუედურა, თქვენი წიგნის პირველმა ნახევარმა ისე შემძრა, ბარათის მოწერა განვიზრახე, მაგრამ შემდეგ, როცა ჩვენი კონსტიტუციის მიღების ამბებს მივაღდექა, გადავიფიქრე, ავი ყოველივე ის, ჩვენის მხრივ, დიდი ვაუკაცობა იყო, თქვენ კი ჭეროვნად არ შეაფასეთო.

კი, მაგრამ, ახლა ესეც ვიკითხოთ, ამ დიდმა ვაუკაცობამ გამოიღო განა რაიმე ნაყოფი? დადებითი და ხელშესახები არავითარი, ხიფათი კი დიდზე დიდი იყო.

(გვახსოვდეს, ჩვენში ცრემლსადენი გაზი არც მზადდება და არც იხმარება, და არც „ბრბოს“ გასაფანტავად წყლის მასხურებელ ავტოცისტერნებს მიმართავენ ხოლმე, და არც პლასტიკური ტყვიებით ტენიან ავტომატებს!).

შეიძლება მითხრან, ამას დრო უნდაო.

დრო კი, მაგრამ... აი მის მერე ბარემც ოთხი წელიწადი გავიდეს, და ეს ხანი თითქოს არცთუ ისე მცირეა, — ჰოდა, შეიცვალა კი რაიმე ამ ხნის მანძილზე უკეთესსკენ?

მხოლოდ ერთი მაგალითი, მარტივზე მარტივი: „ჩვენი“ ოსებიც კი, იმ დიდი საფაბერაკო ამბების შემდეგაც, თავიანთ

საქმიან და უსაქმო ქაღალდებს თბილისში — მათგან სულ რა-
ღაც ასიოდე კილომეტრით დაცილებულ საქართველოს რეს-
პუბლიკის სატახტო ქალაქში! — არათუ ქართულ ენაზე შედგე-
ნილს, ბლანკებზეც კი, მხოლოდ ოსურ-რუსულ ენებზე დაბეჭ-
დილ ბლანკებზე გვიგზავნიან, და ასე, ამგვარად, როგორც ხე-
დავთ, ჩვენი სახელმწიფო ენა არათუ წითელ ხილამდე აღმო-
სავლეთით და ლესელიძემდე დასავლეთით, გორიდან სულ ცო-
ტა მოშორებითაც კი უკვე აღარ „ხელმწიფობს“.

(მინი-ცნობა არა მარტო ტოპონომიკოსების საყურადღე-
ბოდ: სამხრეთ ოსეთში ოსურ ენაზე დაბეჭდილ ყველა წიგნზე
რცხილნარიიდან წარმომდგარი ცხინვალი გვეცხადება როგორც
Цхинвал).

ზოგმა წერილობით, ზოგმაც სიტყვიერად არ გაიზიარა ჩემი
მოსაზრება იმის თაობაზე, რომ ბევრი არაფერი დანაშაული
იქნება, თუკი ჩვენს ბავშვებს აქა-იქ, სპეციალურად, ქართვე-
ლებისთვის განკუთვნილ რუსულ სკოლაში მივაბარებთ-მეთქი
(ოღონდ მართლაც აქა-იქ, და არა ისე „აქა-იქ“, როგორადაც
გაზეთებში წერენ ხოლმე საყოველთაოდ გავრცელებულ სიმა-
ხინჯეზე), თანაც იმ პირობით — იქვე აღვნიშნავდი, — თუ ეს
არ მოხდება აფხაზეთსა და სამხრეთ ოსეთში-მეთქი.

თქვენ კი ამბობთ „აქა-იქო“, მაგრამ ჩვენი დროის ქართვე-
ლი „ივანიჩები“ — ისინი კი ათიათასობით დაითვლებიან — ამ
„აქა-იქს“ ხელებზე დაიხვევენ, და ეს ერთი „აქა-იქ“ შე ვიყო, და
ასე, ამგვარად, საბოლოო ანგარიშით ყველას შვილები რუ-
სულ სკოლაში ამოყოფენ თავსო.

მართალი გითხრათ, როცა ამ საკითხს ვეხებოდი, ჩემს
სიტყვას მაგიურ მნიშვნელობას არ ვანიჭებდი (რასაკვირვე-
ლია, არც ახლა ვანიჭებ), თანაც გამჭირახი და გამგები მშობ-
ლები მყავდა მხედველობაში, რომლებიც შვილების „აქა-იქ“
რუსულ სკოლაში მიბარებით არც სამშობლოს სიყვარულს გა-
უნელებენ და არც მშობლიურ ენას დაავიწყებინებენ; თვალ-
წინ გასული საუკუნის ჩვენი ცხოვრების ისტორია მეხატებო-
და, როცა მრავალმა ქართველმა რუსული აღზრდა-განათლება
კი მიიღო, მაგრამ ქართველობის მცირეოდენი ნიშან-წყალიც
არ დაუქარგავს.

ახლა სხვა დროაო, მეუბნებიან, და ამას, როგორც ჩანს, არ

შეიძლება ანგარიში არ გაეწიოს. თუმცა ესეც არის, სხვა დროცა, მაგრამ ამ სხვა დროშიც ყველა მშობელი ერთმანეთის ანაბეჭდად როდი გვევლინება; პარიზში დიდი ხნის წინათ გადახვეწილმა ქართველებმა და იქ დაბადებულმა მათმა შვილიშვილებმაც დღესაც საკმაოდ კარგად იციან ქართული, მოსკოვში მცხოვრებ ჩემს ზოგიერთ ნაცნობ, წმინდა ქართულ ოჯახში კი ბევრი ბავშვი ენობრივად გარუსებულია, მაგრამ, ამავე დროს, იმავე ქალაქში მცხოვრები იოსებ სტალინის შვილიშვილის შვილები — იაშა და ბესიკი — უწუნო ქართულით შეტყველებენ, თუმცა მათმა მამამ პაპისა და მამის მშობლიური ენა, რაკი სხვა გარემოცვასა და სხვა პირობებში იზრდებოდა. — არ იცის.

ასეა თუ ისე, თავზე მეხიცი რომ დამატყდეს, მე მაინც ვიტყვი: ურუსულოდ ჩვენ, თუნდაც ჩვენი თავი ჩვენვე გვეყუდნოდეს, ჩიხში ჩაყენებულ მატარებელს დავემსგავსებით, მატარებელი კი მაშინ არის მატარებელი, როცა მოძრაობს, თანაც როცა მიიწევს წინ!

ჰოდა, რაკი მე ვერ მოვნახე, როგორც ირკვევა, სწორი და მოკლე გზა ამ ჩიხიდან ჩვენი თავის გამოსაძვრენად, — მონახონ სხვებმა, მხოლოდ არა იმათ, რუსულად *квасной патриотებს* რომ ეძახიან. აქვე ამასაც დავძენდი: ისინი ვერც მონახვენ.

საკავშირო მასშტაბით ჩვენ დიდი სახელმწიფოებრივი წარსული გვაქვს. დღევანდელი ახალგაზრდობისათვის ეს შორეულზე შორეული ამბავი უბრალო ამბავი როდი გახლავთ, იგი ბევრი რამის მოქმელია: 1923 წლის აპრილში გამართული რუსეთის კომუნისტური პარტიის მე-12 ყრილობის 59 კაცისგან შემდგარ ხელმძღვანელ ორგანოებში არჩეული იყო 6 ქართველი (შესადარებლად: სომეხი 1)...

(მინი-ცნობა: იმხანად ასეთ სამეთაურო ადგილებზე ადამიანებს ირჩევდნენ არა თანამდებობების მიხედვით, როგორც ახლა, — ირჩევდნენ გონებრივი მონაცემებს გათვალისწინებით).

1931 წელს, თებერვალში, ანატოლი ლუნაჩარსკიმ „იზვესტიკაში“ პატარა, მაგრამ საგულისხმო აზრებით დახუნძლული

სტატია მოათავსა, საქართველომ ჩვენ მოგვცა თანამედროვეობის არა ერთი და ორი გამოჩენილი პიროვნებაო; ვიჩხვსლავ მოლოტოვს კი, 1937 წლის დასაწყისში, კრემლში ქართული ხელოვნების პირველი დეკადის მონაწილეებთან შეხვედრისას, როცა საქართველოს „ჩვენი დიადი ქვეყნის მარგალიტი“ უწოდა, არა მარტო ჩვენი ქვეყნის იშვიათი კლიმატურ-გეოგრაფიული მდებარეობა ჰქონდა მხედველობაში, — ხალხიც, აკი თქვა კიდევ, ქართველთა ტალანტები მთელ საბჭოთა კავშირში ბრწყინავენო.

აღბათ, მარტო ობროდი არ დამეთანხმება: ის ტალანტები მოსკოვის ცისკიდურზე რუსულის უცოდნელად ვერ ამობრწყინდებოდნენ.

ახლა კი... ამ ტალანტებს, ცხადია, დროთა განმავლობაში თითქოს უნდა ემატა კიდევ, ნამდვილად კი თითქმის სულ არა-რაობამდე დავიდა, ჩვენი მეზობელი სომხებისა კი...

ო, ამაზე უკვე არაერთხელ მოგახსენე, ჩემო დიდად მომთმენო მკითხველო, და ვიდრე საყვედურს შემომკადრებდე სიტყვიერი ტყეპნისათვის, ვფიქრობ, სჯობს... მით უმეტეს, რომ ერთხელ უკვე ვიწვნიე კრიტიკული შოლტის სიმწვავე...

ღიახ, გადმომცეს აკი, ერთმა დოცენტმა, რომელსაც „მავი წიგნი“ ჩაეარდნოდა ხელთ, დიდ ცოდვად ჩაუთვალა თურმე ავტორს, განმეორებები აქვსო.

მე დავინტერესდი, სხვათა შორის, ამ მეტად პატივსაცემი, ამჟამად დოცენტისა და ახლო მომავალში — ამაში ეჭვი ნუ შეგვეპარება! — პროფესორის მოღვაწეობით და... ჩემს წინ მისი უ-უდიდესი მეცნიერულ-ლიტერატურული სიმდიდრე გადაიშალა, თუმცა; ესეც უნდა მოგახსენოთ, ამ უნიკალურ სიმდიდრეს ბევრი ქექვა-წვალების შემდეგ მივაკვლიე: ორ დიდებულ შრომას, დაბეჭდილს — საკმაო ინტერვალებით — ერთსა და იმავე ფორმატ-მომცრო გაზეთში, რომლებიც — ორივე! — უაღრესად მტკივნეულ საკითხს ეხება: აი უკვე რამდენიმე თვეა (ეს პირველ ნაშრომში, მეორეში კი... „უკვე მთელი გრძელი წელიწადი გავიდა მის შემდეგ, რაც...“) ამ პატარა, მყუდრო ქუჩაზე მთავარი მაგისტრალიდან მოძრაობა გადმოიტანეს, ეს კი საფრთხეს უქმნის... ამა და ამ საზოგადოებრივ... საზოგადოების... საზოგადოებას...

მივაკვლიე იმასაც, — ეს უკვე ძალიან იოლად, — რომ სწორედ ამ პატარა, მყუდრო ქუჩაზე ცხოვრობს თურმე ეს ჩვენი ამხანაგი დოცენტი და, ალბათ, უახლოეს მომავალში უთუოდ პროფესორი და, თუმცა ამას ცალკე აბზაცში არ გამოყოფს, მაგრამ ეს ისეც იგრძნობა, სწორედ მანქანების ხმაური უშლის მას ხელს კანტისებურ აზროვნებაში, მათი გამონაბოლქვი კი საფრთხეს უქმნის მის ტვინსა და ფილტვებს, რომელთა ყოველი ნერვი და უჯრედი მთლიანად და სავსებით, სავსებით და მთლიანად ეკუთვნის, ცხადია, საყვარელ დედასამშობლოსა და მშობლიურ კომუნისტურ პარტიას!

ეს ყველაფერი ჰო, მაგრამ... თუკი საგზაო მოძრაობის დროებით შეცვლაზე, რომელიც არსებითად მხოლოდ შენს მუცლის გვრემასთან არის დაკავშირებული, დროის სულ მცირე მონაკვეთშიც კი შეიძლება, პრესის საშუალებით, ორჯერ ამცნო და მოაგონო საზოგადოებას, რატომ არ შეიძლება, ანდარა გასაკიცხია, თუკი შენი მშობლიური ერის უბედურებაზე ორჯერ, სამჯერ და, თუ გნებავთ, უთვალავჯერაც ჩავიკაკუნონ თავში, თუნდაც იგი, ვთქვათ, ცარიელი არც იყოს?!

როცა ტყვილი გაკვნესებს, იმაზე როდიდა ფიქრობ, სხვათა ყურთასმენისათვის დამატკბობელ ხმაზე იკვნესო, — კვნესის ისე, როგორადაც გეკვნესება...

შე თეატრში დასადგმელ დრამას კი არ ვწერ, რომ მის არქიტექტონიკა-კომპოზიციას გულდასმით ვუკირკიმალო...

...სჯობს, რომ იმაზე ვიტყვით,
მუდამ მთქმელი ვარ ამისა,
ნუ შეგაშინებთ, არ გავნებთ
მთიდან ყვირილი ხარისა...

1 ზშირად, როგორც უკიდურესი უბედურება, უკიდურესი ბედნიერებაც აბრ-
მავეებს კაცს, უბნევს სწორ გზას და მი-
აყავს ზნეობის დაცემამდე.

აკაკი.

მალმალ მეკითხებიან ხოლმე, ეს თქვენი „შავი წიგნი“ —
ხელნაწერი „ზევით“ თუ გაუგზავნე, „ზევით“ თუ წაიკითხეს,
„ზევიდან“ რა პასუხი მიიღეთო...

არ გამიკვირდება, თუკი ჩემი წიგნის, მეორე, ამ ნაწილის
მკითხველსაც აღეძრება სურვილი გაიგოს, რა ბედი მოეღოს
იმას, რასაც ამჟამად კითხულობს.

რაკი მგონია, მომავალში ამაზე პასუხის გაცემის შესაძლებ-
ლობა ვაითუ აღარ მომეცეს, ამიტომ გადაუდებლივ აქვე მო-
გახსენებთ: ვფიქრობ, ისეთივე ბედი მოეღოს, რაიც პირველ
ნაწილს ეწია, და მაინც, იგი დროულად გაიგზავნება „ზე-
ვით“...

„შავი წიგნი“ ვინც წაიკითხა, მათ უკვე იციან, ჩემმა პირ-
დაპირმა აღრესატებმა (აბაშიძე (გრიგოლი), ღუმბაძე, თაქთა-
ქიშვილი, ჭელიძე (ვახტანგი) „ზევით“ რაიმის სათქმელად არა-
თუ ენა დაისველეს, მის მომწერსაც კი არც ცოცხალი და არც
მკვდარი (ესე იგი წერილობით) ერთი სიტყვითაც არ შეეხშია-
ნენ, ხოლო მე თვითონ „ზევით“...

ო-ო, მინდოდა კი ჩამეტარებინა ერთი სასერიო ექსპერი-
მენტი — გამეგზავნა ჩემი წიგნი ნელი, სახმელეთო ფოსტით
ტიბეტს, მაგრამ ამის გაფიქრებისთანავე, უმაღლეს მთელს ჩემს
უკვე საფუძვლიანად მოფამფალეზულ ორგანიზმში, კინკრისო-
დან ფეხის ფრჩხილებამდე, შიშის ურუანტელმა დამიარა, ვაი-
თუ, უცხოელებთან დანაშაულებრივი კავშირის გაბმის ცდა
დამბრალდეს-მეთქი... ისე კი, ექვიც არ მეპარება, ამ ხნის მან-
ძილზე სწორედ ტიბეტში მობინადრე დალავი-ლამას რეზიდენ-
ციიდან უფრო აღრე მივიღებდი რაიმე ცნობა-უწყებას, ვიდრე

ეს შეიძლება მიიღოს. თურმე ჩემებრ უმნიშვნელო მოკვდავმა ჩიტაძის ქუჩის შემოგარენიდან.

მთავარი, რა თქმა უნდა, ის კი არ არის, რომ ფორმალური „მივიღეთო“ მიიღო, სრულ უპასუხოებასაც არაფრად ჩააგდებ, თუკი ასეთ, თითქოს უპატივცემლო დუმილს სასიკეთო საქმეების პრაქტიკული განხორციელება მოჰყვება. „შავ წიგნში“ კი, როგორც ამას მკითხველთა ჩემდამი მოწერილი ბარათები ადასტურებენ, მრავალი ისეთი საკითხია წამოყენებული, რომელთა დადებითად და დროულად გადაჭრა ბევრ ხელშესახებ სიკეთეს მოგვიტანდა.

ამათგან ამ საკმაოდ დიდი დროის განმავლობაში მხოლოდ ერთი რამ განხორციელდა, ოღონდ... ნუ იფიქრებს მკითხველი, ავტორი იმდენად ლენჩი და დაბდურია, რომ მას თავის „შავ წიგნს“ მიაწერს: პეკინის ქუჩამ პეკინობა რომ კარგა ხანია კი-რი მოგვეჭამა, ამას „ზევით“ უჩემწიგნოდაც ჩინებულად მიხვდებოდნენ, ოღონდ ეს კი არ ვიცი, გრძნობენ თუ არა ისინი, რომ, მაგალითად, თბილისისათვის ქაიროს ქუჩაც ისეთივე სიბრძნეა, როგორიც იყო ერთ დროს ხრუშჩოვის მიერ ალყირე-ლო ახმედ ბენ ბელას ჩვენი ქვეყნის გმირად გამოცხადება...

აბა ერთი მიბრძანეთ, რა ჩვენი თავსატეხი საზრუნავია საქართველოში ეგვიპტელი არაბების დედაქალაქის უკვდავოფა (ფარაონების ეგვიპტე იყოს მაინც, — მაშინ ვინ მამაძალი), იმ დროს, როდესაც იმავე საქართველოში აზრადაც არ მოსდით, ნიშნად ჩვენი დიდი ეროვნული მადლიერებისა, თბილისის ქუჩებისათვის გვეწოდებინა სახელები ჩვენი სამშობლოს დიდი და უანგარო, დაუცხრომელი მეგობრებისა — დაძმა უორდროპებისა და კონსტანტინე ბალმონტისა, რომელმაც „ვეფხისტყაოსანი“ იმხანად თარგმნა, როცა არც რაიმე ჰონორარს გამოელოდა და არც რაიმე ლაპარაკი იყო რუსი და ქართველი ხალხების საუკუნოვან ძმობა-მეგობრობაზე, უფრო მეტიც და უარესიც: ენა ჩვენი, ქართული, ძალღის ენად მიიჩნეოდა.

ისე კი... ქუჩებისთვის მათი სახელების შერქმევა, აბა, რა ისეთი დიდი პატივია, — განა მათ ჩვენგან ვარდისფერი მარმარილოსგან ძეგლების აღმართვა არ ეკუთვნით? თუკი შესაძლებელია ჩვენს დედაქალაქში (იპოდრომის წინ) ძეგლი დაედგას

შეიძლება, საერთოდ დიდად პატივსაცემ, მაგრამ ჩვენი ხალხი-სათვის იმდენად სრულიად უცნობ პირს, რომ მისი გვარი მეც კი ვერა და ვერ ჩავიბეჭდე ჯერ კიდევ ობმოუყიდებელ მეხსიერებაში, ბალმონტი კი...

ჩემგან სომხების არცთუ სულ კარგად ხსენებას ისე შეეჩვია ჩემი მკითხველი, მათზე ახლა ისევ ჩემსავე ნათქვამ საქებას სიტყვას, ყურადღებას, ალბათ, აღარც მიაქცევს, ამიტომ გთხოვთ ეს მაინც დაიხსომოთ: სომხები მადლიერების გრძნობის გამოხატვით, არა საერთოდ, — თ ა ვ ი ა ნ თ ი ჩ რ დ ი ლ ო ე ლ ი მ ე გ ო ბ რ ე ბ ი ს ა დ მ ი, ბევრად გეჯობნიან: თავიანთ სატახტო ქალაქში მათ ძეგლი აუგეს სომხური პოეზიის რევოლუციამდელ მთარგმნელს ვალერი ბრიუსოვს, მიანიჭეს ამისივე სახელი ერევნის პედაგოგიურ ინსტიტუტს; საშუალო პოეტის და თანამედროვე სომეხი პოეტების კარგი მთარგმნელის ვერა ზვიაგინცევის საფლავზე, მოსკოვის მახლობლად, პერედელკინოში, სომხეთის მწერალთა სახელით ძეგლი აღმართეს, ჩვენ კი...

ჩვენ კი რით დავაფასეთ დიდი პოეტი ბორის პასტერნაკი, დიდად ნიჭიერი ნიკოლოზ ზაბოლოცკი, რომლებმაც სახელი გაუთქვეს და დაამკვიდრეს რუსეთში ქართული პოეზია, რომლებიც — ეს „სხვათა შორის“ კი არა, საგანგებოდ აღსანიშნავია! — მარტო ქართულიდან თარგმნიდნენ, და არა ჩვენი კავშირის, ერთ გულურად შეკრული ყველა ენიდან, რომლის უკვე ნახევარსაუკუნოვანი ქართული დევიზი ასეთია:

ვთარგმნი ჯამბულს,
ვცამ ამით პურს!..

(ო, არა, ზემოთ ნიკოლოზ ტიხონოვი არ გამომჩინია — მის სახელსა და საძვალეს სამთავრობო ორგანიზაციებიც კარგად უფლიან-პატრონობენ).

...მე პირადად პეკინის ქუჩას უფრო სხვა სახელით მოვნათლავდი, ვიდრე ახლა მიაკუთვნეს, მაგრამ ჩემს სუბიექტურ მიდგომას, აბა, რა მნიშვნელობა ექნება, ერთიც იმიტომ არა, რომ მ შ ვ ი დ ო ბ ი ს გ ა მ ზ ი რ ი არის მოსკოვში და ის, რაც მოსკოვში არის, როგორც წესი, ჩვენშიც უნდა იყოს, — და რაც, საერთოდ, ბევრი გვექნება მშვიდობის მიმანიშნებელი ქუჩები,

ჩიხები, პროსპექტ-გამზირები, ამით, ალბათ, უფრო იოლად ავიცდნენ ბირთვული ომით ამობუვვას; მეორეც, სულ დამთხვეული უნდა იყოს ადამიანი, ამ შემთხვევაში მე — თქვენი მორჩილი მონა, რომელსაც ყენობა თუ არა, — წისქვილების მწკრივი კი ახსოვს მტკვარზე იმჟამინდელი ვორონცოვის და ამჟამინდელი კარლ მარქსის ხიდთან და აქამდე ვერ შეუგნია, რომ, მაგალითად, საპირველმაისო ანდა სოპტომბრო ზეიმის მეორე დღეს გაზეთები ასე ხომ არ დაწერენ, — მშრომელთა დემონსტრაციები ოპტიმისტური და ენერგიული ნაბიჯებით მოედინებიან კონსტიტუციის მოედნისაკენ მიხეილ ჯავახიშვილის გამზირიდანო, იმ ჯავახიშვილისა, რომელსაც, ესეც კი არ ვიცი, 1937 წელმა სად გაუთხარა სამარეო...

როცა „შავი წიგნისადმი“ მკითხველი და, სამწუხაროდ, შემთხვევლიც „ზევიდან“ თუნდაც ცოტაოდენი გულისყურის მსგაესს რაღაცას მაინც მოველით, ამით ჩვენ, მკითხველსაც და დამწერსაც, ერთი დიდი შეცდომა მოგვდის. ეს შეცდომა მკითხველს თუ ეპატიება, სრულებითაც არ მიეტევება ავტორს: კაცმა ჭიანჭველასავით შენს წონაზე ორჯერ უფრო მძიმე ტვირთი წამოიკიდო და ის კი არ იცოდე, რომ მართლაც ჭიანჭველა ხარ, და როგორც ჭიანჭველამ ასე დაგვიანებით გაიგო და, საბედნიეროდ, შეიგნო კიდევ, რომ დემოკრატიული ცენტრალიზმი თურმე იმას ნიშნავს, რომ ყოველივე გონივრული, ყოველივე საჭირო და აუცილებელი „ზევიდან“ უნდა მომდინარეობდეს, — და რომ ასეთი რამ „ქვემოთ“ არ შეიძლება დაიბადოს და არც უნდა დაიბადოს ისეთი რამ, რაც „ზევით“ ჯერ არ დაჰბადებიათ; შენი უპარტიო ჭიანჭველობა მუდამ უნდა გახსოვდეს და ისიც უნდა გახსოვდეს, შენი ორჯერ ორი არ შეიძლება იყოს ოთხი... ხუთიაო, გეუბნებიან და ამაში არც უნდა დაეჭვდე და შენი გონების განმანათლებელს არც უნდა შეედავო; თუნდაც გზას ამ შემთხვევაში შენი და მისი დიდი მასწავლებლის, კარლ მარქსის დევიზი გინათებდეს, ყველაფერს ეჭვის თვალით შეხედეო...

შეხედვით — კი, ბატონო, შეხედე, ოღონდ შეხედე მალულად და ამას საჯაროდ ნუ გაამხელ, და თუ ასე ჭკვიანურად მოიქცევი მანამ, ვიდრე თვითონ არ შეცვლიან თითქოს არასწორად მიღებულ ნამრავლს, მაშინ, ვინ იცის, ჭიანჭველობი-

დან შეიძლება ჯარისკაცობამდე აგამაღლონ (ესეც არის, თუკი ერთხელ „ჩესტის“ ალება დაუგვიანე, მაინც მარადის დარჩები მათს თვალში მაზარაგადაცმულ კიაღუად)...

ო-ო, აბა, ერთი ღენერალი იყო!

არა, სამხედრო გენერლობა სულაც არ არის აუცილებელი, შთავარია, ჩვენი ცხოვრების ღენერალი იყო, გნებავთ ვაჭრობის დარგში, გნებავთ პარტიის სარბიელზე, გნებავთ ლიტერატურის ასპარეზზე...

აი, მაგალითად, ერთი ასეთი ლეტარატურული ღენერალი ამ რამდენიმე ხნის წინათ ამერიკას ეწვია...

ალბათ დამეთანხმებით: ჩახვიდე ამერიკაში და ჩვენი საუკუნის საოცრება — უოლტ დისნეის დისნეილენდი არ მოინახულო, ეს იმას ნიშნავს, გურიაში ჩახვიდე და ნასაკირალის ობელისკი არ მოიხილო...

ნასაკირალი კი მას უკვე ნანახი ჰქონდა, თანაც არა ერთხელ და ორჯერ, ამიტომ წმინდა სინდისით მოინახულა კალიფორნიაში...

რომელმან შექმნა სამყარო ძალითა მით ძლიერითა,
ზეგარდმო არსნი სულითა ყვნა ზეცით მონაბერითა...

...კაცის მიერ ხელთქმნილი, მაგრამ თითქოს უშუალოდ ღმერთის მიერ ნახელავი სამყარო, სამყარო-სასწაული, გამაცეცებელი, გამაოგნებელი ყველასათვის, განურჩევლად ხნოვანებისა, სქესისა, ეროვნება-რასისა, განათლება-სიბნელისა, სიმდიდრე-სიღარიბისა...

...მერედა, მოეწონა? დავსვით კითხვა ამგვარად, — ეს ნიშნავს, რომ შევბღალეთ და დავაკნინეთ მისი გრძნობები, ეჭვი შევიტანეთ მის გემოვნებაში, — მოეწონა კი არა, ისე განცვიფრდა და იმდენად აღფრთოვანდა, რომ დათვალეირებისთანავე... მმ... მიჭირს შესაფერისი ზმნის მონახვა...

ღიახ, იმ დღიდანვე აეკვიატა, აეტორღილა, აებანიავა დიდებული, ბრწყინვალე, დიდად პატრიოტულ-მამულიშვილური აზრი, აზრი-ელვა, აზრი-რაკეტა...

და როცა მას, ჩვენდა საბედნიეროდ და სასიხარულოდ, ატლანტის ოკეანეზე იოსებ ჟორდანიას მუხთალი ბედი ააცილა ღმერთმა და შინ მშვიდობით დაგვიბრუნდა... რა დიდე-

ბული და რა მშვენიერება იქნებოდა საქართველოს ბავშვებ-
საც თავიანთი დისწილენდი რომ ჰქონდეთ... თბილისშიო!..

ადგილიც შეარჩია, — პოეტური ენით თუ ვიტყვით, მდინა-
რე, და თუ პროზაულ-რეალურით, — ლელე ვერეს მიდამოებ-
ში, სხვათა შორის, ასე ხელისგულივით რომ მოჩანს მისივე
სახლის აივნოდან.

თქმა ამისა და დასტურის მიღებაც „ზევიდან“, დიახ, „ზ ე-
ვი დ ა ნ“, თითქმის ერთი იყო: აშენდესო, თქვეს, „მზიურიო,
მზიურიო...“

(სახელი ესე, ამბობენ, სამუშაო ფსევდონიმიანო, ნათლობის
სახელად კი, შეიძლება, „ზურიკეილენდი“ შეერქვასო)...

...და დაჯდება იგი სულ რაღაც... ასი მილიონი ანუ ძველი,
ხრუშჩოვამდელი კურსით ათასი მილიონი, ანუ ერთი მილიარ-
დი, იმდროინდელი ჩვენი რესპუბლიკის მთელი ბიუჯეტის
თითქმის ერთი მესამედი!

ასიო, ამას ვიღაც-ვიღაცეები როდი ამბობენ, ითქვა ეს საქ-
ვეყნოდ, ტრიბუნოდან ერთი დიდი თანამდებობის პირის მიერ,
ერთგვარი სიამაყითაც კი, აი ჩვენ ასეთი ვეებერთელა სახსრე-
ბის გაღებაც არ გვენანება ბავშვებისთვისო...

ჰოდა, თუ ვინიცობაა ყურის აწევა დამიპირეს კრიტიკანო-
ბისა და პროვოკაციული ხმების გავრცელებისათვის, მხოლოდ
მაშინ გამოვტყდები, სად, როდის და ვისგან მოვისმინე „აგი“
ჯერ კიდევ აუწეველი ყურით...

თანაც ეს ასი მილიონი ხარჯთაღრიცხვით არის გათვალის-
წინებული, მშენებლობის პროცესში კი, ვინ იცის, ბოლოში
კიდევ რამდენ ნოლს მიიწერს, რასაც წინასწარ მთელი საფი-
ნანსო ინსტიტუტიც ვერ იანგარიშებს...

დიახ, ჩვენ ასეთი უზარმაზარი თანხაც არ გვენანება „მზი-
ურის“ ბავშვებისათვისო...

მაშ, როგორ! თუკი ზოია რუხაძეს „მზიურში“ არ ერბინა-
ეთამაშა, იმიტომაც დაენანა თავისი ხალხის სადიდებლად სახ-
რჩობელას ყულფში თავი გაეყო... ანდა შოთა გამცემლიძენ
ბრძოლის ველზე... ან ქიჭიკო ბენდელიანს ცის ტატნობზე...
ლიანა ისაკაძესაც იმიტომ ვერ მოჰყავს ალტაცებაში უცხოეთის
ყველა ის ქვეყანა, სადაც იგი ვიოლინოზე ხემს ჩამოჰკრავს
და სადირიჟოროდ ხელს ამართავს!..

კონტრასტისათვის: სრულიად ახალგაზრდა, 19 წლის ლეილა ნ-ძე, სამუსიკო სკოლადამთავრებული და უკვე ჩამოყალიბებული ნარკომანი იმიტომ დაადგა ამ „ლხენა-განცხრომის“ გზას, რაკი ქუთაისში ცხოვრობდა და ნარკოტიკებით მოვაჭრე დედამ თბილისის „მზიურში“ ერთხელაც ვერ გააქენტრუს-გამოაქენტრუსა)...

ჩემი ხსოვნის არე, მხრებზე ზვავით ჩამოწოლილ წლებთან ერთად, ისე შემოისალტა, სულ ადვილი შესაძლებელია შევცდე, და მაინც: მგონი, არც ილია ვეკუა, ღარიბი გლეხის შვილი, არ მოსწრებია და არ დამტკბარა „მზიურის“ კარუსელბილიკ-საჩრდილობლებით, და სწორედ ამიტომაც ვერ გაიკაფა და ვერ გაიკვლია გზები უმაღლესზე უმაღლესი მათემატიკის ლაბირინთებში და ვერ გაამზიურა ამ თავსატეხი მეცნიერების აქა-იქ კიდევ შემორჩენილი, ჯერ კიდევ წყვედიადით მოცული მართი და არამართი კუთხეები

იაპონიაში ოდითგან მომდინარეობს კულტი ბავშვისა და კულტი მოხუცისა. ამ უკანასკნელზე აქ არაფერს ვიტყვი, პირველზე კი... იქ ბავშვი თუნდაც გააღმერთონ და ოქრო გარემოში ამყოფონ, ჩვეულებრივი კაცის გრძნობებს მაინც არ დაკარგავს და მისგან საბოლოოდ მაინც დადგება წესიერი, ზნეკეთილი, შრომისმოყვარე ადამიანი. ეს არის იაპონელთა ეროვნული თვისება. იქ ისე, როგორც ყველგან დასავლეთსა და ამერიკაში, მცირე და საშუალო შეძლებისიანებზე რომ აღარაფერი ვთქვათ, ძნელად მოინახება გნებავთ მილიონერის დედისერთაც — არასრულწლოვანიც კი — მშობლების მილიონებს შესჩერებოდეს და თავს აღარ იწუხებდეს ცხოვრებაში საკუთარი საქმიანობით ადგილის დამკვიდრებისათვის.

ჩვენში კი, საქართველოში... რაც უფრო მეტს ატკბობ და მეტს აყრი შენს მწირ მონაშენს, რაც უფრო „ამზიურებ“ მას და ცივ სიოს არ აკარებ, მით უფრო — არა, ამ სიტყვისათვის ბოდის არ ვიხდი — ვირდება იგი და ისეც საგინებელი მშობლების („ბევრი ვაჭამო და ცოტა ვამუშაო“) კიდევ უფრო მაგინებელი და გამამწარებელი ხდება!

რა გაეწყობა, იაპონელებისა და სხვა, კაპიტალისტურ ჯუნგლებში მცხოვრები, ჩამორჩენილი ხალხებისგან განსხვავებით,

ეს არის ჩვენი ეროვნული თვისება, რაც წინათ თითქოს სულაც არ გვახასიათებდა, ახლა კი, ერთსა და ორ შვილიანობისას, უმეტეს წილად ათასგვარი მამაძალღური, არა-შრომითი გზებით მიღწეული გამდიდრების ჟამს თავი იმ მზეს-უმზირასავით მოიღერა, რომელიც, თავთავის უსაშველო სიმძიმის გამო, სადაცაა დაენარცხება მის გამომკვებ მიწაზე!..

არა, ჩვენი დიდი ეროვნული სატიკვირის განსაკუთრავად არ გამოგვადგება არც იაპონიიდან და არც ამერიკიდან გადმოღებულ-გადმოტანილი მალამო...

...ჰოდა, არც ახლა დარწმუნდები, ფარაჯიანო კიალუა-ჯარისკაცო, რა სასიკეთო მადლი შეგიძლია მოპვინო ქვეყანას, ღენერალი თუ გახდები?! და როგორც ღენერალმა, ამ ცოცხალი მაგალითის მიხედვით ხომ ხედავ, როგორ უნდა იზრუნო საქართველოს მომავალზე, საქართველოს ბავშვებზე, და რა ისეთი ციური იდეა მისცე დედამამშობლოს, რომლის ხორცის შესასხამად ათეული მილიონებიც არ დაიშურონ, რომლებიც, სხვა შემთხვევაში, შეიძლებოდა მოხმარებოდა გზებს, — უგზოობის გამო, თითქოს ჰირი გაჩნდაო, მთელი ოჯახებით რომ გამორბიან თვალმოხატული ქართული სოფლებიდან... მოხმარებოდა თუნდაც ჩვენს მზიურ თბილისში საბავშვო ბაგა-ბაღების მომრავლებას, სადაც ბაღის მოწყობა უფრო ძნელია, ვიდრე სიმწიფის ატესტატის მქონესი — უმაღლეს სასწავლებელში... აშენებულებო ყაზბეგის რაიონის სოფელ ანჩხოტში ერთი პატარა სკოლის შენობა, მოსწავლენი წლების მანძილზე შეფარებული რომ არიან დაქირავებულ შენობაში, და ეს დაქირავებული შენობა თუ რა შენობაც იქნება, მართალია, იოლი წარმოსადგენი არ არის, მაგრამ მაინც ვეცადოთ წარმოვიდგინოთ...

ყოველივე ეს, და ასობით მსგავსნი მათნი, როგორც ჩანს, წვრილმანია, წვრილმანებს კი თავი მერეც მოევლება, ათიოცი წლის შემდეგ, ახლა კი მთავარი „მზიურია“, — ჩვენი მზე, ჩვენი მთვარე, სუნთქვა ჩვენი და ჟანგბადი ჩვენი!..

„საქმემან შენმან გამოგაჩინოს შენ...“

და მერე ნახეთ ჩვენი არქიტექტურული ხელოვნებით და მშენებლობის უბადლო ხარისხით თუ ჩვენ კუბოში არ გადავაბრუნებთ რაღაც საშიოდე „სამი გოჭისა“, რაღაც ერთი „თა-

გუნია მიკი. მაუსისა“, „ბემბისა“ და კიდევ რალაც-რალაცების შემქმნელ უოლტ დისნეის...

ღიახ, ჩენი..

ჩვენ, რომლებსაც რუსთაველის ძეგლის წინაც კი ასფალტი ისე ვერ დაგვიგია, რომ წვიმასა და ნაწვიმარზე იქ გავლელ ამერიკელ სტუმრებს, ნაკაშიძე-წუწუნავას ცხენზე მოჭირითე ისიდორესავით, ამერიკაში საკუთარი კალოშებით რომ გაემგზავრა, — ამასავით მაღალყელიანი რეზინის ჩექმები ნეტავ თან წამოგველოო...

ასეთივე აუხდენელი ნატვრა ძალ-ღონეს რომ აცლის სასტუმრო „აჭარაში“ დაბინავებულ უცხოელ სპორტსმენებს სპორტის სასახლის მიმართულებით, ავღარში, ქუჩის გადაკურვა რომ სჭირდებათ...

...ჩვენ... რამდენიმე თვე რომ მოვუწდით და ზუსტად დანიშნული დღის — თბილისობისთვის მაინც ვერ მოვათავეთ და ვერ გავხსენით მეტრო „რუსთაველის“ მახლობლად ორ სახლს შუა ჩაჩხირული, პატარა ერთდარბაზიანი და ერთსართულიანი სანაყინე, თუმცა იგი საგულდაგულოდ შენდებოდა და მისიეული გვყავდა არა ერთი და ორი სამშენებლო ტრესტი...

ღიახ, ბატონო! შენ ოღონდ საბჭოთა ცხოვრების დენერალი იყავი, ოღონდ იდეა გამოიმეტე, „ზურიკეილენდისა“ არ იყოს და ასაწონ-დასაწონად სასწორზე მის დადებას, მოვიფიქრებთო, აბა, ვინ შეგკადრებს, — საამისოდ ვინ გალოდინებს, მაგრამ, როცა შენ ჩვენი ალალ-მართალი ცხოვრების მხოლოდ ღობემძვრალა ხარ, თან არაკომუნისტი, აბა „ზევით“ რა ყურადსაღებია შენი ფიქრები, „გინდ შეენი იყენენ, გინდა თეთრები...“

...ამა და ამ ქუჩას გომართელის სახელი დავარქვით და მისი სახლის ფასადზე მოსაგონარი დაფაც მივაკრათო, ფულზე გონებაშეშლილი, ერის ამომწყვეტი აბორტმახერები ავაგოთ ან-ძუხზეო, საჭედან სამუდამოდ ჩამოვსვათ ორჯერ და სამჯერ შემჩნეული ლოთები მაინცო, მრავალშვილიანები წავახალისოთ და გავახაროთ ჩვენი სიკეთითაც — ორი თითი მაინც ჩავიყრთ მრავალნაირი შემოსავლით ჩვენს ასე გამოტენილ ჯიბეტომრებშიო და სხვა ამგვარი აბღაუბდები ხალხისათვის და სამშობლოსთვის საჭირო და სასარგებლო რომ ყოფილიყო,

როგორ ფიქრობ, ამაზე შენზე ადრე ჩვენი მთავარი ლიტერატურული ლენერალიც ხომ გვეტყოდა და სხვა, მისი მომდევნო ლენერლებიცო (ფრონტის გენერლები არა გვეყავს, თორემ... ზურგის ლენერლები?! თვლასაც ვერ ავუღივართ!).

...ხოლო რაც შეეხება შენ რალაც სხვა ბუზანკალურ საეკვო და ხალხთა ძმობის დამარღვეველ აზრიკუნებს (МЫСЛЕННИК) — მაგ ბენტერა თავში თუ კიდეც გამოჩეკ, ყოველ შემთხვევაში გარეთ მაინც ნუ გამოაფრენ, თორემ... ნუ იფიქრებ, ჰამლეტის მამის აჩრდილი აწი მეტჯერ აღარ გამოჩნდება ჩვენი ცხოვრების სარბიელზეო...

ჩემო ბატონო, დაახლოებით, ალბათ, ასეთი პასუხი უნდა მიმეღო „ზევიდან“, მაგრამ სინამდვილეში არც ასეთი მიმიღია.

როგორც იტყვიან, სრული იგნორირება!

თითქოს მე მათთვის არც არაფერი გამეგზავნოს და თითქოს არც მათ მიეღოთ ჩემგან რამე!

ღიახ, სრული იგნორირება!

ერთმა ჩემმა სტუდენტობის დროინდელმა ნაამხანაგარმა გურულმა ქალმა, ფარმაკოლოგიის პროფესორზე გათხოვების შემდეგ სირსვალი ლობიოს შეკაზმვის, ჩვენი დინამიკური დროისათვის ბევრად უფრო ეფექტური, ახლებური რეცეპტურა რომ შეიმუშავა, — ჩემი ნაშრომი (თუკი, მისი აზრით, იგი ნაშრომად შეიძლება ჩაითვალოს) საერთო შტრიხებში თუმცა მოიწონა, მაგრამ თან ისეთი არსებითი, მომაკვდინებელი შენიშვნა მოაყოლა, ერთი ხელის აქნევით სულ ფურცლა-ფურცლა გადამიყარა... არ ვიცი, მდინარე სუფსაში, არ ვიცი, ბახვის წყალში!

მოკლედ უნდა დაგეწერაო, სადა აქვთ პასუხისმგებელ ამხანაგებს მაგის კითხვის დრო და თავიო...

ვინ იცის, ეგებ მართლაც-მართლაც.. არა, თავი კი აქვთ, მაგრამ დრო, დრო! მოცალეება და დრო!

ასეთ განაჩენს თითქოს საგონებელში უნდა ჩავეგდე, მაგრამ როცა ჩავუფიქრდი, თითქოს გამეხარდა კიდეც: ჩემს ნაწერში ზოგიერთი ისეთი აზრიც არის გამოთქმული, რომლის ორჯერ ორის ოთხობაში ეჭვის შეტანა არავის, და, თითქოს, არც პასუხისმგებელ ამხანაგებს სოკრატობაში არ ჩამოერთმე-

ვით, და მათ „შავი წიგნი“, სიდიდისა და ცენზურული თვით-დაზღვევის გამო, რაც სულ უღრრობასთან არ იქნება, ცხადია, დაკავშირებული, არც აქამდე წაუკითხავთ და არც აწი წაიკითხავენ, ეს ერთთავად ცუდი არც არის: როცა თვითონ, და არა — დაიფარონ ღმერთმა! — ვილაც ლიტერატურული ჯარისკაცის მორიდებული კარნახით მივლენ ამ აზრთა აქსიომობამდე, მაშინ მათ, ალბათ, კიდევ განახორციელებენ.

და ჩვენ ახლა იმაზე უნდა ვიოცნებოთ, რომ ამ პროცესს ათეული წლები არ დასჭირდეს ისე, როგორც ეს დასჭირდა, მაგალითად, იმ დიდ აღმოჩენას, რომ რძეს თურმე ძროხა იძლევა, და რომ ბევრი კვერცხი გვექონდეს, ამისათვის თურმე საჭიროა ქათამი გვეყავდეს მრავლად...

ერთსაც ვიტყვოდი: ნუ. ვეცდებით (ცოტას ვცდილობთ თუ?) ინდაურის საცივი უინდაუროდ გავაკეთოთ; უინდაუროდ ინდაურის საცივი არასოდეს არ ვაკეთდება.

ერთმა ჩემმა ნაცნობმა „შავი წიგნი“ როგორღაც ერთ ისეთ ყოფილ პასუხისმგებელ პირს წააკითხა, რომლის პირველკაცობის პერიოდში, შორიდანაც რომ გამოჩნდებოდა, იმ ბედის მომცემი და ბედის წამრთმევი დაწესებულების კარგა მოზრდილი მუშაკებიც კი, თუ იმ წუთში დერეფანში აღმოჩნდებოდნენ, — ვაი, თუ ჩვენი დანახვა არ ექაშნიკოსო, — მოკრიალებულ პარკეტზე. შეშინებული ვირთხებივით გარბოდნენ და შერბოდნენ თავიანთ სოროებში... ბოდიში, კაბინეტებში!

ო-ო, ეს ნურც გავვიკვირდება და ანლა მათ ასეთი სიფრთხილისათვის ნურც დაეძრახავთ, აკი მას თითქმის იმდენივე შეეძლო, რამდენიც, ვთქვათ, კალიგულას, თავისი იორლა-ცხენის გაკონსულება რომ მოინდომა...

ჰოდა, თუ მის ახლობელს დაეჯერება, ასეთმა დიდმა კაცმა, თუმცა ყოფილმა, ჩემთან შეხვედრის ისეთი მორიდებული სურვილი გამოთქვა, აი, უხეირო რეჟისორი მსახიობს როლის ქვეტექსტს რომ უხსნის: თუ მიკადრებსო...

ჩემგან „უკადრობა“, აბა რა საკადრისი იქნებოდა და... საუბრისას, სხვათა შორის, სიტყვა მემუარულ ლიტერატურაზე ჩამოვარდა...

მემუარები, მე ვუთხარი, მხოლოდ იმ შემთხვევაშია საინ-

ტერესო, თუკი მისი ავტორი გამოჩენილი პიროვნებაა, ანდა; შეიძლება თავად არ იყო გამოჩენილი; მაგრამ ისტორიულ პიროვნებათა შორის ტრიალებდა და ისტორიული ამბების თუ უშუალო მონაწილე არა, მათი უშუალო მომსწრე მაინც იყო-მეთქი.

რაკი გავბედე და ასეთი გაცვეთილი სიბრძნე ჩამოვდერდე, ამით გათამამებულმა მერე უკვე წმინდად ჩამოვფქვი, აი „ამას-ამას-ამას“, რაც არც მაშინდელი და, მით უმეტეს, დღევანდელი თვალსაზრისით, მისი მოღვაწეობის პერიოდს არ ამშვენებდა და არ ამშვენებს, რატომ აკეთებდა...

მან ყოველივე და ყველაფერი „ეს-ეს-ეს“ სტალინსა და მოსკოვს გადააბრალა...

კი, მაგრამ... ვითომ სულ ასე იყო საქმე? მკვდარი, ლომიც კი, სიმართლეს ველარ აღვიდგენს, მოსკოვი კი...

როგორ, მაგალითისთვის, იმ სახლზე რომ მემორიალური დაფა მიგვეკრა, სადაც ივანე გომართელი ცხოვრობდა, რომლის მთელი დანაშაული საქართველოსა და ქართველი ხალხის წინაშე ის არის, რომ მისი გული საქართველოსა და ქართველი ხალხისათვის ფეთქავდა, და ამ მოსიყვარულე გულმა შეიწირა კიდევ იგი, — დავიჯეროთ, ამას მოსკოვი დაგვიშლიდა?

რასაკვირველია, მე სულ უბრალოზე უბრალო მაგალითი მომყავს, თორემ... თუნდაც ქუჩას და დაბა-ქალაქისთვისაც მიგვეკუთვნებინა ამ მართლაც სასიქადულო, ყოველმხრივ მისაბაძი მკურნალის სახელი, ესეც პატარაზე პატარა ამბავი იქნებოდა იმ სასიკოცხლო საკითხებთან შედარებით, რომელთა მოუგვარებლობა ისე დიდად გვაწუხებდა (ახლაც გვაწუხებს!) და რომელთა გადაჭრისათვის მოსკოვს უნდა დავკითხებოდით...

აი, თუნდაც... სულ აგერ ახლა, ვაგზლის მახლობლად ოქტომბრის ქუჩის საკმაოდ გრძელი მეორე შესახვევი საქელეხო სეფა-სუფრით მთლიანად რომ ჩაბერაგეს, და საერთოდ, ეს ახალი „ტრადიცია“, ჩვენი სატრაბახო, დიდად ცივილიზებული დედაქალაქის მეტ-ნაკლებად მოფარებულ ქუჩებში რომ მკვიდრდება ორას-სამას-ხუთასკაციანი ღრეობები, ამის დროულად, ამთავითვე ამოსაშანთავად მკაცრ ზომებს თუ მიიღებენ, — როგორ, ამას დაგვიშლის მოსკოვი?

ესეც ვიცოდეთ, გავა დრო და ეს ახალი „ტრადიცია“ რომ დაძველდება, ჩვენი შთამომავლობაც მიიღებს, ალბათ, დადგენილებას მავნე ტრადიციების თაობაზე და, ვაითუ, ის დრო, რომელშიც ახლა ჩვენ ვცხოვრობთ ქელებს-სეფა გაშლილ... ბოდიში, მხრებგაშლილ საქართველოში, იმ ზედსართავი სახელით მოიხსენიონ, რომლითაც ჩვენ ვიხსენიებთ ხოლმე წარსულს ახლანდელ დადგენილებებში...

ჰოდა, ნუ დავაწყევლინებთ თავს!

დადგენილებას პრაქტიკული შედეგი თუ არ მოჰყვია, რა ფასი აქვს ასეთ დადგენილებას?!

ჰოდა, ნუ ეგონებათ დღევანდელ ამა ქვეყნისა ძლიერთ, გამოტანილ დადგენილებათა მიხედვით შეაფასებს მათ ნაღვაწნამოქმედარს ხვალინდელი ისტორია.

რესპუბლიკის უმაღლესი ორგანოების დადგენილება უბრალო სამომჩივნო-საგაზეთო წერილი ხომ არ უნდა იყოს, რომელზეც, ამ შემთხვევაში უთანამდებებო, მაგრამ ფულით და კანონიერების არაერთხელ დაუსჯელი გათელვით გათამამებულის, ჯოღლომოდლო ხალხი ნიშნისმოგებითაც პირში გვახლის, წერეთ და იკითხეთო...

ბუზი ბუზობისას უნდა მოკლა, თორემ... თუ მას სპილოდ გადაქცევა აცალე, მერე თვითონვე დაგტორავს.

დაკვირვებული მკითხველი, ვფიქრობ, მიმიხვდება, რისი თქმაც მინდა ამ ორიოდე სტრიქონით:

რა დროს „მზიურია“,

როცა მზე იწურება

ს ა ქ ა რ თ ვ ე ლ ო ს ი !

რევენს ღმერთი გასაქირში მოაგონდებაო.

ანდაზა

ამ რამდენიმე წლის წინათ მარჯანიშვილის თეატრი ერევანს ეწვია: დიდი პატივისცემით მიიღეს (სტუმართმოყვარეობის ყადრი სომხებმა ჩვენგან გადაიღეს, მაგრამ ახლა, ისე, როგორც ყველაფერში, ამაშიც გაგვისწრეს; საერთოდ, ჩვენში ადრე დამკვიდრებული წარმოდგენა კარაპეტა-ძუნწისა არ არის სწორი და მართებული. სომეხი იმდენად ძუნწი როდია, რამდენადაც მომპირნეა და ყაირათიანი, რაიც ისევ მათ გონიერებაზე მიგვანიშნებს).

სპექტაკლი, ისე, როგორც თბილისში, საღამოს 8 საათზე უნდა დაწყებულიყო... და აი, დადგა ჟამი ფარდის ახლისა, მაგრამ მასპინძლები სთხოვენ სტუმრებს, ცოტა შეიცადონ...

იცილიან...

წუთის მანიშნებელი ისარი რვას, აი, ათი წუთითაც გადასცილდა, თხუთმეტითაც, მაგრამ... სპექტაკლს მაინც არ აწყებინებენ, რასაკვირველია, ერთობ მორიდებული თხოვნით...

პირველი საგასტროლო სპექტაკლის მონაწილე მსახიობები ნერვიულობენ, ფარდაში დატანებული სათვალთვალოდან დარბაზში იკვრიტებიან: უცნაურია, უმალლესი პარტიული ელიტა ცენტრალური კომიტეტის პირველი მდივნის დემირკიანის მეთაურობით უკვე თეატრშია, მაშ, აბა, რა არის მიზეზი, ასე რომ აგვიანებინებენ?

ეს მხოლოდ ცხრის ოც წუთზე გაირკვა, როცა ერთ-ერთ მეტად პატივსაცემ ლოქაში ამალითურთ ყოველთა სომეხთა კათალიკოსმა ვაზგენ პირველმა შემოდგა ფეხი ჩაბრილიანტებული კვერთხითა და ძვირფასი ქვებით მოოქვილი საეკლესიო ორდენებით მკერდდამშვენებულმა...

აბა!

ამდენ ხანს თურმე დიდი და პატარა, ქალი და კაცი, პარტი-

ული და უპარტიო თავიანთი სულიერი მამის მობრძანებას ელოდებოდნენ!

აი, ასეთ პატივს მიაგებენ სომხეთში თავიანთ არა მარტო ყველაზე დიდ მღვდელმთავარს, — მის რიგით მსახურსაც კი, ჩვენ კი სრულიად საქართველოს კათალიკოსს...

ჰოდა, რით ჩამორჩება ჩვენი უწმინდესი და უნეტარესი სომხეთის უწმინდესი? ღვთაებრივი გარეგნობით, თავის ერისა და თავის სამშობლოს სიყვარულით, განათლებით და გონებით, თუ... წაიკითხეთ ილია მეორის ეპისტოლეები და, როგორც იტყვიან, მერე ვილაპარაკოთ.

ჯერ იმდენი გვირტყევს თავში და მერე იმდენი გვიჩიჩინებს, რომ ჩვენ, ჩვენდა საუბედუროდ, მდიდარი რელიგიური კულტურა თითქმის სულ პირწმინდად დავკარგეთ...

ეს რომ ასე არა, მაშინ ოდესღაც წმიდა ნინოს წილხვედრ საქართველოში, პრესაში ამას წინათ წმიდა ნინოდ ისეთ ნინოს არ შეასახელებდნენ, რომელმაც, თუ ხმებს დაეჭერება, „კომცომოლობისას“ ქრისტიანობის მქადაგებელ ნინოს ვაზის ჯვარის იმიტაცია ოთხად გადატეხა, და რომელიც, თუ ხმებს ესეც დაეჭერება, პაპიროსსაც აბოლებს, ვაზის ნაწურსაც გე-ახლებათ და დროდადრო, თუ გაგულისდა, „ნაკურთხი“ სიტყვების ლექსიკონშიც იხედება თურმე...

შარშან დეკემბერში ამაზრზენი ამბავი მოხდა: ერთ კვირა დღეს შიო მღვიმის მონასტერში საწირაოდ არქიმანდრიტი მამა იოაკიმე ჩავიდა, — ერობაში ცხრა შვილის მამა, კაცი ფრიად პატიოსანი...

ჯერ ადგილობრივმა და მერე მცხეთიდან მოხმობილმა მამაშველმა ძალებმა მამა იოაკიმეს წირვის საშუალება არათუ მისცეს, — როცა ეს უკვე ხანში შესული ღვთისმსახური მუცლისკაცებს ვაუკაცურად გაუძალიანდა, ეკლესიის კარი გარედან გამოუყეტეს და მთელი ღამე, ყინვაში მშვიერ-მწყურვალი, სხვა ბუნებრივ საჭიროებაზე რომ აღარაფერი ვთქვათ, აყურყუტეს, თითქოსდა შიო მღვიმის მონასტერი მათი საკუთარი ბოსელი თუ გომური ყოფილიყო.

ვინ იცის, ეს მცხეთური ლინჩის პარპაში რამდენ ხანს გასტანდა, რომ მეორე დღეს ტყვე იქ შემთხვევით მოხვედრილ ერთ ღვთისნიერ რუს სამხედრო პირს არ გამოეხსნა, რო-

მელმაც მხოლოდ ამის მერე შეიტყო ძველი ამბავი ოსმალების მიერ თევდორე მღვდლის ველური წამებისა, რაიც ბევრად არც აღემატება მცხეთელ „მამუკელაშვილების“ მიერ მამა იოაკიმეს დღევანდელ „ცივილიზებულ“ წამებას, რომელთაც სვეტიცხოველით და ჭვარით თავი ისე მოაქვთ, თითქოსდა ეს უნიკალური ტაძრები მათ აეშენებინოთ ანდა მათებრ მსგავს მათ წინაპრებს.

მაგრამ ამათ, აბა, რწმენის რა სიწმინდე უნდა მოსთხოვო, თუკი პოეტი კაცი, უკვე ხანში შესული ასაკითაც და პოეტური სტაჟითაც, ჩვენს დროში, ჩვენს დღეებში, ჯერ თუნდაც თავისთვის ანდა მეგობრების ვიწრო წრისათვის დაწერს და შემდეგ კი მოურიდებლად გამოაქვეყნებს პირდაპირ ქუჩური სიტყვებით აქრელებულ სიბინძურეს იესო ქრისტეზე (იხილე „პოეზია“, 1981 წ.)...

ასეთი რამ იმ წლებშიც კი არ იწერებოდა, როცა დავით და კონსტანტინეს ძვლები ლამის ძაღლებს გადაუყარეს, როცა ქუთაისის მახლობლად, საღორიის ტყეში, იმ დროს ყმაწვილის, ახლა კი უკვე მოხუცის, ცნობილი მომღერლის მამა — მღვდელი სიმონ მჭედლიძე დახვრიტეს, როცა კათალიკოს ამბროსის („სული ჩემი ღმერთს, მძორი ჩემი კი თქვენ, ჯალათებო...“) განაჩენის გამოტანიდან მეცხრე დღეს სული აღმოხდა, როცა ცხინვალში ერთი დღიდან სულგრძელი, ფანატიკურად მორწმუნე მღვდელი, გვარად ცქიტიშვილი, ანაფორის გახდა: არ დანებდა და ერთმა „კომცომოლამ“ საკუთარი ხელით მოუსპო სიცოცხლე მას, ვინაც სიცოცხლე თავად მას აჩუქა, და იგი, მამის მკვლელობისათვის, „უფროს კომუნისტ ამხანაგებს“ ფორმალურადაც კი არ დაუსჯიათ.

ოციან წლებში ამერიკის ერთ-ერთ პატარა ქალაქში მოსახლეობის დიდზე დიდმა ნაწილმა უკიდურესად შეურაცხყოფილად იგრძნო თავი, როცა შეიტყო, ერთ სკოლაში ბიოლოგიის მასწავლებელს მოწაფეებისათვის აეხსნა, ადამიანი მაიმუნისგან წარმოიშვაო...

...როგორ თუ ჩვენ — ადამიანი! — ბუნების გვირგვინი, სასწაული გონიერებისა, მთესველი სიკეთისა, გუშავი სიწმინდისა, ბანჯგვლიანი და უწმინდური მაიმუნისგან წარმოვიშვითო...

ო, ნუ აჩქარდები, ძვირფასო მკითხველო, და ნუ გაამტყუ-

ნებ იმ ქალაქელთ, და ნურც უვიც, უმეცარ, ბრიყვ ბრბოდ-
ჩათვლი, — ისინი მორწმუნენი იყვნენ.

ახლა კი ყველა ჩვენგანს შეუძლია ჩაატაროს სულ მცირე, ყველასათვის იოლი, ხელმისაწვდომი ექსპერიმენტი: ჰკითხეთ ვისაც გნებავთ, — მამას, დედას, ბიძაშვილ-მამიდაშვილს, გნებავთ შემთხვევით გამვლელ-გამომვლელს, მგზავრს ტრამვაი-ავტობუსში, თუნდაც საჯაროდ კრებაზე, ტრიბუნიდან, — ამხანაგებო, მაიმუნი-რა არის, თურმე ჩვენ, საბჭოთა ადამიანები, აფთრისა და ღორის ნაჭვარისგან ცყოფილვართ წარმოშობილიო, — აბა ერთს მაინც ვინმეს თუ ეწყინოს, აბა ერთი ვინმე მაინც თუ აღშფოთდება და შეურაცხყოფილად იგრძნობს თავს?

ო, ასეთს მართლაც ვერსად მონახავთ იმიტომ, რომ... ყველა ჩვენ ურწმუნონი ვართ, და შეიძლება ეს არის მთავარი მიზეზიც იმისა, რომ ამ კეთილშობილ ცხოველებს ბევრ რამეში უკვე დავენათესავეთ და სულ მოკლე ხანში შეიძლება სულ ახლობელი ნათესავი — ბიძაშვილიც გავხდეთ მათი...

წინათ ხატს მალლა, კუთხეში ჰკიდებდნენ, ეს იყო კუთხე მაცხოვრისა... გავსაბჭოვდით თუ არა, ეს რწმენის კუთხე ცეცხლითა და მახვილით მოვშალეთ და იგი წითელი, ლენინის კუთხით შევცვალეთ და, — ნუ შეშინდები, მკითხველო, მე თუ დავწერ და შენ წაიკითხავ, — ამის მერე ლამის საუკუნე გავიდეს, მაგრამ მაცხოვრის კუთხე... ლენინის კუთხემ ვერა დავერ... მმ...

არა, კი, ამ კუთხემ ხალხში ქრისტეს რწმენა კი ამოშანთა, მაგრამ ამ ამოშანთვამ არათუ ვერ ამოწვა, — კიდევ უფრო გააძლიერა ის, რაიც ყველაზე ადრე უნდა ამოებუვა — კომუნისმის შეუნიღბავი, პირდაპირი მტრები: ჰიპერტროფიული კერძო საკუთრების მომძლავრებელი სული, ფულისა და ქონების დაგროვების გაუმადლარი მალა, კარიერიზმი და ეგოიზმი („გძულდეს მოყვასი შენი და გიყვარდეს თავი შენი!“), საყოველთაო მეშინანობა და ისეთი დანაშაულობანიც კი, რომლებზეც ძველი ქვეყნის სისხლის სამართლის კოდექსს შორეული წარმოდგენაც არ ჰქონდა; მაგალითად, ერთ დიდ ქალაქში ზოგიერთ ადამიანზე ბევრად უფრო ჰქვიანი და კეთილშობილ-სენბერნარის ჯიშის ძაღლი, — აი ის, მთაში თოვლის ზევაებში

ჩაფლულ და მიკარგულ ადამიანს რომ მიაკვლევს და თავდა-
ღებით გამოიყვანს სამშვიდობოზე! — ახალგაზრდა კომუნისტ-
მა ახალგაზრდებმა ცოცხლად გაატყავეს, რათა მისგან ქუ-
ლები შეეკერათ...

...და ისინი დაუსჯელნი რჩებოდნენ, რამეთუ არც სოლო-
ნის, არც ძველი რომის, არც პეტრე დიდის, არც ვახტანგ მე-
ექვსის, არც ნაპოლეონის და არც რომელიმე ჩვენი რესპუბლი-
კის კოდექსებს ამგვარი დანაშაული, მისი წარმოუდგენლობის
გამო, გათვალისწინებული არა აქვთ...

და როცა აღშფოთებული მოწინავე საზოგადოებისათვის
უკვე აღარ შეეძლო ანგარიში არ გაეწია, საბჭოთა მართლმსა-
ჯულებამ ამ საბჭოთა მოქალაქეთ ხულიგნობის მუხლი მიუ-
ყენა...

ოტა უცნაური კია, სად ხულიგნობა და სად წინასწარ გან-
ზრახული მკვლელობა მეფე-ძაღლისა, მისი ტყავით ურწმუნო
კომუნისტური თავების შემოსევა-შებურვის მიზნით! (თუმცა
ესეც არის, სხვა გამოსავალი, აბა, რა ეპოვათ: ძაღლის მკვლე-
ლობას კაცის მკვლელობასთან ხომ არ გააიგივებდნენ?!).

ჩემს ყმაწვილობაში, როცა რელიგიასთან საბრძოლველად
ყველა ხერხი, ყოველგვარი ფანდი და ილეთი ნებადართული
იყო, აი ისე, როგორც ესაა დაშვებული ამერიკულ თავ-
ცხვირ-პირ სამტკრევ მსგავსს ჭიდაობა-კეტრში, როცა ამ ბრძო-
ლის ერთადერთი დევიზი გახლდათ — მოსპე-გაანადგურე, -და-
წვი-აღგავე! — მთავარი იერიში, რელიგიის გასაბახებლად,
პერსონალურად მღვდლებზე მიიტანეს.

...კი, იყვნენ ისეთი მღვდლებიც, ნუნუა რომ უყვარდათ, და
ამის გამო ცხვირიც ჰქონდათ გაბუშტულ-გაწითლებული და
საქელეზო სუფრიდან დროულად რომ არ წამოდგებოდნენ; შე-
იძლება მათ წირვაც შეეკვეცათ, თუმცა ფეხბურთის მატჩზე
არ აგვიანდებოდათ ზოგიერთი ახლანდელი ქირურგივით, ამის
მომიზეზებით ზოგჯერ მაკრატელს რომ უტოვებს ნაოპერაცი-
ევს მუცელში; შეიძლება ჯვრისწერის წინ მექორწილებთან
გასამრჯელოზე ვაჭრობაც კი დაეწყოთ; შეიძლება ზოგიერთ
მათგანს მოფარებულად დიაკვნისათვის მუჭლუგუნიც კი ეთა-
ვაზებინა, როცა ძეობით გახარებულთ, ნათლობისას, არა მის,

არამედ თავის ხურჯინს ავსებინებდა რჩეულ-რჩეული ხორა-
გით — ხაჭაპურებით, სათბილოთი, ბეჭით და სუკით...

კი, ბატონო, არათუ იმდროინდელ მღვდელთა ლეგიონში, ახლაც კი, როცა ეს ლეგიონი რაღაც ასეულამდე დაცოტავ-
და, — უღირსნი, საუბედუროდ, ამ ასეულშიც, ალბათ, გამო-
ერევნიან, მაგრამ რა დანაშაული მიუძღვის ამაში რელიგიას,
როგორც რწმენის სიმბოლოს?

განა ცოტანი იყვნენ ქრისტიანობის ამ ოცი საუკუნის მან-
ძილზე ისეთნი ღვთისმსახურნი, რომლებიც უდრტვინველად
სიცოცხლეს სწირავდნენ თავის რწმენას, თავის ხალხს, თავის
ქვეყანას?!

მოდით, ბატონებო, და ესეც ვიკითხოთ: თუკი უღირს
მღვდელს შეუძლია სახელი გაუტეხოს რელიგიას და შეურყი-
ოს მორწმუნეს რწმენა, მაშინ რაიკომის მდივანს, წესდებით
თავის რაიონში კომუნიზმის პირველ მგზნებარე კომუნისტ-
მშენებელს, ყველაფერი საუკეთესო კომუნისტურის მაგალი-
თის მიმცემს, თუკი იგი იმ გლახა, ანტიქრისტე მღვდელივით
ცრუმარქსისტია, თავის ეჩო ვაიხელმძღვანელია, მოკლედ,
გლახა რაიკომის მდივანია, და ამას რაიონის „მრევლი“ თვალ-
ნათლივ ხედავს, შეუძლია თუ არა ხელი აგვადებინოს კომუ-
ნისტურ მრწამსზე და სახელი გაუტეხოს კომუნიზმს, რომლის
გამოცხადებას, დასტურ, რა ხანია ველოდებით, ველოდებით
და ასე უსაშველოდ იგვიანებს დალოცვილი, იგვიანებს, იგვიან-
ებს?..

ო, რასაკვირველია. შეუძლია, მაგრამ ეს თითქოს იმას რო-
დი ნიშნავს, რომ ამ ზნეწამხდარი, ცრუკომუნისტი რაიკომის
მდივნის შემხედვარეებმა აღარ ვიწამოთ კომუნიზმი, საზოგა-
დოებრივ ფორმაციათა შორის, ცხადია, მხოლოდ თეორიულ-
ად, როგორც ყველაზე უკეთესი ფორმა საცხოვრებლად და
სასიცოცხლოდ...

ზუსტად ათი წლის წინათ საქართველოში დახსნეს და და-
ანიავეს ყველა რაიკომის ყველა მდივანი, უფრო მეტიც, მათ
ცენტრალური კომიტეტის მდივნებიც მიაყოლეს...

რატომ? კომუნიზმის წუნკალი „მღვდლები“ იყვნენ და იმი-
ტომ! ერთ მათგანს, მაგალითად, ხალხმა „აბაზა“ შეარქვა:
ქრთამად აბაზის — ოცკაპიკიანის — აღებასაც არ თაკილობს

(სხვათა შორის, ამ „აბაზამ“ ახალი შენობით თავისი მმართველობა რომ გაეგრანდიოზებინა, ის უმშვენიერესი ცაცხვი მოაპკრევენა, რომლის ჩრდილის ქვეშ რაჭაში მოგზაურობისას აკაკიმ შეისვენა).

...ერთი დაბაბ-ლიბიანი. რაიკომის მდივანი შემოდგომაზე ერთ საწყალ, ჩვენი დროის გოგია უიშვილს ფარდალალა ფიცრულ ქონხმასში შეუფარდა და კედლიდან „ბლარისთვის“ განკუთვნილი აკიდო ჩამოუგლიჯა, შენ ეს ყურძნის დამზადების გეგმისთვის დაგიკლიაო, მეორემ — ასეთივე აფხორილ-გადიდ-გინებულმა — ასეთსავე უიშვილს, ოღონდ არა გოგიას, — მაგდანას, გადანახული ერთი დოჭი ტკბილი წაართვა, და როცა „დამნაშავემ...“ ბოვშებისათვის ფელამუში მინდოდა გამეკეთებინაო, — ბოვშებს ფელამუში კი არა, კამფეტი აჭამეო...

ჰოდა, რა გვექნა მაშინ, ამგვარების შემხედვარენი როგორ მოვქცეულიყავით? ჩაგვეკლა ჩვენში რწმენა კომუნისტური იდეალებისა, რწმენა კომუნისმისა?!

ასეა რელიგიაც!

ამიტომაც არა აქვს ფასი და ძალა ჩვენს აგიტაციას, — ქრისტეს ნუ იწამებ და ჰანუყვაძე იწამეო!..

(გვარი ესე კრებითია და იგი ავირჩიე, როგორც არცთუ მაინცდამაინც მთლად კეთილხმოვანი).

ქართულ ანბანს, როგორც ვიცით, მთავრული ასოები არ გააჩნია, ამიტომაც არსებითი და არაარსებითიც ერთნაირად იწერება, რუსულში კი...

ერთხანობას, თანაც დიდხანს, დიდხანს „ქრისტე“, როგორც არასულიერი, პატარა ასოთი იბეჭდებოდა, აი ისე, როგორც მაგალითად, *веник, тряпка, горшок...* თუმცა აქ არის, სწორედ, არსებითი განსხვავება: ცოცხი, ჩვარი, „გარშოკი“ აღამიანისთვის საჭირო და სარგებლობის მომტანი ნივთებია, *христос* კი... აბსოლუტურად არაფერიაო, *ничто!* არ იყო ასეთი კაციო, გამოგონილი მითიაო...

ამჟამად ქრისტე რუსულად უკვე დიდი ასოთი იბეჭდება ცენტრალურ პარტიულ პრესაშიც კი, მაგრამ ეს კიდევ იმას არ ნიშნავს, რომ იგი საყოველთაოდ შეიწყალეს და აღიარეს. ფაქტად მისი, როგორც ისტორიული პიროვნების, არსებობა.

კი, მაგრამ... კაცობრიობის ისტორიისათვის ოცი საუკუნე

ვითომ რა ისეთი ხანგრძლივი პერიოდია, რომ მისი დასაწყისის პირველი რაღაც სამი ათეული წელიწადის ამბები ისე კუპროვით ბნელით იყოს მოცული, რომ მას დღევანდელი ადამიანის თვალი და გონება ვერ მისწვდეს?

ღიახ, რა არის ოცი საუკუნე ისტორიისათვის? სულ მალე, ხუთიოდე წლის შემდეგ, ქართველი ხალხის ცოცხალ სათაყვანებელ, მკლავმოუღლელ და გონებაგაუცვეთელ აკაკი შანიძეს ასი წელი შეუსრულდება...

ჰოდა, ამ ოციდან თითოეულ საუკუნეს თუ პატივს დავდებთ და თანმიმდევრობით თითო-თითო აკაკის ჩამოვურიგებთ, რატომ არ შეეძლო, ოცი აკაკის წინათ, დღეს ჩვენში მითად გამოცხადებულ ქრისტესაც ეცხოვრა? რატომ არ შეეძლო იმეამინდელ ისტორიას მომავლისათვის შემოენახა ქრისტეს სახელი და მისი ცხოვრების მთავარი ფაქტები? აკი ისტორიამ ხომ შემოგვინახა იმდროინდელ სამყაროში მცხოვრებ, უშუალოდ ქრისტეს თანამედროვეთა და თითქმის მის თანამედროვეთა... აი, თუნდაც ციცერონის არა მარტო როგორც ცოცხალი პიროვნების ამბები, არამედ მის მიერ სენატში წარმოთქმული სიტყვებიც კი...

ძველი რომი თავისი კულტურით, კერძოდ დამწერლობითი კულტურით ვითომ ისე დიდად უსწრებდა წინ იმ ქვეყანას და იმ ხალხს, რომელმაც შექმნა ბიბლია?!

...ჰოდა, დაე, ამ შემთხვევაში იყოს ნება თქვენი, კერძოდ, ქართველო ათეისტ-პუბლიცისტებო (სხვათა შორის, ერთ ამათგანს ისე ხატოვნად ემორჩილება და ემარჯვება კალამი, მისი ნაწერის კითხვისას გული გწყდება, თავის, ალბათ, არა ცალ-ქსრივ ნიჭს „ვთათხავ ქრისტეს, ვკვამ ამით პურს“-ზე რომ ახურდავებს), — კარგი, ბატონებო, ქრისტე არ იყო, ქრისტე პითია, რომელიც უმეცრებმა შეთხზეს და მათზე კიდევ უფრო უმეცარ და ბნელ ხალხს თავზე მოახვიეს...

კი, მაგრამ... ეგებ ესეც გვითხრათ, კვლავ ბატონებო, მერედა, ამით რა დაუშავდა ადამიანებს და ადამიანობას?! ეგებ კომუნისტების მწვერვალებიდან ჩვენს გიგანტურ სვლას ეს ანელებდა და ანელებს, ა?!

კი, მაგრამ... ასტრონომიული ციფრითაც რომ ვიანგარიშოთ, ჩვენს თვალუწვდენ ქვეყანაში ეკლესიაში მოსიარულენი

მილიონზე მეტი ხომ არ იქნება და... დანარჩენი 169 მილიონი კი ნუთუ ფარულ ლოცვასა და პირაჭერის წერაშია, ნაცვლად იმისა, რომ მთელ თავის დროს, რაშიც ხელფასს იღებს, შრომის ნაყოფიერების ზრდის საქმეს ახმარდეს?

„არა კაც ჰქლა,“ „არა იპარო...“ და სხვა ცნობილზე ცნობილი მცნებანი დღეისათვის, ჩვენი თანამედროვეებისათვის ეგებ მართლაც მოძველდა, ა? ან, უფრო უკეთ, მოვაძველ-და-ვაძველეთ ჩვენ მიერ ყველაფერში ახლის ძიებით და ყველაფერი ძველის საპირისპიროდ ყირაზე დაყენებით?

ქრისტეს ნუ იწამებ, ჰანუყვაძე იწამეო, და ბევრიც, ძალიან ბევრიც სიგლახის მთესველისაგან უფრო მკვირცხლად იღებს მაგალითს, ვიდრე... შეიძლება სწორედ ამიტომაც აგერ ახლა ერთმა, სამეგრელოში, რაკი მავნე ოპიუმად მიიჩნია სახარები-სეული — გიყვარდეს მოყვასი შენი, ვითარცა თავი შენი, — ხელებაუკანკალებლად და მუხლებმოუკვეთლად, წარბშეუხრე-ლად და გულმოდგინედ ცოცხლად ჩამარხა ცივ მიწაში თავისი-ვე მეზობელი...

ასე წინა საუკუნეების სელჯუკი, მონღოლი, თურქი ქრისტიანს, რელიგიური ფანატიზმის ნიადაგზე, მოქცეოდეს, — ეს შეიძლება კიდევ გაგვეგონოს, მაგრამ ქრისტიანი ქრისტიანს, როცა საქართველოში ქრისტე ქრისტეობდა, — არავის გაე-გონა...

ვინ იცის, ჩვენი დროის ამ ურწმუნოს ქრისტე-ღმერთი რომ სწამებოდა და ჯოჯოხეთში მოხვედრის შიში მისი ცხოვ-რების მუდმივი თანამგზავრი ყოფილიყო, ამგვარ არაადამიანურ საქციელს არ ჩაიდენდა (მე არ ვამბობ მხეცურს, — მხე-ცი ასეთ „ადამიანობამდე“ არასოდეს დაეცემა)...

...და შეიძლება არც ქ ა ლ ი მოკლავდა ქ ა ლ ს, ვალი რა-ტომ დამიგვიანეო, და არც მეცხრე კლასის მოწაფე გოგო თავისივე ამხანაგს უმნიშვნელო წაკინკლავების გამო, და არც მცირეწლოვანი მოუღებდა ბოლოს მცირეწლოვანს...

ჩვენ, ასე დიდად ჰკვიანებს, ნუ გვგონია, ვინც რელიგია შექმნა, — ბუდა იყო ის, მოსე იყო ის, კონფუცი იყო ის, ქრის-ტე თუ მაჰმადი, რაკი მათ ჰეგელი თუ ფოიერბახი არ წაეკი-თხათ ან კიდევ მარქსი და ლენინი, ანდა ჩვენიანები — თეიმურაზ ფანჯიკიძე თუ დავით გეგეშიძე, ჩვენზე უფრო სულელები

და ჩვენზე ნაკლებ გონებაგამჭრიახნი იყვნენ ადამიანის თანდა-
ყოლილი ხინჯოვანი ბუნების შესაცნობად და არაფერი გაეგე-
ბოდათ, რა უნდა მოემოქმედათ მისი სრულყოფილობისაკენ
წარმართვისათვის...

ჩვენ უკვე რა ხანია თავდაუზოგავად ვებრძვით რელიგიურ
დღესასწაულებს (არ ვებრძვით მხოლოდ მუშად... კურთხე-
ვას!), დროდადრო ვახსლებთ და ვლესავთ და ვლესავთ ამ ჭერ
კიდევ ამოუშანთავ ოპიუმთან საბრძოლო იარაღს, მალულად
ეუსაფრდებით იმ კომკავშირელ ახალგაზრდებს, რომლებიც
ეკლესიაში შესვლას დააპირებენ, — აბა, როგორი კომუნისტუ-
რი რწმენის გამაუკუღმართებელ სულიერ ოპიუმს სჯობს სა-
დაც გინდა, იქ იყო, ოღონდ არა ტაძარში, და, თუ გინდა, ნამ-
ღვილ, ფიზიკურად ხელშესახებ ოპიუმსაც დაეწაფო...

აღდგომის წინა ღამეს ხალხი საერთოდ და, კერძოდ, ახალი
თაობა, რომელმაც პაპებისა და მამების მიერ დაწყებული კო-
მუნისტების შენება უნდა დაამთავროს, ლიტანიობას რომ არ
დაესწროს, ტელევიზია შრომის კანონების დარღვევასაც არ
ერიდება და დილის ოთხ საათამდე ხან „ფანტომასს“ უჩვენებს,
ხან „შვიდი ძმის შვიდ ცოლს“, ხანაც ბრაზილიურ ფეხბურთს,
და ხან კიდევ რას...

...და მაინც, იმ ღამეს ვერც სიონში, ვერც ქაშვეთში არათუ
ცხვირს ვერ შეჰყოფ, — მათ ახლომახლო ქუჩებში საცალფე-
ხო გზასაც ვერ გაიკვლევ.

თუმცა ხელს ასაკიც მიწყობს და, წისქვილის ქვაზე რომ
არის ნათქვამი, ცხოვრების იმდაგვარი გამოცდილებაც, მაგრამ
მაინც მერიდება ვურჩიო ტელევიზიის თავკაცებს — ვაითუ
შევცდე! — ვიფიქროთ-მეთქი, უფრო ეფექტიანი ხომ არ იქნე-
ბოდა, რომ ამ მიზნით, ესე იგი ჩვენი ქვეყნის მომავალი — ჩვე-
ნი უბიწო ახალგაზრდობა რელიგიამ რომ არ წარყვნას და შე-
ბილწოს, და ამიტომ აღდგომა ღამეს მის შინ დასაბმელად, ნაკ-
ლები შედეგიანობის მომცემ უცხოური სათავგადასავლო სუ-
რათების ნაცვლად ხომ არ აჯობებდა მათთვის უცხოურივე
პორნოგრაფიული ფილმები გვეჩვენებინა?

მით უმეტეს, ჩვენს ორივე აკადემიურ თეატრს საამისო გა-
მოცდილება უკვე საკმაოდ დაგროვილი აქვს, თანაც ისინი ამ
ღონისძიებას წელიწადში ერთხელ როდი მიმართავენ, რაზეც,

სხვათა შორის, საკმაოდ ვრცლად მაქვს ნაამბობი „საით მიექანება ქართულ თეატრში“, სიდიდის გამო ამ ხელნაწერს რომ გამოეყო და ახლა ეულად მიდი-მოდის და არავინ არ ბეჭდავს, ჟურნალი „საბჭოთა ხელოვნებაც“ კი (მისმა რედაქტორმა, ნოდარ გურაბანიძემ... „მთელი ზიზლით არის დაწერილი ქართული თეატრის მიმართო“...).

წინააღმდეგ დასავლეთისა, სადაც პორნოგრაფია, პიროვნების სრული თავისუფლების საბაბით, კანონით თითქმის ნებადართულია, ჩვენში კი იგი, საბედნიეროდ, მკაცრად იკრძალება და ამგვარ გონივრულ შეზღუდვას პიროვნების თავისუფლებისა, მე პირადად ამისათვის ტაშის დასაკვრელად, ზოგიერთი სხვა ამბებისათვის, ცალი ხელი, ვითომ მტკივანი, დროდადრო კისერზე რომ მაქვს ხოლმე ჩამოკონწიალებული, ახლა თაბაშირშიც რომ მქონდეს გახვეული, როგორც მართლაც მტკივანი, არც იქიდან დავიზარებდი მის ამოღებას...

ცარიელი გულა ადვილი გასაბერაჟია..
კაციც ასეა: რაც უფრო ცარიელი აქვს
თავი და გული, უფრო მალე იბერება და
თავის თავიც დიდ რაშედ მოაქვს.

აკაკი.

ახლა, თითქმის ერთდროულად, საქართველოს მოედო, ეგრეთ წოდებული ახალი ტრადიციების დამამკვიდრებელი დღეობები და ქართული ფუტკრის ამომხოცი ავადმყოფობა — ვარატოზი.

ფუტკრის სენი ჩვენში გარედან შემოვიდა, დღეობები კი — ჩვენი თავებიდან, ბევრი უკვე გამოვიდა და ბევრიც, ალბათ, აწი გამოვა...

რელიგიური დღეობები წინათ თითებზე ჩამოითვლებოდა — ეს კვირიკობაო, ეს შარიაობაო, ეს პეტრე-პავლობაო, ეს გიორგობაო, ეს ღვთისმშობლობაო...

ახალი, ასე ვთქვათ, სამოქალაქო საბჭოთა დღეობები კი; როგორც ერთმა ოფიციალურმა პირმა გვაცნობა, ჯერ-ჯერობით ასამდეა თურმე (საერთოდ, გვიყვარს ჩვენ სათვალავად ასი: ასი მილიონი, ასი დღეობა, ასი წლის იუბილე (რუსთაველის თეატრისა)!)..

ღმერთო, ნუ შემრისხავ, მაგრამ ზოგიერთ ამ ახალ დღეობას ცოტა არ იყოს სასაცილო ელფერი დაჰკრავს და თავს ისე გაგრძნობინებს, თითქოს საღდაც, ცხრა მთას იქით, მხრებგაშლილ საქართველოში კი არა — მხრებჩამოყრილ ლილიპუტიაში იმყოფებოდე...

აბა მითხარით, გეთაყვათ, განა შესაძლებელია საქართველოში, სადაც ჯერ კიდევ, ჩვენდა საბედნიეროდ, მრავალზე მრავალი სოფელია, ყოველ სოფელს ისეთი საქვეყნოდ გამოჩენილი ადამიანი წარმოეშვას, რომ მისი სახელობის დღეობა დაწესდეს? დარბიან ახლობლები, ნათესავები, ბევრნიც რაიონის თავკაცებიდან პრესტიჟისათვის და... ამიტომაც იმ ასში

ცოტა რბდია „ნიკიფორობა“, „ეფროსინობა“, „ესტატობა“, „აგრაფინობა“...

არა, დაწესება ასეთების კი არა, უფრო უარესად გაუმართლებელისაც შეიძლება, მაგრამ, ეს მიბრძანეთ, მოაქვს და მოიტანს კი ეს რაიმე სარგებლობას? სარგებლობის რა მოგახსენოთ, სხვა მხრივ კი... განსაკუთრებით სექტემბერ-ოქტომბერში იწყება ხოლმე ო რ გ ა ნ ი ზ ე ბ უ ლ ი სამზადისის ციებ-ციხელება... იხარჯება სახსრები, ნიავედება სურსათ-სანოვაგე, ცდება ხალხი — დამხვედურნი და ჩამსვლელნიც, — უამათოდ კი, აბა, ჩეხოვის საქორწილო გენერლისა არ იყოს, დღეობა რა დღეობაა, და რა ფასი ექნება მას!..

და ესენიც, ყოველ შემთხვევაში მათი უმრავლესობა, გულის კარნახის საწინააღმდეგოდ, დროგში შებმული ცხენებივით მიჯაჯვავებენ ერთი რაიონიდან მეორეში, ბარიდან მთაში, მთიდან ბარში... მეტწილად ერთნი და იგივენი, აკი ამდენი ჩამოსარიგებელ-დამამშვენებელი, მართლაც საქვეყნოდ გამოსაჩენი მართლაც სასახელო-საპატივისაცემო ხალხი, — „ღენერლები“, აბა, სად მოგვენახება!

...და ყველგან კაზიონური ერთფეროვნება, დღეობა-ღონისძიება, რომლის დაწყებას არავინ გულაჩქროლებით არ ხვდება და არც მის დამთავრებას გულისტკივილით არ განიცდის...

არა, შატილობა, თუშეთობა, მესხეთობა, ტანძიობა, შუამთობა და სხვა ამ ყალიბისანი, ნაჭიროც არის და აუცილებელიც, რათა ამ კუთხეებმა უშუალოდ იგრძნონ ჩვენი ყურადღება და სიყვარული, წელიწადში ერთხელ მაინც მოესმათ ჩვენი გადაძახილი, რათა არ იფიქრონ, რომ ისინი ობლად არიან მიტოვებული...

თუკი ყველაფრისადმი წუნკალ უმადურობას არ გამოვიჩინოთ, რაიც, საერთოდ, თითქოს უცხო არ უნდა იყოს ღორისა და აფთრის ნაჭვარისთვის, ამ მხრივ ჩვენი რესპუბლიკის მეტაურს კაცი ვერ დაემდურება, მაგრამ მას სხვებმაც უნდა მიზბაძონ, ცხადია, თავში ჩაუკაკუნებლად...

ღიახ, ბოლო შატილობაზე დამსწრე ერთმა ჩემმა ახლო ნაცნობმა ჩემს შეკითხვაზე, სად გაათიეთ ღამე-მეტქი, მიპასუხა, რაკი დიდრუანები არ ჩემევიდნენ, გაქათქათებული კარგები პატატრუანებს დაგვრჩა რაღაც ორ მანეთადო...

ამ გურული მუშაკაცის ხსენებაზე... სულ აგერ ახლა საქართველოში ისეთი რაიონი ამოიწვერა, რომელმაც ბრმად არ მიბაძა სხვებს და სხვათა და სხვათა კონკრეტული „ეფროსინობის“ ნაცვლად, ასე ვთქვათ, აბსტრაქტული... თუმცა რატომ აბსტრაქტული? პირიქით, — დიდად პატრიოტული, დიდად მამულიშვილური დღეობა დააწესა...

ეს გახლავთ ჩოხატაურის რაიონი, რომლის დღეობის სახელწოდება კი... მმ... ღმერთო, გამახსენე... მმ... ო-ო, გამახსენდა, გამახსენდა! — ერისკაცობა, ერისკაცობა!..

გესმით? ხომ ამაყად და საამოდ ეღერს, ა? ერისკაცობა!

ამას წინათ ერთ ქართულ გაზეთში „რეპლიკის“ სახით ამოვიკითხე (ამოვკერი და შევინახე კიდევ; რათა დროთა განმავლობაში ცრუ ფაქტების შეთითხვნა არ დამწამონ)... არა, ამ „რეპლიკას“ საკავშირო დებეშათა სააგენტოს გრიფი თუ დამდა არ ახლავს, და არც სხვა რომელიმე წყაროა მითითებული და არც ავტორის სახელ-გვარი აქვს მიწერილი...

მოკლედ, ასეა თუ ისე, ეს ჩვენი ქართული გაზეთი შეშფოთებას სულაც არ გამოთქვამს ამის გამო, უფრო, თითქოს, ნიშნისმოგებითაც კი გვაუწყებს, უკანასკნელი წლებშიო საბჭოთა კავშირის მიმართ მტრულად განწყობილ ისრაელის სახელმწიფოში („მტრული“ არ წერია — იგულისხმება!) შობადობა დაცა 30 პროცენტიდან 22-მდეო...

ო, ღმერთო დიდებულო, ეს რა გაგვაგებინეს?! 30 პროცენტი, როგორც საქვეყნოდ ცნობილია, ეს უკვე დემოგრაფიული აფეთქებაა, 22 პროცენტი კი ამ აფეთქების მომდევნო ფაზაა და საშიში და საგანგაშო აქ არაფერია, თუნდაც მან უფრო შესამჩნევად დაიწიოს; საშიში და ტრაგიკული 10—12 პროცენტია, რაიც, განსაკუთრებით, პატარა ერისათვის სულ მოკლე ხანშიც კი მისი ფიზიკური სიცოცხლის გამჭრობია, და ასეთი გამჭრობი, და ამაზე უფრო მალე გამაქრობელი პროცენტიც კი... დღევანდელი ჩოხატაურის რაიონის შემამკობელია, და ასეთი რაიონი, რომელიც საქართველოში ერთ-ერთი პირველთაგანი ირტყამს დანას პირდაპირ გულში, — უზრუნველად იხდის და აპირებს ყოველ წელიწადს იზეიმოს... ერისკაცობა!

კი, მაგრამ, იცის თუ არა მან, ზრდის 9—10 პროცენტით-
კიდევე რამდენჯერ იერისკაცებს?!

კიდევე რამდენჯერ იცეკვებს ხორუმს და კიდევე რამდენჯერ
ჩაუქრიმანჭულებს?!

შარშან მაისში ფილარმონიის დიდ დარბაზში ჩოხატაურიძე
მომიჯნავე რაიონის ხალხური შემოქმედების საღამო შედგა,
გურულები ჩამოვედით, გურულებიო...

მათს გამოსვლებს — დიდის თუ პატარასი, ქალის თუ კა-
ცის, გლეხის თუ მოსამსახურისას — გაფაციცებით ვუყურებდი
და თვალცრემლიანი გულს ვეხეთქებოდი, ნუთუ ასეთი, ათასე-
ბისაგან გამორჩეული ხალხი უნდა აღიგავოს გურიის საედემო
მიწისაგან და ის მიწა თავისივე ნებით, გაუძალიანებლად, ხე-
ლის შეუბრუნებლად უნდა დაუტოვონ შორსმჭვრეტელ სომ-
ხებს, რომლებიც გურიაში ახლაც უკვე ისე მომრავლდნენ,
რომ დაუარსეს მათ პირდაპირი საავტობუსო მიმოსვლა მახა-
რაძე-ბოგდანოვკა, და მალე, ალბათ, „ამირსპასალარ“ ვერმი-
შიანის ენაზე სკოლის გახსნასაც მოგვთხოვენ...

რაკი „ხალხთა ძმობის“ უღელში ხარ გაბმული, ბიჭი ხარ
და უარს ეტყვი!

არა მარტო გურია, — სრულიად საქართველოც ჩვენი გულ-
არხეინობით მალე, სულ მალე შეიძლება ინტერნაციონალიზ-
მის საცდელ პოლიგონადაც კი გამოცხადდეს!

იმის იმედით, გონიერო მკითხველო, რომ სულ ცოტა ხნის
მერე ნებას დამრთავ, კვლავ გურიასა და გურულებს დავუბ-
რუნდე, აქ შევწყვეტ მათზე თხრობას, მანამ კი...

რა გემღერება, გურიავე,
როცა ბედი წყდება

ს ა ქ ა რ თ ვ ე ლ ო ს ი !

როცა აწმყოში არაფერი აქვთ საბაყო,
გუშინდელი დღით ტრაბახობენ.

ციკრონი

გურულებმა მე-19 საუკუნის პირველ ნახევარში ნიკოლოზ პირველის 25 წლიანი სამხედრო ბეგარამოხდილი, მათს მიწა-წყალზე ჩასახლებული ხოხლოვები, რეშეტნიკოვები, გოგოლები, ზოგიც სხვა ისე ჩაყლაპეს და ისე გააგურულეს...

ეს კი მხოლოდ იმათ შეუძლიათ, ვინც დიდად სჭარბობს უცხო უმცირესობაზე, მაგრამ, როცა თვითონ შენ აღმოჩნდები ამ უმცირესობაში, მოსულ-მთორეულთათვის თავად შენ ბრძანდები უცხოც და ვილაც „აბდალაიც...“ შენი ნაპერწყალიუმორიანი საღამოები აღარ გაიმართება ფილარმონიის მცირე დარბაზშიც კი და აღარც იმის ძიებას დაიწყებენ, რა ნათესაობა გაკავშირებდა ბასკებთან...

დიახ!

და განა ეს მარტო პატარა და კოხტა გურიას ეთქმის, და არა, საერთოდ, მთელ საქართველოს, ასევე კოხტას და, სამწუხაროდ, ასევე პატარას, და ასჯერ და ათასჯერ ამაზე უფრო სამწუხაროდ, კიდევ უფრო დაპატარავების უნებლიე მოსურნეს, რომელიც არ უნდა მოკვდეს თუნდაც იმიტომ, რომ მისმა ნიჭიერმა ხალხმა, რომ არ იცოდა, რას ქმნიდა, და მაინც, ეროვნული ინსტიქტით შექმნა ის, რაც ახლაც, მთვარეზე აღამიანის ფეხის დადგმის შემდეგაც კი, გაცეცებას იწვევს...

გთხოვთ ყური დაუგდოთ:

«Глубокими корнями уходит самобытная музыка Грузии в далекое прошлое. Как и почему именно здесь возникло многоголосие, почему грузинская музыка так непохожа на музыку соседних с ней народов — это до сих пор представляется удивительной загадкой».

(Газ. «Советская культура», № 34, 1982)

პარიზში, ძველი ქართული ხელოვნების გამოფენასთან დაკავშირებით, ერთი ჩვენი მინისტრი, რომელმაც სახელი, სხვათა შორის, ქართული ფოლკლორული სიმღერებითაც გაითქვა, ასე გადმოგვცემს შთაბეჭდილებას იქაური, ჩვენებურად თუ ვიტყვი, ხელოვნებათმცოდნეებისას, რომლებიც, მართალია, ასეთი შეუმცდარობის, პრეტენზიულ სახელს არ იწებებენ, მაგრამ დიდი ცოდნით, ფართო განათლებით, ხელოვნების აღქმის უტყუარი ალლოთი, არა მგონია, ბევრით ჩამოუვარდებოდნენ ამ დარგის ქართველ მცოდნეებს.

კიდევ ერთხელ დავუგლოთ ყური:

«Я беседовал с инспектором Лувра мадам Д. Габори, которая детально ознакомилась со всеми экспонатами. Она восхищена ими и разделяет мнение о том, что эта выставка — одна из интереснейших, которые были во Франции».

(საფრანგეთში კი უცხო ქვეყნის რაც უნდა იყოს, თუ იგი დიდად საინტერესო არ არის, ხალხთა ძმობის საფანელით არც არავინ გამოაფენს! ჩვენი კი, ამ დიდად საინტერესოთა შორისაც, გამორჩეულად ჩანს თურმე).

კიდევ ერთხელ მათხოვეთ ყური, ყური:

«А главный эксперт Лувра мадам О. Лансдорф сказала, что выставка древнего и средневекового искусства Грузии открыла ей новый мир. Сейчас она собирается посетить Грузию, чтобы еще ближе познакомиться с ее историей и культурой».

(Газета «Заря Востока», № 101, 1982 г.)

ვინც ამ წიგნს კითხულობს და, ჩვენდა სატირლად, იმდენი რუსულიც კი არ იცის, რომ ამ ციტატებს ასავალ-დასავალი გაუგოს (დასავლეთში ოფიციანტები და ნოქრებიც კი პირველხარისხოვან რესტორნებსა და დიდ მაღაზიებში ორსა და სამ უცხო ენაზე თავისუფლად მეტყველებენ, ჩვენთან კი ბევრი პროფესორიც მარტო რუსულსაც ძლივს ღერღავს), მათ მისახვედრად გადმოვაქართულებ მთავარს: მსოფლიოს უდიდესი მუზეუმის ლუვრის მთავარი ექსპერტი ქალბატონი ლანს-

დორფი იმდენად გაცეცებულია ჩვენი ხელოვნებით, რომ საქართველოში ჩამოსვლას აპირებს, რათა უფრო ახლოს გაეცნოს ჩვენი ქვეყნის ისტორიას და კულტურას...

ჰოდა, რა კარგი, რა დიდებული იქნება, პირდაპირ ბედი გვეწევა, თუკი მაღამ ლანსდორფის სტუმრობა ჩვენს იღბლად, თბილის-ქალაქობას დაემთხვევა...

თბილისობა ხომ ყველა ჩვენი დღეობის ფლაგმანია, მათი გვირგვინია, რომლის დასაწნავად საქართველოს ყოველი რაიონი, სულ ცოტა, ერთ თვეს მაინც ემზადება, თანაც შემოდგომისას, როცა მუშახელი მოსავლის ასაღებადაც კი ასე ქირს, — ემზადება ზოგი ურმით, ზოგი ფაცხა-ნალით, ზოგი — ჩურჩხელა-ტკბილისკვერით, საცივით და ღომით (ერთი ჭამს — ათასი უყურებს)!

თვითონ თბილისში კი თბილისობისთვის, აბა, ვიღა აღარ იღვწის: რეჟისორები და არტისტები, პოეტები და ჯამბაზები, მაჰანკალი ხანუმა და მეეზოვე სარე, ვირებიც კი...

(შარშან ერთი ქოჩორა ვირი, რომლის ჯერ კიდევ პრესტიჟ-აღუდგენელი ქართული ჩაის ფერის დიდრონ თვალეში მსოფლიო სევდა სფინქსივით ჩაწოლილიყო, სახელდახელო სასცენო მოედნიდან კუდით ძლივს გაათრია მისმა ჩაუქმა მხედარმა გივი ბერიკაშვილმა, რაიც არა მისი, ეოკეის გაუწაფავობით აიხსნებოდა, არამედ ყურში და გულში ჩამწვდომი ჯადო-მუსიკით, რომელიც ამ დროს ირგვლივ იღვრებოდა...)

ჰოდა, არც ახლა ირწმუნებთ ურწმუნონო? გიორგი ყანჩელის მუსიკამ ვირიც თუ გააბრუა და დაარტყანა, მაშინ რატომღა უნდა გვიკვირდეს, თუკი „კავკასიურ ცარცის წრეს“ ადამიანებს შორისაც ხვდა უჩვეულო წარმატება — ყველგან, ყველგან! ერევანშიც და ევროპაშიც!).

მაღამ ლანსდორფი ჩვენთან, ცხადია, ერთ დღეს ხომ არ დარჩება, თბილისობით მოხიბლული იგი მეორე დღესაც დააპირებს, ალბათ, გავლა-გამოვლას ჩვენს ულამაზეს და უმშვენიერეს, ასე დიდად კულტურულ დედაქალაქში.. უცხოელებს კი, როგორც ეს საერთოდ ცნობილია, ადგილობრივი მსლებლების გარეშე უყვართ ყველაფრის თვალიერება და აუჩქარებელი სიარული...

ო-ო, ეს კი როგორმე თავიდან უნდა ავიცილოთ, უეჭველად უნდა ავიცილოთ, თორემ...

აი, მაგალითად, შარშან, ზაფხულში, პატარა ტანის, გარეგნობის მიხედვით, არცთუ ისე ხნიერი გერმანელი ტურისტი ქალი გამოვიდა სასტუმრო „აქარიდან“ და მშვიდობის გამზირზე ერთი ნაპირიდან მეორეზე გადასვლისას წითელმა შუქმა შუა გზაზე მოუსწრო და... რაც საწყალმა შიში ქამა არასახანძრო, მაგრამ სახანძრო მანქანების სისწრაფით მიმქროლ-მომქროლ მანქანებს შუა ჩახერგილმა, ეს მას ბერლინში ჩასვლამდე, არც დაავიწყდებოდა...

აქ გადასასვლელად თურმე 15 წამი (სეკუნდი!) ყოფილა დაწესებული, და ეს იმათ დაუწესებიათ, ვინც, საერთოდ, ქვეითად არასოდეს არ დადის და ვისაც, როგორც ჩანს, არც ფეხით მოსიარულე პატარა ბავშვიანი ცოლი ჰყავს, არც დედა და მამა ჰყავს ხნიერი და არც ბებია-ბაბუა ჰყავს მოხუცი... იმათ თურმე მერცხლებიდა ჰყოლიათ მოშინაურებული, რომელთათვის ამ მონაკვეთზე გადასაფრენად, მათივე ზუსტი გამოანგარიშებით, 15 კი არა, — 13 წამიც საკმარისია.

...მაგრამ ამით როდი დამთავრდა ამ შიშნაქამი, ერთობ სიმპათიური გერმანელი ქალის გაცნობა ჩვენს დამსახურებულად მიჩნეულ საამაყო სატახტო ქალაქთან: რაკი მშვიდობის გამზირის მეორე მხარეზე, ასე თუ ისე, თავი მშვიდობით გააღწია, — გახარებულმა, თუმცა არაფრის ყიდვას არ აპირებდა, გასტრონომის მაღაზიის ვიტრინებს ცნობისმოყვარე თვალი მაინც შეავლო და, რაკი დემოკრატიული გერმანიიდან იყო და არა ფედერაციულიდან, ერთიორად გაიხარა იმით, რომ ამ ფართო და კრიალა შუშებს იქით ცოტა ეწყო თუ ბევრი, ყოველ შემთხვევაში რაც ეწყო, ეწყო ცოცხალი პროდუქტი, და არა ისე, როცა თავის ადრეულ ახალგაზრდობაში, ჩვენს ქვეყანაში პირველად ჩამოსვლისას, რომელ გასტრონომშიც შეიხედავდი, მულიაქების სიუხვეს წააწყდებოდი: ძეხვის იმიტაციას ხისგან, ყველის იმიტაციას ხისგან, ღორის ბარკლის იმიტაციას... კვერცხები ხომ, მთებად რომ იყო აზვინული, ნამდვილისთვის ისე დაემსგავსებინათ... ახლა სააღდგომო წითელი კვერცხი რომ გეპყრათ ხელთ და თქვენ ამ კვერცხზე დაგიკრან, მოგეცათ

ლხენა, ჩვეულებრივი კვერცხით კი არა, უროთიც ვერ გაგიტეხენ...

...ალბათ ამ ფიქრში რომ იყო ეს ჩვენი ძვირფასი, ჯერ კიდევ თმაშეუღლებავი ქერათმიანი სტუმარი, მე კი ამ დროს იმ არემარეზე, ბოსტნეულის მაღაზიაში ფოჩეძე ტალახმიმხმარ საადრეო, თითქოს მწვანე, უფრო კი შეყვითლებულ ხახვს მიწონიდნენ, კივილისებური ერთი გერმანული სიტყვა მომესმა...

ო, მეპატიოს ეს მცირეოდენი გადახვევა, რამეთუ იგი ნათელს მოჰფენს ჯერ ჩემს განათლებას, მერე კი ამ განათლების დაბნელებას: რაკი მე დავამთავრე ომის გამოცხადების წელს გერმანული ენისა და ლიტერატურის ფაკულტეტი, ეს ენა თითქოს ახლაც უნდა ვიცოდე, მაგრამ... უმაღლესის დამთავრებისთანავე ისეთ უმდაბლეს დაწესებულებაში მიკრეს თავი, სადაც არათუ გოეთეს, პუშკინის უმდიდრესი ენიდან, ყოველი მხრიდან და ყოველ დროს, ორად ორი უცენზურო სიტყვა ისმოდა, რომლებსაც, სხვათა შორის, ისე ატრიალებდნენ ყველა ბრუნვაში, მათში ჩაქსოვილი, ცხადია, არაკანტისებური, აზრი ყველასათვის მაინც გონებამისაწვდომი იყო...

ჰოდა, რა გასაკვირია, შვიდი წლის მანძილზე ასეთ გარემოცვაში მყოფს, გერმანულიდან ჩემს მეხსიერებას ასიოდელა სიტყვა შემორჩა, და მათ შორის...

— *Hilf! Hilf!* (— მიშველეთ, მიშველეთ!..)

ამ სიტყვიერ გერმანულ კივილზე ჩემთვის უკვე აწონილ ხახვს ხელი აღარ დავტაცე და უმაღვე გარეთ გამოვევარდი და, რას ვხედავ: ამ ჩვენს სტუმარს ამ ჩვენს მშვენიერ ქალაქში, იმ მშვენიერ მოედანზე, სადაც სულ ცოტა ხნის წინათ, 26 მაისს (უცნაური დამთხვევა კი იყო — საქართველოს დამოუკიდებლობის გამოცხადების დღეს!), გრანდიოზული ზეიმობა გაიმართა (მიუხედავად მაისისათვის უჩვეულო სიცივისა!) მთელი საბჭოთა სახელმწიფოს მეთაურის ლეონიდ ბრეჟნევის თანდასწრებით, — მოდების ატელიეს წინ, მოდურ ფეხსაცმელში შემალული პატარა ფეხი ძირში გადაჭრილ, დიდი, ალბათ ელექტროლამპიონის რკინის ბოძის ამოუვსებელ, პირღია ორმოში ჩავარდნოდა...

როგორ შეიძლებოდა დამართოდა ეს, — რაკი ამის მერე.

ღრო საკმაოდ გავიდა, ახლა ამის შეუცდომლად დადგენა, ალბათ, უორე სიმენონის კომისარ მეგრესაც გაუქირდება, ისე კი, კაცმა შეიძლება ივარაუდოს, რომ მას იქვე მდებარე პოლიტექნიკური ინსტიტუტიდან, ლექციებიდან გამოპარულმა, რომელიღაც შავგვრემანმა სტუდენტმა დაადგა თვალი, უფრო კი, ვინ იცის, მის ოქროს საყურეებს, ამ „ლორელაის“ ცოლიკოურის მტევენებივით რომ ჰქონდა ჩამოკიდებული, და რაკი ასეთი მამაკაციური ყურადღება ქალს ხანდაზმულობაში უფრო მეტად ახარებს („ოი, მე კიდევ მოვწონვართ, მე კიდევ მოვწონვართ!“...), მასაც ამ შემთხვევაში სიხარულით გული ისე აუჩქროლდა, ნაბიჯები ისე აერია, წინ აღარც კი დაიხედა, ანდა, აბა როგორ იფიქრებდა, ქალაქის შუაგულში, თანაც რა სახელობის მოედანზე, — პროსტიტუციის... ო, უკაცრავად, უკაცრავად, — კონსტიტუციის, კონსტიტუციის მოედანზე!!!

არა, მის ფიქრებში მეტს აღარ შევიტრები, ვიტყვი კი, რომ ხაფანგიდან მისი ფეხის გამოსახსნელად, ჩემს გარდა, იმდენი თბილისელი ვაჟკაცი და ქალკაცი დაესია, მტკივანი ფეხი, მგონი, კიდევ უფრო ვულრძეთ...

...და როცა იგი, როგორც იქნა, ამოველეთ, მინდოდა სასტუმრომდე მიმეცილებინა და ჩემი ასსიტყვიანი გერმანულით ჩვენი საამაყო ქალაქისთვის ნამუსი მომეწმინდა, აი თითქმის ისე, როგორადაც ლუარსაბ თათქარიძე იხდიდა ხოლმე ბოდიშს მას შემდეგ, როცა ვინმე მის ოღროზოღრო ვითომ იატაკზე ფეხს წაიტეხდა, მაგრამ ეს საპატიო მისია არ დამანება ორმა, არათუ უგერმანულო, — ურუსულო ქალიშვილმა, ფეხდაშავებული სტუმრის მახერის კოფითით მოხიზლულმა...

არა, ჩემს ამ კეთილშობილურ განზრახვას ასე იოლად, ალბათ, არც დავთმობდი და, შეიძლება, მისი გულისთვის იმ ქალიშვილებსაც თავსაც შევაკლავდი, რომ სწორედ იმ წუთში, ჩემდა სამარცხვინოდ, ჩემს თავზე ეგოისტური აზრი მეხივით არ დამკემოდა: მე ხომ იმ პანიკური შეძახილისას, „ჰილფე — მიშველეთო“, გონება დამებნა და საშველად გამოქცეულს დახლზე სამასი გრამი ხახვი დამრჩა (ორასი გრამი ტალახი წმინდა წონას აღარ მივათვალე)...

ჰოდა, დღემდე მიკვირს, მაშინაც უკვე გადაღჯულებულს, განგებამ მუხლებში ისეთი რა ძალა ჩამიყენა, რომ „კაპუსტა-

პეტრუშკას“ საფირმო მალაზიისკენ ისე გავშვი და გავენთე, როგორც ამ ორმოციოდე წლის წინათ ელენე გოკიელი, ჭეირონივით რომ დარბოდა „დინამოს“ სტადიონზე (ფიზკულტურაო... ჩვენ კიდევ, საერთოდ, ცალკე დრო გვჭირდება საფიზკულტუროდ?!).

ღიას, გავიქეცი, გავიქეცი, მაგრამ...

ო, თავო ჩემო, ბედი მართლაც არ გიწე-რიაა: იქ აღარც ხახვი დამხვდა და აღარც მასზე მიმხმარი ტალახი; სულ ერთიანად, როგორც იტყვიან, კო მ პ ლ ე ქ ს უ რ ა დ ა ე ც ა ნ ც ლ ა ფოჩიან-ლაფიანად ჩვენი საამაყო ქალაქის მოქალაქეობით მოამაყე რომელიღაც მოქალაქეს და...

საიდან სადაო, გულდათუთქულს როგორღაც მომაგონდა გაუნათლებელთათვის უცნობი და განათლებულთათვის ცნობილი რუსი პოეტი, ალექსანდრე პირველის იუსტიციის მინისტრი გავრილა დერჟავინი, რომელმაც კითხვაზე — რა ამბებია რუსეთის იმპერიაშიო, უპასუხა: „Все воруют, батенька, все воруют“...

როცა უკან გამოვბრუნდი ამ სტრესით წელს ზევით დაკოდილი და-კვლავ იმ ნაბობარ ორმოს დავხედე, მაინც რა სიღრმისაა-მეთქი, ამ თვალღერებისას, მისგან ცოტა მოშორებით, ზედ ტროლეიბუსის გაჩერებასთან, სადაც მუდამ ჩოჩქოლია დიდისა და პატარასი, — ღმერთო, მეორე ასეთივე ორმო არ აღმოჩნდა!!!

რაკი ჩვენი დედაქალაქი, ალბათ, არანაკლებ მიყვარს, ვიდრე იმას, ვინც ვეებერთელა ასოებით გვიწერს ხოლმე „გადავაქციოთ თბილისი სანიმუშო კომუნისტურ ქალაქადო“, თუმცა, მე თუ მკითხავთ, კომუნისტურად კი გადავაქციეთ, ოღონდ სანიმუშოდ ჭერ ვერა და ვერა, — იქვე, ახლოს მდებარე ორჯონიკიძის რაილმასკომს მივაკითხე და რაკი დიდთან არ შემიშვეს, ეს უმნიშვნელო რამეაო, მაშინ მასზე პატარას მივუკაკუნე...

ორი კვირის მერეც მივუკაკუნე... და როცა მესამეჯერაც შევახსენე, ვინ იცის, იფიქრეს, ეს ვიღაც მოცლილი, შერეკილი უსაქმურია, აკი გუშინ წვეტიანი ჯოხითაც მოეთრა და არაფერი გვავნოსო და.. ერთ ორმოს, ტროლეიბუსის გაჩერებასთან, ფიცარი გადააკრეს, მეორე კი, ალბათ, ნაკლებ საბედისწეროდ

მიიჩნეს და ისევ ხელუხლებლად დატოვეს: როგორც ჩანს, საამისოდ ან ხე-ტყის მასალა არ ეყოთ, ანდა ამ პრობლემა-საკითხის საბოლოო გადასაჭრელად რაიკომის პლენუმზე თუ აღმასკომის სესიაზე უნდა ემსჯელათ...

ჰოდა, მას შემდეგ აი, აგერ, უკვე წელიწადი გადის და ის ორმო... დიახ, ისევ თავდაუხუტრავია, მაგრამ ნუ შეშინდებით, თუ მასში ფეხი ჩაგივარდათ, არ მოგტყდებათ, არა: რაკი ბატონ ავლიპი ზურაბაშვილს, ფსიქიკის მხრივ, ჯერ კიდევ არ შევემოწმებინე და ვინმეს მოურჩენელ გიჟად რომ არ მივეჩნიე, რამდენჯერაც იმ მხარეს მომიხდა ყოფნა, მალულად, ფეხების არტისტული თრევა-როკვით, სვანური ცერულის საცეკვაო ილეთების მოშველიებით, ირგვლივ მიყრილ-მოყრილი შემოდგომის ფოთლებით, ასე თუ ისე, ამოვავსე...

ერთხელ, ასეთი საქმიანობისას, ერთ ნაცნობს, რომელსაც თანამდებობით მანქანაც ეკუთვნის და სხვა ტკბილეულიც, გადავაქციოთ თბილისი ასეთ და ასეთ ქალაქადო, სხვებზე არანაკლები მგზნებარე ხმით რომ მოგვიწოდებს ხოლმე, შორიდან როგორღაც შევენიშნე და თავზე წამომადგა; ეს რა თქვენი საქმეა, თქვენ პიესები გვიწერეთ, რას იკლავთ თავს, ამას ჩვენ გავაკეთებთო...

მე ეს, რასაკვირველია, არ მომკლავდა, და არც ის მომკლავდა, ღმერთს ჩემთვის დაბადებიდანვე შესაშური ფიზიკური ძალა რომ მოეცა და ლენინის ქუჩაზე მდებარე სახლი № 69-ის წინ სატელეფონო ღრმა ჰა თავდაუხუტრავი რომ მიეტოვებინათ, — იქვე მიგდებული მისი რკინის მძიმე სარქველი მიმეგორებინა და...

მაშინ ოქტომბრის ერთ შეღამებულ საღამოს ხომ ასცდებოდა ხიფათს ის საწყალი ბეცი კაცი, რომელსაც სათვალის შუშების ძებნის სამი თვის მანძილზე მხედველობა კიდევ უფრო დაუქვეითდა და ახლა ხილიანის ქუჩაზე პანაშვიდზე რო მიიჩქაროდა, ლამის თავად გაუხდა საპანაშვიდოდ საქმე...

ეს რაღაც ორი კვირით ადრე მოხდა შარშანდელ გრანდიოზულ თბილისობამდე, თუმცა თბილისობის შემდეგაც შეიძლება მომხდარიყო: ასეთ თავდაუხუტრავ, იქვე სახურავმიგდებულ ტელეფონის თუ წყალსადენის ჰეზს დიდი კულტურის ჩვენს ქალაქში არა ერთსა და ორს შეხვდებით, და რომ ერთსაც კი

არ შეხვდეთ, ამისათვის საჭიროა მოტორიზებულმა ამხანაგებმა თავიანთ სამწყსოში, ხანდახან მაინც, ფეხით გაიარ-გამოი-არონ და თვალებიც ცოტა მეტად გაახილონ...

ჩ ა ნ ა რ თ ი :

1 ბატონო გურამი

შარშან, 15 დეკემბერს, საღამოს თერთმეტის ნახევარზე თქვენ, თქვენთან შედარებით მომცრო ტანის, სიმპათიური ქალის თანხლებით, ჩაიარეთ ბარნოვის ქუჩაზე, რამაც მე პირადად, ამის მნახველს გული სიხარულით ამივსო: გამახარა იმ გარემოებამ, რომ რაკი ქვეითად მოზრძანდებოდით, არ შეიძლება არ შეგემჩნიათ (და, ალბათ, გონებაში არ ჩაგენიშნათ!) სახლი № 89-ის წინ მდებარე სატელეფონო ორმოს დამტვრეული თავსახურავი...

რამდენიმე დღის შემდეგ მასში, სკოლაში აჩქარებით მიმავალ პატარა ბავშვს ფეხი ჩაუვარდა და მის მოთქმა-ტირილს გამწარებული დედის წივილ-კივილიც დაემატა წყევლა-კრულვასთან ერთად: „ეს (აქ მის მიერ ნახმარ „ეპითეტს“ გამოვტოვებ, რადგან ერთობ შეურაცხყოფელი იქნება ჩვენი ქალაქის მესვეურთათვის)... მილიონებს ხარჯავენ რალაც თბილისობამასკარადებზე, ქუჩებში კი დამშვიდებით ბაღებსაც ვერ გაუვლიათ...“

ის დამტვრეული, ნაპირჩამოტეხილი „სახურავი“ ახლაც, თქვენი ჩავლიდან ერთი თვის შემდეგაც, „ამშვენებს“ იმ სახლის წინ მდებარე ვიწრო ტროტუარს...

პლენანოვის პროსპექტზე № 179 სახლის ეზოში შესასვლელთან ვეებერთელა ღია, სრულიად უთავსახურო ორმოა — მგონი წყალსადენის... ბნელში კი არა, მზეშიც კი ვერ მოჰკრავ მას თვალს, თუკი სტადიონის მხრიდან მოდიხარ და გულარხეინად მარცხნივ შეუხვევ ეზოსკენ...

ასეთი უპატრონოდ მიტოვებული ორმოები, ალბათ, სხვაც ბევრია თბილისში... ჰოდა, სწორედ ერთ-ერთმა ასეთმა ორმომ გამოათხოვა წუთისოფელს თავის დროზე დიდად ცნობილი ფეხბურთელი შოთა იამანიძე... ეს იყო — ზუსტარ აღარ მახ-

სოეს — მელაძის თუ ბუხრაშვილის ქალაქის მამობის დროს!.. ახლა კი თქვენ მაინც ნუ დაიდებთ უდანაშაულო „შვილების“ ცოდვას!..

ნიკო ნიკოლაძეს, გერცენისა და ოგარიოვის მეგობარსა და თანამებრძოლს, და თავადაც დიდ ადამიანს, ფოთის ქალაქის თავობისას, წესად ჰქონდა მიღებული, ხშირ-ხშირად, მზრუნველი თვალთ შემოეველო ქალაქის უბნები, ახლა კი რაიონული აღმასკომების თავმჯდომარეების სამი მოადგილიდან (ამბობენ, მალე შეოთხესაც დაამატებენ!) თუნდაც ერთმა ხანდა-ხან მაინც, კანტიკუნტად რომ ჩაიარ-ჩამოიაროს — ოღონდ ფეხით, ფეხით! — თავიანთი „სამრევლო“, როგორ ფიქრობთ, ამით ხალხის თვალში მათ დიდკაცობას ანდა კრისტალურ კომუნისტობას ვითომ ჩირქი მოეცხება?!

პატივისცემით კ. ბუაჩიძე.

18. 01. 81.

ეს ჩემი ბარათი თბილისის აღმასკომის თავმჯდომარემ, გურამ გაბუნიაშ, საბედნიეროდ, უყურადღებოდ არ დატოვა და მოკლე დროში ერთს თავსახური გამოუცვალა და მეორეს სულ ახალი თავი დაახურა... ვილაყამ მითხრა, ალბათ ხუმრობით, შეეშინდებოდნო, ვაითუ არ გავაკეთე, ბუაჩიძე-ამომრჩეველმა ხმა არ მომცეს და ის ხმა, 99,9 პროცენტს დააყლდესო.

ო, ღმერთო, ო, ნეტავ ასე „შეეშინდებოდეს“ სხვებსაც, და არა მხოლოდ ქალაქის მამებს, — „არჩევით“ თანამდებობათა ყველა მქონეთ, მაშინ ნახავდით, რა შერცხლის სისწრაფით წავილოდა ჩვენი ცხოვრება წინ!..

ღიას, თუ ჩვენი ძმობით ქებული თბილისის მოქალაქეთა სიცოცხლე დიდად არაფრად გვიღირს, უცხოელ სტუმრებს მაინც გავუფრთხილდეთ, აი, თუნდაც ქალბატონ ლანსდორფს, ახლო მომავალში რომ გვეწვევა... .

ეს მით უმეტეს, რომ საფრანგეთის წინაშე ახლაც მიუტევებელი ცოდვა გვაწევს: სტალინის სიკვდილის ერთი კვირის სწორზე საბჭოთა ქვეყნის დიდი მეგობარი ივ ფარჯი თბილის-

გორის გზაზე ფარშად რომ ვაქციეთ და კუბოიან თვითმფრინავთან მყოფმა მისმა თავზარდაცემულმა მეუღლემ აერობორტში თანაგრძნობის გამოსახატავად მოსულ დიდ ამხანაგებს გამოწვედილი ხელები არც ერთს არ ჩამოართვა...

ლანსდორფის სტუმრობასთან დაკავშირებით ისიც უნდა გვახსოვდეს, რომ ადვილი შესაძლებელია, ეს ქალბატონი მართო არ ჩამოვიდეს, აი ისე, როგორც 1936 წელს ჯერ მოსკოვში და მერე კი საქართველოში, იმ დროის გამოჩენილი ფრანგი მწერალი, ანდრე ჟიდი ჩამოვიდა; მაშინ მას და მის თანმხლებ პირებს დიდი პატივი სცეს, და ისიც, ვიდრე საბჭოთა მიწა-წყალზე იმყოფებოდა, ჩვენს საქებად ფერადოვან სიტყვებს უხვად აფრქვევდა. მაგრამ თავი ამოყო თუ არა სამშობლოში, არა ერთი და ორი ვედრო ნარეცხი წყალი გადაგვასხა...

ეს რა ქვეყანააო, მოსკოვშიც კი, ამ უზარმაზარ ქალაქში, საზოგადოებრივ ტუალეტს ტანჯვა-წამების შემდეგ თუ სადმე წააწყდებიო, თანაც იქ შესვლაში აბაზს (ახლანდელი ორი კაპიკი) გახდევინებენო...

თბილისში იმ დროს ერთადერთი, ძველზე ძველი ფეხისადგილი იყო, საოპერო თეატრის ბალის გვერდით გამოქვაბულში (ახლაც იქ არის და მალე, ალბათ, ისეთი ისტორიკოსიც გამოგვიჩინდება, რომელიც დაადგენს მის, შეიძლება, ასი წლის საიუბილეო თარიღს), და ჩვენი ბედი, რომ თბილისი მაშინ ისე გაშლილი როდი იყო, როგორც ახლა, თორემ, საჭიროების შემთხვევაში, ჩვენს პარიზელ სტუმარს ოპერასთან, თეატრალურ შესახვევში, აბა, რა მანქანებით მივაფრენდით ვაკიდან ან საბურთალოდან, გლდანიდან ანდა ორთაჭალიდან, სადაც იმჟამად კი არა, აშეამადაც კი, ამ მხრივ კატასტროფული მდგომარეობაა...

იცოცხლეთ, ანდრე ჟიდს, რაკი ქვეყნისა და ხალხის ცივილიზაციის ერთ-ერთ მაჩვენებლად საზოგადოებრივი ტუალეტის — ახლა რომ შემოდის ჩვენს სალაპარაკო და სამწერლო ენაში, თითქოსდა მისი შემცვლელი სიტყვა ქართულში აქამდე არც გვექონოდა — ფუნქციონირება...

ღიახ, ფუნქციონირება ტუალეტისა, მისი სიმრავლე და სისუფთავე, და რაკი მოსკოვში უტუალეტობა უენიშნა, მაგრამ ახლად აშენებული, უზარმაზარი ქარხანა „მარიკოპოდშინიკი“

ვერ შეამჩნია, ზურგზე ტყავი აუწვეს სტატიით „პრავდა-ში“: „Смех и слезы Андре Жида,“ სადაც, თუმცა ქარაგმულ-შენიღბულად, მაგრამ მაინც იოლად მისახვედრად, ის აზრი გამოსჭვიოდა, რომ ახლა უკვე ეს არცთუ ისე ანგარიშგასაწყვეი ფრანგი მწერალი, საშუალოზე დაბალი ღირსების რომანის „Фальшивомонетки“-ს ავტორი... მამათმავალია, და ამიტომაც ჩვენს წმინდა მიწაზე თან ჩამოიყვანა ახალგაზრდა მწერლები, რომელთა შორის ქალი ერთიც არ ერია...

პო, მაგრამ ამ ამაზრზენი ამბავიდან ჩვენ, მკითხველებმა, ვერაფრით ვერ გავიგეთ, „ასეთი“ იყო მუსიო ანდრე აქ ჩამოსვლამდეც, თუ ჩვენთან წამოსვლისას, პარიზ-მოსკოვის გზაზე, ჩატარებულში შეეყარა ოსკარ უაილდის ეს დამღუპველი და მომაკვდინებელი სენი...

(სხვათა შორის ჩვენს მიმართ ასეთივე უმადურობა გამოიჩინა ანდრე უილზე ცოტა ადრე, წარმოშობით რუმინელმა, მაგრამ ფრანგმა მწერალმა პანაიტ ისტრატიმ, ბალკანეთის გორკად წოდებულმა, რომლის ერთი მოთხრობა „ქოჩორა თურინჯი“ თარგმნა მიხეილ ჯავახიშვილმა).

მოკლედ, ასე იყო თუ ისე, სტალინმა ამ სანიტარული ისტორიიდან, რომელიც პოლიტიკურში გადაიზარდა, ის დასკვნა გამოიტანა, რომ გააუქმა ჯერ კიდევ პირველ საუკუნეში რომის იმპერატორ ვესპასიანეს მიერ შემოღებული გადასახადი „ღამის ოქროზე“ („ფულს სუნი არ უღის“), და ბრძანა მოემრავლებინათ... მმ...

და ახლა მოსკოვში ყოველ ნახევარ კილომეტრზე შეხვდებით ყველა ჩვენთვის გასაგებ რუსულ ენაზე, უცხოელთათვის კი ინგლისურზე — სახელწოდებასა და გზა-მაჩვენებელს საკუროების შემთხვევაში ამ უსაჭიროესი „დაწესებულებისას“...

თბილისში საამისო მაჩვენებლები ჯერ არ შემოუღიათ, და ალბათ უფრო იმიტომ, რომ მათ იშვიათად თუ სადმე წააწყდებოდათ, მეორეც, — „თუ გიჭირს, ძამია“, იქ ისეთი სისუფთავეა, მისგან რა შორსაც იყო, სულ ერთია სუნით მიაგნებ, — ასენიზატორად, აბა, რომელი ჩვენგანი დადგება, განათლების დიპლომი, თავი რომ არ დავიძიმოთ, ზოგს შარვლის უკანა ჭიბეში და ზოგსაც პორტფელში რომ გვიდევს („უმადლეში იმიზა ვისტავლე, ფეხილაგში დაგიდგე დორნიკად?!“).

სავარაუდებელია, რომ ქალბატონი ლანსდორფი, თბილისის ძველი, გარედან ასე კოხტად განახლებული უბნების დათვალიერების შემდეგ, ქალაქის ახალი დასახლებების ნახვასაც მოიწადინებს...

რასაკვირველია, პარიზის ღვთისმშობლის ტაძრისა და თერამეტი ლუდოვიკოს ხავსმოდებულ, ეანგისფრად ქცეულ ნაგებობებთან შედარებით, მას, როგორც ხელოვნებათმცოდნეს, ალტაცებაში მოიყვანს ჩვენი ქათქათა თემქა და გლდანი, პლიუს მუხიანი, რომლებიც ტოლს არ უდებენ ბრაზილიის ახალ დედაქალაქს არქიტექტურული გონივრული სილამაზით და სამშენებლო ხარისხით...

...და მაინც, რატომღაც ვფიქრობ, თითქოს აჯობებდა, ეს თვალთუნახავი რაიონები ამ ქალბატონისთვის ვერტმფრენიდან გვეჩვენებინა, თორემ იქით ავჭალის გზატკეცილით ქვეითად თუ წავიყვანეთ, ვაითუ თვალში მოხვდეს ამ გზაზე სამად სამი მიწისქვეშა გასასვლელი და, ვაითუ, ეს ბევრში ჩაგვითვალოს, რად გინდოდათ ამდენიო; ვინ იცის, ეგებ ესეც გვეითხოს, რატომ აქვთ ასე შეწუხებული სახეებიო იმათ, ვინც, როგორც ეტყობა, ტრამვაიდან შემალღებულ გაჩერებაზე კარ ხანია ჩამოვიდნენ და აქეთ, ქუჩის ნაპირას, ტროტუარზე ვერ გადმოსულან, და ამათაც — უიმედო ტრაგიკული გამომეტყველება, ვინც ახლა ტროტუარზე ბედის ანაბრად მიგდებული ლტოლვილებივით დგას და ტრამვის მიუწვდომელ, საოცნებო გაჩერებისკენ ისე იყურება, როგორც უდაბურ კუნძულზე შეხიზნული, ჩაძირული გემის ძლივს გადაჩენილი მგზავრები ჩვენი დროის მხსნელის, ქართველი მოსეს მოლოდინში...

შეიძლება გვეითხოს, მიზეზი ამისა ამათ შუა უსასრულო ნიაღვარივით მიმდინარ-მომდინარე ავტომობილები ხომ არ არისო?

ო-ო, თუ ეს დავუდასტურეთ, ვაითუ, გადათქვას ადრე გამოთქმული აზრი, ხუთკილომეტრიანი გზისათვის, სადაც, სულ ცოტა, ტრამვის ოცამდე გაჩერებაა, სამად სამი მიწისქვეშა გასასვლელი პირდაპირ წვეთია თბილისის ზღვაშიო, მით უმეტეს, რომ ამ მაგისტრალზე ისეთი ავტომობილისტები მიქრი-მოქრიან, რომლებიც, როგორც ჩანს, ქვეითებს ისე არაფრად აგდებენ, როგორც მე-18 საუკუნეში ამერიკელი მონათმფლო-

ბელი პლანტატორები აფრიკიდან შემოზიდულ ზანგებს, თუმცა მაშინ ეს ბატონკაცები თავის უპირატესობას შავკანიანებზე იმით ამართლებდნენ, რომ ისინი თეთრკანიანები არიან...

კი, მაგრამ, ეს დაჩაგრული თბილისელები ხომ ყველა თეთრკანიანიაო, თუ სიტყვა ასე მოგვიქრა, ჩვენ უნდა ვეცადოთ, ეს სიტყვა ბანზე ავუგდოთ, და თუ მაინც კიდევ ჩაგვაცივდა, ვუთხრათ, ქალაქში ასე თუ ისე ნორმალური, ადამიანური ცხოვრების დასაფუძნებლად ამდენი სახსარი არა გვაქვს, — და რაც გვაქვს, იმით, ქალბატონო, საშვილიშვილო საქმეს ვაკეთებთ, საქართველოს ბავშვებს „ზურიკეილენდს“ ვუშენებთ, რომელიც, თუ ახლო მომავალში ჩვენთან კიდევ ჩამობრძანდებით, დარწმუნდებით, ჩვენი „ლენდი“ ამერიკულთან შედარებით ისე გამოჩნდება, როგორც მაუზური „დამსკი“ ბრაუნინგთან-თქო...

ჩვენ რომ სტუმრის მიღების ფაცაფუცში ვიქნებით, შეიძლება, ვიდაც ციგანმა — ეროვნებით კი არა, ხასიათით — ისიც ჩაუქირქილოს, რომ ჩვენმა ძმებმა, ქურთებმა, მომავალი „ლენდის“ ერთი ახლომახლო მიდამო ნავის საყრელ ისეთ მოედნად გადააქციეს, მილიონობით ბუზი რო მოამრავლა და ახლა ვაკელები, მათ შორის ჩვენი „ლენდის“ თეორიული პროექტის სულისჩამდგმელიც, მათი შემოსევის შიშით, საწყლები, ფანჯრებს ველარ აღებენო...

ამაზე იმგვარად უნდა ვუპასუხოთ, რომ... და საერთოდ, მადამ ლანსდორფს ისეთი ენაცქაფი და ყურცქვიტა თარჯიმანი უნდა მიუღწინოთ, ყოველგვარ ჩვენთვის საჩოთიროს შებრუნებით, პირუკულმა რომ უთარგმნის... ასე, მაგალითად, თუ ვინმე ნერვებდაწყვეტილმა და მოთმინებადაკარგულმა დამთხვეულმა, აი, თუნდაც ეგერ, შუა ქუჩაზე რომ გაჩხირულა და ტუტუცი მძლოლების შიშით, პირი ვერც იქით უქნია და ვერც აქეთ, და იმ დუქიანი პირით გამკივანი ხმით რომ იწყევლება, ინფარქტი, ინსულტი, დიაბეტი და არგადარჩენა ყველა ჩვენს მწვალებელსო, ჰოდა, თუ იკითხა იმ ფრანგის ქალმა, რა აკივლებს ამ უბედურსო, უნდა ეთარგმნოს, — ეს ქალი, ილოცება, მადამ, დღეგრძელობა და მქუხარე ტაში ყველა ჩვენს გამხარებელს, რომლებიც ასე თავგამოდებით გვიცავენ ინსულტისა და ინფარქტისგან-თქო...

ქალბატონ ლანსდორფს, უეჭველია, ჩვენი საამაყო მეტროც დააინტერესებს და უნდა ვუჩვენოთ კიდეც, ოღონდ დროის მოგება თუ გვინდა. — ჩვენიც და მისიც, — პირველი რიგისას ნუ ვუჩვენებთ, ვუჩვენოთ შედარებით ახალი სადგურები („წერეთლის პროსპექტი“, „პოლიტექნიკური ინსტიტუტი“, „კომკავშირელი“, „დელისი“), და თუ მისმა გამჭრიახმა ფრანგულმა თვალმა შეამჩნია, რომ არც ერთ ამ სადგურზე, არც თალის სახით და არც ჩასასვლელი კიბის დასაწყისისას მაინც. სახელწოდება არ არის მინიშნებული, უნდა გავანათლოთ და ვუთხრათ, რა რომელი სადგურია, ამას მხოლოდ მაშინ გაიგებთ, როცა ორას მეტრ სიღრმეზე მის წიაღს ესტუმრებით და თავს პლატფორმაზე ამოყოფთ-თქო...

შეუძლებელია, ამ სიახლემ მადამ ლანსდორფი არ გააცუცოს და არ თქვას, ვიცი, მსოფლიოში მეტროს მქონე ქალაქი უკვე ორმოცდაათამდეა, ოცში მე თვითონ ვყოფილვარ და არსად, არსად ასეთ ორიგინალური, მგზავრობისათვის გაადვილებულ გადაწყვეტას ჯერ არსად შევხვედრილვარო...

რაკი მიწის ქვეშ უვადოდ ყოფნა გველადუა მიქელ-გაბრიელის უღმობელი განაჩენით „მერეც, მერეც“ გვეყოფა, ამიტომ იქ დიდხანს ნუ გაეჩერდებით, და როცა ესკალატორით ცისკენ ამოვსრიალდებით და, თუ ვინიცობაა, ქუჩაში ქალბატონმა ლანსდორფმა თვალი მოჰკრა ნელი ნაბიჯებით ერთად მიმავალ სამ მეპატრულე მილიციელს — არაშავგვრემანთ და ჯერ კიდეც წვერულვაშუდინდლოთ, ფიზიკურად სუსტთ და სიმაღლითაც საკმაოდ მომდაბლოთ, უნდა ავეხსნათ, რომ ჩვენთან ეს სამი ვაჟკაცი არსებითად ერთ მილიციელად ითვლება; დიახ, სამნი მხოლოდ შესაშინებლად დააბოტებენ, რათა დღისით-მზისით სტუდენტებმა და სხვა ახალგაზრდებმაც არ განაიარაღონ ისინი და თავიანთი იარაღის ისეც მდიდარ კოლექციას კიდეც ახალი და ახალი არ მიუმატონ-თქო...

არ იქნებოდა ცუდი, თუ ამასაც დავძენდით: თქვენ, ქალბატონო, როგორც ჩანს, ჩამავალი მზის ქვეყანაში — იაპონიაში არ ბრძანებულხართ, თორემ უთუოდ გავგონილი გექნებოდათ, იქ პოლიციელისთვის განსაზღვრული სიმაღლეა დაწესებული, — თუ იმ სიმაღლეს ვერ აღწევ, პოლიციაში არც გამსახურებენ... გვიამბობენ, ერთ ათლეტურ, ბედკრულ ახალგაზრდა

იაპონელს სულ რაღაც ერთი სანტიმეტრილა აკლდა ამ სიმაღ-
ლემდე და ვიდრე მრავალნაირი, პირდაპირ საწამებელი ვარ-
ჯიშით ეს ერთი სანტიმეტრი არ შეიმატა, მანამ ვერავითარმა
მისმა ზეეწნა-მულარამ ვერ გაჭრა...

ჩვენ კი, ქალბატონო-თქო, რაკი ჰუმანისტები ვართ და რა-
კი ამომავალი მზის ქვეყანაში ვცხოვრობთ... ისე კი, საერთოდ,
მასთან საუბრის დროს, ჩვენ შორის საიდუმლოდ რომ ითქვას,
ზედმიწევნით ფრთხილად კი უნდა ვიყოთ, საიდანღაც არ გა-
მობტეს ვიღაც ციგანი (ეროვნებით კი არა, — მოწოდებით!),
და ჩვენს სტუმარს ოქროს საყურეები არ ააგლიჯოს, მერე კი,
ეს ამგლეჯი, შეიძლება ჩქარი ნაბიჯით არც წავიდეს, მაგრამ...
გამოტყვევება კი თუნდაც უამრავი ხალხიდან ერთი მაინც, მი-
სი დამდევენბელი?!

მადამ ლანსლორფი ტაქსს არავითარ შემთხვევაში არ უნდა
ვანდოთ, ვინ იცის, რა სიამეს გადაეყრება...

განა ასე არ შეემთხვა მოსკოველ ზოლოტუხინას, აერო-
პორტიდან მომავალს, ტაქსში, მძღოლის თანხმობით, ორი
ახალგაზრდა რომ შემოუჭდა, რომლებმაც ცოტა ხნის მერე,
ღორის დასაკლავი გრძელი დანები ყელში ჯერ შოფერს მიუბ-
ჯინეს და ნავაჭრი ფული წაართვეს, მერე კი, მის მგზავრ ქალს,
ჩვენი ასე დიდად სტუმართმოყვარე ქალაქის სტუმარს, რო-
მელსაც, სხვათა შორის, კანკალატანილი უტყვი, მშრომელი
ტაქსისტი უფრო შეებრალა, ვიდრე დაენანა თავისი ოქროს
ბეჭდებ-საყურეები... მაგრამ... მმ... სულ მალე მისთვის ნათე-
ლი გახდა, რომ ეს ვითომ საწყალი, მშრომელი ტაქსისტი თვი-
თონ ყოფილა თურმე ამ ვერაგული თავდასხმის ინსცენირების
მოთავე და მისი ავან-ჩავანი, მძარცველები კი — მისი ძმაკა-
ციები...

თბილისი, მართალია, ძმობის ქალაქია, მაგრამ ძმებშიც
ხომ გამოერევიან ხოლმე ერთმანეთის აუგის მხსენებლები, და
თუ ვინმე ჩვენი დროის კაენმა ჩაუფრანგულა ჩვენს ფრანგ
სტუმარს, რა ყოჩალიც არის თბილისი მკვლელობებში, ძარცვა-
გლეჯაში, საავტომობილო ავარიებსა და ამათგან გამოწვეულ
მსხვერპლიანობაში, ბინების ტყაპატყუპად გაქურდვაში, უეჭ-
ველად დააპირებს შეიტანოს ჩვენი თავი გინესის რეკორდების

წიგნში... ვაჭრობაში ხომ... მარტო ერთჯერ ყიდვისასაც კი, სულ ცოტა, ოთხჯერ მაინც გვატყუებენ: ზომაში, წონაში, ფასსა და ხურდაში (ჩვენ კი არ ვტყუვდებით, მაგრამ, რას იზამ, როცა „ის“ მაინც შეუპოვრად გვტოვებს ხოლმე მოტყუებულს)...

ჰოდა, თუ გვინდა ჩვენი პრესტიჟი და რენომე დაეიცვათ, მაღამ ლანდლორფს აქეთ უნდა შევედავოთ, ყოველივე ეს ცილისწამებაა-თქო, და ეს რომ ასე იყოს, მაშინ რა მორალური უფლება გექნებოდა ასე ზარ-ზეიმით გვედღესასწაულა თბილისქალაქობა; ჯერ ყოველგვარ სისაძაგლეს ცოტათი მაინც ამოვიძირკვავდით და მერე მოვიცლიდით თავის შესაქებად; ჩვენ იმ დიდ პატიულ მუშაეებს როდი ჩამოვგავართ, სათავეში ჩადგომისას პირველი ორი-სამი წელიწადი წარსულის კრიტიკის წლებად რომ გამოცხადდება და მერე კი იწყება მათივე ხოტბა-დიდების ოქროს ხანა-თქო...

ამასობაში, ალბათ, მოსაღამოვდებ კიდევ, და რაკი ღამის გასათევად თელავში ვერ წავიყვანთ, სადაც, თურმე, წყალიც მუდმივად მოდის და ტელეფონიც არ წარმოადგენს ინკვიზიციის დროინდელი წამების იარაღს, და, მაშასადამე, ჰიპერტონიის მასაზრდოებელ წყაროს, — ჰოდა, რაკი წყალი მას ყოველთვის დასჭირდება და არც იმის გარანტია გვაქვს, რომ თბილისური ტელეფონი სწორედ იმ დროს არ გიმტყუმნებს, როცა გადაუდებელია, ეთქვათ, თუნდაც სასწრაფოს გამოძახება, — ჯობს ყოველივე ეს მაღამ ლანდლორფს პირდაპირ ვუთხრათ, რაკი ფრანგები იუმორის დიდი მოყვარულები არიან, ვუთხრათ სიცილ-კისკისით, თითქოს ხუმრობით: მუხათგვერდის სასაფლაო 50 წლისათვის იყო ნაანგარიშევი, მაგრამ იგი რაღაც ათ წელიწადში უკვე თითქმის შეივსო, და იქ ახლა, სხვათა შორის, ცოტანი როდი წვანან ისეთები, რომელთაც სიცოცხლის დღენი ჩვენი დიდად ცივილიზებული ქალაქის ტელეფონმაც შეუშოკლა-თქო...

არა, ბეირუთის სასაფლაოც უკვე ავსებულა თურმე, მაგრამ ეს თითქოს არც უნდა გვიკვირდეს: ბეირუთში სულ ხელჩარ-

თული ომი და ომია, თბილისი კი გერმანელების თავდასხმის-
განაც კი აგვაცილა მამაზეციერმა, და მაინც, ამდენი ტელე-
ფონ-განგმირულნი?!

რაკი ქვეყნის თავკაცები ჩვენს ნერვიულ სისტემას ისე
უფრთხილდებიან, როგორც ძუძუგამშრალი დედა თავის
ჩვილს, მხოლოდ ახლა ათეული წლების შემდეგ გაგვაგებინეს,
რომ თბილისის სატელეფონო ქსელს ძირეული გადახალისება
სჭირდება, ამისათვის კი დიდი ფინანსებია თურმე საჭირო...

— არა-არა, მადამ ლანდორფ, ჩვენ ღარიბები არ გეგო-
ნოთ, — ფინანსები, რასაკვირველია, გვაქვს, გვაქვს, მაგრამ თუ
ისინი „ალო, ალოსთვის“ გადაეყარეთ, ანდა უვარგისი ონკანე-
ბის გამოსაცვლელად, თქურუშ-თქურუშით რომ გვიღვრის იმ
წყლის თითქმის, თურმე, ნახევარს, რასაც ქალაქი საერთოდ
ღებულობს (თბილისი კი, წყლის მომარაგების მხრივ, ერთ-
ერთი პირველი ყოფილა ჩვენს ქვეყანაში), ანდა კიდევ, თუ
ამ თანხებიდან თუნდაც მცირე ნაწილი მივახარჯეთ მიწისქვე-
შა გასასვლელებს, რათა მიწის ზევით ცოტათი მაინც შემცი-
რდეს სიკვდილადის თარეში, მაშინ „ზურიკეილენდს“ ბახმარო-
დან ჩალვადრების მიერ ჩამოზიდული ჰაერით ხომ ვერ ავა-
შენებთ, ღირსპატივისცემო ფრანგის ქალო-თქო...

თბილისობა სამჯერ უკვე ვიღლებოვ, წელს ამას მეოთხე
მოჰყვება, გაისად — მეხუთე...

არა, იქნებ დავფიქრდეთ, ხომ არ იქმნება იმის საშიშრო-
ება, რომ მისი გამომსახველი ფერები თანდათან გაფერ-
მკრთალდება, ახალს ასე მალიმალ ვერაფერს იტყვი, ერთი და
იგივეს, მსგავსის მსგავსის გამეორება კი ერთმანეთს ასე ახ-
ლოს, წლიდან წლამდე მომაბეზრებელი ხომ არ იქნებოდა?
საპატიო მოქალაქეებად ასარჩევი მოქალაქეებიც, ალბათ, შე-
მოგველევა, თუმცა იმ პრინციპს თუ დავადგებით — უძალო
ქვეყანაში კატები ვაყფოთ, მაშინ არა, არ შემოგველევა.

ეს მართალია, გასულ საუკუნეში ყვენობა (ყველიერიც!)
ყოველ წელიწადს იმართებოდა, მაგრამ იმ დროს ხალხი და
ჯამაათი მონატრებული იყო ყოველგვარ გასართობს: არც რა-

დიო იყო, არც ტელევიზია, თეატრალური წარმოდგენები კან-ტიკუნტად თუ იმართებოდა, იტალიურ ოპერაში კი, თუნდაც ბილეთი გქონოდა, საქოსა და სიკოს უსმოკინგებოდ იქ, აბა, ვინ შეუშვებდა... ფეხბურთი ინგლისშიც კი ის-ის იყო ისახებოდა; სპორტსმენებად მხოლოდ მამლები და ვერძები გვევლინებოდნენ ძიძგი-ძიძგი მამალოთი და მოკაუქებული რქების ჯახაჯუხით...

ახლა კი... მარტო მუსიკამაც კი, მელოდიურმა და კაკაფონიურმაც, ლამის წაგვლეკოს, საიდან და რა დროს არ იქრება მისგან ჩვენს უკვე სმენადაქვეითებულ ყურებში...

ჰოდა, ხომ არ აჯობებდა თბილისობა არა ყოველწლიურად, — აი, თუნდაც, სამ წელიწადში ერთხელ გამართულიყო? ამით მისი მომწყობ-გამმართველნიც დროით შეისვენებდნენ და ათიათასობით მანეთის მომჭირნეობასაც გავწევდით, მოქალაქე მაყურებლები კი... გლეხკაცი მეწლე ხილის ხეს არანაკლებ პატივს სცემს, ვიდრე ყოველწლიურად მსხმოიარეს: მეწლე უფრო მეტ ნაყოფს იძლევა თურმე და, მგონი, უფრო გემრიელსაც...

რასაკვირველია, როცა ამ „სწორუპოვარ სიბრძნეს“ გამოვთქვამ, არ მავიწყდება ჩემი უმწეობაც: მტკვარი უფრო გადაუხვევს ლიხ-ხაშურთან შავი ზღვისაკენ, ვიდრე ჩვენი რესპუბლიკის თავკაცები მიიჩნევენ ამას თუნდაც წამით ჩაფიქრების ღირსად („ჩვენ არასოდეს არ ვცდებით“).

ოცდაათიან წლებში, ერთხანობას, მოსკოვში, „დინამოს“ სტადიონზე, ყოველწლიურად ეწყობოდა ფიზკულტურელთა პარადი, დროთა განმავლობაში, როცა ნათელი გახდა, რომ ეს ყოველმხრივ დიდად სამძიმოა და თანაც შტამპად იქცა, სტალინმა აღარ ცნო საჭიროდ მისი სისტემატურად მოწყობა.

უფრო მეტიც: სტალინმა მსოფლიოში უკვე სახელგანთქმული საავიაციო დღესასწაული მოსკოვის მახლობლად, ტუშინოში, აგვისტოს ერთ მშვენიერ მზიან დღეს, სულაც გააუქმა, — იყო შემთხვევები თვითმფრინავების დაღუპვისა: არ ღირს მშვიდობიანობისას ჩვენი მფრინავები ილუპებოდნენო...

ზუსტად არავენ იცის, ვინ თქვა ეს, ვარაუდით კი ჩერნი-
შევსკის მიაწერენ:

«Только дураки не меняют своих решений.»

ახლა აბა ვინ გაიგებს, იცნობდა თუ არა ამ ფრაზაში ჩათ-
ქმულ სიბრძნეს
ყმაწვილობაში — სოსელო, ახალგაზრდობაში — ჭულაშვი-
ლი, მერე კი — სტალინი..
დიახ!..

რა გვეთბილისება,
როცა ბედი წყდება
ს ა ქ ა რ თ ვ ე ლ ო ს ი

ადამიანის საუკეთესო განმარტება იქნება:
უმაღლური ორთეხი.

თ. ლოსტოვესკი

ამას წინათ საქართველოს ტელევიზიამ გვამცნო, რა ზომებს ღებულობენ რესპუბლიკაში „ქურთი მოსახლეობის შემდგომი კეთილდღეობის ამაღლებისათვის“...

„აი ისტორიაც“:

გადმოხვეწილი ქურთები ქართველებმა გასაბჭოების პირველ წლებში შეივრდომა: შეივრდომა ისე, როგორც ეს ჩვენს, საბოლოო ანგარიშით, როგორც ირკვევა, ჩვენდა საუბედუროდ, სულელურ თანდაყოლილ ინტერნაციონალურ ბუნებას სჩევია.

უმაწვილობიდან მახსოვს, იმ დროს ქურთები, ეზიდები ჩუმი, წყნარი მორიდებულები იყვნენ. მამაკაცები ადრე დილიდანვე გამოეფინებოდნენ ხოლმე ქალაქის მთავარი ქუჩების მახლობლად ერთხელვე მონიშნულ „ბიჩუებზე“ და ხშირად მთელი დღე ელოდებოდნენ თითო-ოროლა მუშტარს, ტვირთი რომ წაეღოთ...

ზურგიით, რასაკვირველია.

სიმძიმის შედარებით შესამსუბუქებლად და უფრო იოლად წასაღებად ყოვლადნაცად კურტნებს ატარებდნენ.

...და როგორც ბევრ სხვა რამეს, ამ კურტნებსაც ბოლო სტალინმა მოუღო: 1935 წელს იოსები, უკვე დიდი იოსები, თბილისს ეწვია, შესაძლოა დედის სანახავადაც; და როცა მანქანიდან თვალი მოჰკრა რუსთაველის პროსპექტზე, ლალიძის წყლის კუთხეში, ქურტებს, უსაქმობით მზეს რომ ეფიცებოდნენ, „სათვალებიანს“ (ბერძანს) გადაულაპარაკა უფრო, ალბათ, სიტყვის მასალად: ესენი კურტანს კიდევ არ გამოეთხოვენო?

უკვე იმ დროსაც სიტყვის თქმა კი არა, სტალინის წარბის ოდნავ შერხვევაც საკმარისი იყო, რომ ჩვენი წილი დედამიწისთვისაც კი „უკუბრუნნი გვექნა“, კურტანი კი, აბა, რა გადაუჭ-

რელი პრობლემა იქნებოდა: მეორე დღესვე, ტოტალური წესით, ყველას ჩამოართვეს კურტანი და...

დარჩნენ ქურთები უკურტნოდ, მაგრამ... ამის გამო ისინი, წარმოიდგინეთ, არ აჯანყებულან და არც ზემდგომ ორგანოებში მიუწერიათ ასე და ასეო, ჩვენ, იმპერიალისტებისგან განაწამებ და დაჩაგრულ ქურთებს, ქართველები, თავი საბჭოთა ადამიანებად რომ მოაქვთ, გვაფიწროებენო...

მათ შეეძლოთ ამგვარი საჩივარი პირდაპირ ამხანაგ სტალინისათვისაც გაეგზავნათ, აკი აინუნშიც არ იყვნენ, რომ ისინი ამ მაქლაჯუნა კურტნისაგან თავად ამხანაგმა სტალინმა გაათავისუფლა...

ღიახ-ღიახ, არ აწრიალდნენ და არ იჩივლეს, — მათ ჯერ კიდევ არ ჰყავდათ დიდი პოეტი თოგარე ბრო, მწერალთა კავშირში არ ჰქონდათ ქურთული სექცია, რადიოში არ იყო ქურთულ ენაზე გადაცემები, როგორც წინათ დაწიხლული და ახლა აღორძინების გზაზე შემდგარი ნაციონალური უმცირესობა არც ლიმიტებს მოითხოვდა სამუსიკო, სამხატვრო და უმაღლეს სასწავლებლებში...

იმხანად ქურთები თბილისში ხუთას სულამდე თუ დაითვლებოდნენ და ყველანი სარდაფებში ცხოვრობდნენ. თუმცა არა მარტო ქურთები ცხოვრობდნენ, დღევანდელი თვალსაზრისით, ჯურღმულებში, — ბევრი, ბევრი ქართველიც (მათ შორის ამ ცრემლიანი სტრიკონების ავტორიც: მოწაფეობის ბოლო ექვსი წლის მანძილზე გრიბოედოვის ქუჩაზე, სახლი № 15-ში, რომლის „აპარტამენტების“ ფანჯრებიდან ტროტუარზე მოსიარულეთა ფეხები მხოლოდ კოჭებ-მუხლებამდე მოჩანდა... ერთხელ ბინაში მორიელიც კი შემოძვრა, შეშინებულ ბავშვებს მამამ, დამშვიდების მიზნით თეთრ „ტარაკანად“ რომ გაუსადა, მაგრამ „ნომერი“ არ გაუვიდა: ზოლოგიაში ჩვენ უკვე განსწავლულები ვიყავით).

ო, მას შემდეგ დიდი, დიდი დრო გავიდა... როგორც ამას წინათ გაზეთმა „თბილისმა“ სიხარულით უწოდა — „ქურთები, ჩვენი ძმები“ ერთობ მოღონიერდნენ, სარდაფებიდან ბევრ ქართველზეც ადრე ამოვიდნენ, გამრავლდნენ,

და მერე როგორ!

ჩვენ მათზე კინონარკვევიც გადავიღეთ — „Мы — кур-

დღე!" — რუსულ ენაზე, ცხადია, — ქართული ამ „ჩვენს ძმებს“ უკვე კარგა ხანია ეპატარავებათ; სხვათა შორის, ამ ფილმში ახლად დაქორწინებულს, ნეფეს ეკითხებიან: „Сколько детей будете иметь?“ პასუხი წამიერი ფიქრის გარეშეც: „Десять!“ დედოფალი კი თვალმდარცხვენით უპასუხებს: „Нет, двенадцать!“

რა თქმა უნდა, მათ საამისოდ მტკიცე პირობის ჩამორთმევა არცა სჭირდებათ, ამას უპირობოთაც შეასრულებენ, აკი ზურგი მაგარი აქვთ; მათ მშვენივრად იციან, რომ თანამდებობების მქონე ქართველები მათი პირველი ძმები არიან; აგერ ახლა ხომ წამოიძახა კიდევ რიხით, ბინების განაწილებისას, დედაქალაქის ერთ-ერთი რაიადმასკომის თავმჯდომარემ, „ქურთი და ქართველი ჩემთვის სულ ერთია!“-ო.

თბილისში 6 ათასი ქურთია მეეზოვედ გაფორმებულნი, დი-ახ, გაფორმებული (ამათში თოთო ბავშვიც ბევრი ურევია), ამიტომაც ასე „ბრწყინავს სისულეთავით“ ჩვენი დედაქალაქი!.. მაგრამ ქურთებმა არა მხოლოდ სანიტარიის, უფრო სწორად — ანტისანიტარიის სფეროში, — სავაჭრო ქსელშიც ამაზე ნაკლებ როდი მოიკიდეს ფეხი: ქართველ დიდ ქურდებს ხელს უფრო აძლევთ სამატყუარო-საანგარიშო დარგში დაძმაცალება მათთან შედარებით პატარა ქურდებთან... ბოლიში, ქურთებთან, ქურთებთან!

არა, ყველა ქურთი როდი გავაქრებულა; ზოგიერთი მათგანი ორას მანეთად მეხუთე სართულზე პიანინოს ატანაზეც გაგირიდება; თუმცა... მესამე სართულზე შეიძლება მიგიტოვონ, არ ვიცოდით ასე მძიმე თუ იქნებოდაო, და რაკი შენ მისი ამტანი არა ხარ და არც იმის იმედი გაქვს, რომ სხვა ქურთი გამოგიჩნდება ისეთი, ტყავი რომ შეგარჩინოს, იძულებული ხარ, გაქვს თუ არ გაქვს, ასი მანეთი კიდევ წაუმატო...

ო, რასაკვირველია, ერთობ დროულია, დროული!.. შეიძლება დავაგვიანეთ კიდევ „ჩვენი ძმები — ქურთების“ შემდგომ კეთილდღეობაზე ზრუნვა და მეურვეობა.

...და მაინც, მე ვამჯობინებ, რათა უფრო მერწმუნოთ, ჩემი, შესაძლოა, ზერელე დაკვირვებანი განზე გადავდო და „ქურთების საკითხის“ უფრო ობიექტურად ნათელსაყოფად რესპუბ-

ლიკის დიდი ოფიციალური პირისათვის გაგზავნილი მოხსენებითი ბარათი მოვიშველიო, რომლის ავტორს, თავისივე პროფესიის გამო, უშუალოდ და პრაქტიკულად არაერთხელ მოუხდა ამ მღვრიე ტბაში გაცურვა-გამოცურვა... ეს გახლავთ ვახტანგ ქვანია; იურისტი და ლიტერატორი (ტექსტი შედგენილია რუსულ ენაზე; კომუნისტ ქვანიას, როგორც ჩანს, არ შეუინებია, თუ მის ნაწერს მოსკოვიც გაეცნობოდა):

«...Большинство дворников и уборщиков оформлены на 4—5 работах, и каждый из них получает зарплату профессора.

...Я сталкивался с фактами, когда в документах домоуправлений были оформлены дворниками грудные дети...

...А если кто посмеет поднять голос об этих противозаконных, преступных деяниях, сразу же поднимается, со стороны курдов, организованный шум и поход многочисленных жалоб о национальном преследовании «маленького, бесправного народа».

...Количество курдов и езидов по сравнению с довоенным периодом в Тбилиси во многом возросло, и это не только за счет способности большого размножения, но и за счет массового экспортирования из Ахпаранского и других районов Армении «зятьей» и «невест», которые за взятки беспрепятственно прописываются, а затем еще тянут за собой колоссальное количество родичей...»

(ჩემი მინი-კომენტარი: იყიდებოდა და იყიდება საქართველო, ოღონდ სამშობლოთი წინათ მარტო თავადაზნაურობა ვაჭრობდა და საქმეს მხოლოდ სომხებთან იჭერდა, ახლა კი საქართველოთი ვვაჭრობთ ყველა ჩვენ, ვისაც „სკამი“ გვაქვს და ვინც ხელის კუჭყს შემოგვაძლევს, — ვყიდით ყველაზე, გაწურჩველად ეროვნებისა)

«...Об их невиданном «угнетении» единичные курдские писатели и малочисленная интеллигенция уже кричат таким зловещим голосом, будто их режут не турки, а грузины... Они же сочиняют то множество провокационных, клеветнических, анти-

грузинских жалоб — индивидуальных и коллективных. которые наводняют вышестоящие партийные и государственные органы... Клевета выдается за истину, и провокаторы добиваются своего...»

აი, ესეც „ჩვენი ძმები, ქურთები!..“

მაპატიოს კი მკითხველმა, თუ მის წინაშე არ მოვიხიდი ბო-
დიშს ასეთი გრძელი ამონაწერისათვის, თანაც უფრო იმიტომ,
რომ ეს მცირეზე მცირე ნაწილია იმ 18-გვერდიანი მოხსენე-
ბითი „უსტარიდან“, რომელიც „ზევიტ“ გაიგზავნა...

...და თქვენ ფიქრობთ, ერთი-ორი თვის წინათ? ანდა ერთი-
ორი წლის წინათ? არაა ორიოდ თვის შემდეგ მისი გაგზავნი-
დან სრული ათი წელიწადი შესრულდება, პასუხი კი გამგზავნს,
სულ უბრალოც — „თქვენი წერილი მივიღეთ“, ესეც არ მი-
ულია.

კარგა, ვთქვათ და პასუხისათვის შეიძლება მართლაც ვერ
მოიძალეს, მაგრამ ბარათში დასმული მრავალი საკითხიდან
ზოგიერთი მაინც, ყველაზე მტკივნეული, ეგებ მოაგვარეს და
გადაქრეს, ა? ვითომ ეტყობა კი ეს ჩვენი დედაქალაქის სინამ-
ღვილეს? საამისოდ ათი წელიწადი განა ცოტაა?!

ერთმა თერთმეტწვილიანმა ქურთის ქალმა, რომლის რამ-
დენიმე შვილი ჩემმა, აწ განსვენებულმა დამ, როგორც უბნის
პედიატრმა, ზოგი წითელას გამოსტაცა, ზოგი — ყივანახველას,
ზოგიც — ხუნაგს, — ერთხელ, როცა ფულის მიცემა დაუპირა
მკურნალს და ამან კი არ გამოართვა (გჯერა კი ეს, მკითხველო,
ჩვენი დროის ექიმისგან?), საიდუმლოდ ჩაუჩურჩულა: „აი-
ღე, თინა-ექიმო, ნუ გეცოდები... ჩვენ, ქურთებს, იმდენი ფუ-
ლი გვაქვს, გამოჩენის გვეშინია, თორემ ნახეივარ თბილისს ვი-
ყიდით“.

ეს იყო მევანაძის დროს, რომელიც, სხვათა შორის, რო-
გორც შემდეგ დროთა ვითარებამ გვიჩვენა, თავისი თანამდე-
ბობისათვის არც ისეთი წყალწალღებული ქალაქუნა და დაბდუ-
რი იყო, რომ მასზე სრულად გაგვევრცელებინა მე-18 საუკუ-
ნის შოტლანდიელი რობერტ ბერნსის პოეტური სიტყვები:

ღმერთმა დამიფაროს, აუგით ვახსენო
მე კანონმდებლობა ინგლისის,
და ვთქვა, რომ არ გყოფნით ამ ერის მართვისთვის
სიბრძნე და მეფური სინდისი;
მაგრამ ის უნდა ვთქვა, ძლიერ მაკვირვებს:
ვის ანდეთ სიმპრატლის სადავე,
ცხენის ჩონჩორიკს რომ უნდა ხვეტავდნენ,
ისინი ქვეყანას მართავენ
ამ ძნელბედობის დღეს...

ღიახ, ამ ბოლო ათ წელიწადში კი, ნუ იტყვით, „ჩვენი ძმე-
ბი, ქურთები“ იმდენად დაუძლურებულან თურმე ქართული
კაციკამია ნაციონალიზმით, რომ... მხოლოდ აგერ ახლა მივხ-
ვდით ამას და თავზე ხელი სასწრაფოდ შემოვიკარით (თუ შე-
მოგვაკვრევენ?!) და გამოვიტანეთ დადგენილება „ქურთი
მოსახლეობის კეთილდღეობის შემდგომი ამაღლებისათვის“,
რომელიც, უნდა იმედი ვიქონიოთ, მრავალ სხვა დადგენილება-
საერთ ქალაქებზე არ დარჩება და მას ხელებდაკაპიწებულნი
შეასრულებენ.

რაკი ჩვენ, სამკჳაშვილები და სამყურაშვილები (ჩემ მიერ
შეთითხნილი გვარები არ გეგონოთ, — ნამდვილია!) თავით
ფეხებამდე ინტერნაციონალისტები ვართ, ქურთები, მსგავსად
ფერეიდნელი ქართველების რაღაც 18 ოჯახისა, კი არ დავსაქ-
სეთ, ერთად, კოლონიებად ჩავასახლეთ, თემქასა და გლდანში...

ამან, რაღა თქმა უნდა, დიდებული შედეგი მოგვცა, რაშიც
ყველაზე ადრე და ყველაზე პრაქტიკულად მილიცია დარწმუნ-
და მაშინ, როცა ერთხელ მანქანის გამტაცებელ ერთ ქურთ
ახალგაზრდას დაედევნა, ამან კი, დრო იხელთა თუ არა, ერთ-
რეასართულიან შენობას შეაფარა თავი და... უმაღვე იმ სახ-
ლის მრავალრიცხოვანი ფანჯრებიდან და აივნებიდან ქვემოთ
მყოფ მილიციელთა. მისამართით არცთუ სულ მოძულებული
საოჯახო ნივთების თქეში წამოვიდა, რასაც მალე მდულარე
წყლის ნაკადულიც მოჰყვა ჭრელკაბიანი ქალების ომახიანი შე-
ძახილებთან ერთად: „გლდანი ჩვენია! გლდანი ჩვენია!..“

დაე, ნუ დავძრახავთ, ნუ გავამტყუნებთ, სიმხდალეს ნუ
დავწამებთ: ასეთ საარტილერიო ზალპსა და ფსიქიკურ „ატა-

კას“ ორი მილიციელი კი არა, მთელი დივიზიონიც ვერ გაუძლებდა... ამიტომაც დაბრუნდნენ კიდეც ისინი უბანში ხელცარიელნი, ერთი მათგანი თავცარიელიც კი: ფორმის ქუდი ცოცხით წააქალეს და იმ ცოცხითვე აბურთავეს.

უკვე მოგახსენეთ, წინათ თბილისში ქურთები უტყვი, ბუნჩულა ხალხი იყო-მეთქი, ახლა... მოსამართლე ვახტანგ ევანიას ათი წლის წინათ მოწოდებული ცნობები ერთობ მოძველდა: დღეისათვის ქურთი დამნაშავეების რიცხვმა, მათ სულადობასთან ერთად, კიდეც უფრო იმატა, მაგრამ მათს გვარებს ქართველი დამნაშავეების გვერდით ამოყენებულთ, პრესაში იშვიათად შეხვდებით: ვაითუ, შევიჯავროთ „ჩვენი ძმები, ქურთები!“ (თუნდაც შეიჯავრე, ამით ბევრი არაფერი დააკლო: ის მოდის, შენ მიდიხარ... ის ყვავის, შენ ჭკნები...).

ჩემი თვალით ენახე: საკოლმეურნეო მოედანზე, აფთიაქთან, დღისით-მზისით, მთელი ქვეყნის თვალწინ, ორმა ქურთმა ახალგაზრდამ ერთი ქართველი გლეხი, მისთვის ფული რომ წაერთმიათ, მაგრამ როცა იგი ამაზე იოლად ვერ დაიყაბულეს, როგორ წააქციეს და წიხლებით მოთელეს...

ერთმა, მედოევმა, ტყუილუბრალოდ მოკლა ქართველი მოწაფე... შეხვდით კი ამის გვარს გაზეთ „თბილისში“? მე მგონია, არ შეხვდარიხართ, სამაგიეროდ ამას კი: „ქურთები, ჩვენი ძმები!“...

ჰოდა, ამოცანა გვეკითხება, თუკი ქურთები თბილისში ახლა „მხოლოდ“ 30 ათასია (1977 წლის ოფიციალური, ცხადია, ამჟამად უკვე მოძველებული მონაცემებით) და უკვე თავს გრძნობენ, რუსები რომ იტყვიან, хозяином положення, რაღა იქნება მაშინ, როცა ისინი... მმ... და როცა ჩვენ კი...

ეპ, ნუ გავიფუჭებთ გუნებას სტატისტიკური შედარებებით... თუმცა ესეც არის, ბევრ ჩვენგანს ვითომ გაუფუჭდება?!

მწერლისათვის მის მიერ შექმნილი პერსონაჟი, რა უარყოფითიც უნდა იყოს იგი, მაინც საყვარელი ქმნილებაა. ჩემთვის სარე, მეეზოვე ქურთი გოგონა — მხიარული, ცოცხალი, კეთილი, ზოგჯერ უხეირო ქართველს ჰკუასაც რომ ასწავლის, საყვარელზე საყვარელია, მაგრამ... მე დღეს მას აღარ დავხატავდი. მე ის შევექმენი ზუსტად 30 წლის წინათ, როცა ქურთებმა ჩერ კიდეც იტოდნენ თავიანთი მოკრძალებული ადგილი სა-

ქართველოში, კალთა მათ მაშინ რომ გადაათარა, როცა სხვები ასაკუწად სდევნიდნენ.

მოდით ახლა და სულ უსაფუძვლო პარადოქსად მიიჩნიე ცი-ნიკოს-ფილოსოფოსთა დევიზი, ნურავის ნუ უზამ სიკეთეს, და შენც ბოროტებით არავინ გიპასუხებდნენ...

კავშირგაბმულობის სამინისტროს მუშაკი, მ. მ. შესვენებისას ყველის რიგში ჩადგა, და როცა ცოცხიანი ქურთის ქალი დაუეითხავად და თავხედურად რიგის თავში ჩაეჩრა, და მას შენიშვნა მისცა, ჩვენ თუ ვდგავართ, შენ რა. წითელი კვერცხი ბრძანდები, არ გეკადრებაო? ამაზე შეურაცხყოფილმა, მგონი, ყველაზე უფრო დეფიციტური პროფესიის ქალმა (ალბათ გაგებული ექნებოდა, თბილისს ორი ათასი შეეზოვე აკლიაო...), არც აცივა არც აცხელა, როგორღაც ელვისებური მიხვედრილობა გამოიჩინა და ერთგვარი შურისძიების მიზნით პირდაპირ მიახალა ქართველ ქალს ქართულ გულში: მალე თბილისი თქვენი აღარ იქნება, თქვენ გახდებით ჩვენი დორნიკები და მერე რამდენიც გინდა, იცეკვეთ და იმღერეთო...

და წაუმღერა კიდევ, ოღონდ სარესავით სიყვარულით კი არა, — გაანჩხლებით (ქართულ ანსამბლში, როგორც ჩანს, მელოდიას ხელს არ ახლებენ, ტექსტს კი):

„თბ-ლი-სო, მტკრისა და ნა-გვის ქა-ლა-ქოო...“

ღიახ, მალე თქვენი აღარ იქნებაო...

და ეს მხოლოდ ამ ერთი მეეზოვე ქურთი ქალის აზრი როდია, — ასევე ვარაუდობენ ასიათასობით არაქურთები და არამეეზოვეები; და არათუ ვარაუდობენ, — ამაში ეჭვიც არ ეპარებათ.

ამის დასაიდარტურებლად საკმარისია თუნდაც ისიც, რომ, მაგალითად, სომხებმა არამ ხაჩატურიანი მოსკოვიდან ერევანს ჩამოასვენეს, ქოჩარაიანი სურენიც, ამერიკიდან კი — უილიამ საროიანი (თუ მთლიანად არა, ნაწილი მაინც — გული...), მაგრამ მათი საფიცრის, მათი ღიდი ეროვნული პოეტის, რევანეს თუმანიანის ნეშტის თბილისიდან ერევანში გადასვენება ფიქრადაც არ მოსდით, მიუხედავად იმისა, რომ იგი საქართველოში არც მომკვდარა: გარდაიცვალა მოსკოვში, 1923 წელს, და

თუმცა მოსკოვში სომხებს საკუთარი სასაფლაო აქვთ, იქ არ დამარხეს, ამჯობინეს თბილისში დაეკრძალათ...

ღიას, თბილისში, იმ თბილისში, რომელიც... შალე ჩენი იქნებაო...

(ვფიქრობ, მკითხველისთვის ერთგვარად ესეც საინტერესოა: დავითაშვილის ქუჩაზე მდებარე სახლი, რომელშიც ოვანეს თუმანიანი ცხოვრობდა, მისი ასლი სომხებმა ზუსტად გადაიღეს და ერევანში ააშენეს).

ჰკვიანი, შორმსპვერეტელი, გამპრიახი ხალხის წინაშე, ის ქურთი იქნება, სომეხი თუ სხვა გადამთიელი, უპკუო ხალხს მხოლოდ მუხლის მოდრეკა გვმართებს...

ერთ ამერიკელ პროფესორს, ფიზიკოსს, გრეგორი ბენფორდს, რომელიც ქართულ სტუმართმოყვარეობას მოუხიბლავს და, ალბათ, ქართველ ფიზიკოსებსაც, წერილობითი სიგელი დაუტოვებია, ქართველები არაჩვეულებრივი ხალხიაო...

ჩენთან ათღლიანი სტუმრობისას, აბა, რას მიხვდებოდა ეს დალოცვილი, რომ ამ „არაჩვეულებრივი ხალხით“ თუ დაინტერესდება მისი შვილის შვილიშვილი და ჩამოვა ამ „არაჩვეულებრივი ხალხის“ სანახავად, იმხანად უკვე ეგრეთ წოდებულ საქართველოში, იგი აქ იმდენსავე ქართველს წააწყდება, რამდენიც ინდიელია ამჟამად ამერიკის სამიოდე რეზერვაციაში...

ღიას,

თუ საქართველო აღარ იქნება,
ნულარ იქნება ნურც სხვა ქვეყანა!..

ქეთი, თეატრ-ლენგი, კოსმოსა და სხვაბი...

სომხებს საკუთრივ სომხური სახელი უამრავი მოეპოვებათ, და ეს არა მარტო ჩვენთან შედარებით...

ქართველებს ბევრი სახელი ნასესხები გვაქვს ძველი ბერძნებისაგან; რომაელებისაგან, სპარსელებისგან, უფრო მეტად კი — ებრაელებისგან.

ზოგიერთს შეიძლება გაუკვირდეს კიდევ, მაგრამ ეთერ-აბესალომზე რომ აღარაფერი ვთქვათ, თამარიც კი ძველი ებრაულიდან მომდინარეობს.

აი, ლამარა კი წმინდა ქართული სახელია და, სხვათა შორის, საქართველოში ყველა ლამარა დაბადებულია 1926 წლის შემდეგ: სწორედ ამ წელიწადს დაიდგა რუსთაველის თეატრში გრიგოლ რობაქიძის „ლამარა“ და... ისე, როგორც ყველა ანზორი დაბადებულია 1928 წლის ბერმე, თუმცა ეს სახელი ალექსანდრე ყაზბეგთან გვხვდება „ელისოში“ ჯერ კიდევ როდის, მაგრამ ხალხმა მაშინ იგი არ აიტაცა; ამ შემთხვევაში, როგორც ჩანს, თეატრმა დაჯაბნა ლიტერატურა...

...კი, ასეთი ზედპირული გავლენა ადამიანებზე თეატრს მართლაც შეუძლია მოახდინოს, მაგრამ მას რომ შეეძლოს საზოგადოების სოციალური ჭრილობების განკურნება, თუნდაც ნება მოგვეცეს ამ ჭრილობების გამომწვევი მიზეზების ჩვენებისა, — ამის მტკიცება ბავშვური გულუბრყვილობა იქნებოდა, მაგრამ ეს სხვათა შორის...

სამწუხაროდ, ჩვენში თეატრმა (და არა მარტო თეატრმა), გაუთვითცნობიერებელ, წამხედურა ადამიანებში სხვა სახელებიც თუ ჯერ კიდევ ლამარასა და ანზორივით მასობრივად ვერ დაამკვიდრა, ყოველ შემთხვევაში ისინი, უვიცობით, თავგამოდებით მიისწრაფვიან აქეთკენ...

მე „იმპორტულ“ სახელებზე მოგახსენებთ, შეიძლება დიდად განთქმულსა და თანაც ერთობ მშვენიერზეც, მაგრამ ჩვენი ქვეყნისთვის, ჩვენი ყოფისთვის, როცა ეს სახელები სცენო-

დან კი არა, ყოველდღიურ ცხოვრებაში გვხვდება, მერწმუნე, ძვირფასო შკითხველო, ქართულ ყურთასმენას უსიამოდ ჰქრის...

არაქართველებისთვის კი ისინი ხომ სიცილისა და დაცინვის უშრეტო წყაროა, ჩვენი პროვინციულობის, ზოგჯერ კი პირდაპირ საარაკო უკულტურობის დამადასტურებელი ბეჭედ-დარტყმული დოკუმენტი...

შენივე ერშიც კი თითქმის ყოველ ადამიანს სიამოვნებას ჰგვრის შენთან შედარებით უკეთესობით თუ გამოირჩევა, თუკი შენ სამასხარაო-საბურთავებელი ხარ, შერეკილობასა და ამაზე სხვა უარესობაზე რომ აღარაფერი ვთქვათ...

განა შეიძლება სახელად, მაგალითად, მაუგლი გერქვას ან ჭუნგლი? თურმე შეიძლება, და ჰქვიათ კიდევ, თქვენ წარმოიდგინეთ, ასე თუ ისე, საკმაოდ ცნობილ პირებსაც კი...

სახელი მუდამ თან დაგყვება, ისე, როგორც გარეგნობა, პირისახე... სახეს ვერ აირჩევ, მას ბუნება იძლევა, სახელი კი ჩვენს ხელთ არის, არჩევანიც დიდზე დიდია, მაგრამ ეს იმას არ ნიშნავს, ქართველმა კაცმა, სპეციფიკური ქართული გვარის მატარებელმა, უცხოური, თუნდაც თავისთავად კეთილხმოვანი და საქმეყნოდ ცნობილი, მაგრამ შენი გვარისთვის და ჩვენი ეროვნული ყურისათვის უსაზომოდ მყვირალა სახელით თავი შეიმკო, უფრო სწორად — შეგამკონ...

და თუ ნაკლებად წინდახედულმა მშობლებმა მთელ სასოცოცხლოდ ასეთ უღელში შეგაბეს, — გამოიცვალე, ბატონო, ღვთის მადლით, ამას ახლა იმდენი ტანჯვა-წვალება არ სჭირდება, რამდენიც სჭირდება გვარის გამოცვლას ანდა, მაგალითად, სომხობიდან შენი ნამდვილი ეროვნების — ქართველობის დაბრუნებას...

„თავის მომჭრელ“ უცხო სახელობიას ჯერ კიდევ ამ ორმოცი წლის წინათ, 1940 წელს დაწერილ კომედიის გავეკარი კბილი:

ი ვ ა ნ ე: ...გლახის ბიჭს, შე, გლახა, რომის პაპის შეილივით გზრდიდი.

ნ ა პ ო ლ ე ო ნ ი: ნუ მაყვედრი, რომის პაპს ბავშვები არ ჰყავს... რისთვის ჩამოხვედი, საჩხუბრად?

ივანე: ურემს რომ ტვირთი დააწება — ჭრიჭინს დაიწყებს.

ნაპოლეონი: თუ ასეა, შენ რომ ტვირთი ამკიდე, ოცდასამი წელიწადია კურტანივით მკიდიხ და სადაც წავალ, ევანივით თან დამყვება, მაგრამ ჩემგან საყვედური ჭერ ერთხელაც არ მოგისმენია.

ივანე: რომელ ტვირთზე მეუბნები?

ნაპოლეონი: რომელზე და... ნაპოლეონი რომ დამარჯვი, ჰკუთა სად გქონდა? სირცხვილით ანკეტაც ვერ შემივსია. სად ჰინჭილეიშვილი, სად ნაპოლეონი? ნაპოლეონის მაგივრად პუჰუჰიე დაგერქმია, არ მერჩია?

ივანე: მე კეთილი გულით დაგარქვი, იცის ღმერთმა! სპირიდონმა თავის ბიჰს ბისმარკი შეარქვა და... მე რა, სპირიდონზე ნაკლები ვარ თუ? ნაპალიონი ზარბაზანივით ქუხს, შენ კი არ გინდა მამის ამაგი დაათასო...

ვისაც იუმორის გრძნობა არ გააჩნია, ვთხოვ მენდოს და დამიჯეროს: შენ ჰამლეტ დადიანი იქნები თუ ჰამლეტ ჰიპაძე, სხვის თვალში, რა ლამაზიც იყო და რაგინდ ჰკვიანიც, მაინც სასაცილოდ გამოჩნდები...

ჩვენ ახლა რუსეთთან ხშირი მიმოსვლა გვაქვს, ზოგი ცხოვრობს და მსახურობს კიდეც იქ, ზოგიც სწავლობს... უმამისსახელოდ კი რუსები: მხოლოდ „შანტრაპას“ მიმართავენ. ჰოდა, თუ ცოტათი მაინც პატივისცემის ღირსად მიგიჩნიეს, თქვენი ვინაობა გვიბოძეთ, როგორ უპასუხებ? „Гамлет Робинзонович...“ „Дездемона Гамлетовна...“ ჰში თან გვარიც, მათთვის ძნელად წარმოსათქმელი თუ მოგყვებათ...

საქართველოს ტელევიზიის ერთ-ერთი პროგრამა, ორ კვირაში, მგონი, ერთხელ რომ გადაიცემა და, აქვე ვიტყვი, ჩემი აზრით, ბევრად რომ არ ჩამოუვარდება მოსკოვის ანალოგიურ პროგრამას, — ერთ-ერთი მისი დარბაისელი მონაწილე მეორე დარბაისელ მონაწილეს მიმართავს:

— ჰამლეტ, ეგებ ცოტა რამ გვიამბოთ დანიაზე...

— სიამოვნებით, სოსო... დანია საქართველოსავით პატარა ქვეყანაა...

...ჰო, მაგრამ... მე უკვე ყურადღება გამეფანტა და ტელე-

ვიზიის ჰამლეტის კარგი, ზეპირი ქართულით ნაამბობს უკვე ყურს ველარ ვუგდებ, რა ექნა, ჩემს მეხსიერებაში შექსპირის ჰამლეტი შემოიჭრა: „ოფელიაე, წადი მონასტერში!“.

ჩემსა და ტელევიზორს შორის, ალბათ, კონტაქტი არც გაწყდებოდა, რომ...

— ბატონო ჰამლეტ, იქნებ ცოტა რამ გვიამბოთ დანიაზე...

— სიამოვნებით, ბატონო იოსებ! დანია...

როგორც ხედავთ, სულ რაღაც ერთ ასოშია განსხვავება, და ესეც უკვე საკმარისია იმისათვის, რომ თავი ვიგრძნოთ ჩვენს გარემოცვაში, ჩვენს მიწა-წყალზე და თანაც სახეზე ჩვენი უპირატესობის დამყინავი ღიმილი არ აგვესახოს.

აქვე შევნიშნავდი, რომ „სოსო და ჰამლეტი“ და კიდევ რამდენი არაჰამლეტი და არასოსო არა მარტო სატელევიზიო გამოსვლებ-საუბრებში, თითქმის ყველა სახის საჯარო ურთიერთობებში ერთმანეთს მიმართავენ... ო, რა ხანია „ამხანაგომ“ და „პატივემულომ“ განდევნა...

არა, მგონი აჭობებს კვლავ ერთი შორეული „დოკუმენტი“ შემოგთავაზოთ — ნაწყვეტი ოცი წლის წინათ, 1962 წელს დაწერილი კომედიიდან:

ქ ი ჳ ი ნ ო ბ ე ლ ი ძ ე: ეს უკვე თქვენი ბრალი არ არის, ლეონიდ... მმ... ეგებ მამის სახელი მიბოძოთ.

კ ა მ ა რ ე ლ ი: ალექსანდრე.

ქ ი ჳ ი ნ ო ბ ე ლ ი ძ ე: დიახ, ეს უკვე ჩემი ბრალია, ლეონიდ ალექსანდროვიჩ!

კ ა მ ა რ ე ლ ი: გთხოვთ „იჩობით“ ნუ მომმართავთ. ეს ძალიან ცუდია, თუმცა ჩვენი ყური ამას ისე შეეჩვია, თითქმის აღარავის ეჩოთიერება. მამის სახელით მიმართვა წმინდა სპეციფიკური რუსულია, რომელიც, სხვათა შორის, რუსებისაგან არ გადაუღიათ არც ჩეხებს, არც პოლონელებს, არც ბულგარელებს, და თითქმის არც ერთ სხვა სლავურ ერს. ჩვენ კი, ქართველებს, ისეთი რა ცეცხლი გვიკიდია, რომ ერთმანეთს მივმართავდეთ: „ყარამანიჩ“, „პილატევიჩ“, „ძუკუევიჩ“, „ბურდ-დლიჩ“, „ქაიხოსროვანა“... ჩვენი ეროვნული სახე გუშინ არ ჩამოყალიბებულა. გეკითხებით: ასეთი რა დააშავა და რატომ უნდა მივცეთ დავიწყებას ჩვენი კეთილხმოვანი, ტრადიციული

„ბატონო?“ „ბატონო გედონ!“... „ქალბატონო ნინო!“... ცუ-
დია?

კიკინობელიძე: ჩინებულია, მაგრამ ზოგიერთები
ალბათ ფრთხილობენ, ფეოდალიზმისადმი სიმპათია არ დაგვეწა-
მონო.

კამარელი: ჰმ! განა ფეოდალურ ურთიერთობას „ბა-
ტონო“ აღადგენს? რაც მიიცვალა და გაიხრწნა, მას ვერც
ღმერთი გააცოცხლებს და ვერც დიალექტიკა...

...„თუთახშიას“ ბევრმა მკითხველმა ალბათ არ იცის, რომ
ამ რომანის ავტორის ნამდვილი, ნათლობისა და ახალგაზრდო-
ბის დროინდელი სახელი მზექაბუჯია, და თუმცა იგი წმინდა
ქართულია, მისმა პატრონმა, როგორც ჩანს, ზედმეტად პრე-
ტენზიულად მიიჩნია და შეიძვალა ის „გლებურ“ კაბუჯზე;
ამით მას, როგორც პიროვნებას, და არც მის რომანს, როგორც
მხატვრულ ნაწარმოებს, სულაც არაფერი დაჰკლებია.

სხვათა შორის, მზექაბუჯ ამირეჯიბი ერთ დროს, თურმე,
მართლაც ამართლებდა ამ ბრწყინავ სახელს... თურმე-მეთქი,
რამეთუ ვერ დავიტრახებ ამის მნახველობით, გადმოცემით
კი ვიცი: როცა 1946 წლის მარტში ორთაქალის შედარებით
ადამიანური შრომა-გასწორების კოლონიიდან თავი მიკრეს ავ-
ჭალის კოლონიაში, რათა აქ უფრო მძიმე შრომით ძირფესვიან-
ნად გამოვესწორებინეთ, სწორედ მაშინ გავიგე, რომ წინაღლით
აქაური პატიმარი მზექაბუჯი, როგორც ჩანს, შრომითვე უკვე
ლოთიანად გამოსწორებული, დათასავით გაფირალებულიყო...

მე მხოლოდ იმას მივუსწარი, კოლონიის უფროსი, ტანად
დავით აღმაშენებლის მტკავლის ოდენა კაცი, როგორ ყრიდა
ამის გამო ცეცხლებს:

— დოჟლაპია მცველებო, ყველას დაგხვრეტთ, თუ სასწრა-
ფოდ არ მონახავთ და არ გაძაგრავთ... („კაცი, რომელიც და-
აკლდა ციხეს!“).

(სხვათა შორის, ათიოდე წლის შემდეგ უკვე შერისხული
ბერიას ეს ახლობელი, იმეამად თამბაქოს ფაბრიკის დაცვის
უფროსად ყოფნისას, ტომრობით პაპიროსების ქურდობა-გა-
ტანისათვის... „კაცი, რომელიც შეემატა ციხეს!“).

„შავ წიგნში“ უკვე ვწერდი, და ახლაც ამაზე კვლავ სიტყ-

ვის ჩამოგდება თითქოს აღარც ღირს, მით უმეტეს, რომ ამით სულ ერთია, მაინც არაფერი სწორდება, — ძალი ყვეს, ქარავანს ეს არ აშფოთებს, მაგრამ, რას იზამ, თუ ქართველს გული გიკვდება ჩვენი უგემოვნობის, ჩვენი უკულტურობის, ზოგჯერ კი პირდაპირ განუკითხავი სიტუტუციის დამადასტურებელი „ჟიგულით“ და „კლოზეტათი“ (ეს, ალბათ, ვიქტორ ჰიუგოს „განკიცხულნიდან“, ფრანგულ კოზეტასაგან მოწანწკარებს), „ნეგუსით“ და „კოსმოსათი“ („—სადა ხარ, ბიჭო, კოსმოს? კოსმოსა!..“), „ნორინგით“ და „ჯიუ“-თი; „უანუაკარუსდით“ და „ჯოულით“, „რენტგენით“ და „როდენით“, „შახით“ და „ტახით“, და ათობით ამისთანებით, რომლებითაც სასერიოდ ვიხდით თავს, მსგავსად „ალი კირპიჩ ბრასაი ოლლისა“, განსაკუთრებით არაქართველის თვალში.

მოზღვავედა, ამ ბოლო დროს მაინც, ისეთი „სახელები“, რომ იმ ჟმთავრესსაც ვერ გაიგებ, მისი მფლობელი ქალია თუ კაცი; თითხნიან სახელად რაღაც ასოებს, ანდა დედისა და მამის სახელების პირველ მარცვლებს აკოწიწებენ (ამით, ალბათ, ბრძენი მშობლების ბრძნული აზრით, თავიანთ თავსაც უკვდავყოფენ და თავიანთ, მეტწილად, ერთადერთ პირმშოსაც აბედნიერებენ დაბადებიდან აღსასრულამდე), ანდა უცხო სიტყვათა ლექსიკონიდან კრეფენ, — მორალი, ლომბარდი, დოტაცია (ყველა ესენი ამოწერილი მაქვს პრესიდან და სამგლოვიარო განცხადებებიდან)...

წინათ ასეთ სიმახინჯეს ერთი მედავითნეც კი მოუღებდა ბოლოს, ახლა ამას მთელი რესპუბლიკაც ვერ მორევიან, ანდა, აბა, რას მოერევა, როცა მისივე სახელმწიფო დაწესებულება, ზოგჯერ უმეტრებით, მომეტებულად კი — „ვს არის ჩემი ხალტურის“ მოსაზრებით ანაგვიანებს სახელთა კრებულთაიგულს და უდანოდ ასახიჩრებს ადამიანებს.

(ამას წინათ სამხრეთ ოსეთის ერთ-ერთი მმაჩის მუშაკი გამოიპირეს, რომელიც თავისი „მოღვაწეობის“ 30 წლის მანძილზე უქრთამოდ უბრალო ცნობასაც არ იძლეოდა და ამ გზით დიდძალი ფული დააგროვა; განა ფიქრი უნდა, თუ მას ეტყოდნენ, მაგალითად, რაღაც უცნაურზე, ეს ჩამიწერეო, მთხოვნელს გაოცების ფართო თვალებით სახეში კი არ შეხედავდა, — ხელებში, ამისათვის რას მომცემო).

როგორც შეამჩნევდით, „კულტურულ“ ქართველებში დიდი მოთხოვნილებაა ბევრ ისეთ „სახელზე“, რომლებსაც ცოტათი გაგებულნი აღმიანიც კი ძაღლებსა და მაიმუნებს თუ შეარქმევს, ამავე დროს ათასში ერთხელ თუ გაიბრჭყვიალებს ისეთი კობტა, ქართული სახელები, როგორიცაა, მაგალითად, მზექალა, მზეონა, გულთამზე, გულისა, გულვარდი, თეა, ძიძია, მამისა, ცისნამი; ქართლოსი, თორნიკე, გულადი, ლომგული, ალუდა, ვეფხია, მინდია, ბარათა, მამამზე... შოთაც კი გაიშვი-ათდა, ცოტნეს კი შეიძლება მხოლოდ წამლად შეხვდეთ სად-მე, მაშინ როცა „თემურმა“ ლამის წაგვლეკოს, და ახლა ამას ცალკე „ლენგიც“ ემატება...

დიახ, ნაცვლად იმისა, რომ ამ „თემურს“ და „ლენგს“ — საქართველოს შეიღჯერ თუ რვაჯერ ამაწიოკებელ-დამაქცევარ-ამაოხრებელს, ქართველების ასიათასობით ამომხოც-ამომ-ქლექს დღენიდაგ წყევლა-კრულვით ვიხსენიებდეთ, ჩვენ მას, პირიქით, არსებითად უკვდაქვეყოფთ კიდევ.

ეს მოგვდის ისტორიაში გაუნათლებლობით, დაუფიქრებელი წამხედურობით და, თუ გნებავთ, პატრიოტული გრძნობის, უკაცრიელი პასუხია, ფეხებზე დაკიდებითაც, შეიძლება ჩვენი, საერთოდ სულელური გულმაფიწყობით და მიმტევებლობითაც.

მართლაც რომ, სახელს შერჩევა უნდა, მთელი სიცოცხლის მანძილზე, იგი ყვავილივით უნდა ატარო, და არა კურტანივით, და თუ შენმა მზრუნველმა მოზობლებმა თავიანთი სიბრყევით თუ ცრუგანსწავლულობით ეს კურტანი აგვიდეს, გონიერების ასაკში შესვლისას მას თუ გადაავდებ, — ვინ იქნება შენი მძრახველი!

ოციანი წლების დასაწყისში, როცა ძველი ქვეყანა დაემხო და ახალი მოგვევლინა, მრავალი შემთხვევა იყო სახელის შეცვლისა, მომეტებულად ვლადიმერზე: ეს, ცხადია, ლენინის პატივსაცემად, და აგრეთვე იმის ნიშნადაც, რომ... „აჰა, ამით გაფურთხებ შენ, საზარელო ძველო ქვეყანავ!“.

(როგორც ცნობილია, ტიტე ტაბიძე და პავლე იაშვილი ჯერ კიდევ რევოლუციამდე „მოინათლნენ“ ტიცვიანზე და პაოლოზე).

რალა შორს წავიდე, ჩემმა ძმამ მეფის მირიანობა ითაკილა და იუკადრისა, და იგი ბენიტოზე გადაცვალა, რამაც მერე და

მერე... არა, ამის თაობაზე მას ჩემთვის არაფერი შემოუჩივლია, — როგორც ნაბოლარას, ოჯახში მეცხრეს, დიდი არაფერი ფასი მედო, მაგრამ ჩემითაც ვხვდებოდრი, დროთა განმავლობაში ამ „ლაშქრობამ“ ბევრი სიმწარე აწვნია: თურმე ბენიტო იტალიის, იმ დროს ახლად წამოჩიტულ დიქტატორს, მუსოლინსაც რქმევია...

ჰოდა, „რავალი“ საქმე იქნებოდა, იყო პროლეტარული მწერალი, იტალიის გარდა, ესპანეთში და სხვა ესპანურენოვან ქვეყნებში საკმაოდ გავრცელებული, მაგრამ მაინც ამ შემთხვევაში, იყო დიდი ფაშისტის სეხნია და თან ცხოვრობდნ სტალინის სამეფოში?!

დასტურ, სტალინმა პაოლო იაშვილს პავლეობა დაუბრუნა, ნატა ვაჩნაძეს... ნატო ხარო.

აბა დაფიქრდეთ, ჩემი თაობის და ცოტა ამაზე მომცრო თაობის მკითხველებო, კერძო საუბარში, თუკი რაღაც სასწაულით სტალინის გვერდით მოხვდებოდრი, რა უნდა ეთქვა მას ისეთი, რომ იგი ყოველგვარი ძალდატანების გარეშე, გულით და სულით არ მოგწონებოდა?!

ეთქვა თუნდაც კალმით ნახატი ქალისათვის, ჯულიეტა კი არა, შენთვის ბაჭაჯღანა უნდა დაერქმიათო... ჰოდა, ამის მერე, აბა, რომელი ჯულიეტა არ „გაბაჭაჯღანდებოდა?“ აკი მან იცოდა, ამიერიდან მთელი დარჩენილი სიცოცხლე ბელადისაგან სხინატყორცი თავადერილი ივლიდა, სტალინმა შემარქვაო...

იმეამად რომელი ერთი იფიქრებდა, ამ „ნათლობას“ როდისმე ყავლი გაუვიდოდა, ანდა სტალინი, საერთოდ, ოდესმე მოკვდებოდა, და თუ — დალახვროს ღმერთმა! — მოკვდებოდა, მის მიერვე დაფრთიანებული აღზრდილები აღმზრდელს ქვა და გუნდას დაუშენდნენ?!

ახლა ესეც წარმოიდგინეთ, ან გუნდაობისას რა დღეში ჩავარდებოდა ერთი ჩემი ნაცნობი, გვარად მურადოვი, რომელსაც, ბევრად ადრე ხრუშჩოვის გაკეისრებამდე, ერქვა... სტალბერ!

ეს ამხანაგი, სტალბერ მურადოვი, იძულებული გახდა თავის, ერთ დროს მქუხარე სახელისთვის ჯერ „ბერ(ია)“ ჩამოეკლო, და მერე, როცა ამ განახევრებულ „სტალ“-საც შეერყა, მარქსისტულ ტერმინს თუ ვიხმართ, ბაზისი, შემომჩივლა, არ

ვიცი, რა წყალში ჩავეარდე, კაცი მგონი, სულ უსახელოდ
ვრჩებიო...

ღიას, ერთხელ უკვე მოგახსენეთ, დროს არც უნდა გაუს-
წრო, და არც უნდა ჩამორჩე... ეს კია, მაშინ არ მიტყვამს: გას-
წრებას მაინც, მგონი, ისევ ჩამორჩენა სჯობს. დასტურ, ასე
რომ მოქცეულიყვნენ, არც სტალბერნი და არც ლენსტალნი
უსახელოდ არ დარჩებოდნენ.

გარდა მეცნიერების ამ დარგის — ონომასტიკის — სპეციალ-
ლისტიებისა, ბევრს ეჭვი არ ეპარება, რომ, მაგალითად, ნატა-
ლია და ნიკიტა წმინდა რუსული სახელებია...

არა! რუსებს, ჩვენი არ იყოს, ალბათ როგორც მართლმადი-
დებლებს, ცოტა აქვთ საკუთარი სახელები: Вера, Любовь;
Надежда; Святослав, Владимир, Владислав და კიდევ
რამდენიმე სხვაც... ამ „რამდენიმე სხვაში“ ლიუდმილა კი რუ-
სულია, ოღონდ რუსლანი, ჩვენი გორგასლანისა არ იყოს, ცო-
ტა გადასხვაფერებული სპარსული არსლანია (ლომი)... ნატა-
ლია ლათინურია და მშობლიურს ნიშნავს, ღვიძლს; ნიკიტა კი
ბერძნულია და საწყისს გამარჯვების ღმერთ ნიკა-ნიკედან
იღებს.

ნატა შემოკლებული ნატალიაა, და სრულიად ბუნებრივია
ქართულისათვის. მიმართვა-დაძახებისას, უფრო მეტად სოფ-
ლად, ქართველებს მეტწილად გვეძალება-გვეადვილება „ო“-ზე
დამთავრებული სახელები: ლადო, სანდრო, მარო, ზაქრო, სერ-
გო... ამ მიზნით ზოგჯერ, კერძოდ იმერეთში, თანხმოვანზე დამ-
თავრებულ სახელს მიმართვისას „ამრგვალებენ“ ხოლმე: მი-
რიანო, ნიკოლოზო, დავითო...

ნატოც ასეთი სახეცვლილებაა ნატასი; და თუ არ ვცდები,
წინათ იგი ნათლობის სახელად არც იწერებოდა. ასე რომ, პო-
პულარობის უკვე ზენიტში მყოფს, უკიდევანო საბჭოთა ქვეყ-
ნის ყველა ერისათვის საყვარელ ნატად ცნობილ ნატა ვაჩნაძეს
არ უნდა შეეცვალა იგი ნატო ვაჩნაძეობაზე...

...და რომ სტალინი არა, რასაკვირველია, არც შეიცვლი-
და, — ო-ო, აბა, ვის, ვიმეორებ, ვის არ გააბრიყვებდა, ვის არ
წასძლევედა სული, რომ ამ უღმერთო ღმერთ-კაცს შენთვის წა-
მიერი ყურადღება დაეთმო, და ეს არ დაგეფასებინა და არ გეგ-

რძნო თავი უ-უბედნიერეს ადამიანად მსოფლიოს ყველა ცოცხალთა შორის..

(აქვე გზად იმასაც შევნიშნავდი, რომ კარგმა, დიახ, კარგმა პოეტმა ალიო მაშაშვილმა ბევრი რამ წაავო, როცა მაშაშვილს — იმ დროს ერთობ ცნობილ ფსევდონიმს — ეუკუ ჰკრა და მკითხველებს უეცრად „ვიღაც“ მირცხულავად გამოეცხადა).

ერთმა ჩემმა ახლო ნაცნობმა მითხრა, აი შენ ასე თავგამოდებით რომ ებრძვი საზოგადოებაში, პრესაში, ტელე და რადიოგადაცემებში გამოტანა-ხსენებას შინაურულ, კნინობით-მოფერებით-საალერსო სახელების „გამოფენა-გაყიდვას“, ოცდაათ-ორმოც-სამოცი წლისან ქეთინო-თამარიკო-მარიკებს, რეზოებს და დათოებს, გიებს და გიგებს, და კიდევ რამდენ ამისთანას, თან სერიოზულ არგუმენტსაც იშველიებ, — ასეთი ფამილარობა, ურთიერთობის გაუბრალოება, დისტანციის მოსპობა უმცროს-უფროსს შორის (ახლა არცთუ ისე იშვიათია, როცა მცირეწლოვანი შვილებიც კი მშობლებს და ბებია-ბაბუებს სახელით მიმართავენ და... ამათი მხრიდან არავითარი უარყოფითი რეაქცია, ვითომც აქ არაფერი!) კიდევ უფრო აქვეითებსო ზრდილობა-აღზრდილობის ჩვენში ისეც უკვე ძალზე ჩამოქვეითებულ, ასე ვთქვათ, რეიტინგს, — შენზეც თქვეს, კიტაც ხომ კნინობითი-მოფერებითი სახელია, და თუ ის კაი კაცია, რატომ თავადაც ნიკიტად არ იწერებაო.

ო, ეს, თქმა არ უნდა, ერთობ მძიმე ბრალდებაა, მით უმეტეს, თუ მართლაც „კაი კაცი ხარ“, თანაც იმ კაცის მიმართ, რომელიც ყოველთვის ცდილობდა და ცდილობს, იცხოვროს ისე, როგორც წერს (ეს მისთვის სიძნელეს არ წარმოადგენს), და წეროს ის, რასაც ფიქრობს (ეს უკვე ძნელზე ძნელია, მაგრამ ნაწილობრივ მაინც ამას თითქოს ახერხებს და სულ ლაფში არ ისერება).

დიახ, პასპორტის მიხედვით მე ნიკიტა ვახლავართ, ოღონდ ისეთი ნიკიტა... ერთხელ, ალბათ, სახუმაროდ, თბილისიდან ჩემს სოფელში, ფარცხნალში, სადაც დავიბადე და ზაფხულობით იქ ვიზრდებოდი, წერილი გამომიგზავნეს, მიერთვას ნიკიტა ბუაჩიძეს საკუთარ ხელშიო... ფოსტალიონს კი ბარათი თა-

როზე ამოედო, ნიკიტა ხარაძე — კი, მაგრამ ნიკიტა ბუაჩიძე?.. ასეთი ჩვენთან არავინ არისო.

ჩემს ნიკიტობას მე არასოდეს არ ვემალავდი, და არც მერ-ცხვინებოდა მისი: მწერალთა ცნობარში ნიკიტაც არის ჩაწერი-ლი, რუსულად გამოცემული ყველა ჩემი წიგნის ბოლო გვერდ-ზე სწორედ ასეც ვეცნობი მკითხველს...

(თითქოს სასაცილო დეტალი: როცა ნიკიტა სერგის ძე ზრუშჩოვი თავის ვულკანისებრ ენერგიას ეტნასავით თავზე გვაფრქვევდა, ნაცნობი შემანქანე მოსკოვში, ძველი ყაიდის რუსი ინტელიგენტი, ანა ივანოვნა კრავჩუნოვსკაია, ერთხელ შეეცადა, ნიკიტა სერგეევსკიობით მომმართა და უშაღვე ენაზე იკბინა:

— Ой, простите, простите, Никита Михайлович, ей-Богу, я не хотела оскорбить Вас!

...და ეს იმ წლებში, როცა ნიკიტას პოლიტიბიუროს ექვი არ ეპარებოდა, რომ მის შესაქვს, სერგეიჩს, ხალხში დიდი ავტო-რიტეტი შეუქმნა).

მე იმ დროს დავიბადე, როცა საქართველოში კიტა აბაშიძეს ვეებერთელა სახელი ჰქონდა. მამაჩემმა სწორედ მის პატივსა-ცემად დამარქვა ეს სახელი, მაგრამ რაკი სახელთა საეკლესიო წიგნში იგი არ აღმოჩნდა, და აღმოჩნდა მსგავსი ამისა — ნიკი-ტა, ეს ჩაიწერა კიდევ მეტრიკაში.

ღიახ, „კიტა“ არც კინობითია და არც მოფერებითი; ნაძა-ლაღვეად თუ გამოენახება მას ასეთი ფორმა, მაშინ... კიტკო, კიტუნი, ანდა მსგავსად რუსული ნატაშა-პავლუშასი — კი-ტუშა...

რას გააწყობ, მეტი გზა არ არის, უნდა შევთანხმდეთ: კიტა ცალკე, დამოუკიდებელი სახელია, და რომ ეს ასეა, ამას ადას-ტურებენ ჩემი თანამოსახელენი, და რაც მთავარია, ჩემზე აღ-რე დაბადებულები: დიდებული ქართველი, საუბედუროდ, ნა-ადრევად დაღუპული ფილოსოფოსი კიტა მეგრელიძე და ასე-თივე დიდებული ქართველი, საზღვარგარეთ ფართოდ ცნობი-ლი ლექსიკოგრაფი და სამი შვეიცარიელი ქართველოლოგის აღმზრდელი კიტა ჩხენკელი.

ექვი არ მეპარება, რომ ეს „კიტებიც“ კიტა აბაშიძისადმი სიყვარულით გამოეცხადნენ სამზეოს, ოღონდ ეს კი აღარ ვიცი, მათმა მამებმა რა გზებით მოახერხეს შვილები არასაეკლესიო სახელით ჩაეწერათ საეკლესიო წიგნში...

სხვათა შორის, თითქოს უცნაური კია, თვითონ თავადი კიტა აბაშიძის ნათლობის სახელი ივანეა; უნდა ვივარაუდოთ, რომ, ალბათ, არც მას ჩაუწერეს 1870 წელს დაბადების მოწმობაში ის სახელი, რომლითაც შემდეგ ასე ფართოდ გაეცნო მთელ საქართველოს.

ისე კი, ბარემ ამასაც ვიტყვოდი, ამ სახელს ჩემთვის სახარბიელო რამ არაფერი მოუტანია, სახარხარო კი — მრავალზე მრავალი: რამდენი შემთხვევა მახსოვს, სულ ბოლო დროისაც კი, როცა გამცნობს ჩემი თავის წარდგენისას უნებლიეთ წამოსცდენია: „იცნობდეთ, დრამატურგი კიტა აბაშიძე“... და ამასაც, ესე იგი გასაცნობელს, ცხადია, ნაკლებად გათვითცნობიერებულს, თუმცა, შეიძლება, უნივერსიტეტდამთავრებულსაც, ისეთი ამბით ჩამოურთმევია ჩემთვის ხელი, თითქოს იგი მთელი თავისი დღე და მოსწრება სულ ამას ნატრობდა, რომ ეს ღირსსაცნობი დრამატურგი კიტა აბაშიძე როგორმე ეხილა:

— გიცნობთ, ბატონო!.. სახელით, აჰა, არ გიცნობთ?! არ შენახეთ, თვარა... კიტა აბაშიძეს?! თქვენ ვინ არ გიცნობთ!..

აი, ასე „იწიხლება“ ხოლმე პატარა კაცი, მისი „მონათესავე“ დიდი აღამიანის აჩრდილითაც კი...

ისე, ვისაც იუმორის გრძნობა მოეპოვება, ასეთი „დაწიხლება“ მასში მხოლოდ თავშესაქცევ ღიმილს თუ გამოიწვევს: დრამატურგს, საერთოდ, შექსპირის გარდა, არა მგონია, იცნობდეს ვინმე...

ოღონდ... ღირდა კი ამდენი მიღებ-მოდება ჩემს „მოფერებით“ სახელზე, ანდა, საერთოდ, სახელებზე? მაინც ვფიქრობ, რომ ღირდა, აკი ჩვენ ისე უზომოდ „გაენათლდით და გავკულტუროსნდით“, რომ ახლა ჩვენს ყურებს უფრო ჯემსი და პეპსი ელამუნება, ვიდრე...

ზოგიერთი მატრაკვეცა ამჟამად აღარც ქეთევანობას კადრულობს, მაგრამ ამაზე უფრო დასანანი ის არის, რომ თუ ეს მატრაკვეცა საზოგადოებაში ცოტათი მაინც რაიმეთი გამოიჩნევა წამხედურა მიმდევრები მას ლეგიონიც კი გამოუჩნდება ხოლმე...

ღიახ, გარდა ქეთევანისა, სხვა დიდებული, გაუხუნარი სახელებიც იღვენება არა მარტო ქეთებით, მარიკებით, გიებით, ღათობით...

კი, მაგრამ... ნუთუ ჩვენს დროში ჩვენთვის ისე ხელწამოსაკრავნი, დასავიწყებელ-შეშარცხვენელნი გახდნენ ქეთევან წამებულის, წმიდა მარიამ, დავით აღმაშენებელი, წმიდა გიორგი?!

ზოგს, ალბათ, ღრმად სჯერა და ეჭვიც არ ეპარება მასში, თუ იგი, მაგალითად, ქეთევანის ნაცვლად ქეთის მიიტყუებდეს, ან მარიამი — მარიკას, ანდა უკვე ასაკოვანი დავითი ღათოს არ მოეშვება, ან კიდევ სამოც წელს მიტანებული გიორგი — გოგის, რევაზი — რეზოს, გრიგოლი — გიგას, აკაკი — კაკოს, იოსები — სოსოს, ზურაბი — ზურას; თენგიზი — ვიზოს, ამით იგი ხალხის თვალში უფრო ღამაზიც გამოჩნდება, უფრო ნიჭიერიც და, რაც მთავარია, ორჯერ და სამჯერაც უფრო ახალგაზრდად მოგვეჩვენება...

ასეთი „მეტამორფოზი“... ეჰ, ჩავიქნით ხელი და ვთქვათ არტისტს, კიდევ პო, ასე თუ ისე მიეტყუება, მაგრამ იგი სულაც არ შეშვენის არამსახიობთ, — მეცნიერს („ვანიჩქა ჯავახიშვილი“, „სიმონიკა ჯანაშია“), მწერალს („კოწო გამსახურდია“, „გიგა რობაქიძე“)...

ო, სხვა პროფესიების ჩამოთვლით თავი რომ არ მოგაბეზრო, მკითხველო, თუ არ შემომწყრები და კითხვას თავს არ დაანებებ, ერთ „ისტორიულ უკანსვლას“ კვლავ შემოგთავაზებ: ხანმოთეულისა და ხანმოუთევლის მცირე დიალოგს დიდი ხნის წინათ დაწერილი და დადგმული პიესიდან:

ბ ა ჳ უ ლ ა : ბატონო ლეონიდე, აი, როგორც იქნა, დამობეჭდეს ეპიგრამები!

კ ა მ ა რ ე ლ ი : მართლა? მომილოცავს, დიდად გამახარე... აბა! (კითხულობს):

წიგნების გროვას ისე უმზერდა,
თითქოს მგლებია შიგ გარეული, —

სამეცნიეროდ ემზადებოდა
კაცი ფეხბურთზე გადარეული...

უცნაური ეურნალია, სახატავი რვეულის ოდენაა, სიმართლე კი, რაკი სატირულია, ხანდახან მაინც გაეპარებათ ხოლმე...

გაცვია ფრენჩი და გაცვია კიტელი, —
მაინც ხარ ლენჩი და მაინც ხარ ტიტველი...

„ბაჭულა მაპარაძე“... მმ...-ეს მითხარი... შენ ილიკო ჭავჭავაძე გაგიგონია?

ბ ა ჭ უ ლ ა: ილიკო?! ჭავჭავაძე? არა.

კ ა მ ა რ ე ლ ი: ილია ჭავჭავაძე?... ო-ო, გატყობ, ჩემი შეკითხვა ლამის შეურაცხყოფად მიიღო, მაგრამ ეს ორივე ერთი და იგივე პირია, სამოცდაათი წელიწადი ილიას თავისიანები, მარტო ძალზე ახლობლები, ილიკოს ეძახდნენ, მაგრამ იგი, როგორც ეს ჭკვიანსა და დაკვირვებულ პიროვნებას შეჰფერის, საზოგადოებას, როგორც პოეტი, ოცი წლის ჭაბუკი კი, ილიად წარუდგა. ამით მას, სხვათა შორის, ნალხის სიყვარული ერთი ბეწოც არ დაჰკლებია... შენ კი, ბაჭურის ნაცვლად, ბაჭულა მიგიწერია. დიდი უტაქტობაა, როცა ბექდვითი სიტყვის საშუალებით მკითხველს ეცნობი იმ შინაურული, საალერსო, კინობითი სახელით, რომლითაც დედა აკვანში მოგმართავდა, ახლა კი ცოლი ლოგინში გეძახის, თუმცა... აბა მაგალითი ვისგან უნდა აიღო, როცა ჩვენი პრესა, ეკრანები, აფიშები აჭრელებულია რეზობით, გოგიებით, სოფიკოებით...

ბ ა ჭ უ ლ ა: რა მექნა, ასე მიცნობენ და...

კ ა მ ა რ ე ლ ი: ასე გიცნობდნენ მთაწმინდაზე, როცა კოჭობანას თამაშობდი. ამიერიდან სტრიქონს არ წავეკითხავ შენსას, თუ კიდევ...

...დიახ, გვარი და სახელი თავისთავად ვერა და ვერ აგამალლებს, ვერ გაგამშვენებებს, ისინი თვითონ უნდა აამაღლო და გაამშვენებრო შენი კეთილი საქმეებით, შენი საერო ღვაწლით და რუღუნებით...

იყო დრო, ჩიბურდანიძე საქართველოში ერთობ საოხუნჯო გვარად ითვლებოდა, ახლა კი, როცა ეს გვარი შემოგვსმება, მისდამი პატივისცემით იმსკვალები...

ვისაც აკადემიკოსი დოლიძე ახალგაზრდობიდან ახსოვს, დამიდასტურებს, რომ მის მეფურ სილამაზეს სულ ოდნავაც ვერ ჩრდილავდა დღეს ასე სოფლურად მიჩნეული, გლეხუჭური სახელი: ისიდორე...

სხვათა შორის, რეზიკო-თამრიკოებს და მრავალ მათ დამიკო-ძამიკოებს, ამ „გადასრულწლოვანებულ ალუებს“, ავისა და კარგის გამრჩევო მკითხველო, ამჟამად ხელმეორედ ვახედებ საზოგადოებრივ სარკეში, მაგრამ, გულწრფელად გამოგიტყდებით, არა მგონია, ამან რაიმე შედეგი გამოიღოს, დადებითი, ცხადია.

აი, ჩვენ რომ დანია ვიყოთ, და რომ გვეკონდეს დანიელების... ეე... მმ...

ერთხელ კოპენჰაგენში, მისმა მერმა თვალი შეასწრო, ზოგიერთი მოქალაქე, გზის შემოკლების მიზნით, ერთ მონიშნულ ადგილას, გაზონზე გადადიოდა... მეორეჯერაც შენიშნა... კვლავაც შენიშნა და... მაშინ ქალაქის მამამ იმ ალაგას საშუალო კაცის სიმაღლის სვეტი ამართა ასეთი წარწერით: „ბილიკი ვირებისათვის“.

ჰოდა იმ დღიდან იმ ბილიკზე არც ერთ „ვირს“ აღარ გაუვლია და არც ერთ „ვირს“ სურვილი არ აღძვრია, რომ ის წარწერა ჩამოეგლიჯა და... ბილიკი ისევ მწვანე ბალახით შეიმოსა.

სამწუხაროდ, მტკიცედ არ ვიცი, სად არის დანია, გამიგონია კი, მგონი ევროპაში უნდა იყოს...

ვფიქრობ, შეამჩნევდით, აქამდე, სახელებთან დაკავშირებით, რადიო-ტელევიზიასთან ერთად პრესასაც ვკიცხავდი, ცხადია, ქართულ პრესას, რომელიც არათუ რევოლუციამდელი, — ომამდელი ჩვენი პრესისგანაც განსხვავებით, ამის მერე ჩვენი საერთო, ყოფითი კულტურის, ალბათ, უსაშველოდ „ამალღების“ გამო, თავის ფურცლებზე უხვად მასპინძლობს და ხელს უწყობს ათობით ქეთი-გიების შინაურულ კოპწიაობას...

ჰოდა, ვიფიქრებდი განა, რომ საქართველოს პირველი რუსული გაზეთიც, რომლის მუშაკები, რაც, ბუნებრივია, რუსული კულტურის სულით უფრო იქნებოდნენ გამსკვალულები,

ვიდრე ქართულით, — და მაინც, ამ სიგლახეს ქართულ გაზეთებს დაესესხებოდნენ?!

რუსუდან ფეტვიაშვილის სახელ-გვარი ახლა, აბა ვის არ გაუგონია, და იგი ჯერ თუმცა მხოლოდ 14 წლისაა, საზოგადოებას მაინც არ ევლინება, „მე პატალა ლუსიკო ვალო“, მაგრამ „Заря Востока“ მას მაინც დაუინებით „რუსიკოდ“ წარმოგვიდგენს.

მაგრამ ეს არაფერი! უფრო „არაფერი“ ის არის, რომ ამავე გაზეთში შეგეძლოთ ამოგეკითხათ: „Заслуженный артист Авто Махарадзе“, „Режиссер Авто Варсимашвили..“

Авто, Авто...

ჯერ ქართულადაც კი უცნობილესი და უსაყვარლესი, შოთასეული ავთანდილის შეჭრა-შემოკლება, მე თუ მკითხავთ, საერთოდ, დიდი სირცხვილია, რუსულად ხომ კიდევ უფრო მეტი სირცხვილია, ავთანდილს „ავტომაშინასთან“ რომ აკავშირებენ...

ბევრი არაფერი დაუშავდებათ ჩვენი პრესის მუშაკებს, როგორც ქართულისას, ისე რუსულისასაც, 1980 წელს მოსკოვში გამოცემული ნ. ა. პეტროვსკის ჩინებული წიგნიდან ამოღებულ ამ ციტატას თუ დაიხსომებენ და იხელმძღვანელებენ კიდევ:

«Уменьшительно-ласкательная форма в отличие от полного имени, носящего официальный характер, служит для называния человека в быту, в кругу семьи, в кругу друзей, товарищей.»

(„კნინობითი-მოფერებითი სახელობითი ფორმა სრული სახელისაგან იმით განსხვავდება, რომ იგი ოფიციალურ ხასიათს ატარებს, და მას მიმართავენ შინაურობაში, ოჯახში, მეგობრებისა და ამხანაგების წრეში“).

(გ ვ ი ა ნ დ ე ლ ი მინაწერი: ჩემი ვარაუდი, სამწუხაროდ, გამართლდა: - ამ „შეგონების“ გამოქვეყნების დღიდან საკმაოდ ბევრი დრო გავიდა, მაგრამ ამ ხნის მანძილზე არც ერთი ქართველი დედიკოს არც ერთმა ქართველმა შვილიკომ დანიელებისგან მაგალითი არ აიღო, ალბათ, ვაითუ ჩემს დიდ ქკუასა და ჩემს გონიერულ არჩევანში ეჭვი შეიტანონო და... არა და არა, ვირიდან არ ჩამოხტა და ბედაურზე არ ამხედრდა... ასე რომ,

უნდა ვიმედოვნოთ, ამ მხრივ საქართველო მალე, შეიძლება, სულ ერთიანად გადაიქცეს სრულწლოვანთა საბავშვო ბაღად...

ერთ გაზეთში რომელიღაც სტატიის ავტორის გვარ-სახელი ამოვიკითხე: „ფილოსოფოსი გია კოლია“. ჰოდა, თუკი ფილოსოფოსიც (!) ვერ ელევა „ბიჭო, ვისი ხარ, მალხაზის“, სხვა არაფილოსოფოს „მალხაზებს“ რალა მოეთხოვება?!

ჩემს წერილს მართლაც მეცნიერი და მართლაც ცნობილი ლექსიკოგრაფი მიხეილ ჭაბაშვილი უმალ გამოეხმაურა:

„...მომიტევონ ჩვენმა ცნობილმა მწერლებმა, რეჟისორებმა, მსახიობებმა, მეცნიერებმა, მაგრამ, როდესაც მათი სახელები შემხვდება ასე შემოკლებულად — ვანო, რეზო, გოგი, გია, გიგა, დათო, სოსო, ლადო, ქეთი, მარიკა, სოფიკო... — ყოველთვის მებადება კითხვა: რა უშლის ხელს, რომ გვარის წინ მათ მაგივრად ეწეროს: ივანე, რევაზ, გიორგი... ქეთევან და ა. შ.

უცნაურად არ მოგვეჩვენება, რომ ვინმემ ეკატერინე გაბაშვილი კატოდ მოიხსენიოს ან ივანე ჭავჭავაძე — ვანოდ, ხოლო ზაქარია ფალიაშვილი — შაქროდ? არადა, შინაურები ალბათ ასეც ეძახდნენ მათ“. (გაზეთი „ახალი საქართველო“, 23.11.90).

არა მგონია, ეს ანდა ამის მსგავსი სტრიქონები სადმე ან როდისმე წაეკითხათ, მაგრამ მაინც, როგორც ჩანს, ეს მშვენივრად იციან რუსუდან ფეტვიაშვილის მშობლებმა...

ო-ო, მათ განა მარტო ეს იციან!

მანანა და ვახტანგ ფეტვიაშვილების მსგავსთა საქართველოსათვის მოსავლენად მზად ვარ დღე და ღამე ორივე მუხლზე დაჩოქილმა შეუსვენებლივ ვილოცო, და თუ ისინი მრავლად მოგვევლინებოდნენ, მაშინ ქართველების ბედს, მათივე სამშობლოში, ერთი გადამთიელიც ველარ დაჰყეფდა...

...რუსუდანი მათი პირველი შვილია, და თუმცა უკვე ორი წლისას გამოაჩნდა მას ხატვის ნიჭი, მშობლებმა, ასიათასობით სხვა უგუნური ქართველსავით როდრ გადაწყვიტეს, მორჩა, გათავდა, ეს ერთიც გვეყოფა, თავისი ნიჭიერებით იგი ათ ბავშვსაც კი აიწონის და ახლა ავდგეთ და მარტო მისი ნიჭის გაფურჩქვნაზე ვიზრუნოთო...

არა!

პატარა რუსიკოს სამი და-ძმა კიდევ შემატეს და... სულ აგერ ახლა, ორიოდ წლის წინათ, მეხუთეთითაც გააბედნიერეს შვილები, საკუთარი თავიც და საქართველოც, თუმცა დედას თამამად შეეძლო „ხანდაზმულობა“ მოემიზებებინა (სულ უფროსს და სულ უმცროსს ერთმანეთისაგან 12 წელიწადი აშორებს).

ღიახ, მანანა აბრამიშვილი — აი, ვინ არის ჩვენი. დროის ნამდვილი ქართველი მანდილოსანი,

და ვახტანგ ფეტვიაშვილი — აი ვინ არის ჩვენი დროის ნამდვილი ქართველი ვაჟკაცი!

კიტა ზუაჩიძე

1982 წელი

პოსტსკრიპტუმი: მაშინაც, კი, როცა ეკლესიები ლამის ბოსლებად აქციეს და ანაფორიანი მღვდელი ქართულ მიწაზე ისეთივე იშვიათი სანახავი იყო, ვითარცა ქართულ ცაზე მფრინავი თევზები, ბევრი ქართველი თავის ბავშვს ნათლავდა მაინც, მალულად ნათლავდა...

საბედნიეროდ უკვე დრო დაგვიდგა ისეთი, როცა ტელეეკრანზე მღვდელმსახურთ უფრო ხშირად ვხედავთ, ვიდრე რაიკომის მდივნებს...

ასე რომ, აწი შიშის გარეშე, საზეიმოდ მოვინათლებით ხოლმე, ოღონდ ამ ნათლობას წინანდელივით არაფრის მთქმელი ფორმალობის ელფერი არ უნდა დაჰკრავდეს: უპირველეს ყოვლისა, ნათლობის სახელს იურიდიული ძალა უნდა მიენიჭოს.

რასაკვირველია, საეკლესიო კალენდარი — სახელების დავთარი ახალი, კობტა, გონმოსაწონი ქართული სახელებით უნდა შეივსოს და გამდიდრდეს.

1990 წელი

• •

გვიანდელი დანართი (1990 წლის დეკემბერი): ვფიქრობ, მკითხველისთვის ინტერესმოკლებული არ უნდა იყოს იმის გაგება, რომ წიგნის ეს ნაწილი, რომელიც გაზეთ „კომუ-

ნისტში“ დაიბეჭდა (4.11.90.), არ არის სრული: მას დაბოლოება აკლია, ურომლისობაც, ავტორის მტკიცე აზრით, წერილს ახეიბრებს...

როცა ტელეფონით შეხმიანებისას („თქვენი „ქეთი“ დიდად მომეწონა“) შეიტყო ჩემი ეს გულისწუხილი „ლიტერატურული საქართველოს“, ასე ვთქვათ, მეორე რანგის ხელმძღვანელმა, — გამოგვიგზავნეთ, ჩვენ დავბეჭდავთ... და მეც არ დავაყოვნე და უმაღვე ვაფრინე ელიზბარ ჯაველიძის სახელზე

ბატონო რედაქტორო!

მიხეილ ჭაბაშვილის განმარტებით, კინოლოგია არის მეცნიერება ძაღლების შესახებ, კინოლოგი კი მეძაღლე—მეცნიერია...

სამწუხაროდ, ამჟამად თბილისში ამ დარგში ჩვენ არც ერთი მეცნიერი არ მოგვეპოვება (ჩემი ყმაწვილობის დროს კი იყო — პაჭუ ჟორდანიას, რომელიც, მახსოვს, პაოლო იაშვილსა და მის სეტერს ემეგობრებოდა).

სწორედ ეს გახლავთ მიზეზი იმისა, რომ ვერა და ვერ დავადგინე, რა მეცნიერული მიზნით აჭრიან ხოლმე ზოგიერთი ჭიშის ძაღლს კუდს; კუდი ხომ ძაღლისათვის ასე დიდად საჭირო ორგანოა; კუდით აბეზარა ბუზებსაც იგერიებს და მისი ქიციანით რას არ გამოხატავს: პატრონისადმი თავდადება-ერთგულებას, სიყვარულს, ლხენას, ალერსს...

აი გუშინ, 4 ნოემბერს გაზეთ „კომუნისტში“ დაიბეჭდა ერთი თავი გამოსაცემად გამზადებული, „სპონსორმაძიებელი“ ჩემი „შავზე შავი წიგნიდან“: „ქეთი, თემურ-ლენგი, კოსმოსა და სხვები“...

ჰოდა, მერწმუნეთ, კუდი რომ მქონოდა, წინააღმდეგობით რედაქციისაში, ზღვარს გადასული სიხარულით და პირთამდე სავსე მადლიერების გრძნობით მეც უეჭველად გავაქიციანებდი, როგორც უბედნიერესი ავტორი: აკი ეს იყო ჩემს უხანგრძლივეს, თუმცა დროდადრო წყვეტილ, ლიტერატურულ ცხოვრებაში პირველი შემთხვევა, როცა (გთხოვთ გამოიჩინოთ სულგრძელობა

და, როგორც რედაქტორი, ამისთვის ნუ გამინაწყენდებით და ნურც ამ სტრიქონს ამოშლით)... როცა ჩემს ნაწერს რედაქტორის, როგორც წესი, ქავილს მიჩვეული მარჯვენა ხელი (ცხადია, თუ ცაცია არ არის!) ამჯერად ჩემს წერილს სულაც არ შეხეზია, და როცა საღამოს რვა საათზე კორექტურის გასწორების მერმე სტამბიდან შინ დავბრუნდი, ჩემს თვალს საოცარი კმაყოფილებისა და აღმაფრენის ცრემლი მხოლოდ განთიადისას შეაშრა.

...და როცა დილის რვა საათზე მე-9 სააქადმყოფოს გაქუცულ ბაღში მდებარე ჟურნალ-გაზეთების კიოსკში თავმომწონედ მთელი ბლუჯა, სამ-სამ კაპიკიანი „კომუნისტი“ შაურ-შაურად შევიძინე...

ო-ო, ცრემლის ნიაღვარი ახლა იკითხე, თურმე, ბედკრულო ავტორო: ღამის, ალბათ, პირველ-ორ-სამ საათზე, როდესაც რედაქტორის (ან მისი მოადგილის) გონება უფრო ფხიზლობს, ჩემი „ქეთ-თემურ-კოსმოსას“ არცთუ ისე გრძელი (ორგვერდიანი!) „კუდი“ სულ ერთიანად შეეჭრათ და ამოეგდოთ.

ასეთ შემთხვევაში დალოცვილებს ბარემ „თავიც“ წაეჭრათ, აკი წერილის დასაწყისი — „სომხებს საკუთრივ სომხური სახელი უამრავი აქვთ, და ეს არა მარტო ჩვენთან შედარებით“... — უშუალოდ კავშირშია დასასრულთან.

აი, ეს შერისხული დასასრულიც (თუ თქვენც კრამოლად არ მიიჩნევთ, იმედი მაქვს, დაბეჭდვაზე უარს არ მეტყვიოთ):

ალბათ შენიშნავდით, ჩემი ნაწერის ამ მონაკვეთში შავ ქვებსა და თეთრ კენჭებს ხან აქეთ ვისვრი, ხან იქით, ზოგჯერ პირდაპირი მისამართით, ზოგჯერ თითქოს უმისამართოდ, და თუ ეს ცოდვად ჩამეთვლება, რაკი დავაშავე, ბარემ მას ერთ ცოდვას კიდევ მივუმატებ და სახელებზე სჯა-ბაასს იმით დავამთავრებ, რითიც დავიწყე: სომხებს საკუთარი სომხური სახელები უამრავი აქვთ-მეთქი; ასე განსაჯეთ, მათი ეს სიმდიდრე ოთხ ტომსაც კი შეადგენს...

ჰოდა, სომხები რუსთაველის სომხობას სულ იოლად ამტკიცებენ: შოთა ოდნავ შებრუნებული ამოტიოა.

ამას, რასაკვირველია, ბევრი კრიტიკი არც უნდა, ეს ისეთივე „მეცნიერული“ საბუთია, როგორიც არის მათივე ანეგ-

დოტური მტკიცება, ღვთაებრივი ჯუზეპე მერლი-ს სომხობი-
სა, რომლის ნამდვილი გვარი თურმე, ნუ იტყვით, ალახ-მერ-
ლი-ანი ყოფილა.

ჩემი ბევრის მომთმენი მკითხველი ახლა მაინც, ოდნავ მა-
ინც რომ შეეასვენო, გასართობად, მხოლოდ, მხოლოდ გასა-
ართობად მინდა მათებური, სომხური ქეშმარიტების და-
სადგენად მათივე ამ მეთოდით ვისარგებლო და მათ, სომ-
ხებს, ერთი დიდი კაცი „წავართვა“...

ეს გახლავთ ლორის-მელიქოვი, გრაფი, მეფის რუსეთის გა-
მოჩენილი სახელმწიფო მოღვაწე, რომელიც თითქმის ზუს-
ტად ასი წლის წინათ, სხვადასხვა გუბერნიაში გენერალ-გუ-
ბერნატორობიდან ვეებერთელა იმპერიის შინაგან საქმეთა მი-
ნისტრობამდე ამაღლდა, ერთხანს კი, მართალია, არცთუ დიდი
დროის მანძილზე, მთელი რუსეთის დიქტატორი — სომეხი კი
არა... ქართველი იყო.

დიახ, ქართველი!

საბუთი? ინებეთ: მელიქი არც სომხური სიტყვაა და არც
ქართული, არაბულია და ნიშნავს გამგებელს, მმართველს სოფ-
ლისას, ქალაქისას, პროვინციისას... ლორე ერთ დროს სწორედ
ქართულ პროვინციად ითვლებოდა... ლორის, ლორესი — ნათე-
საობითი ბრუნვაა ქართულში; მაშასადამე, ლორის მელიქი —
ლორის გამგებელი.

მაგრამ ეს კიდევ არ არის მთავარი; მთავარი ის გახლავთ,
რომ 1825 წელს დაბადებულ ამ ლორის-მელიქოვს სახელად
მიხეილი შეარქვეს, — არათუ მაშინ, ეს სახელი ახლაც კი იშ-
ვიათია სომხებში, თუმცა ბოლო დროს მათთან, ჩვენი არ იყ-
ოს, ერთობ მოძალდა არტურები, ალბერტები, რობერტები, ედ-
უარდები, — მიხეილს კი იშვიათად სადმე თუ წააწყდებით, ჩვენ-
ში კი მიხეილი ისეთივე ჩვეულებრივი, ფართოდ გავრცელე-
ბული სახელია, როგორც მათთან, ვთქვათ, არშაკი ან ტიგრანი.

ჰო, მაგრამ, სიცილის მოყვარულო ჩემო მკითხველო, არც
ეს არის სულ მთავარი: მთავარზე მთავარი ის არის, რომ... ამ
მიხეილის მამას ერქვა... ტარიელი!

ეს ტარიელი კი დაიბადებოდა, სულ ცოტა მე-18 საუკუ-
ნის მიწურულს...

მერე? სომეხი და ტარიელი?! თანაც რა დროს? როცა სო-

მეხი თვალისჩინივით უფრთხილდებოდა თავის გრიგორიანულ სარწმუნოებას და თავის გრიგორიანულ, ასარჩევიდან ასობით ასარჩევ სომხურ სახელებს!

— დიახ, Граф არა Трдат Смбытович Лорис-Меликов, არამედ... Михаил Тариелович Лорис-Меликов!

სავარაუდებელია, რომ მიხეილის მამის, რუსის ყურისათვის უჩვეულო სახელის წარმოთქმისას პეტერბურგის ჩინოვნიკები, მეფეების ალექსანდრე მეორისა და ალექსანდრე მესამის ჩათვლით, ენას ისე იმტვრევდნენ, როგორც დღევანდელი მოსკოველები მათთვის საყოველთაოდ სათაყვანებელი ანდრონიკოვის... Ираклий Лаур... Лоар... Лулу... Лу-ар-са-ხო-ვიჩ...

როგორც ხედავთ, ერთი კი არა, ბარემ ხუთი საბუთიც კი გამოვქეჩე მიხეილ ტარიელის ძე ლორის-მელიქოვ-მელიქიშვილის ქართველობის დასამტკიცებლად, და მაინც, არ ვთვლი მას ქართველად, რაკი თავი თვითონ მას სომხად მიაჩნდა.

ფეიქრობ, არ იქნებოდა ცუდი, სომხებსაც ყველა სხვა „სომხის“ მიმართაც ანალოგიური დასკვნა გამოქქონდეთ, მაგრამ, ვეჭვობ, რომ ეს შეძლონ; საერთოდ, ეროვნულ ბლინძვას, ქართველი იქნება ის, ჩუქჩი თუ სომეხი, — „ჩვენ ვართ, რაც ვართ!“ — ვერც წამალი კურნავს და ვერც გონივრული რჩევადარიგება...

ჩემდა სავალალოდ, მწერლების გაზეთის ამ ბატონო რედაქტორმა, ჩემთვის პირადად უცნობმა, მაგრამ წიგნებისა და ტელევიზორის შუამავლობით ახლო ნაცნობმა, არ მიიჩნია საჭიროდ თავისი გაზეთის ფურცლებზე გამოენახა მცირეოდენი ადგილი იმ დროს უკვე აგონიაში მყოფისაც კი, „კომუნისტის“ მიერ ამ ძირში მიჭრილი „კულისათვის“, თუმცა იგივე რედაქტორი დროდადრო და გეგმაზომიერად, ზოგჯერ ნომრიდან ნომერში („გაგრძელება იქნება“) მთელ გვერდებს უძღვნის ხოლმე იმის მტკიცებას, რომ...

მაგალითისთვის მოვიყვან მარტო ერთ ბოლოდროინდელ თავდასხმა-შესევას აწ განსვენებულ მერაბ მამარდაშვილზე, როგორც ეს ჩვენ, — შეპატიოს „მეიდანზე“ ნასესხები სიტყვის

ხმარება. — „ყურბანა“ ინტელიგენციამ მხოლოდ სიკვდილის შემდეგ შევიტყვეთ, ამ მსოფლიო მასშტაბის პიროვნებაზე, თანამედროვეობის უგანათლებულესი რუსი მეცნიერების მიერაც კი აღიარებულ „ერთადერთ ნამდვილ, ცოცხალ ფილოსოფოსზე საბჭოთა კავშირში“ იმის გამო, რომ იგი მოსკოვში ცხოვრობდა და რუსულად აზროვნებდა და რუსულად წერდა, ამიტომაც ის თურმე... მონათხრობს, უფრო სარწმუნო რომ იყოს, ვფიქრობ, დედანში წაკითხვა აჯობებს („ლიტერატურული საქართველო“, 26.10.90):

„ისევ და ისევ იმით, რომ მამარდაშვილი არაა ქართველი. მას ქართული სატიკივარი არა სტიკივა, ან გულში სიციარიელე აქვს.

ქართველობას ვინა ჩივის, მგონი აქვე ფილოსოფოსობაშიც შეირცხვინა თავი:

„ჩვენ ძლიერი, უკვე აშენებული დემოკრატიით შეგვიძლია გავეყაროთ ასევე ძლიერ და დემოკრატიულ რუსეთს“—ობრძანებს ჩვენთან საგასტროლოდ სიბერეში ჩამობრძანებულ რუსულ-საბჭოურ-სოციალისტურ ჟურნალებში ნარედაქტორალი მამარდაშვილი“.

დაე მკითხველმა თავად განსაჯოს თუნდაც ამ ერთი ციტატის მიხედვით პოლემიკური მსჯელობისა და თავაზიანობის დონე, და ისიც, იყო თუ არა მერაბ მამარდაშვილი ქართველი, და რამდენად შემარცხვენელია „ფილოსოფოსობაში“ წინასწარმეტყველება იმისა, რომ დემოკრატიული საქართველო თავს გამოიხსნის იმპერიალისტური რუსეთისაგან მაშინ, როცა თვითონ იგი გახდება დემოკრატიული...

მე კი მოხარული ვარ იმით, რომ, არაფილოსოფოსმა, ანალოგიური აზრი გამოვთქვი ამ „თავშერცხვენელი“ ფილოსოფოსის დამოუკიდებლად: განთავისუფლდება რუსეთი,—განვთავისუფლდებით ჩვენც-მეთქი.

ჩვენთან საგასტროლოდ სიბერეში ჩამობრძანდაო...

ო-ო, ეს „არაქართველი“, მამარდოვ-მამარდიან-მამარდ-ზადე, საქართველოს დაუბრუნდა ფიზიკურად და გონებრივად სულაც არაბერიკაცი, რადგან... „მთელი ჩემი სულით და სხეულით მე ქართველი ვარ“—ო, ხოლო რაც შეეხება „რუსულ-საბჭოურ-სო-

ციალისტურ ჟურნალებს“, აი რას ამბობდა მათი „ნარედოქტორალი“ სიკვდილამდე ცოტა ადრე, 1990 წლის აგვისტოში:

„ტყუილი რუსეთის იმპერიის ელემენტი იყო და ეს ტრადიცია გაგრძელდა საბჭოთა ხელისუფლების დროს. ეს ჩვენთვის არაისტორიული და არატრადიციული, უნდა მოვიშოროთ და დავებრუნდეთ ტრადიციულს“.

„...გვეუბნებიან ტყუილს და თვალსაც არ ახამხამებენ, გართმევენ, გახრჩობენ, გორგუნავენ და შენ თქმაც არ შეგიძლია, რადგანაც ბუნებრივი ენაც ოფიციალური და რიტუალურია“.

„...გვაქვს სახელმწიფო, რომელიც სახელმწიფო არ არის. გვაქვს უცნაურბ საზოგადოება, რომელიც საზოგადოება არ არის და უცნაური ხელისუფლება, რომელიც ხელისუფლება არ არის... ხელისუფლება საბჭოეთში არის ამორფული. მართავს იმით, რომ ჩვენ ვმართავთ ერთმანეთს მის სასარგებლოდ. ჩვენ ადამიანურად „ვეუგებთ“ ერთმანეთს და ვაკეთებთ იმას, რაც სურს საბჭოთა ხელისუფლებას და ვიღებთ საბჭოთა იდიოტიზმს ეკონომიკაში, ხელოვნებაში, სამოქალაქო ცხოვრებაში“.

„იმისათვის, რომ დავებრუნდეთ საკუთარ თავს, უნდა მოვიცილოთ ეს ამორფული ხელისუფლება, რომელიც თავს მოგვახვევს, და დავებრუნდეთ ისეთ ცხოვრებას, სადაც პურს პური ჰქვია, ჯარისკაცს ჯარისკაცი და არა მეომარ-ინტერნაციონალისტი. ესე იგი დავებრუნდეთ რეალობას და ამ რეალობაში ნაკლები სისხლი დაიღვრება იმიტომ, რომ ლანდები გაცილებით მეტ სისხლს მოითხოვენ, ვიდრე ბოროტი სახელმწიფო ან ხელისუფლება. ეს ძნელი ამოცანაა. ან ამას შევძლებთ ქართველები ან — არა ვართ ღირსნი ისტორიული ცხოვრებისა“.

(სხვათა შორის, როცა „ლიტერატურულმა საქართველომ“ პირველ წერილში, კრივის ტერმინს თუ ვიხმართ, ნოკდაუნო ძირს დანარცხა, მე აღარ დაველოდე „გაგრძელება იქნებას“— მეორე წერილ-ნოკაუტს და გავუგზავნე ჩემი „ასტაფიევი“: „მოკრძალებით და რიდით პირწმინდა ქართველს—ბატონ მე-რაბ მამარდაშვილს“.

და სულ მალე, მიღებისთანავე, ტელეფონში ჯერ არასოდეს გაგონილი და სრულიად უაქცენტო ქართული მომესმა: „დიდი, დიდი მადლობა გამხნეებისათვის“...).

მერაბ მამარდაშვილი ინფარქტმა მოცელა... ინფარქტი ადამიანს შეუმზადებლად არ ემართება: სულიერი აფორიაქების ნიშანადგურად ნაქლევს ნაქლევნი ემატება ხოლმე და... სულ ცოტა, ერთი ნაქლევნი მაინც, ჩვენც აღვებუქდეთ იმ გამთათხავი, ორსერიანი წერილებით ქართველობისათვის თურმე ასე საამაყებელ, დიდი ფილოსოფოსის მგრძნობიარე გულზე...

ო მოგვიტევე და შეგვინდე ჩვენ, თითქოს დიდად განათლებულ პროვინციულ ბრიყვებს, ბატონო მერაბი..

...და მაინც, ყოველივე ეს რა ბრალისათვის? თუ ეს, „ლიტერატურული საქართველოს“ კვალიფიკაციით მართლაც დანაშაულია, მაშინ არც პეტრე იბერი უნდა მივიჩნიოთ ქართველად, არც ანთიმოზ ივერიელი, არც პეტრე ბაგრატიონი, არც ივანე რამაზის ძე თარხანოვი, არც ალექსანდრე ივანეს ძე სუმბათოვ-იუჟინი, არც ირაკლი ლუარსაბის ძე ანდრონიკოვი, არც გიორგი მელიტონის ძე ბალანჩივაძე — ჯორჯ ბალანჩინი... და არც მაყვალა ქასრაშვილი და ზურაბ სოტკილაეა უნდა ცხოვრობდნენ მოსკოვში და მღეროდნენ დიდ თეატრში, და არც პაატა ბურჭულაძე დაწოწავდეს ევროპიდან ამერიკაში და ამერიკიდან ევროპაში, მილან-ლონდონ-ვენა-ნიუ-იორკში: სამივენი, თუ ნაღდი ქართველები არიან, უნდა ეგდონ თბილისში და უგალობდნენ ცარიელ სკამ-სავარძლებს ჩვენს სახელგანთქმულ, საქართველოს გარეთ მართლაც სახელგანთქმულ საოპერო თეატრში (წელს გერმანიაში საგასტროლოდ გამგზავრების წინ თბილისში გაცნობის მიზნით ჩამოსული დუისბურგელი მუსიკის პროფესორი გაეცედა, როცა, მისი აზრით, დიდებულ „აბესალომ და ეთერზე“ დარბაზში ექვსად ექვსი მაყურებელი დათვალა, აქა-იქ ყვავებივით რომ ჩამომსხდარიყვნენ... ასევე, არა მგონია შეეცდეს ვარაუდში, თუნდაც ჩვენს პატივსაცემ ქართველ თურქოლოგ რედაქტორსაც ანდა მის ნაფიც ავტორს, ყოველივე ქართულისთვის დამწვართ, ქუდიც რომ შეეფუგდოთ... თუმცა რას შეუგდებ, — „ახალი თაობა“. ქუდს აღარ იხურავს!).

...ამ „ანტირუსული თეორიით“ ისე გამოდის, ჩვენ რუსეთში, კერძოდ მოსკოვში, მამარდაშვილ-სოტკილაეა-ქასრაშვილ-ვირსალაძე-ანანიაშვილებით, და თუ გნებავთ, შევარდნაძეებით

კი არ უნდა გვიცნობდნენ, — ქართველ ხალხს უნდა ზომავდნენ მალაზია-ბაზრებში მოთარეშე, ერის თავისმომპყრელი ვაჭრუკან-სპეკულანტებით და სინდისსა და სირცხვილზე ხელაღებულ რეკეტირ-ბანდიტ-ბინის ქურდებით, რიცხობრივად ამ „პროფესიის“ რუსებსაც რომ აქარბებენ ახლა თურმე მოსკოვში...

როცა ჩვენი „ნაფიცი ავტორი“, გურამ პეტრიაშვილი, ამ გვიანდელ მინაწერს გაეცნობა, ეჭვი არ მეპარება, არტისტული მგზნებარებით ამოთქვამს ჩემზე:

— დედა-დედა, ეს რა უმადური კაცი ყოფილა!.. მე ხომ ისა ვარ, 1988 წლის ნოემბრის მღელვარე დღეებში ტელევიზიის შენობის კიბე-ბარაკადიდან, კომუნისტური რეჟიმის ბრალდასადებად რომ შესძახა, რატომ არ უნდა იბეჭდებოდეს, ხალხო, კიტა ბუაჩიძის „შავი წიგნიო“... ეგებ არ იცის, ა?

არა, ვიცი, იმ დღესვე მომიტანეს ეს ამბავი, მაგრამ გურამ პეტრიაშვილის მიერ მარტო ქართველებისათვის უკვე გამოთხრილ და აწ კიდევ უფრო ღრმად გამოსათხრელ „სუვერენულ“ გამოქვებულში არც ამისთვის და არც სხვა რამისთვის, რა ექნა, თავს ვერა და ვერ-შევეყოფ და ჩემი ერისანის არც სხვებს ვურჩევ იქ შეხიზვნას: გარესამყაროსათვის საყურებლად ძალზე ვიწრო, ძალზე შეზღუდული სათვალთვალოთი აღჭურავს მას მისი მთავარი მშენებელ-არქიტექტორი...

ისე კი, საერთოდ, გარდა იმისა, რომ „შავი წიგნი“ უნდა დაიბეჭდოსო, სხვაც ბევრი რამ საგულისხმო უთქვამს და ბევრი რამ გონივრულიც დაუწერია და დაუბეჭდავს გურამ პეტრიაშვილს, მაგრამ მათში, პუბლიცისტურ წერილებში, სამწუხაროდ, ისეთ არაგონივრულსაც გამოუჩვენეს ხოლმე, კაცს ძალაუნებურად გაგახსენდება ერთი კასრი თაფლისა და ერთი კოვზი, არა ჩაის, — სუფრის კოვზი კუპრის ნაერთი...

გულწრფელად გაგანდობთ: მე ახლა შიში მზარავს, ვის ამოიღებს მორიგ სამიზნედ უკვე არასოციალისტური, არასაბჭოთა საქართველოს რესპუბლიკის ეს, საბედნიეროდ, მგონი, არცთუ მთავარი იდეოლოგი, ვის შეესევა ან ვის შეუსევენ? ღმერთმანი, ჩემ თავს არ ვჩივი, ჩემი თავი ხონჩაზე მიმირთმევეია და ჩემი უსამართლო განქიქებაც კი მისგან არც ისე მეწყინება, თუკი არ ჩხუტავს თავის წამახულ კალამს ლევან ხაინდრაევას,—

ვერაგულად ჩინეთში დაბადებულს და 32 წლის ასაკში საქართველოში დაბრუნებულს, ქართულის სუსტად მცოდნეს, რომელიც რუსულად წერს და თავს მაინც ქართველ მწერლად თვლის, ორი კარგი ქართველი ვაჟკაცის მამას... და თუ მაინც გაიმეტებს, ამ გამეტებამდე წუთით იმაზეც დაფიქრდეს, საქართველოსა და ქართველების დასაცავად რომელი ჩვენგანი გამოაქანდაკებდა ისეთ ბარათ-ალიყურს, როგორიც მან შიართვა ჩვენი დროის რუსეთის ყველაზე დიდ მწერალს, ალექსანდრე სოლჟენიცინს? (იხილე „Литературная газета“, 24.10.90.)

საერთოდ, როგორღაც ვშიშობ, რუსეთისა და რუსული ენის მიმართ ახლა, როცა თითქმის ყველაფერში დარტყიანებულია ვიქტორობა, ვაითუ, მეორე უკიდურესობაში გადავვარდეთ, მსგავსად ოციანი წლების იმ „კომცომოლებისა“, რომლებიც, ყველაფერი ძველის ნგრევის ექსტაზით შეპყრობილნი, ლაფში ანარცხებდნენ, კერძოდ, ეკლესიათა ჭვარ-გუმბათებს, სახარებას ცეცხლს უკიდებდნენ, მღვდელმსახურთ „ცოცხლივ“ წვერს აგლეჯდნენ...

ჰოდა, ახალი, კომუნისტური ქვეყნის ამ „მშენებლობამ“ თურა ნაყოფიც გამოიღო, ეს ახლა ვის არ მოეხსენება...

რუსული ენა უნდა ამოიძირკვოსო, გაიგონებთ ხოლმე ჩვენი დროის მიტინგებზე თითქოს იმ „კომცომოლების“ მონათესაევო, დაუდულარი გონების მომაჭრო ახალგაზრდებისგან, ზოგჯერ უკვე დადუღებულ-დაღვინებულთა ჩაგონებითაც...

კი, მაგრამ... მანინ, აბა, რა ენაზე უნდა ელაპარაკოს დამოუკიდებელი საქართველო ბალტიისპირეთის, შუა აზიის, კავკასიის ხალხებს, უკრაინელებს, ბელორუსებს, მოლდაველებს, ყაზანის თათრებს, თვით რუსებს? — ინგლისურად?

ო-ო, თავის მოტყუება იქნებოდა იმაზე ფიქრი, რომ, თუნდაც ოდესმე, რუსულის ნაცვლად საქართველოში ინგლისური დამკვიდრდება საყოველთაოდ... ცხრა მთასა და ცხრა ზღვას იქით მდებარე დიდი ბრიტანეთის კი არა, — პატარა ბავშვობიდანვე ჩაგვესმის მეზობელი რუსეთის ენა, და მაინც ის, უმაღლესი განათლების დიპლომის მიხედვით ინტელიგენტებად მიჩ-

ნეულებსაც კი, რიგიანად ვერ შეგვისწავლია და... ინგლისურს ავითვისებთ მასობრივად?!

დიახ, ამ დიდი ეროვნული გაწამაწიის დროს გონებზე თუ გვიმტყუნებს რუსეთსა და რუსულ ენას ზურგს შევაქცევთ, ეს სიკეთეს ბევრს არაფერს მოგვიტანს... რასაკვირველია, მე ლიგაჩოვ-იაზოვ-როდიონოვის რუსეთს როდი ვგულისხმობ, — ახალს, თავისუფალს, რომელიც რუსეთის დიდი შვილების ოცნებაც იყო მუდამ და რომელზეც ილია ჭავჭავაძის ერთ-ერთი რიაბჭრე, იაკობ მანსვეტაშვილი წერდა:

„ნუ დავივიწყებთ, რომ ილიაც და ჩვენ ყველა მისი თანამოკალმენი გაზრდილნი ვიყავით რუსეთის მწერლობაზე. ვინ იყვნენ ჩვენი ჭკუისა და გონების გამწვრთნელნი? ჩერნიშევსკი, დობროლიუბოვი, პისარევი და რუსეთის მეცნიერნი. ვინ გვაძლევდა საკვებს გრძნობისასა და გემოვნების გაღვიძების და განვითარებისათვის? პუშკინი, ლერმონტოვი, გოგოლი, ტურგენევი, დოსტოვესკი, ტოლსტოი და სხვანი. ჩვენ ვიყავით იმათი ღვიძლნი სულიერნი შვილნი. და განა დასაგმობი არ იქნებოდა ისეთი შვილი, რომელიც შეაგინებს, შეურაცხყოფს თავის ღედას, იმ ღედას, რომელმაც იგი თავისი ძუძუთი გამოზარდა? ჩვენ ამას ვერ ვიზამდით, რადგან უმადურობა კი არა, უგუნურობაც იქნებოდა. არა, ჩვენ გვძულდა და ამ სიძულვილს არცა ვმაღავდით, გვძულდა რუსეთის მთავრობა, გვძაგდა რუსეთის წესწყობილება, გვეზიზღებოდა ის წარმომადგენლნი ჩვენში, რომელნიც უხეშად, ბრიყველად გვიფურთხებდნენ და ფეხქვეშ გვითელავდნენ ყველა იმას, რაც ჩვენთვის წმინდას შეადგენდა“.

დიახ, ჩვენც გვძაგს თანამედროვე რუსული წესწყობილება, გვძულს საბჭოთა ხელისუფლება, რომელიც მოგვახვია ხალხთა ძმობის კავშირად სახელმწიფომეულმა საბჭოთა რუსეთმა, სამხედრო თვალსაზრისით უძლიერესმა და ადამიანურად ვერაგმა და უღმობელმა, და საქართველო, ეს ლიფსიტა თევჩი, დღეს თავგამეტებით იბრძვის, რათა ამ გველეშაპს როგორმე დაუძვრეს და ცოცხალი თავიც შერჩეს...

ღმერთმა ქნას, ღმერთმაც ქნას, მაგრამ... მმ... ათასჯერ უფ-

რო მოხარული ვიქნებოდი, თუკი ეს ჩემი ნაღველნარევი პროგნოზი არ გამართლდებოდა: ძალზე სათუოა, რომ არამოსაჩვენარ, ნ ა მ დ ვ ი ლ თავისუფლებას რუსეთისავე მძლავრი ხელის დაუხმარებლად მოვიპოვებთ; ჩვენი მონური ქვეშევრდომობის ჭაჭვების აყრა დამოკიდებულია ისევ და ისევ რუსეთის ხვედრზე.

ღიახ, განთავისუფლდება რუსეთი — განთავისუფლდება საქართველოც!

მივაკითხოთ ისტორიას: განა ასე არ მოხდა 1917 წელს, როცა თებერვლის რევოლუციამ გამოიხსნა ცარიზმისაგან რუსეთი და მასთან ერთად გვიხსნა ჩვენც?!

ამიტომ მოდიტ...

თუმცა ჩვენ, დღევანდელი ქართველები, ერთმანეთის დაუნდობლობით უფრო წარმართებს ჩამოვგაეართ, ვიდრე ქრისტიან მართლმადიდებლებს, მაგრამ მაინც, მუხლმოყრილებმა ვილოცოთ და ვევედროთ უფალს მუსულმანებივით დღეში ხუთჯერ, რათა თვით რუსეთი დაუსხლტეს დროულად... საბჭოთა რუსეთის ბოროტების იმპერიას!

ამ მიზნის მისაღწევად გაბედულად იბრძვიან კიდევ რუსეთისავე გონებანათელი, დემოკრატი შვილები — ვასილიევები და სობჩაკები, ტრაკვინები და სტანკევიჩები, კარიაკინები და ვლასოვები, აფანასიევები და ლიხაჩოვი...

ღიახ, ლიხაჩოვი, დიმიტრი ლიხაჩოვი, უსპეტაკესი სინდისის მქონე ეს დიდი ინტელიგენტი და მეცნიერი, მართო ერთია რუსეთში, მას გვერდით ტოლს ვერავის ამოუყენებ, ამიტომაც არ იტქმის და არ ეწერ ლიხაჩოვები-მეთქი...

ვაგლახ, ჩემგან მისთვის ასეთი დიდი ფასის დადებას არა და არ დაეთანხმება ჩვენი პატივცემული გურამ-მეხდამტეხი, აკი მან ერთხელ საკმაოდ უპატივცემულო ტლინკი ლიხაჩოვსაც ჰკრა, როგორც შოვინისტ რუსოფილს, რომელსაც თურმე პატარა საბჭოთა ხალხები თვალში თითქოს კიდევ უფრო ეპატარავენ და ბევრად არც არაფრად თვლის მათ; ამათში, თავისთავად ცხადია, ქართველებიც იგულისხმება...

რამდენად მართებული და სწორია ყოველივე ეს, ამის დასადგენად, სჯობს სიტყვა მივცეთ წერილობით დოკუმენტს — ლიხაჩოვის მიერ ჩემდამი მოწერილი სამი ბარათიდან მხოლოდ

ერთს, რომელიც მიღებისას ყველას წინაშე არც ამიფრიალე-
ბია, რადგან იმხანად ჩეკისტური ცენზურა კიდევ მძვინვარებდა
და შევშინდი, ვაითუ რაიმე ხიფათი შეემთხვეს ამის მომწერს-
მეთქი:

გოგონა გიგა მუხომანთა:

ბავშვებო, ნაცნობი პირებისთვის წერილი და წერილი.

გოგონებო და ბავშვებო და... წერილი წერილი და

დავით კობახიძე არც არასდროს უნდა იცნობდეს ის

გარდა და აქვე, ის და მთელი გოგონა მთელი

იქნებოდა და უნდა იყოს და უნდა იყოს და

მთელი იქნება და ის და ის, და ის და ის, და ის

და მთელი იქნება, და მთელი იქნება და მთელი.

მთელი გოგონა და მთელი გოგონა და მთელი გოგონა,

და მთელი გოგონა.


მთელი გოგონა და მთელი გოგონა და მთელი გოგონა.

მთელი გოგონა და მთელი გოგონა და მთელი გოგონა.

მთელი გოგონა და მთელი გოგონა და მთელი გოგონა.

მთელი გოგონა და მთელი გოგონა და მთელი გოგონა.

29 IV 90.



რაკი ეს ხელნაწერი ზოგმა შეიძლება იოლად ვერ გაარჩი-
ოს:..

Дорогой Кита Михайлович!

Большая, большая благодарность Вам за чай.

Хотелось бы поговорить как-либо с Вами. Сейчас в муках рождается нечто совсем новое и спасительное не только для грузин, но и для России. Россия была прикована к захваченным ею территориям, и это было плохо прежде всего для нее самой, для её культуры, для свободного развития, для свободы политической ее са-
мой.

Мучила других и тем самым мучилась сама в тисках оков, созданных ею для других.

Ну, да этого всего не объяснишь в письме.

Еще раз большое спасибо. Для меня он (чай) приятен еще тем, что подарен он грузинном.

Любящий Вас

Д. Лихачев

29.III.90 г.

ახლა ხომ ხედავთ, მკითხველო, რა ყალიბის „შოვინისტი“ „დერეჟიმორდა“ რუსიც ყოფილა აკადემიკოსი დიმიტრი ლიხაჩოვი?

ვინც რუსული სუსტად იცის და ეს ვერ იგრძნო, მათ ამ ისტორიული, დიას, ისტორიული ბარათიდან ერთი ფრაზის თარგმანს მაინც მივაწვდი: რუსეთი „ტანჯავდა სხვებს და ამით თავადაც იტანჯებოდა მის მიერ სხვებისათვის შექმნილ მარწუხებში მოქცეული“-ო.

სხვათა შორის, თქვენს ყურადღებას მივაქცევდი აგრეთვე

დიდი რუსი მოქალაქის ალეგორიულ მინახატსაც: მზე ამოდის თითქოს არა მოსკოვ-ლენინგრადიდან, — თბილისიდან!

დასასრულ, ერთი პატარა ამონაწერიც იმის დასამტკიცებლად, თუ როგორ „ეძულვართ“, კერძოდ, ჩვენ, ქართველები, საქვეყნოდ ცნობილ ამ აკადემიკოსს:

«Благородство, рыцарственность, самопожертвование, сознание собственного достоинства, сознание своего служения высшей идее — вот, что в моих глазах стало главным в представлениях о грузинах».

**(«Багратион русского искусства».
«Партийное слово», № 10, 1981 г.)**

ქართველ ხალხს ბოლო დროს ბევრი რუსი მეგობარი შემოაკლდა: ზოგი სიკვდილმა წაგვართვა, ზოგიც ჩვენზე არასწორი, სახელგამტეხი ინფორმაციის წყალობით ჩამოგვშორდა...

შემორჩენილ მეგობრებს უნდა გაუფრთხილდეთ, დაუფიქრებელი, ავყია სიტყვით ისინი არ უნდა დაკარგოთ.

სადილის მიზანი სხეულის საზრდოობაა,
ცოლ-ქმრობის მიზანი კი— ოჯახი.

ლევ ტოლსტოი

თბილისის ერთ-ერთ გაზეთში ამოვიკითხე პარფიუმერიის ფაბრიკის არცთუ ისე ახალგაზრდა, გაუთხოვარ მუშა-ქალზე, სამაგალითოა და მისაბაძიო, ამა და ამ საამქროში გახდა იგი დამკვრელიო, ლენინის პარტიის წევრიო, აგიტატორიო, რომელსაც პარტიული სიტყვა მოაქვს ყოველ მშრომელთანო....

ო-ო, ყოველივე ეს დიდებულია!

ჩინებულია ისიც, რომ მას გულში ჩამწვდომი კომუნისტური სიტყვა მიაქვს მასებთან, მაგრამ... ახლა ესეც ვიკითხოთ, თვითონ მას რა მიაქვს, მშრომელსა და აგიტატორს, როცა შრომით და აგიტაციით დაღლილ-დაქანცული შინ ბრუნდება?

შეიძლება იგი მინისტრიც გახდეს, დეპუტატიც, მრავალგზის ორდენოსანი და პერსონალური პენსიონერიც, მაგრამ განა გამორჩეული საზოგადოებრივი მდგომარეობა, და თუნდ თავზე საყრელი მატერიალური ავლა-დიდებაც...

ო, ვერაფერი, ვერაფერი ამის მსგავსი რომ ვერ ამოუხსნებს სულ პატარა გულის ერთ კუნჭულსაც კი, მით უმეტეს, როცა ახალგაზრდობა გაუფრინდება, გვერდით კი სისხლით ახლობლების სუნთქვას ვერ იგრძნობს...

თუშეთში ჩაუწერიათ, გაუთხოვარი ქალი და გაუსვენებელი მკვდარი ერთიაო. ჩვენ კი ამჟამად შვილიერების ასაკში მყოფი ათიათასობით გაუთხოვარი ქალი გვყავს, თანაც მათ გაუთხოვების პერსპექტივას როგორღაც უპერსპექტივობის ბურუსი ფარავს, აკი უამრავია უცოლო ვაჟები, რომლებიც დაცოლშვილებას არათუ ჩქარობენ, ბევრი მათგანი არც კი ფიქრობს, ოჯახს საერთოდ მოეკიდოს.

ასე განსაჯეთ, „ზევით“, ჩვენს მმართველ აპარატებში და ორგანოებში ცოტანი როდი სხედან ისეთი ბერბიჭები, რომლებსაც პარტიული სიტყვა კი მიაქვთ-მოაქვთ, ოღონდ თავად

მათ სიტყვას არაფერს ეუბნება, ასე ეუღლად თუ კიდევ ივლი, აქედან გულდა-ნაბადს აგიკრავთო...:

ისე კი, მერწმუნეთ, მომგებიათ ადგილიდან სავსე გულისა და თბილი ნაბდის აკვრას დაქორწინებას, თუ გნებავთ, ჯოჯოხეთის მაშხალაზეც ამჯობინებს...

მომრავლდა ისეთი შემთხვევებიც, როცა, სოფლად თუ ქალაქად, ჯარში ნამსახურთ ჩამოჰყავთ შორიდან არაქართველი ქალები; მაგალითად, ჩემს შედარებით პატარა სოფელში ასეთი — ხუთამდე „მარფუშკა“ დავთვალე (საუბედუროდ თუ საბედნიეროდ ორი მათგანი ვერ შეეგუა ჩვენებურობას, თუნდაც უაბანოობას, და უკანვე გაბრუნდა).

ერთხელ ერთმა ჩემმა აქარელმა ნაცნობმა ისლამური სარწმუნოების „ეს, ეს, ეს“ ჩამომითვალა და მკითხა, აბა რა არის ამაში ცუდიო...

ისინი, მართლაც, ქრისტიანული სარწმუნოებისგან კი განსხვავდებოდნენ, მაგრამ მკრეხელობად მაინც არ მომჩვენებია. მრავალცოლიანობაც, ალბათ, ისლამის სიბრძნის ნაწილს განეკუთვნება.

ნუ შემრისხავთ და... ხალხი, რომელიც დაღუპვის ნაპრალისკენ მიექანება, უმთავრესად მისი ქალების გადაგვარების გამო, ერის გადასარჩენად და თავად ამ ქალების ერთგვარად დასასაჯელადაც... თუ მრავალცოლიანობის არა, — ორცოლიანობის „სტატუსის“ დამკვიდრება, დროებით მაინც, უებარი წამალი იქნებოდა...

ღიახ, მიზნის, და მერე როგორი მიზნის? — ერის სიცოცხლის შესანარჩუნებლად ყოველგვარი საშუალება გამართლებულია.

ამ ძნელბედობის დღეებში ამისათვის, ალბათ, არც იესო ქრისტე გაგვიცხავდა და... იგნატი ლოიოლა, ვისაც ეს გამოთქმა ეკუთვნის, — ხომ არა და არა!

ერთმა კაი გულის ქალმა, მართლაც მეცნიერმა, ახლა უკვე ხანში შესულმა და, სამწუხაროდ, მარტოხელა შინაბერამ, ვაჟკაცურად გამანდო, ხუთ დიპლომს მივეცემდიო ერთ პატარა ოჯახშიც კი; თქვენი „შავი წიგნი“ ბევრად ადრე რომ წამეკითხა, რაკი, როცა საამისო დრო იყო, გათხოვებას არ ვჩქარობდი, მოგვიანებით კი მთხოვნელი აღარავინ გამომიჩნდა, — შვილს, ერთს მაინც, უქმროთაც ვიყოლიებდიო...

ვინ არ იცნობს ელენე ახვლედიანს, ამ ხუთიოდე წლის წინათ გარდაცვლილ დიდებულ მხატვარს და დიდებულ ადამიანს, იგი ხომ მუდამ სხვების დასახმარებელ ფუსფუსში იყო... მოსაწყენი მას ამქვეყნად თითქოსდა არაფერი ჰქონდა, გარს უამრავი ნაცნობ-მეგობარი ეხვია; მისი საამო სითბოთი სავსე ბინა რომელ თბილისელ, მოსკოველ, ლენინგრადელ, ასე ვთქვათ, ინტელექტუალს არ იზიდავდა, ჩვენი დროის უდიდეს პიანისტად აღიარებულ სვიატოსლავ რიხტერის ჩათვლით, მაგრამ ყოველივე ეს, თურმე, ცოტა ყოფილა იმისათვის, რომ თავი ბედნიერად იგრძნო, მით უმეტეს მაშინ, როცა ხნოვანება კარზე და სახეზე მოგიკაკუნებს: იხუ იტყვიო, ეს ჩვენი ძვირფასი ქალბატონი ელენე, ახლობლები რუსულ ყაიდაზე „ელიჩკას“ რომ ეძახდნენ, როგორც ეს მის მიერ ერთისადმი მიწერილი ბარათიდან ახლახან შევიტყვეთ, თავისი ბედის დიდი მომღურავი ყოფილა; ქალი, რომლისთვისაც დებრესიული განწყობილება გარეგნულად არასოდეს არავის შეუმჩნევია, შინაგანად ძნელად ასატან მართობას განიცდიდა თურმე...

სამწუხაროდ, ჩვენდა სამწუხაროდ, სამწუხაროდ...).

დიახ, ქალი 30 წლის, გათხოვებისათვის ამ ისეც უკვე ხანმოთეული, კრიტიკული მიჯნის შემდეგ შეიღს „უკანონოდ“ თუ გააჩენს, ეს არ უნდა იძრახებოდეს, და თუ ახლა აქეთ-იქით მივიხედ-მოვიხედავთ, გონიერი ადამიანებისგან ეს თითქოს აღარც იძრახება, უგონონთ კი, თუმცა ისინი „ნახირის“ უმრავლესობას წარმოადგენენ, ანგარიში არც უნდა გაეწიოს, ოღონდ სავალალო ის გახლავთ, რომ ქართველ ქალს ასეთი ნაბიჯის გადადგმა უჭირს და უძნელდება, — ჯერ უკეთესზე უკეთესი საბედოს მოლოდინში, მერე — უბრალოდ უკეთესისა, მერე და მერე — „იყოს, თუ არა უშავს რა“... „დიდი ვერაფერი შეიღია, მაგრამ“.. „ცოტათი მაინც თუ ჰგავს კაცს, — ჯანდაბას...“

დიახ, ასეთ ჰოკმანსა და იმედების გაცრუებაში უღამდებათ თვალეები და ეწრიტებათ წუთისოფელი:..

მ ი ნ ი - ც ნ ო ბ ა : მკითხველი, გართობის მიზნით, ცოტა რომ შევეასვენო, რაკი ჩემი ცალუღლობის გამო საყვედური არაერ-

თხელ მომისმუნია, თანაც იმ ჩემი აზრის დასადასტურებლად, ზემოთ რომ მოგახსენეთ, — ქართველი ქალის წუნიაობასა და ცხვირაბზეკიაობაზე, უკეთესზე უკეთესის არარეალურ მომდინარეობაზე, — გულახდილად გამოგიტყდებით: ჩემი თავი საქმროდ, ასე ვთქვათ, ოფიციალურად, არასოდეს არავისთვის შემითავაზებია, მინიშნებით — კი; აი, ცხოვრების მეორე ნახევარში, 35 წლის შემდეგ, როცა კაი ხნის ნაპატიმრალი — „ხალხის მტერი“, ასე თუ ისე, ფეხზე დავდექი და თვალებიც გამოვაქუციტე, მაგრამ მათგან, ესე იგი ჩემი „სასაცოლეებისაგან“ მონაბერი სიო იმდენად ცივი იყო, რომ ბუნებით, ჩვენი თავდრეკია დროისათვის, შეიძლება, ზედმეტად ამაყმა, მათ არათუ მივძალეუბივარ, — მერე მათკენ მოჭუტული თვალითაც აღარ გამიხედავს.

თქვენ, ცხადია, გაიფიქრებთ...

ჰოდა, ვიდრე გაიფიქრებდეთ, დაგასწრებთ და აი, რას გამბობთ: მოსკოვში ერთი ჩემი კომედიია, იმხანად ერთ-ერთ იქაურ თეატრში რომ დაიდგა, უნდა გამოეცათ. მინდოდა ყდაზე მთავარი პერსონაჟი დაეხატათ. თხოვნა კი შემისრულეს, მაგრამ სურათი სულ ერთიანად დავიწუნე, რა არის, ქართველი ქალიშვილი, რომლის გულისთვის სამი ქაბუჯი ერთმანეთს თავს აკლავს, ასეთი შეუხედავია-მეთქი...

არც ხელახლა დახატული მოვიწონე, უფრო ლამაზი უნდა იყოს-მეთქი... ასე იყო თუ ისე, ჩემი გული ძლივს შეავსეს.

გავიდა ხანი და ჩემგან წამებული ეს მოსკოველი მხატვარი, წიგნის გამოსვლის შემდეგ, შავი ზღვისკენ მიმავალი, გზად თბილისში მეწვია...

ერთხელ, სასეირნოდ გამოსულნი, ნახევარი ვაკე რომ ჩავიარეთ და რუსთაველის ძეგლს მივადექით...

— Никита Михайлович, дорогой, покажите мне, пожалуйста, красивую грузинку.

...ლენინის მოედნამდე ჩავიარეთ, მერე ისევ ამოვიარეთ, მერე ისევ ჩავიარეთ და...

ვაი შენს ქართველ დრამატურგ კიტა-ნიკიტას!..

მანამდე ნათქვამი მაინც არ მქონოდა მოარული ფრაზა, საქართველო ლამაზი ქალების ორანჟერეა-მეთქი: არ ვიცი, მაისის იმ კვირა დღეს ლამაზმანები ჩემს შესარცხვენად მიი-

მალნენ თუ წინა ღამით სულ ერთიანად ამოიხოცნენ; ეს კია, გამზირზე ქალიშვილები და მანდილოსნები ასობით ერთმანეთში რომ ირეოდნენ, მათ შორის ერთიც არ შეგვხვდა ისეთი, თვალს რომ შეაჩერებდი...

რასაკვირველია, საერთოდ სილამაზე, ტალანტისა არ იყოს, იშვიათია, ამიტომაც ძვირად ფასობს კიდევ; საბჭოთა საქართველოში ქალის თვალტანადობა, ბუნების ბევრ სხვა მშვენიერებასთან ერთად, ესეც გაიშვიათდა...

გაუთავებელი, უსაზომო თქელეფა-ჭამისგან სიმსუქნეში მცურავი, ქონმოკიდებული, გატიკნული, გარუმბული, დანდრაზა, ჩაგოდრებული „ტურფანი“ წინათ ამდენი ვის ენახა?..

კარგი, ბატონო, ამ „ტურფებს“ ნუ შევურაცხევოფთ და მოვეშვათ, — აკი ისტორიაში ისეთი დროც იყო ხოლმე, როდესაც ქალი წონით ფასდებოდა, მაგრამ არასოდეს, დღიდან ქვეყნიერების დასაბამისა, არ ყოფილა ისეთი ხანა, როცა კაცის სიმსუქნე, მით უმეტეს სასწორის დამამტკრეველი სიმსუქნე-სპილოობა დაცინვის, აბუების, გამასხარავეების საგანი არ ყოფილიყოს...

და რა გონების წამრთმევია და გულსშემომყრელია, როცა დღეს ჩვენში, ქალაქად და სოფლადაც კი, ამ უშველებელ — ღიპიო, ამაზე არ ითქმის! — ფაშვიან ქართველ „ვაჟაკებს“, „ტარიელ-ფრიდონ-აფთანდილთ“, სათვალავი არ დაეღუვათ, თვით ახალგაზრდებსა, მოზარდებსა და ბავშვებშიც კი, და ისინი, ვითარცა ბუზები ნეხვზე, გამალებით მრავლდებიან და მრავლდებიან...

არანაკლებ შემზარავია ის ფაქტიც რომ მათ ამ არა დაბადებითი, არათანდაყოლილი, — შეძენილი ფიზიკური სიმანინჯე, ოდნავაც არ ეჩოთირებათ, არ ეუხერხულებათ, არ ერცხვინებათ...

და მალე, ალბათ, მსოფლიოს სარეკლამო ტურისტულ რუკაზე საქართველო გამოცხადდება იმ ქვეყნად, რომლის ნახვითაც ყველა ტურისტს...

შეგეძლებათო საკუთარი თვალით იხილოთ და დარწმუნდეთ, ღორზე უფრო მეტმა ღორმეცელობამ რას შეუძლია და ამსგავსოს არათუ ერთი ადამიანი, — მთელი ერით...

გვიანდელი ჩანართი (1990 წ.): მიაბგეს, ამ ბოლო ხანს ტრაპიზონ-სტამბოლს მასობრივად შესეულ, უსაშველო გაბარტიან ჩვენს ოთხკუთხა „მაიციერებზე“ როგორ იცინიან უბრალო თურქებიც კი და ჩასულთ უთითებენ თავიანთ „ჩამორჩენილ“ ქალებზე, ტროტუარზე მსუბუქად რომ მიირხევიან...

ეს კი ცისფერ ეკრანზე საკუთარი თვალთ ვინილე: საქართველოში და, კერძოდ, ბათუმში ექსკურსიაზე ნამყოფ იქაურ „თურქ“ ქართველს, ახალგაზრდას, ქუჩაში ეკითხება თბილისელი ტელერეპორტიორი, კიდევ თუ წახვალ გურჯისტანში, რა არ მოგეწონა ჩვენიო, — „სუ ჰამა, სუ ჰამა“, დამცინავი ღიმილით პასუხობს იგი და ჰაერში ხელით ხატავს გამოშვებულ ლოყებს და უზარმაზარი მუცლის სილუეტს, და თან იცინის, იცინის...

სხვათა შორის... თუკი ეს, რა თქმა უნდა, სასხვათაშორისოდ ითქმის! — ამ ტრაპიზონელმა ქართველმა თბილისელ ქართველს ესეც უთხრა, თქვენი კაცები ქალებს აქეთ უქმრებოდნუ გამოუშვებენ, გვარცხვენენო... ალბათ ამან მისცა კიდევ ბიძგი ერთი სატირიკოსი პოეტის მუზას ჟურნალ „ნიაგში“ ასე ამეტყველებულიყო:

სემს-ტურისტი

ტრაპიზონს მივეშურები, ვნახავ ხუფათს და რიზეს!..
თუ მკითხავთ, რა მიხარია, ახლავე გეტყვით მიზებს:

„სექს-კლუბი!“ — ვხედავ, ვკითხულობ, მივდივარ, კარებს ვაღებ, ორიოდ დღეში „ვაკეთებ“ ვიდეოსა და ჰალებს!..

რა უშავს, ვის დავუწვები, ინტელიგენტს თუ ყასაბს?
ღუბლიონკასაც დავირტყამ ჩემი ნამუსის ფასად!

აინუნშიაც ვერ მოვლენ ჩემი დები და ძმები
და ჩემს ბუნჩულა ქმარიკოს ჩავეხუტები ვნებით!

არა რევოლუციამდე, და არც ომამდე, — სულ ახლახან რომელიღაც გაზეთში ამოვიკითხე, ქართველი ქალის ბუნებაში დიდი სათნოებაა ჩაქსოვილიო...

ამ ფრაზა-აზრში, მგონი, დრო არის არეული: ნამყო თითქოს აწმყოში არის გადმოტანილი...

იმ უთვალავი პარტიიდან, რომლებიც ახლა საქართველოში ნაირფერ დროშებს აფრიალებენ, მე პირადად სხვებზე მეტად — თუნდაც იმიტომ, რომ ამ პარტიაში ქალებს, მით უფრო კაპარჩხანა ქალებს არ ღებულავენ. — მესიმპატიურება... აი ისინი, თავისთავს მორიდებულად ტრადიციონალისტებს რომ უწოდებენ, თუმცა კი მონარქისტები არიან, რაც ჩვენგან, „ფანატიკოს სოციალისტებისგან“, არც უნდა დაეძრახოთ და არც უნდა გაიკიცხონ, აკი თანამედროვე ევროპის ისეთი უდემოკრატიულეს ქვეყნებშიც კი, როგორცაა ინგლისი, ესპანეთი, პოლანდია, ბელგია, შვეიცია, დანია, ნორვეგია, ახლაც, მეტნაკლებად, მონარქიული წყობილებაა, და თუ ჩვენც, აზია-ევროპის გადასაყარზე, მათ მივემატებით, ამით თუ მოვიგებთ, თორემ წაგებით, არა მგონია, რაიმე წავაგოთ.

...დიახ, მეც, აქამდე უპარტიოების სტაჟით თავი რომ მომქონდა, მზად ვარ ქართველ მონარქისტებს მივეკედლო, თუკი... მმ... თუკი საქართველოს სამეფო ტახტზე წამოსკუპდება არა ჯერ კიდევ რაღაც იღბლად შემორჩენილი, არაერთგზის მიტყეპილ-მიხეგვილი საბჭოთა ბაგრატიონი, არამედ დავით-თამარ-ერეკლეს ტახტზე თუ აბრძანდება ამჟამად ესპანეთის ბინადარი გიორგი ბაგრატიონ-მუხრანელი, რომლის — ასე შორიდან ერთი თვალის შევლებით — დასანანი ნაკლი ის არის, რომ ქართული არ იცის, მაგრამ ამას გამეფებისათვის გამოუსწორებელ უბედურებად ნუ ჩავეთვლით; პირველ ხანებში არც გერმანელმა პრინცესა სოფია ფრედერიკა ავგუსტა ანგალტ ცერბსტელმა — ეკატერინე მეორემ იცოდა რუსული, მაგრამ მოექცა თუ არა თითქმის უკულტურო რუსეთის სათავეში, რუსულიც ისწავლა და, ასე თუ ისე, იმდენად გააკულტუროსნა თავისი საიმპერატორო, რომ მას მეცნიერებათა აკადემიაც დაუარსა და სხვათა ტერიტორიებიც იმდენი და-

იპყრო, რომ თვალუწვდენი რუსეთის სახელმწიფო კიდევ უფრო გაათვალუწვდენა...

ვინ იცის, ევროპაში დაბადებულმა და გაზრდილმა ბატონიშვილმა გიორგიმ რაღაც ღვთიური ძალისხმევით საქართველო ეგებ უშუალოდ დაახლოვოს ევროპასთან და გვაზიაროს კიდევ მის ყოფით კულტურას, თუმცა... მმ...

...ამას წინათ ესპანეთს ჩასულ ქართველებთან საუბარში მის უმაღლესობას უთქვამს, მინდა ჩემი ქვეყანა — საქართველო ნაბიჯ-ნაბიჯ დავიარო...

რა დავმალო, მისმა ამ კანონზომიერმა, ბუნებრივმა სურვილმაც კი სულ ერთიანად ამაფორიაქა და სევდისამწეწმა შიშმა შემიპყრო...

ნაბიჯ-ნაბიჯო... ესე იგი ახლოს და ახლოს, დეტალურად მინდა გავიცნო ის ქვეყანა, სადაც, ალბათ, მეფობა მომიწევსო...

და თუ მართლაც მოუწია, მაშინ... ვიდრე გაპარტახებულ და გავერანებულ თავის წინაპრების ყოფილ საგვარეულო მამულებს მოინახულებს, მარტო რუსთაველის პროსპექტზე ერთხელ ჩავლისასაც კი, ვაითუ, იმდენ ფაშვიან, მომავალ თავის ქვეშევრდომთ მოპკრას თვალი, საზეიმო გუნება-განწყობილება სულაც წაუხდეს, აკი მისი, და საერთოდ, ევროპელთა და ამერიკელთა აზრით, წონამეტი სიმსუქნე და ლალი ინტელექტი ისე ვერ ეთავსება ერთმანეთს, როგორც ცეცხლი და წყალი: ქონი თრგუნავს აზრს...

ჰოდა, ვაითუ გაიფიქროს მომავალმა გიორგი მე-14-მ, ამ ზალხს, როგორც ჩანს გათენება ჭამისთვის უფრო უხარია, ვიდრე მზის დანახვისთვის და ამის სათქმელად:

— გმადლობ შენ, უფალო, რამეთუ სიცოცხლის ერთი დღე კვლავ მარგუნე შენს სამზეოში,

და არა

— გმადლობ შენ, უფალო, რათა გამაძღე მე!

...და განა მარტო ეს? ამ ნაბიჯ-ნაბიჯ გავლა-ჩავლისას, ვაითუ, თვალში მოხვდეს ისიც, რომ ბევრზე ბევრი შემხვედრი, დიდი თუ პატარა, ქალი თუ კაცი, უხნონი და ხნიერნიც, შეუსვენებლივ ღრანჭებს რომ ამოძრავებენ, — ზოგი „კევეა-ქვაჩკას“ იცოხნის, ზოგიც ქუჩის მტვერში ამოგანგლულ „სემიჩქას“ იყ-

რის პირში და მისი ჩენჩოთი კიდევე უფრო „ასუფთავეებს“ ისე-
დაც ნაგვის ბუნკერის მსგავსს, თითქოს სულაც უმევეზოვო სა-
ტახტო ქალაქს...

ვინ იცის, რაკი ქართველთა სახეებისთვის თვალი ჯერ კი-
დევე არა აქვს მიჩვეული. შეიძლება მისმა უმაღლესობამ ქართ-
ველებად მიიჩნიოს „უვარჩა“—სიგარეტ—„პადვიაზკებით“ ფეხ-
ზე მოვაჭრე, მუდამ ფეხმძიმე ციგნის ქალები თავიანთი პირ-
დაუბანელი ბავშვებიანად, რომელთა ჯიშის ხალხი, სხვათა შო-
რის, წელს სექტემბერში, იაროსლავლში, დიდმა ინტერნაციო-
ნალისტმა რუსის ხალხმა, თ ა ვ ა დ ხალხმა, ხელისუფლებასთან
შეუთანხმებლად, რამდენიმე ათასი მოსახლე, მთელი უბანი,
დიდიან-პატარიანად, ერთი ხელის დაკვრით აყარა და გაყარა
ქალაქიდან, ამ სპეკულიანტ-ვაჭრუკანების თავხედობა-უტიფ-
რობის მომთმენი მეტი აღარ ვართო...

...და მაინც, საქართველოს ჯერ მხოლოდ სტუმარი და მო-
მავალში მეფე, შეიძლება ყველაზე უფრო მეტად განაცვიფ-
როს შრომის საათებში მდინარესავით შეუწყვეტლივ მომდინა-
რე-მიმდინარე ათასობით მანქანამ და თავის თანამგზავრ მე-
უღლეს ესპანურად გადაულაპარაკოს, ან ფრანგულად, ანდა
ინგლისურად, ეს ჩემი — როგორც თვითონვე ამბობენ — ძვე-
ლი და დიდი კულტურის ხალხი, ეს ჩემი მომავალი სამწყსო ნე-
ტავი როდისღა მუშაობსო?!

ამავე დროს, ვინ იცის, იქნებ მხედველობის უეცარ დაქვე-
ითებას მიაწეროს და თვალები ამოიფშენიტოს, როცა მანქანე-
ბის ჯოჯოხეთურ. ორომტრიალში, პროსპექტზეც კი, ყოველი
ფეხის ნაბიჯზე აქეთ-იქით გადამრბენ-გადმომრბენ, ანც გოგო-
ბიჭებს რომ თავი დავანებოთ, ხნოვან ქალებსა და კაცებს დაი-
ნახავს... და როცა დარწმუნდება, რომ თვალებს არა, არ უმ-
ტყუნიათ მისთვის, არ იტყვის განა, — ღმერთო მაღალო, ნუთუ
ამ დალოცვილებს ერთი ბატის ჭკუა მაინც არა აქვთ?! ევ-
როპის გარდა, რამდენი ქვეყანა მომივლია, მაგრამ არსად, არც
სამხრეთ ამერიკაში და არც აზია-აფრიკაშიც, არც კულტურულ
და არც აგერ ახლა კულტურის ბილიკებზე შემდგარ ხალხებ-
ში, არსად არ შევხვედრივარ, მანქანების კორიანტელში ადა-
შიანები მანქანებს არ უფრთხოდნენ, არ ერიდებოდნენ და...
აღბათ, ფიქრობდნენ, რომ... ეს მანქანებს უნდა ეშინოდეთ მა-

თი, და არა მათ — მანქანებისა... ასეთ დამთხვეულ მაგისტრალზე წერაატანილ ავტომობილებს შორის კი არა, — ტყეში, ხეებს შორისაც არ ივლის გონებადაქვეითებული შეშლილიც კიო... და თუ ზედ მიწისქვეშა გასასვლელის თავზეც კი თვალს მოჰკრავს აქეთ-იქით ხელჩაკიდებულ ორ პატარა ბავშვიან დედასაც, განა უაღრესად შეძრწმუნებული არ წამოიძახებს, ღმერთო, ეს სადა ვარ, თვითწოდებულ დიდი ცივილიზაციის მქონე ქართველებში თუ... პაპუასებთან? თანაც არა მე-20 საუკუნის, — მე-19 საუკუნის, იმ დროს თითქმის ველურებად მიჩნეულ პაპუასებში?! ვინ იცის, ეგებ კიდეც უფრო უარესებთანაც, აკი დღევანდელი მცირეწლოვანი პაპუასები ჩქარ მატარებლებს ქვებს არ უშენენ და ფანჯრებს არ უმტვრევენ, მათი ახალგაზრდები დანებს კი ატარებენ, მაგრამ ამ დანებს ერთმანეთის სისხლის ტბის დასაყენებლად როდი ხმარობენ, — ჯუნგლებში ლიანებისგან გზის გასაკაფავად და ნადირთან შესაბამელოდ, და არც მათი მამები, არც მიზეზით და არც უმიზეზოდ, ერთიმეორეს სიცოცხლეს არ უსწრაფავენ...

ჰოდა, ვაითუ, ვაითუ... მაგრამ რაკი „ვაითუს“ სათვალავი არ დაეღევა და ბევრ მათგანს უკვე შევეხე შავი ფერის ორივე წიგნში, ამიტომ სჯობს მოკლედ მოვქრა, წუთით გავკადნიერდე და ჩვენს ტრადიციონალისტ-მონარქისტებს მორიდებით ვურჩიო: ვიდრე დიდი გიორგი ირაკლის ძე ბაგრატიონი საქართველოს მეფის კვერთხს ხელთ აიღებდეს, წინასწარ აუწერონ — უამბონ და გაათრთხილონ, რა მხარეში და რა ხალხში მოუწევს მას მეფობა...

...არ გაათრთხილებენ და... შეიძლება უფრო უარესად მოგვეპრას თავი, თანაც სამსოფლიოდ: ერთი-ორი წლის შემდეგ როცა დარწმუნდება, რა მოუტრულებელ ფათერაკშიც გაყო სამეფო თავი, ვაითუ ერთ შავიან დღეს გამოგვიცხადოს, არც თქვენი (პაპუასების) ქვეყანა შინდა და არც თქვენი ტახტით, თანდაყოლილი ბუნების გამო მე სტალინობა არც მინდა და არც შემიძლიაო...

...და მაინც, ჩვენ მას მადლობა უნდა მოვახსენოთ, თუკი ევროპაში დაბრუნებისას არ მიჰბაძავს სვეტლანა ალილუევას, რომელმაც თბილისში ორწლიანი ცხოვრების შემდეგ პრესას ამცნო: „Надоело жить среди дикарей...“

(წყაროს ვუთითებ, რათა ვინმეს ჩემი გამონაგონი არ ეგონოს: გაზეთი „Советская культура“, 20.04.89.

სხვათა შორის, აქვე შეგიძლიათ ამოიკითხოთ ჩვენთვის, ცოტათი მაინც, გულის მომხიბვლელი რამ: თავის ამერიკელ გოგონას „ნათელა ჭულაშვილი“ „ველურების“ ენას, ქართულს მაინც ასწავლიდა).

ჩენი საუკუნის დასაწყისში ერთ სერბიელ ქალს, რომლის ხშირი ულვაშები მას თითქმის ყურებამდე სწვდებოდა, კუპრით შავი გრძელი წვერი კი ფართო გულმკერდს უფარავდა,— მთელ ევროპაში ქალაქიდან ქალაქში დაატარებდნენ და ამ საოცრება-სიგონჯის დემონსტრაციით მისი დამტარებლები დიდ ფულს აკეთებდნენ.

ჰოდა, თუ ის ქალი — წვეროსანი ევროპას მხოლოდ ერთ ეგზემპლარად მოევლინა, თვითონვე განსაჯეთ, რა იქნება მაშინ, როცა მსოფლიოს მილიონიანი ტურისტების წინაშე უამრავი ქართველი მასობრივად წარდგება მათთვის აქამდე არც ერთ ქვეყანაში არასოდეს ნანახი ვეება...

(ელირება კი რამედ უცხოური ვალუტის მოპოვება-დაგროვება ამ გზით?..)

...აი, ვინაა კაი ყმა,
მოსაგონარი ქებითა!
არა თქვენ, სადიაცენო,
რო ძროხებივით სძლებითა;
ლამე მაძლრები დასწვებით,
დილით მშივრები სღგებითა;
თავის ჯამს ჩასტქერიოთ, საქვეყნოდ
არც როს არ გამოსდგებითა.

ვაჟა

ლუარსაბი: „ფაშვი კაი მსმელისა მაქვს, აქ თუნდა ოთხი-ჩაფი ღვინო ჩავა“.

ილია

სარდონი: „ან კი რას ავიდოდა ხეზე, მისი ფაშის პატრონი“

ვაჟა

...დიახ, თქვენ, ცხადია, გაიფიქრებთ, რომ მე საცოლეების უნაყოფოდ ძებნა-შერჩევისას, ალბათ, ვეპოტინებოდი მოსაწყვეტს თუ არა — მოწყვეტილ ვარსკვლავებს მაინც, თორემ ისე, აბა, რომელი ერთი შეგკადრებდათო დაწუნებას, აკი თითქოს ახლაც არა ხართ ბრუციანი, ჩოლახი, მთლად დაშლილ-დაფეხვილი და, მგონი, არცთუ სულ გამოყეყეჩებულიცო...

შეიძლება-შეიძლება, და მაინც... თუმცა არც ერთი ჩემი „სასაცოლე“ არ გამოირჩეოდა არც რალაც ნამეტნავი გარეგნობით, არცთუ, ძველად რომ იტყოდნენ, დიდგვარიშვილობით (მიახლოებით ყველა მათგანი — ზოგი მანჯია იყო, ზოგი — კუტალია, ზოგი — ჭლამაძე და ზოგიც ჭლარკავა), არც ჰარეარდ-სორბონ-კემბრიჯში მიღებული განათლებით და არც რაიმე იშვიათი, მაღალფასოვანი პროფესიით...

მართალი ვითხრათ, ბევრ მათგანზე გული უფრო შებრალებით მიმივიდა („ჩემთვის ბედი რატომ უნდა დამწვარიყო...“ „რა მაქვს დასაწუნი, გარდა იმისა, რომ მანქანა არა მყავს...“ „მე ვინ მითხოვს, გლდანელს? აბა ვაკეში ვცხოვრობდე!“)...

ორი მათგანი სულ უბრალო ექთანი გახლდათ, ვენაში შიშით შპრიცის შეყვანას რომ ერიდებოდნენ... ერთიც — ისეთი რიგითი, შეუმჩნეველი მუშაკი, დაწესებულებაში მარტო ქვითრების გამოწერა რომ ევალედა, მეორე კი... ბოდიში, მეოთხე — წიგნის არც სულ რედაქტორი და არც სულ კორექტორი... მუხუთე...

ეჰ, მოკლედ, აი ასეთმა უკვე მოწყვეტილმა თუ აწ მოსაწყვეტმა ვარსკვლავებმა არ ისურვეს თავიანთი თავით ჩემი თავი გაებედნიერებინათ, შენიღბული უარით მიმასპინძლეს ხოლმე, ზოგჯერ არცთუ თავაზიანითაც; აი, მაგალითად, როცა ცეტ ქალიშვილს კი არა, გათხოვებისათვის უკვე გადამწიფებულს საინტერესო სპექტაკლზე მიიპატიჟებ და ის წამოსვლის თანხმობას მოგცემს, და შენც, რვის ნახევრიდან რვა სა-

ათამდე, მის მოლოდინში თეატრთან, შამფურზე წამოგებული გოქივიტ ცეცხლზე წინ და უკან, წინ და უკან ტრიალებ და... ის კი არ გამოჩნდება, არ მოვა...

ჰოდა, განა ღირს მეორე დღეს თუ თავად პირველი არ გეტყვის, თვითონ ჰკითხო მოუსვლელობის მიზეზი?

კაი ყმა, ვფიქრობ, თავს არ დაიმტკიცებს და არათუ ჰკითხავს, — არც შეიმჩნევს მის „ნარნარ“ ტუტრუცანობას არც იმ დღეს, არც სხვა დროს...

კაი ყმისათვის... სიყვარულიდან სიძულვილამდე მხოლოდ ერთი ნახტომია!

...უიმე-ე! ლამის მთავარი გამომჩა: არც ერთი ჩემი „საკოლე“, შედარებით ერთის გარდა, ჩემზე იმდენად უმცროსი და ისე ქორთვა და ნორჩი არ იყო, რომელიმე თანამედროვე მხატვარს გასული საუკუნის პუკირიოვის მსგავსად, ასეთ საქორწინო პათოლოგიურ შეუსაბამობაზე, ახალი „Неравныи брак“-ი დაეხატა.

ბარემ ამასაც ვიტყვი: ამ ვარსკვლავებიდან დღემდე (!) მხოლოდ ერთს მოაკითხა საბედომ — გათხოვდა ჩვენი დროის პრინცზე, — გასტრონომიული მალაზიის გამგეზე.

და როცა იგი, დიდი ხნის შემდეგ, ბაზალეთის ქუჩაზე შემომხვდა და, თითქოს დარცხვენით, თითქოს საქციელწამხდარმა მითხრა, რომ მას ძალიან, ძალიან მოეწონა ჩემი „ესა და ეს“ ახალი ნაშემოქმედარი, მინდოდა მეპასუხა ისე, რომ...

ო-ო, რაღაც ბედად ელვა-აზრმა უმალ გამომათხიზლა: თუ ახლა მას გულს იმგვარად გადაეუშლიდი, მუდამდღე დატრახახების საბაბი მიეცემოდა („მე, იცით, ცოლად გაყოლაზე ვის ვუთხარი უარი?“), ამიტომ ენაზე უკვე მომდგარ სათქმელს ფიცხლავ ლაგამი ამოვდე:

— მერედა, შე კაი ქალო, თუნდაც შეცდომით ნიჭიერად მიჩნეული ქართველი მწერალი ბულგარულ ბრინჯაზე უნდა გაგეტვალე?!

ღიასი.

ახლა კი, ამ აღსარების მოთავებისას, უმორჩილესად ვთხოვ ყველა ჩემს გულშემატკივარ მკითხველს, ჩემი მრავალგზის პერმანენტული მარცხიანი სასიძორობის გამო ნუ შემიცოდებენ:

ამჟამად ყველა ამ ჩემს, ასე თუ ისე, მაინც დამამცირებელ-დამამდაბლებელ ისტორიებს საკმაოდ იუმორისტულად ვუყუარებ, თუმცა მათ არც იმ მღელვარე დღეებში განვიცდიდი მაინც-დამაინც ისე ტრაგიკულად, რომ, თვითმკვლელობის მიზნით, სედუქსენის ოცი ტაბლეტი ერთდროულად, ტყაპატყუპით გადამეყლაპა...

(ღიახ, ვერ გავიმეტე ჩემი თავი მოსაწამლავად უფრო იმიტომ, რომ ცოდვები ქალების წინაშე მეც მიმიძლოდა: არა მარტო ისინი მიწუნებდნენ, ბევრ-მათგანს, ხტუნვა-ხტუნვითაც რომ გამომყვებოდნენ, წუნი მეც დავდე...

ყველას არ ჩამოგივლით — გრძელი სია გამოვიდოდა — მარტო ორიოდეს:

ერთი თამბაქოს წვევისგან ისე ყარდა, მის გვერდით სტალინური რეპრესიებიც ვერ დამაწვენდა;

მეორე ისეთი ზომა-წონისა იყო, თუნდაც ჩვენი პირველი გაცნობისას სუფრაზე, მცირემჭამელობით რომ მოვეხიბლე. ცდუნებას მაინც ვერ გაუძლო და კაბაგადაცმული ლუარსაბივით ისე ლაზათიანად მიაძღა ხაჭაპურსა და ტყემლის საწებელს, ჩიხირთმასა და ჩაქაფულს, საცივსა და ღომს, ცხელ მწვადსა და ცივი ბეჭის ანაჭერთ, კუჭმაქსა და ქათმის კურტუმოს, ზუთხსა და გადაზელილ ყველს, ხიზილალასა და ისპანახს, პამიდორსა და ზეთის ხილს, ატამსა და ქანჭურს, გულაბსა და ყურძენს, ბისკვიტსა და ნიგვზის ტორტს, — ჩემი პატიყი კავალერისა („მიირთვით, მიირთვით“, „მე გადმოგიღებთ, ქალბატონო, მე გადმოგიღებთ“...) სულაც არ დასჭირვებია და... დესერტის შემდეგ კვლავ ჩაქაფულს მიუბრუნდა.

...მესამე, რომელიც, თუკი ვითხოვდი, მზად იყო განქორწინებულყო, მაგრამ როცა ერთხელ შემთხვევით მისი თანამეცხედრე გამაცნეს, გულს შემომეყარა: ეს შედარებით ჩერ კიდევ ახალგაზრდა კაცი, ინდაურჩინჩახვიანი, წინაკბილებ აქაიქ ჩაცვნილი, თითქოს პირდაუბანელიც... ღმერთო, ამის ნაკოცნ ქალს რა მაკოცნინებს-მეთქი, გავიფიქრე და... მის სახლობაზე დაქორწინების სურვილ-ხალისი ჩემში იმ დღესვე სულ ერთიანად, ტერფით თხემამდე ამოიშალა.

მეოთხე... მეოთხემ შესვენებაზე ჩემ მიერ მირთმეული მო-

საკითხის — „ნაპოლეონის“ მირთმევისას დაუბანელი ხელები, და თუნდაც დაბანილი ჰქონოდა, დედის მიერ ჯერ კიდევ მყარად ჩაუგონებელი, მოუაზრებელი ბავშვივით თითები... მაღიანად გაილოკა და... ამით კიდევ ერთი ჯვარი დაესვა ჯვრისწერის ჩემს საწადელს.

ვიცი-ვიცი, კარგა მოზრდილი თავხედობა და კადნიერებაა, შენი თავი ჰკვიანებში თვითონვე ჩაიწერო, მაგრამ რაკი უამი დაგვიდგა ისეთი, როცა თავის ქება კიტრზე ოცქერ უფრო იაფია, ამ ერთხელ მეც ავდგები და...

„ჰკვიანი ადამიანისათვის სიყვარული ისეთი ნაზი და რთული მექანიზმია, რომელსაც სულ პაწაწინა ხიწვიც დააზიანებს“.

ამ ფრაზაში გამოთქმული დაკვირვება მე-19 საუკუნის დიდად ცნობილ ფრანგ მწერალს გი დე მოპასანს ეკუთვნის).

ახლა, თქვენი ნებართვით, ფრჩხილებში მოქცეულ ჩანართამდე შეწყვეტილ აზრთა მდინარებას კვლავ დავუბრუნდები: დიახ, წინა გვერდების წამკითხველ ქალებში ცოტანი როდი აღმოჩნდებიან ისეთებიც, რომლებიც სიზარულით აულოწინდებიან და შანს მომიგებენ, აი, თურმე, ეს ვაუბატონი, რაკი საქმროდ დავიწუნეთ, ამიტომ გვლანძღავს და გვაქიაქებს, ამიტომ გვემტერება ჩვენ, შვილიერების მოძულე კდემამოსილ ქართველ ქალებსო...

არა, ქალბატონებო, მისი მიზეზი რომ ეს იყოს, მაშინ ჩემი გულის კარს ასე ფართოდ არც გაგიღებდით და მის ხეულებში არ ჩაგახედებდით.

დიახ, მე თქვენ გემტერებით...

და არა მარტო თქვენ, — ყველა ივერიელს, ქალი იქნება იგი თუ კაცი, ვინც მტრობს თავის ერს, სამშობლოს თვისას, ოჯახს თვისას, ერთსა და, თუნდ, ორ შვილს მისას!

მოდით, ღროებით მაინც მოვეშვათ დაფდაფების სალხინო, უდარდელ ბაგაბუგს და ჩვენს პირქუშ სინამდვილეს წამიერად თვალი შევავლოთ: ქართველთ მხარე არასოდეს არ ყოფილა ისეთ კრწხისულ განსაცდელში, როგორშიც დღეს არის.

ჩვენი მომავალი, წინასწარმხილველ ვანგას დაუხმარებლადაც, უკვე შეგვიძლია შეუცდომლად განვკვიტოთ: რალაც ნახევარი საუკუნის შემდეგ, რომელიც სულ დიდი ორი თაობის სიცოცხლის მანძილზე თითქმის შეუმჩნევლად გაირიხინებს,

აღმოჩნდებიან თუ არა ჩვენი შვილიშვილები არასასურველ სტუმრებად, როგორც უმცირესობა, იმხანად აქ უკვე მტკიცედ დამკვიდრებულ მოსულთა და მოთრეულთათვის, — ეს ახლა ჩვენზეა დამოკიდებული...

ღიახ, საქართველოს მომავლის ბედის გამოჭედვაზე ზრუნვა ისედაც მოღალატურად დავაგვიანეთ, და ახლა მაინც, როცა „ინტერნაციონალს“ სულმოუთქმელად გვამღერებენ, ნუ გაეუწევთ ანგარიშს მის ზუსტ მუსიკალურ ელერადობას და მისი ეს სიტყვები უფრო ომახიანად შემოვძახოთ, რათა ყრუ ქართველთა ყურშიც შეაღწიოს:

„Нам не поможет ни бог, ни царь...“

ღიახ, თუ ჩვენსავე თავს თვითონვე არ უუშველეთ, არ ვუპატრონეთ, — ჩვენი გამკითხველი სხვა არავინ გამოჩნდება...

დასასრულ, მეპატიოს, თუკი ერთხელ კიდევ, ამჯერად — ღმერთმაც ქნას! — მართლაც უკანასკნელად გავიმეორებ იმ შეგონებას, რომლისთვისაც დაიწერა „შავი წიგნი“ და ახლა კი ეს მისი მეორე ნაწილიც იწერება:

— მხოლოდ მეტშვილიანობა და მრავალშვილიანობა გვიხსნის ჩვენ არა მარტო ფიზიკური გადაშენებისგან, — ბევრ ჩვენს გადამგვარებელ სიგლახესაც დათრგუნავს იგი და გამოაჯანსაღებს დახაშმულ ქალაქსა და სოფელს...

ამას უნდა ველტვოდეთ ყველა ჩვენ, — ერიც და ბერიც, ღიახ, ბერიც კი...

გ ვ ი ა ნ დ ე ლ ი მინაწერი (1990 წ.): მე ვემეგობრები ერთ მღვდელმთავარს, რომელიც ხუთ შვილს ზრდის თითქმის მაღულად, რადგან ამას მისი სასულიერო თანამოღვაწენი მართლ-მორწმუნეობის შელახვად უთვლიან და, ალბათ, კიცხავენ კიდევ...

ამაოდ, ამაოდ!

მე-17 საუკუნეში თევდორე მღვდელმა იხსნა საქართველო ოსმალთა შემოსევისგან, ახლა კი, მე-20 საუკუნეში, უარეს საფრთხეში ვიმყოფებით: თვითონვე ვესევით და ვმუსრავეთ საქართველოს, აგრეთვე არათუ სხვადასხვა გეარტომის თურქი, — ქრისტიანი „თურქებიც“ კი, თუ სიტყვიერი მზაკვრობა-შარიანობით, თუ დატენილი თოფით, — თავს არ იზოგავენ, რათა ჩვენსავე სამშობლოში ცეცხლის რკალში მოგვაქციონ...

საუკეთესო საშუალება, შთაუნერგო ბავ-
შეებს მამულის სიყვარული, ის არის,
რომ ეს სიყვარული მათ მამებს ჰქონდეთ.

შარლ მონტესკიე

ვიცი წინასწარ, ჩემ მიერ აღრე ნახსენებ დოცენტს არ მო-
ეწონება და არც გაიზიარებს ძველი რომაელების გამოთქმას,—
განმეორება დედაა ყოველივე სწავლისათ, მე მაინც არ მოვე-
რიდები და კვლავ მოვაგონებ მასაც და სხვებსაც მეფე-პოეტის
არჩილის სიტყვებს: „თუ ამოსწყდეს გლეხკაცი, საქართველო
დაძაბუნდაო“.

ჰოდა, თუკი ეს ჯერ კიდევ მე-17 საუკუნეში ესმოდა ქართ-
ველთა მეფეს, რომელსაც არათუ „უმალღესები“, — ბაკურ-
ციხის „ორსართულიანი“ სკოლაც კი არ ჰქონდა დამთავრებუ-
ლი და არც საფრანგეთის რომელიმე ლუდოვიკოსავით სანაქე-
ბო შინაურული განათლება მიელო, ჩვენ კი, მე-20 საუკუნეში;
რატომ არ უნდა გვესმოდეს ამ გაფრთხილების სიბრძნე, ჩვენ,
რომლებსაც თავები გამოტენილი გვაქვს აკადემიებით და უნი-
ვერსიტეტებით, ანდა, უნივერსიტეტი ეგებ მართლაც ვე-
რაფერს-მოგცემს და ვერც ვერაფერს გიშველის, გონება კაცს
ბუნებით თუ არ დაგყვა?!

დიპლომის მიხედვით უმალღესგანათლებულებიდან ნამდ-
ვილ-განათლებას ასიდან ერთი თუ ამართლებს, მაგრამ ეს იმ-
ას როდი ნიშნავს, საექვოდ მივიჩნით ის სასიხარულო ფაქტი,
რომ ის 99 უმალღესდამთავრებული, ყველა, მესამეკლასელი-
ვით, ჯერ კიდევ დამარცვლით კითხულობდეს.

და რახან ასეა, წავიკითხოთ ერთად და ხმამაღლა და, რამ-
დენადაც შესაძლებელია, გამოთქმით:

„თუ 50-იან წლებში სოფლად შობადობა ორჯერ მეტი იყო,
ამჟამად იგი გაცილებით უფრო დაბალია, ვიდრე ქალაქად...“

გაიგონეთ? ვიდრე ქალაქადო, ვიდრე ქალაქადო... ჯერ ქა-
ლაქად რა არის და...

ჰოდა, გავიხაროთ თუ არა ჩვენც, საქართველოს დეპეშათა სააგენტოსთან ერთად, 1977 წელს მის მიერ მოწოდებული ცნობით იმის თაობაზე, რომ...

„ამჟამად საქართველოში 51 ქალაქია და 57 ქალაქის ტიპის დაბაა... დედაქალაქ თბილისში ახლა მილიონზე მეტი კაცი ცხოვრობს, ხოლო ქუთაისში, რუსთავეში, ბათუმსა და სონუმში 180-დან 200—250 ათასი კაცი. 50—100 ათასამდე გაიზარდა უკანასკნელ წლებში გორის, ფოთის, ზუგდიდის; ცხინვალის, ზესტაფონის, მახარაძის, სამტრედიის, თელავის, რესპუბლიკის ბევრი სხვა ქალაქის მოსახლეობა“.

ჩვენც, ამ ზრდის სიხარულით ცას აწეულებმა, ხომ არ შევძახოთ ომახიანად, — ბარაქალა ჩვენს სწრაფვას უფსკრული-საკენ!

მით უმეტეს, რომ ეს ცნობები ამ ხუთი წლის მანძილზე უეჭველად დაძველდებოდა და ჩვენ, ალბათ, კიდევ უფრო წინ წავიდოდით, მხოლოდ წინ და მხოლოდ წინ!..

ჩვენი ეროვნული უბედურების დამადასტურებელი ჩემეული სავარაუდო მონაცემები, როგორც ეს პრესაში გამოქვეყნებულ ამ ბოლოდროინდელი წყაროებიდან ირკვევა, მართლაც არცთუ მცდარი გამოდგა და არც გადაჭარბებული, პირიქით— შავი საღებავები მე, თურმე, ალაგ-ალაგ დამიკლია კიდევც...

აი ესეც ბოლოდროინდელი, გულშემზარავი სტრიქონები, ციფრები, პროცენტები (ვისაც ჯერ კიდევ პატრიოტულად უცემს გული, და თან მაღალი წნევა აწუხებს, ამ მონაკვეთს, ვთხოვ ნუ ჩაიკითხავს):

„უკანასკნელი წლების გამოკვლევებმა გვიჩვენა, რომ ყოველი აბორტი სიცოცხლეს უსპობს არა მარტო იმ ბავშვს, რომელიც აბორტის მსხვერპლი ხდება, არამედ იმ ბავშვთა რაოდენობის ნახევარსაც, რომელთა შობასაც ქალები აბორტის გაკეთების შემდეგ მოინდომებენ“.

„საყურადღებოა ის ფაქტი, რომ ხელოვნურ აბორტს საქართველოში ყველაზე უფრო ხშირად ქართველი ქალები მიმართავენ“.

„მსოფლიოს უმრავლეს ქვეყნებში უშვილო ქორწინება ყველა ქორწინების 10%-ზე მეტი არ არის, საქართველოში მათი რიცხვი 16—17%-ია“.

(ერთ ძველ ანდაზას შეგახსენებდით: უშვილო ცოლის ყო-
ლასა სულ უცოლობა სჯობიაო... თუმცა ბოლოდროინდელი გა-
მოკვლევებით დასტურდება, რომ საქართველოში უშვილო-
ბის ერთ-ერთი მთავარი მიზეზი — როგორც ქალებში, ისე მამ-
აკაცებში — უზომო ქამა და აქედან მომდინარე აუწონავი
სიმსუქნეა!).

„1955 წელთან შედარებით 1978 წელს ერთშვილიანი ოჯა-
ხების ხვედრითი წონა 23,9%-დან 54,7%-მდე გაიზარდა“...

დასასრულ, დასკვნისმაგვარი:

„თუ ეს პროცესი არ შეჩერდა და გაგრძელდა, მოსახლე-
ობის „დაბერება“ და საბოლოო ანგარიშში მოსახლეობის
მკვეთრი შემცირება გამოიწვევს შრომითი რეზერვების შემ-
ცირებას...“

(გამოიწვევსო... ეს უკვე გამოწვეულია და ეს რეზერვებიც
შემცირებულია და წლიდან წლობით სულ მცირდება და მცირ-
დება, რის დამადასტურებელია ქალაქელ მოსამსახურეთა, სტუ-
დენტთა და მოწაფეების თუნდაც დროებითი, საავარიო „გა-
დასროლა“ სასოფლო-სამეურნეო სამუშაოების შესასრულებ-
ლად).

ყოველივე ეს ჟურნალ „საბჭოთა მედიცინის“ შარშანდელ
ოქტომბრის ნომერში ამოვიკითხე; ამ წერილის, როგორც ეტყ-
ობა, ფრიად განსწავლილ ავტორს, თუ არ ვცდები, იმდენად
შრომის რეზერვების შემცირების საშიშროება როდი აწუხებს,
რამდენადაც უგუნურება ქართველი ხალხისა, რომელსაც თა-
ვისსავე ყელთან თავისივე ხელით მიუტანია ყასბის დიდი,
გრძელი, საგულდაგულოდ ალესილი დანა...

დაე ნუ გავამტყუნებთ ამ მკვლევარს, თუ „ა“ ისე წარმო-
თქვა, რომელიც არცთუ სულ „ა“ არის და არცთუ სულ „ბე“
არის; რა ქნას, თუ ის ხნიერია, მაშინ ეცოდინება, და თუ ახალ-
გაზრდაა, — გაგონილი ექნება, რა შავი ღლეც დააყენა პრო-
ფესორ იოსებ ჟორდანიას ქართულ ენაზე გამოქვეყნებული მი-
სი ერთი სტატიის გამო (უთარგმნიდა და „საქმის კურსში“ ჩა-
აყენებდა, ცხადია, ათასებიდან ერთი, რომელიმე კომუნისტი
შადიმან ბარათაშვილი!) საბჭოთა „ნამესტნიკმა“ კოვანოვმა, —
ქართველები გამრავლდებიან თუ არა, ამას რა მნიშვნელობა
აქვს, მთავარია საბჭოთა ხალხი მრავლდებოდეს და ვმრავლ-

დებით კიდევო (ახლა, ოცი წლის შემდეგ, ამას, ალბათ აღარც იტყვოდა: რუსების ნამრავლიც უკვე აღარ იძლევა თვითდამშვიდების შესაძლებლობას; ზღვა, რასაკვირველია, სწრაფად აღდარება, მაგრამ საბოლოოდ დამშრალი ღიდი ზღვაც არა ერთი და ორი ახსოვს კაცობრიობის ისტორიას).

მე ბოდიში უნდა მოვიხადო მკითხველის წინაშე იმის გამო, რომ თურმე, არაზუსტი ცნობა მივაწოდე მას ჩემი შრომის პირველ ნაწილში: ოფიციალურ დაწესებულებებში არავინ ეს „სამხედრო საიდუმლოება“ არ გამანდო, ჩემი კუსტარული დემოგრაფიული სტატისტიკით კი ქართველი ერთშვილიანი ოჯახების რიცხვი 30%-ად ვიანგარიშე, მაშინ, როცა იგი, როგორც ზემოთ შევიტყვეთ, საერთოდ საქართველოში 55% ყოფილა; აქედან კი, თუ „სხვებს“ გამოვაცლებთ, ჩვენი „წმინდა შემოსავალი“, სულ ოცა, 50%-ს მაინც მიაღწევს...

ღიახ, პროცენტებიც შეიძლება იყოს თურმე თავზარდამცემი, — და განა ეს მონაცემიც ამ სფეროს არ განეკუთვნება?!

(ახლა მაინც ხომ დავრწმუნდით, ზოგიერთი ჩვენგანი „ინტურისტის“ ერევნელ გიღზე ტყუილუბრალოდ რომ გააცეცხლდა: როგორც ხედავთ, მან მხოლოდ უცილობელი ფაქტი აღნიშნა, ქართველები მალე ამოიხოცებიანო).

და კიდევ...

ბევრ სხვა დემოგრაფიულ უბედურებასთან ერთად, რომელთა წყაროც თვითონ ჩვენ ვართ, ქართველები, ბოლო ხანს სხვა უბედურებაც წამოგვეწია, — ეს უკვე არა ჩვენი მოთავეობით, — რაიც კიდევ უფრო დააჩქარებს საბოლოოდ ჩვენს სრულ გადაშენებას...

აგერ ახლა თბილისის ერთ-ერთი გაზეთის რედაქციაში, მრგვალ მაგიდასთან ბჭობა გაიმართა მიგრაცია-დემოგრაფიის საკითხებზე...

როგორც ცნობილია, მრგვალი მაგიდა იმას ნიშნავს, რომ შის ირგვლივ მსხდომნი თანაბარი უფლებებით სარგებლობენ სიტყვით, საქმით, რეგლამენტით...

სასიხარულო ის არის, რომ ამ საუბრის შინაარსი გავაცუნეს, ოღონდ სამწუხარო ის არის, რომ ჩვენი ყველაზე გამოჩენილი ეკონომისტის, დემოგრაფის პაატა გუგუშვილის სიტყვა, გაზეთში გამოქვეყნებული ანგარიშის მიხედვით თუ ვიმსჯე-

ლებთ, მისი მოწაფეების სიტყვებზეც კი ბევრად მცირეა. შეიძლება მან მართლაც ცოტა ილაპარაკა, თუმცა ისიც შესაძლოა, — გამართული დიქციით ისე ნათლად წარმოთქვა „ა“, რომ გაზეთის ვიწრო სვეტში არ ჩაეტია...

ასეა თუ ისე, ქართველი კაცის ჯერ მხოლოდ ნახევრად დაელებული თვალი აქაც ბევრ საგულისხმო რამეს (გულისმომკვლელს!) ამოიკითხავს.

აი, ზოგიერთი მათგანი:

„სსრ კავშირის უმაღლესი განათლების ბევრ ცენტრში შევხვდებით ქართველ სტუდენტობას, რომელთა დიდი ნაწილი შემდგომში ალარ ბრუნდება რესპუბლიკაში. ასევე მნიშვნელოვანი რაოდენობით მიდიან საქართველოდან სხვა რესპუბლიკებში ახალგაზრდა სპეციალისტები — ინჟინრები, ექიმები და სხვ. მცირე როდია აგრეთვე სხვადასხვა სპეციალობის მუშახელის კონტინგენტები (განსაკუთრებით მშენებლები), რომლებიც მუდმივ ან დროებით სამუშაოდ მიდიან ქვეყნის ცენტრალურ და აღმოსავლეთ რაიონებში. საყურადღებოა ისიც, რომ დროებით წასულთა ნაწილი მკვიდრდება საცხოვრებლად ახალ ადგილებში“.

...და მერე, ვითომ ისინი იქ, აქა-იქ მიმოფანტული ეს ერთეულები, თუნდაც ათეულები, ამ ახალ სამოსახლო ადგილებში, თავიანთ ეროვნულ სახეს შეინარჩუნებენ? როცა აღარც ჯვარია და აღარც ხატი, აღარ არის რწმენა, სამშობლოს სიყვარული, სისხლის ძახილი, — ხსოვნა წინაპრებისა და გრძნობა ნათესაობისა?!

რომელი ებრაელები ჩვენა ვართ, რომელთა საკვირველმა ეროვნულმა გამძლეობამ სამი ათასი წელი მოინელა, შიგნიდან და გარედან თავს დატეხილი ათასი ჭირი აიტანა და დღემდე მოვიდა, მიუხედავად დაქსაქსულობისა, როგორც ერთიანი, მონოლითური ხალხი!

ნაწილობრივ, მხოლოდ ნაწილობრივ, ასევე შეიძლება ითქვას სომხებზეც, მაგრამ ერთისა და მეორის ბედნიერება მათს ამ უბედურებაში ის იყო, რომ ისინი სახლდებოდნენ. (თუ ასახლებდნენ) მრავალრიცხოვან კოლონიებად სოფლად თუ

ქალაქად, შეეძლოთ ერთმანეთში მისვლა-მოსვლა, მშობლიურ ენაზე ლაპარაკი და, მაშასადამე, მისი შემონახვაც. და რაკი მათში ქალი და კაცი თანაბარი რაოდენობით მოიძევებოდა — თხოვა და გათხოვება მეტწილად თავისივე ერისაზე ხდებოდა...

ახლა კი... ამასაც დაუგდეთ ყური:

„...ყოველწლიურად 10 ათასამდე მუშა, ძირითადად ახალგაზრდობა, ორგანიზებული წესით იგზავნება მშენებლობებზე და სამრეწველო საწარმოებში სამუშაოდ მუდმივად ან განსაზღვრული ვადით“.

ჰოდა, რაღა ახლანდელი ორგანიზებული წესით და რაღა შპა-აბასის მიერ არაორგანიზებული წესით აყრა-წარეკვა...

ღმერთო, შენ შეგცოდნე და... შპა-აბასის დაუფარავი, პირდაპირი ეგზეკუცია, მგონი, ჯობდა კიდევ, აკი ის ყველას მიერეკებოდა — დიდსაც და პატარასაც, ქალსაც და კაცსაც, ახლა კი... მხოლოდ ჯან-ღონით სავსე ახალგაზრდები, მხოლოდ მამრობითი სქესისა, და თან ყოველწლიურად ათი ათასამდე, სულ დარჩეულები, და არა მუქთახორა უსაქმურები, კორუფციით გაღალატებული დედ-მამის შვილები — ლაპ და ლაბაბდამშვენებულები...

...თუ დაეჯერება იმ დროის ისტორიას, როცა სტატისტიკური სამმართველოები ჯერ კიდევ არ არსებობდნენ, არ მოქმედებდნენ, ანუ, ამ სიტყვების ნაცვლად ახლა „უკეთეს ქართულს“ რომ გვთავაზობენ, — არ ფუნქციონირებდნენ, შპა-აბასმა აღმოსავლეთ საქართველოდან სპარსეთში ასი ათასამდე ქართველი წაასხა, ეს „გეგმა“ კი ახლა რაღაც ათ წელიწადში სრულდება და მომავალში — დრო ხომ არ ჩერდება ერთ წერტილზე! — რამდენი ასეთი „უხემოსავლიანი“ ათი წელი გველის კიდევ და კიდევ!..

ფერეიდანში, ამ სამ საუკუნეში, სახით, უფრო მეტად, ვიდრე ნაკლებად, სპარსელებს იერითაც კი დავემგვანეთ და, აბა, რომელ ჩვენს იერსლა შევინარჩუნებთ, თუნდაც ერთი თაობის სიცოცხლის მანძილზე ვოლოგდაში, სმოლენსკში, პენზაში, ვიატკაში, ტიუმენში, კომიში, იაკუტიაში?..

ყვავს არ ჰქონდა, ბუს გაჰქონდაო...

რომელი 60-მილიონიანი იტალია ჩვენი ვართ ანდა 45 მილიონიანი თურქეთი, რომ ჩვენი მუშახელით უზრუნველვყოთ სხვა მხარეები, ახლებურად — რეგიონები, სადაც, თითოეულში, სულ ცოტა, ხუთჯერ მეტი ადგილობრივი მოსახლეობაა, ვიდრე ქართველები ვართ საერთოდ მთელ მსოფლიოში!

ქუთაისის საავტომობილო ქარხანაც კი მუშახელს სანთლით დაეძებს და... რას არ ჰპირდება მის მოსაზიდად: ქალაქში ჩაწერას, ბინას, მანქანას, ხანმოკლე დროის გავლისას უმაღლესში მოწყობასაც კი (ჰმ! კიდევ უკვირთ, რატომ ცარიელდება, ამ შემთხვევაში დასავლეთ საქართველოს სოფლებიო)...

ასევე რუსთავის ქარხნებიც...

ყველაფერ სხვას რომ თავი დავანებოთ, ყოველწლიურად საქართველოდან ათასობით ტალიკ-ტალიკი ბიჭი თუ წავა ჩრდილოეთსა თუ აღმოსავლეთში, ციმბირსა თუ შუა რუსეთში, საცხოვრებელ-დასამკვიდრებლად, საცოლეებს ასე თათარიახნად აქედან ხომ არ წაიყვანენ? რა ქნას მაშინ ათასობით აქ დარჩენილმა ქართველმა ქალიშვილმა, ვისზე დათხოვდნენ? ერთმანეთზე?!

...არა, იმ ქართველი ჰაბუკებისათვის: ჩვენი უფროსი რუსი დები სასიძოებისა და მათ შთამომავალთა ეროვნული სახის წასაშლელ-დასაქარგავად ხომ არა ჰყავთ გამიჯნული?!

ამ თხუთმეტიოდე წლის წინათ, როცა დაღესტნელმა აგაევმა „წინადადება შემოიტანა“, უკვე დროა ერთ ენაზე, რუსულად ვწეროთო ყველამ, მაგრამ რაკი ის მხოლოდ დოცენტი იყო და თავისი „საბჭოთა პარტიოტული“ შექაზილიდან არაფერი გამოუვიდა, ახლა კი მეცნიერულად გააზრებულ მიგრაციად მონათლულ, ამ დიდი მასშტაბით „ქმურ გადაადგილებაში“ უკვე პროფესორ რიბაკოვსკების ოინბაზურად მოფიქრებული, მაგრამ მაინც სულ იოლად გასაშიფრავი მზაკვრული ხელწერა ხომ არ ურევია?!

აჰა, კიდევ ერთი სანდო ამონაწერი:

„მეტად სავალალო მდგომარეობა შეიქმნა ზოგიერთი რაიონის სოფლებში, სადაც უკვე რამდენიმე წელია სიკვდილიანობა სჭარბობს შობადობას“.

(ოფიციალური შერბილებული „ზოგიერთი“ ჩვენს ცენ-
ზურაგაუქვლელ ენაზე ნიშნავს, ცხადია, მ რ ა ვ ა ლ ს).

მე ამას საში წლის წინათ, „შავი წიგნის“ წერისას, მხოლოდ
ვვარაუდობდი, საუბედუროდ, სინამდვილე გამოდგა...

ჰოდა, ჩვენ კიდევ ხელოვნური დაქსაქსვა, გამეჩხერება, აყ-
რა და ცხრა მთას იქით დასახლება-ათქვეფა შეგვიწინარჩუნებს
ქართველობის ერთ მთლიან სახეს?!

და როცა შენ თვალწინ ასეთი საზარელი დემოგრაფიული
სურათია გადაშლილი, განა გაგემტყუნება, თუ შეძრწუნდები
და სასოწარკვეთილი წამოიკივლებ, —

არასოდეს,

ა რ ა ს ო დ ე ს,

მთელი ჩვენი არსებობის ისტორიის მანძილზე არასოდეს,
დიდი ჰირიანობის დროსაც კი, არ ვყოფილვართ ქართველები
ასეთი განსაცდელის წინაშე,

არასოდეს, არასოდეს არ შეგვიხედავს ასე ახლოს თვალე-
ში სიკვდილისათვის,

და ჩვენ კიდევ ამ დროს ჰარი-ჰარალოს უნდა გავიძახოდეთ
და ტაშ-ფანდურს ვუკრავდეთ?!

რუსთაველის თეატრის საზღვარგარეთის გასტროლები და
„დინამოს“ ფეხბურთელთა გუნდი, სუხიშვილის ცეკვის ანსამ-
ბლი და პრიმიტიული კინოსურათი „მშობლიურო ჩემო მიწავ“
გვიხსნიან ჩვენ და ჩვენს მიწასაც დალუპვა-დასამარებისგან?!

ისე არ გამივოთ, თითქოს მოვუწოდებდე, — არ ვიმლე-
როთ, არ ვიცეკვოთ, თეატრის კარიც გამოვიხუროთ და უკვე
შაეებით შევიმოსოთ და პანაშვიდიც გადავიხადოთ,

არა, მაგრამ...

Стыдно народу в годину горя
Красу небес, долин и моря,
Ласку милой воспевать.

(ამ სტრიქონებში მხოლოდ ერთი სიტყვა შევეცვალე მეო-
რით, — ნ. ნეკრასოვის უკვდავმა აჩრდილმა, არა მგონია, ამი-
სათვის დამიცაცხანოს და გამკიცხოს).

ერთმა შედარებით ახალგაზრდა მწერალმა-ქალმა, გაუთხო-
ვარმა და უშვილომ, სულაც არაბრიყვმა და არააფრაქმა, მითხ-

რა, რაკი მომავალი არ გვიწერია, ისტორიას მაინც რომ შემოვ-
რჩეთ, ახლავე დავიხოცოთ როგორც რაინდებიო...

მე მას შუბლზე ხელი დავადე და ერთობ შევწუხდი, რაკი
სიცხე არ ჰქონდა... ჰმ...

რა რაინდობაა შენი მიწა, შენი ცა, შენი კერა, შენი ეზო-
კარი შენი აღსასრულის მომლოდინე და მიდარაჭებულ მოძუ-
ლეს დაუტოვო?!

თუ...

ისტორიას უფრო იმით შემორჩები და რაინდობაც ის იქ-
ნება, თუკი სიკვდილთან პირისპირ მდგომი ჭერ კიდეც შემორ-
ჩენილ ეროვნულ ენერგიას სატკბარუნო ცხოვრების ნუგბარ-
ზე არ დაახურდავებ და თავს არ დაიმშვიდებ უცხო მომსვლელ-
წამსვლელთა შენი ქვეყნისა და შენი ხალხის თუნდაც გულწრ-
ფელი, მაგრამ უსაფუძვლო განდიდებით; არსებობის მიწუ-
რულს მაინც, გონებას მოიკრებ და საქართველოს მარად და
მარად სასიცოცხლოდ წმინდა ვიორგის ლახვარს აღმართავ...

ღვთის მადლით, ამ ლახვარს, ქართველი ერის ძველად მრავალ-
ნადასა და უერთგულეს მეგობარს, ძებნა არ სჭირდება,
თხოვება არ სჭირდება, ალესვა არ სჭირდება, იგი ჩვენს ხელ-
თაა, მოიხმარე ოღონდ...

ჩვენს გამოსადვილებლად საამისო ზარი ადრეც არაერთხელ
შემოვკარი, და თუ ერთხელ კიდეც ახლაც შემოვკრავ, ზოგი-
სათვის მომაბეზრებელი გამეორებისათვის, არც პატიებას ვი-
თხოვ და არც ბოდიშს მოვიხდი:

— ეს არის პირადი მაგალითი!!

ყველგან და ყველა საქმეში პირადი მაგალითი გადარჩენა-
ხსნის ლამპარივით უნდა მიგვიძლოდეს წინ, უპირველეს და
უზენაეს მიზნად ეს უნდა გვასულდგმულებდეს, —

ყველას!

ყველა ქართველს საქართველოში და მის გარეთაც, — აბა-
შიძე — ბუაჩიძე — გაბუნიათი დაწყებული შევარდნაძე — ჩო-
ჩია — ჯიჯეიშვილით დამთავრებული!

ჩვენს ბედში მყოფათათვის სიკვდილის დამარცხება მწო-
ლოდ სიცოცხლეს შეუძლია, ასიათასობით ჩვილი ბავშვის სი-
ცოცხლეს!

სხვა არაფერს და არავის!

ყველას სიკვდილმა გვერდით ჩამიარაო,
შვილის სიკვდილმა ვულს გამიარაო.

ანდაზა

ჯერ კიდევ 1967 წელს მოსკოვის ჟურნალის „Наука и жизнь“-ის მეექვსე ნომერმა გვაუწყა, საქართველოში ყოველწლიურად ნახევარ მილიონზე მეტი აბორტი კეთდებო...

(სულ ახალი მინაწერი: მოსკოვის გაზეთ „Труд“-ის (1.09.90) ცნობით, ინგლისში ყოველწლიურად აღირიცხება 165 ათასი აბორტი (მოსახლეობა — 55 მილიონი); დასავლეთ გერმანიაში — 89 ათასი (მოსახლეობა — 61 მილიონი); იტალიაში — 200 ათასი (მოსახლეობა 57 მილიონი), კანადაში — 63 ათასი (მოსახლეობა — 25 მილიონი); ფინეთში — 13 ათასი (მოსახლეობა 5 მილიონი)...

ეს ციფრები მომყავს შესადარებლად: ხუთმილიონიან საქართველოში კი...)

...თუ იმასაც გავითვალისწინებთ, რომ ამ ბოლო 15 წლის მანძილზე ქართველთა შობადობამ მკვეთრად და მკვეთრად იკლო, ზუსტი სტატისტიკური მონაცემების მოშველიებაც არ არის საჭირო იმ დასკვნის გამოსატანად, რომ ჩვენში ახლა აბორტების რიცხვი იმ ნახევარ მილიონსაც უკან ჩამოიტოვებს.

ამ ნიადაგზე რეალური საშიშროებაც კი იქმნება, რომ წინათ დიდად ქებული ქართველი ქალი საერთოდ დაკარგავს ქალის ფიზიოლოგიურ დანიშნულებას და გადაგვარდება არა მარტო როგორც ადამიანი, გადაჯიშდება როგორც დედაც — სიცოცხლის საწყისი...

ო, ბედო უბედურო, რამდენს ვიცნობ ისეთ ახლად მოლოგინებულს, რომელიც არც ბალერინაა და არც კინომსახიობი, თვალს რომ არ შეაჩერებ არც მის „ტანწერწერტა ფიგურაზე“

და არც მის კაზმულ სახეზე, მაგრამ საერთო მიზანძვა-წამხედურობით ჩვილისათვის ძუძუს მიცემას რომ გაუბრის...

ერთი, 30 წლის ერთშვილიანი ქალი გამოშიტყდა, უფრო კი, ალბათ, წამოსცდა, დღემდე 43 აბორტი მაქვს გაკეთებულიო... ბოლო დროს კი აბორტის საფასურმა ოცი-ოცდახუთი მანეთიდან ორმოცდაათს მიაღწია, და ეს სულ ერთია—კერძოსთან იკეთებ თუ „სახელმწიფოსთან“, მათ შორის რაიმე განსხვავება არც არსებობს...

(გვიანდელი მინაწერი (1990 წ.):... ახლა თურმე ას მანეთს მანეთსაც არ უკლებენ!).

გასავალი გასავლად, მაგრამ ოჯახისა და სამშობლოს პირდაპირ ღალატზე რომ აღარაფერი ვთქვათ, ამ „კეთილშობილური ოპერაციით“ თავს რომ ისახიჩრებ, იმწარებ სიცოცხლესაც, რომელიც არ თავდება 35—40 წლის მიჯნაზე...

სწორედ ერთი ამათგანი იქნებოდა ის, რომელსაც ექვი არ ეპარებოდა, მისი დაღბინების მზეს შავდლიანობის ღრუბელი არასოდეს გადაეფარებოდა, მაგრამ...

„მენატრები, დავიგვიანე, შეც მალე მოვალ...“

ადვილი შესაძლებელია, საფლავის ქვაზე ამას არ წააწერდა და არც იმქვეყნად წასვლას აიჩქარებდა, ამქვეყნად იმ ერთის გარდა სხვა შვილებიც რომ ჰკულებოდა...

ყოველდღიურ, ჩვეულებრივ ამბებად გადაგვექცა. მკვლელობები, ავტოკატასტროფები, ლოთობა და ნარკომანობა, იმაცა ახალშობილთა შორის გონებასუსტებმა, ფიზიკურად მახინჯებმა, კარი შემოგვიღო ავღანეთიდან თავდახურულმა თუთიის კუბოებმაც (ამ ნიადაგზე ერთი დღეა ისე გადაქანდა, სამარის კარამდეც ვერ მიაცილა... „ჩემო ერთადერთო იმედო, ჩემო ერთად-ერთო სიცოცხლეგ...“).

ჩვენი ეს ბედშავობა კიდევ იმით ორკეცდება, რომ, რაც დრო გადის, ამ მხრივ ჩვენი „ცა-ფირუზი“ კი არ იწმინდება,— იქუფრება უფრო...

და ასეთ დროში ერთი და ორი შვილის იმედად დადგომა, თუნდაც რვამილიონიან შვეციასავით სტაბილური და ერთეუროვანი ვიყოთ, არც ვიკლებდეთ — არც ვიმატებდეთ და, მა-

შასაღამე, გათელვით არც არავინ გვემუქრებოდეს, მაინც საბედისწერო შეცდომაა, უწინარეს ყოვლისა, თვით მშობლებისათვის, აკი შენი ერთადერთი და, თუნდაც, ორი სასოება როდის და სად წამოჰკრავს სასიკვდილო ხიფათს ფეხს, — ეს მაღალმა ღმერთმაც არ უწყის...

ამ ბოლო დროს სხვა, ჩვენსავეთ მცირერიცხოვანი ხალხები ეროვნული თვითშეგნებით კიდევ უფრო და უფრო იმსკვალებიან, ჩვენ კი ნაბიჯ-ნაბიჯ იმასაც ვკარგავთ, რაც ნაწილობრივ კიდევ შემოგვრჩენია.

ჩვენ თავი მოგვაქვს, — ზოგჯერ სამართლიანადაც, — საქართველოს გარეთ ჩვენი წარმატებებით თეატრალურსა და კინოხელოვნებაში, მხატვრობაში, სპორტში, ქალთა ქადრაცში...

ჰოდა, თუკი მართლა „ყველაფერში“ ვჩანვართ, ამიტომ განა დასაძინებელი ნანა უნდა ვუმღეროთ ჩვენს თავს, თუკი პირიქით — კიდევ უფრო უნდა შევწუხდეთ იმის გამო, რომ ასეთი გამორჩეული ერი — ერთი მხრივ უქულობით, მეორე მხრივ ნიჭიერებით — თავისივე ნებით ეთხოვება სამსოფლიო საწუთროს...

აგერ ახლა ჩვენმა საოპერო თეატრმა „მთელი“ მოსკოვი გააცუცა, და ეს რაღაც ორწლიანი გარჯის შედეგად ლეოპარდისებური ნახტომი გააკეთა გამოუქცევლად...

გამოუქცევლად-მეთქი იმიტომ, აკი ეს ცეცხლი ააგიზგიზეს 18 წლის მანძილზე საცოდავად და სავაგლახოდ მიმქრალ კერაზე...

ვის შეეძლო ეს? ამბობენ, მხოლოდ მირონცხებულ ხალხსო... და ჩვენ ამის შეგარძნება ყველას გვახარებს, ეს ჩვენთვის დიდი საერო დღესასწაულია...

ჰოდა, რა ბიჭი და რა ქართველი ხარ, ყელს თუ არ მოიღერებ .. მოიღერებ. ცხადია, თანაც უფრო მეტადაც, რაკი იცი, რომ ეს ქება, ჩვენთვის არცთუ უცხო „ილეთის“ მეშვეობით, ღვინო-კონიაკის ძღვენით კი არ მოგიპოვებია, — ნამდვილი, ანკარა, პირწმინდა ხელოვნებით!

ღიახ, ეს დღეს, დღეს, ხვალ კი... ხვალ რა მოგველის? ხვალ რა დახლი დაგვიდგება?

ჩვენი ორმაგი ტრაგედიაც სწორედ ის გახლავთ, რომ თავისი ეროვნებით მოამაყე და თავმომწონე ხალხი თავისივე ერ-

ოვნული მოუსაზრებლობით, სიბეცით და უგუნური გულდამ-
შვილებით დღითი დღე შაგრენის ტყავივით ილევა და მცირ-
დება, მცირდება და ილევა, ცულით და წერაქვით მისდგომია
რა თავისივე საძირკვლის დედაბოძს და ურტყამს და ურტყამს,
ურტყამს, რაც ძალი და ღონე აქვს...

თითქოს პირიქით უნდა ხდებოდეს: ჩვენი პატარა ქვეყნის
მის საზღვრებს იქით ასეთი საყოველთაო მოწონება-აღიარება
ჩვენს გულში ეროვნულ ცეცხლს კიდევ უფრო უნდა აძლიე-
რებდეს, და ჩვენც ამ ცეცხლს სულს კი ვუბერავთ, მაგრამ არა
იმდენად მის გასაღვივებლად, — უფრო ჩასაქრობად...

ისეთი შთაბეჭდილება გრჩება კაცს, თითქოს ახლა უფრო
მეტს ვზრუნავდეთ პრაქტიკულად ჩვენი ისტორიული ძეგლე-
ბის დაცვასა და რესტავრაციაზე, ვიდრე, მათი შემქმნელთა
დღევანდელი შთამომავლების სამარადისო სიცოცხლის შე-
ნარჩუნებაზე...

კი, მაგრამ... თუკი ჩვენ აღარ ვიქნებით, ვისთვისღა გვინდა,
თუნდაც ჩვენი გმირული ისტორია და თუნდაც ჩვენი ხელთუქ-
მნელი ძეგლები? მაგრატის ტაძარი და დიდგორის მემორი-
ალი? ჩვენი „მზიური“ და ჩვენი განახლებული ძველი თბილი-
სი? ქართული ენის განმარტებითი ლექსიკონი და ქართული
ენციკლოპედია? იმათთვის ხომ არა, რუსთავის ბაზარში ერთ-
მა ჩვენმა მარნეულელმა „დამ“, შეკინკლავებისას, თავის ქართ-
ველ „დას“ პირში რომ მიახალა, მაჰ-აბასს თქვენ უფრო მეტი
უნდა ამოეწყვიტეთო?!

მართალია, ეს ბაზარში ითქვა, მაგრამ, -აბა, რომელღა ეკ-
ონომისტ-დემოგრაფმა არ იცის, რომ ცხოვრების ბარომეტრს
ბაზარი უფრო სწორად განსაზღვრავს, ვიდრე ფერადი ტელე-
ვიზორი, სადაც, დასტურ, ახლახან ერთმა ნაიუბილარმა, ერთ
შვილიშვილიანმა პოეტმა, რომლის პოეზიამაც, როგორც გაზე-
თებმა გვამცნეს, „ჩვენს წინაშე უ დ ი დ ე ს ი პოეტური სამყა-
რო გადაგვიშალა“, უყანწოდ შესძახა: „ჩვენს გამრავლებას გა-
უმარჯოს!“

პრესისა და ტელევიზიის შეგონებით, მათი მოწოდებებით
დედაქალაქის ტროტუარებზე ასე ხშირად ადამიანების გამახე-
იბრებელ, თავლია ქებისთვისაც სახურავებიც ვერ დაგვიხუ-
რავს ჩვენ, ქართველებს და... გამარჯვების შეძახილით გაემ-

რავალშვილიანდებით ანდა გავმრავალშვილიშვილიანდებით?!

„სამშობლოზე ფიქრი ნუ მოგვეშალოსო“, — უბედურება ბედნიერებაზე ფიქრებით შეიცვლება?!

ქართველი ხალხის გასამრავლებლად და, მაშასადამე, საქართველოს შესანარჩუნებლად, ახლა ვერც ტიბაანით პირთამდე სავსე ყანწით სადღეგრძელოს შესმა გვიშველის და ვერც თუნდაც მოსეს ტოლა მესიაც მოგვევლინოს...

ერთი მესია, ე რ თ ი...

რუსთაველის აკენის დამრწევ ქვეყანას თუ ყველა ჩვენ ერთად არ მოვევლინეთ მესიად, ჩვენი არსებობის უკულმა დატრიალებულად ჩარხი წაღმა ველარ შეტრიალდება...

რას ვიფიქრებდი, სიტყვა ასე თუ გამიგრძელდებოდა...

თავდაპირველად „შავი წიგნისათვის“ სულ რაღაც ათიოდე გვერდის დამატებას ვაპირებდი, რათა ერთ ბგრესიულ ბარათზე შეპასუხა... ამ პასუხს სხვა რამ მოჰყვა, იმ სხვას კიდევ სხვა და... როგორც ხედავთ, პირველ წიგნს გვერდით მეორე წიგნი ამოუდგა, რომლის კომპოზიცია-მორთვა-მოკაზმულობას, მართალი გითხრათ, განსაკუთრებულ ყურადღებას არც ვაქცევ: როცა სახრჩობელაზე თავი ყულფში გაქვს გაყოფილი, იმაზე როდღიდა ფიქრობ, ამ ქვეყანას მელოტი ეთხოვები თუ თმახუქუქა...

ეს კი არის, „შავი წიგნის“ დაწერიდან სამი წლის შემდეგაც მის ამ მეორე ნაწილში — „შავზე შავ წიგნში“ კიდევ უფრო განმიმტკიცდა, გამისალკლდევდა პირველში გამოთქმულ ჩამოყალიბებული ის აზრი, ის რწმენა, რომ ჩვენი მხსნელი, ჩვენი მშველელი, ჩვენი გადამრჩენი, ქვეყნისა და ერის ამომგდები წამხედურობის ამომშანთავი ისევ და ისევ და მხოლოდ და მხოლოდ

პირადი მაგალითია,

პ ი რ ა დ ი მ ა გ ა ლ ი თ ი ა,

პირადი მაგალითია!!!

და მრავალი სხვა ის ზომა, რომლებზეც არაერთხელ მოგახსენეთ, და რომელთა კიდევ უფრო შევსება-გამდიდრება-გა-

ფართობა, პირადი გამოცდილებისა და დაკვირვების მიხედ-
ვით, ყველა ჩვენგანს შეუძლია.

...და თუ სიბრძნე დაგვეთანამგზავრება და ასე მოვიქცევით,
მერწმუნეთ, დიდი ილია ზეშთაგონებულნი შემოსძახებს:

„ჩენი ქვეყანა, საქართველო, გალვიძებულა!“

ვისთვის კედები, ვერ მიხედები. თუ
სოფელსა მოიძულებ.

რ უ ს თ ა ე ე ლ ი

ამ ხუთიოდე წლის წინათ ჩვენი დედაქალაქის პირველ გა-
ზეთში ამოვიკითხე:

„21-ე საუკუნის დამდგენისათვის საქართველოს ქალაქებში
იცხოვრებს დაახლოებით 3,8—4 მილიონი კაცი, ანუ რეს-
პუბლიკის მოსახლეობის 60—65 პროცენტი.

21-ე საუკუნის დამდგენისათვის საქართველოში სოფ-
ლების რიცხვი 35 პროცენტით შემცირდება“...

ამ ცნობას სახელმწიფო დაწესებულება გვაწვდის და, სა-
ტირალი და სავალალო ის არის, რომ მასში გულისწუხილი რო-
დია ჩაქსოვილი, პირიქით — ჩვენი დიდი ეროვნული ტრაგე-
დია ერთგვარ ოპტიმისტურ ჩარჩოშია ჩასმულ-მოვარაყებელი.

კი, მაგრამ, რით არის ეს სასიხარულო? ქალაქების ასეთმა
მომძლავრებამ მოგვიტანა კი რაიმე სიკეთე? ვთქვათ, ჯანდარში
ანდა კავთისხევეში თუ არ აიშართება ჩარხსაშენი ქარხანა, ამით
საქართველოს ვითომ ბევრი რამე დააკლდება? ჩარხებს ჩვენზე
უკეთ სხვა რესპუბლიკებში დაამზადებენ, მაგრამ ვაზს იქ ვერც
მოაშენებენ და ვერც მოუვლიან და ვერც ღვინოს დააყენებენ
კახური წესით, ვერც ციტრუსებს გაახარებენ და ვერც ჩვენე-
ბურ ხეხილს ახეირებენ...

და ამას არა იმიტომ, რომ იქ ჩვენზე ნაკლებ გამრჯე ხალ-
ხია, — ჩვენ საამისოდ მიწა-ნიადაგიც გვიწყობს ხელს და ჰა-
ვაც, აგრეთვე ძველისძველი ტრადიციებიც.

ეს ტრადიციები კი ახლა, სოფლის მოსახლეობის შეთხე-
ლების გამო, თანდათან ხელიდან გვეცლება, და აგრეთვე იმ
საყოველთაო ნაძალადევი, თავის მოსატყუებელი სწავლა-გა-
ნათლების გამოისობითაც; ამ „განათლებულებს“, სოფლად ფე-

ხადგმულეხსაც კი, — ძროხა უკვე ბიზონად ეჩვენებათ, მოწველით კი... ო-ო, თუნდაც თავი დაიპყირონ და იკადრონ, საიდან მიუღდგენენ ჭიქანს და როგორ მობანონ, — ეს მათთვის თავსატეხი, ამოუცნობი გამოცანაა...

ღიახ, თუ კიდევ ასე განვეითარდით „კულტურულად“ (შეჩერებას კი როგორღაც პირი არ უჩანს!), მაშინ მომავალი საუკუნის დამდეგისათვის 35 პროცენტი რა არის, — უფრო გამაჩანაგებელ მაჩვენებელსაც უნდა ველოდეთ.

შეჭფერის და ეპატიება კი ქართველ კაცს სოფლის მიგდება-მიტოვება? არის კი ამაში გონიერების რაიმე ნასახი? მთელ საქართველოს რაღაც 8—10 საათის განმავლობაში აღმოსავლეთის საწყის წერტილიდან დასავლეთის ბოლო წერტილამდე გადასერავ... აი იმით, მე რომ ბორბლებიანი კუბო შევარქვი, და ეს კუბო უკვე ათიდან თითქმის ყოველმა ერთმა მოვიმარაგეთ და მალე ეს ათი, ალბათ, ხუთზეც ჩამოვა... თანაც ჩვენ ხომ ისეთი ჭკუადატენილი ვაჟკაცები ვართ, რომ არც ყოველსაათობრივი, საზარელი ავტოავარიები გვაფრთხობენ და არც უვარგისი გზები...

...და მაინც, შენ, რაქველმა კაცმა, თბილისისათვის შენი მშობლიური, კურთხეული მხარე რომ მიატოვე, ვითომ არ შეგეძლო, იქ კერია არ ჩაგექრო და შაბათ-კვირაობით მაინც ცეცხლი ისევ გაგეჩალებინა? საამისოდ იქით-აქეთ მისვლა-მოსვლაში რა ბევრი დრო დაგეხარჯებოდა, სამაგიეროდ შენს სიცოცხლეს ერთ-კვირაში სულ ცოტა, დღე-ნახევარი მაინც შეემატებოდა...

...ანდა შენ, იმერელო, ქუთაისში რომ ცხოვრობ და პატრიკეთი და ქვიტირი შენს ყურის ძირშია... ან შენ, კახელო, ქართლელო, მეგრელო, გურულო, სამურზაყანოელო, სვანო, ლეჩხუმელო... რატომ ვიფიწყებთ, რომ საქართველო ერთი ხელისგულის ოდენა ქვეყანაა!

წინათ ერთი მტკაველი სადავო მიწისათვის ძმა ძმას თავში კეტს უბაზუნებდა, ახლა კი აბიბინებულ ეზო-გარემოს თავის სახლებიანად ეშმაკებს ვუტოვებთ და გავრბივართ იმის იმედით, რომ ასფალტი გახდება ჩვენი დედამარჩენალი...

მარქსისტები ერთ დროს ასეთ მიგრაციას მშრომელი მასე-

ბის გალატაკებით ხსნიდნენ, საინტერესოა, ახლა მას რა ახსნას გამოუნახავენ?!

თავად კომუნისტური საზოგადოება ხომ არ არის ხელშემწყობი, რომ გლეხი გლეხურ შრომას გადაეჩვია და მიწის მალმერთებელმა მიწა შეიჭავრა? სულ აგერ ახლა გაზეთ „კომუნისტში“ ამოვიკითხე ბრალდებისებური, — თბილისის ახლომახლო სოფლებში ხალხი არც ძროხას და არც სხვა საქონელს აღარ ყოლიობს, ერცხვინებათ კიდევ თითქოსო...

ო, საწყალი ეს ხალხი!..

მბრძანებელი ერთეულები ჭერ ურემს გადააბრუნებენ და შერე ამ გადაბრუნებაში ბრალს ისევ ხალხს სდებენ, ამას კი თავის გასამართლებლად ხმაც ვერ ამოუღია: არა ვართ, ბატონებო, ჩვენ დამნაშავე, არა ვართ...

ისტორიკოსები კი ივიწყებენ, მაგრამ ხალხი არ ივიწყებს „კვადრატულულობრივი“ და „აგროგოროდების“ დიდ ხუროთმოძღვარს ნიკიტა ხრუშჩოვს... არც მის მოწოდება-ბრძანებას ივიწყებს, კერძო მესაქუთრეების ძროხა და ხარი, ცხენი და ვირი...

(სხვათა შორის, ეს ერთობ სულგრძელი, კეთილშობილი ცხოველი, რომელსაც ქართველი კაცი, შინაურობაში, საალერსოდ დიდყურას ეძახის, ლიტერატურაში კი, თითქოს ბოდიშის მოსახდელად, სახედრად იხსენიება, აღმოსავლეთ საქართველოში, ჭერ კიდევ ხრუშჩოვის ამ გამანადგურებელ დაყოყინებამდე, ჩვენი ადგილობრივი იმდროინდელი ბრძენი ხელმძღვანელების მიერ უკვე დიდი ხნის „მომსპარი“ იყო; მათი საყოველთაო ლიკვიდაცია კი ვირების სატახტო გომურტიდან, წყნეთიდან დაიწყო, — ან კი, აბა როგორ გნებავდათ, ქვეყნის ტვირთმაშვრალნი საღამოთი აგარაკს ამობრძანდნენ და... გზა-ბილიკი მათ ვირებმა გადაუღობონ?!).

...დიახ, ძროხის ყოლა-მოვლით თავი რატომ უნდა აიტკივოთო, გვიფრთხილდებოდა ნიკიტა, — რძე გინდათ? „პაქალუსტა“, შიაკითხეთ, როცა კი მოგესურვებათ, კოლმეურნეობას და უმაღლ ჩამოგისხამენ, ლიტრა რას მიქვია, გნებავთ ბიღონებითაცო...

ჩვენც მივაკითხეთ ხოლმე და რამდენჭერაც მივედით, იმ-

დენჯერ... რძე არა, — ტკიცინ-ტკიცინა დადგენილებები, ხრუ-შჩოვის ხელმოწერით, აგვაფარეს ტუჩებზე...

ჰოდა, სახელმწიფოს ასეთი მეთაური კიდევ სტალინს კი-ლავდა, სოფლის მეურნეობის არაფერი გაეგებოდაო...

სტალინს სოფლის მეურნეობის თეორიისა და პრაქტიკის რა გაეგებოდა და რა არა, ამაზე დაე გამოცდილმა ეკონომის-ტებმა გვიპასუხონ, მე კი ჩემდა თავად ვიტყვოდი, სოფლის მე-ურნეობის ჩვენი მოდელი ზუსტად არც ერთ სოციალისტურ ქვეყანას არ გადაუღია და იქ სურსათის ნაკლებობა, ასე თუ ისე, არც იგრძნობა.

მეფის რუსეთი სახნისით მოყვანილი პური მთელ ევრო-პას კვებავდა, ჩვენ კი ახლა, ტრაქტორ-კომბაინებით გალადე-ბულთ, ამერიკა-კანადა, ცოტა არ იყოს, გვამადლის კიდევ, რომ პურს ყიდის ჩვენზე, თანაც მათივე მუხლმაგარი დოლარებით, და არა ჩვენი მომაკვდავი მანეთებით...

ყოველივე ეს იმის ბრალია, რომ მიწის მუშას პრესტიჟი გამოეთხარა და სოფელს — საძირკველი... იმდენად გამოეთხა-რა, რომ...

აი, ჩემი ძმისწული, ქალაქელი ახალგაზრდა და თავის დრო-ზე ცნობილი მამის შვილი, სოფლად დასახლდა, რათა რვა შვილის გამზრდელი ბებიისა და ბაბუის ნაფუძარი არ გაპარ-ტახებულყო, და ეს მისმა მამიდებმა არათუ საზარელ, ოჯა-ხისათვის საშარცხვინო, თავმოსაჭრელ ტრაგედიადაც მიიჩნიეს („ბენიტოს შვილი მიწას უნდა ჩიჩქნიდეს?!“), თვითონ სოფელ-ში კი მითქმა-მოთქმა ატყდა; ალბათ რაღაცა დააშავა და ქალა-ქად ცხოვრება ეკრძალებათ...

მეორე მსოფლიო ომის დამთავრებისას უინსტონ ჩერჩილ-მა, დიდმა პოლიტიკოსმა და დიკენსისა და სომერსეტ მოემის ფონზე, ალბათ საშუალო რომანისტმა, ომი რომ მოიგო და პრე-მიერ-მინისტრად მაინც აღარ აირჩიეს, — ცხენები მოაშენა; უან გაბენმა კი, მსოფლიოში ცნობილმა ფრანგმა კინომსახი-ობმა, ამ რამდენიმე წლის წინათ მეძროხეობას მიჰყო ხელი და საქონლის სადგომიდან ფუნაც კი თავისი ხელით გაჰქონდა; ჩემმა ერთმა ნაცნობმა ქალმა კი, რომელმაც თეატრალური ინ-სტიტუტი დაამთავრა და ამ დამთავრების შემდეგ, უსაქმური, დიპლომს სულ მარაოსავით აფრიალებს, რომ ყველამ დაინა-

ხოს, თუ რა განათლებულია, — სოფლად შემთხვევით მოხვედრისას, ზიზღნარევი ხმით „წაიმონოლოგა“:

— ო-ო, ვერ ვიტან ეზოში ქათმებს, მათ სკინტლი იციან. მას უთხრეს-ურჩიეს, მაშინ ადექით და მოაშენეთ ანგელოზებიო...

აგერ ახლა ჩვენი გაზაფხულისათვის უჩვეულო თოვლი რომ მოვიდა, „მომამბეში“ დიქტორმა მხნე და სიამაყით აღსავსე ხმით გვამცნო:

„...და მაინც, კახეთში ერთი წუთითაც არ წყდება სასოფლო-სამეურნეო სამუშაოები“.

და თუ თქვენ ამის არ გჯერათ, „პატივცემულო ტელემაცურებლებო“, მაშინ... აჰა თქვენ, კინოლოკუმენტიც: დათოვლილ ზეარს ბარავენ, და რა გასაკვირია, თუ წვალებით და ზედაპირულად ბარავენ თავსაფრიანი, შავეებით შემოსილი, გამხდარი ხნიერი ქალები... იმ არემარეზე ერთი შარვლიანის ქაჭანებაც არა ჩანს, ვაჟაკს ვინ ჩივის, — არც ხანში შესულისა...

გულისა და გონების ეს დამთუთქველი კადრები არც ოპერატორს გადაუღია განგებ და არც ტელევიზიის ფხიზელ ცენზორ-რედაქტორებს გაჰპარვიათ, — მათი თვალები და მათი გონება ასეთ ამბებს უკვე იმდენად ნორმალურად აღიქვამენ, რომ მათში სულაც ვერ ხედავენ ჩვენი ხალხის დღევანდელ შემზარავ და ახლო მომავალში კიდევ უფრო საზარელ სურათს.

სხვათა შორის, იმ კახელმა შავოსანმა დედაკაცებმა, რომლებმაც, ცხადია, მშვენიერად იცოდნენ, მათ წინ გადაძლები აპარატის სახელურს რომ ატრიალებდნენ, — თავიანთ გადაღლილ სახეებზე არაქალური შრომით გამოწვეული ენთუზიაზმი მაინც ვერ გამოხატეს და.. სევდამორეულს ძალაუნებურად მომაგონდა ერთი ზემოიბერელი, თითქმის საუკუნეს მიტანებული, თავის სიცოცხლეში გაზზე კი არა, — პირდაპირ ცეცხლის პირას კეცზე სამასი ათასამდე ქადის გამომცხობელი, წერა-კითხვის მცირემცოდნე, ნააზნაურალი, მაგრამ ფაქტიურად გლეხის ქალი, გაზეთში ტრაქტორზე წამოსკუპული კაბიანი ასული რომ იხილა და თქვა:

— რა ქალის საქმეა ტრაქტორი? ქალს დიასახლისობა ამშვენებს... ქალს ექიმობა უხდება, მასწავლებლობა უხდება, არ-

ტიტობა... თანაც ზომიერად... თუ ასე ყველა ქალი საშოვარზე გავრეკეთ, რავა, ოჯახს ქალი აღარ უნდა?!

თუ რამდენად გამოჩერჩეტებული და სკლეროზმოდებული იქნებოდა ამის მთქმელი, საამისო დიაგნოზის დასმა მკითხველისთვის მიმინდვია, ჩემგან კი ნუ ელით, რომ მასზე ვიტყვი, ბებრუხანაო, ვისი მრავალი შვილიდან ერთიც არ გამოსულა ბანდიტი, და არც ქურდი, არც მექრთამე, არც მკვლეელი, ლოთი და ნარკომანი...

ისე კი მათთვის, ჩვენ რომ ცხოვრებას გვიადვილებენ და ჩვენს ნაცვლად ფიქრობენ და აზროვნებენ, ვილაც დედაბრის ნაბჭობ-ნაბოდვარი, აბა, რა ყურადსაღებია!

ანდა, ვინ იცის, ოჯახს ქალი შეიძლება მართლაც აღარ დასკირდეს, ა? ეს თითქოს გარკვევითაც გამოსჭვივის იმ სამთავრობო სტატისტიკური მონაცემებიდან, რომელთა მიხედვითაც ამ საუკუნის ბოლოსთვის და, თუ ჩვენი საქმე საერთოდ კარგად წავიდა, მაშინ შესაძლოა ამაზე ათი წლით ადრეც, საბავშვო ბაგებსა და ბალებში, ქალაქად აღზრდიან თურმე ბავშვების 80 პროცენტს, სოფლად კი—60 პროცენტს.

პროცენტი კი აბა რის პროცენტია, თუ არ იპროცენტა, ასე რომ, იმედი უნდა გვქონდეს, მერე და მერე იგი ასამდეც გაიზრდება!..

ჰოდა, ასეთ იდეალურ გარემოცვაში ქალი—დედა ვითომ მაქნისი იქნება კიდეე?!

მე კი, როგორც ჩანს, გონაქლულსა და დროის სწრაფ მატარებელს დიდი ხნით ჩამორჩენილს, მეგონა და ჩემში ახლაც ვერ ჩამიკლავს ის რეგენული აზრი, რომ არათუ ჩვეულებრივი, — არაჩვეულებრივი, ბრწყინვალეზე უბრწყინვალესი, განათლებულზე უგანათლებულესი, ადამიანურზე უადამიანურესი კრემლის საბავშვო-ბაგა-ბალიც კი ვერ შეუცვლის ბაღს დედის გულის სითბოს და მის ფუნთულა ლოყებზე დედის ალერსიანი ხელის მოთათუნებას...

ის წიგნი, რომელიც ორჯერ წაკითხვის
ღირსი არ არის, ის არც ერთხელ წაკი-
თხვის ღირსია.

კარლ ვებერი
(გერმანელი კომპოზიტორი, 1786—1826)

საუკეთესო წიგნის შესახებ მკითხველი
ფიქრობს, რომ მისი დაწერა მასაც შე-
ეძლო.

პასკალი

დასავლეთ საქართველოში, მთებს შუა გამომწყვდელი
მდინარის პირას მდებარე ორქუჩიან დაბაში რაიკომის ბიუროს
მორიგ სხდომაზე ერთი ჩემი ახლო ნაცნობი მისთვის სანატ-
რულ თანამდებობაზე დანიშნეს...

და აი ახლა მაჭა და ნაბიჯაჩქარებული მოემართება იგი
სოფლის შარაზე, რათა დროულად მიახაროს შინაურებს მისი
გადიდებულების ამბავი...

ქიშკრის შეღებისთანვე... ღმერთო მაღალო, ამას რას ხე-
დავს?! ცოლ-შვილზე ადრე ჟივილ-ხივილით და ფრენა-ფრენით,
თითქოს მოსალოცად, გარს შემოეხვივნენ ქათმები, ბატები, იხ-
ვები...

საკვირველი და გასაოცარი ჩემთვის ის იყო, — შიამბობდა
მოგვიანებით იგი, — ამ ბენტერა ბატებმა მაინც ასე სწრაფად
საიდან შედრყვეს, პურ-ხორბლეულის საწყობში რომ გამამწე-
სესო...

ღიახ, დრო დაგვიდგა ისეთი, რომ ახლა ჩვენში არათუ ალა-
მიანებს, როგორც ხედავთ, ქვეყნის ასავალ-დასავალი, თურმე,
ბატებსაც აღარ გამოეპარებათ. ამიტომ ნუ გაგიკვირდებათ,
თუკი არც ჩემთვის დაიმალა ახლობელ ქალთა წრეში ერთი
გავლენიანი მანდილოსნის „შავ წიგნზე“ კატეგორიულად ნა-
თქვამი, შოვინისტური წიგნიაო.

რამდენადაც ვიცი, საბჭოთა სისხლის სამართლის კოდექსის მიხედვით, ომის მოსურნე-მქადაგებელი — კი, მაგრამ შოვინისტი თავისუფლების აღკვეთით, ყოველ შემთხვევაში დღესდღეობით, არ ისჯება; სამაგიეროდ ჩვენი ინტერნაციონალური საზოგადოებისგან სასტიკად იკიცხება, და ასეთ გაიციხვას მერე და მერე, როგორც წესი სიკეთეთა ჩამოსაქვეითებელი ზომების მიღება მოჰყვება ხოლმე.

მე საპრივილეგიო თითქოს ბევრი არაფერი მაქვს, რომ მისი ჩამორთმევით გული დამეთუთქოს, და მაინც, აბა რა სიამის მომგვრელია, თუკი ქართველი კაცი ნაპოლეონის მათაყვანებელი ფრანგი ჯარისკაცის შოვინეს კამპანიაში აღმოჩნდე... ამიტომ, ვფიქრობ, არ დამეძრახება, თუკი შევეცდები თავი ვიმართლო უცხო სიტყვათა მხოლოდ და მხოლოდ საბჭოთა ლექსიკონის მოშველიებით, თანაც სულ ახლახან გამოცემულით, — ძველში, აბა, ვინ იცის, რა და როგორ წერია (მაგალითად, რევოლუციის შემდეგ მთელი ათი წელიწადი სიტყვა „სამშობლო“, „პატრიოტიზმი“, „პატრიოტულის“ ხსენებაც კი იკრძალებოდა; პრესაში მათ სარკმელი გაუღეს, თანაც ნელ-ნელა და ცოტოცობით, 1928 წლიდან, როცა საბჭოთა მფრინავმა ჩუხნოვსკიმ ჩრდილოეთის ყინულებში იტალიელი უმბერტო ნობილეს დაღუპული ექსპედიციის ერთ-ერთი წევრი გადაარჩინა):

«Шовинизм — буржуазный национализм, проповедь национальной исключительности, противопоставление интересов одной нации интересам всех других наций, разжигание национальной вражды, чувства презрения и ненависти к другим расам и нациям».
(Краткий словарь иностранных слов. Москва. 1978 г.)

ჰოდა, აბა ერთხელ კიდევ ქორის თვალი გადაავლეთ ჩემს ნაწერს და ბრძანეთ, განა მცხია მე რამე ბურჟუაზიულობისა, და განა მე ვქადაგებ, რომ ჩვენ, დღევანდელი ქართველები, ყველა სხვა ხალხისაგან გამორჩეული ერი ვართ-მეთქი?

განა „შავი წიგნით“ მე ვალვივებ ეროვნულ შუღლს, სიძულვილისა და ზიზლის გრძნობას სხვა ხალხების მიმართ, თუკი, პირიქით, თავგამოდებული მომხრე ვარ იმისა, რომ ქართველად ჩავწეროთ ყველა ის, ვისაც გულით ქართველობა უნდა და ვი-

ძმოს ყველა ისინი, ვისაც ჩვენდამი მოლაღატეობის გრძნობა არ ასულდგმულებს?!

„შავ წიგნში“ ჩემი მშობელი ერის იმდენ ბიწსა და მწიკვლზე მაქვს საუბარი, როცა მას წასაკითხავად ვაძლევ ვისმე, თან ვაფრთხილებ, არაქართველს ხელში არ ჩაუგდოთ, ჩვენი სიგლახის ამოკითხვა მას სიხარულის ფრთებს შეასხამს-მეთქი (არაქართველებში ქართველ ებრაელებს, რასაკვირველია, არ ვგულისხმობ); დიახ, ეს წიგნი მაშინ იქნებოდა შოვინისტური, სხვა ერების შექმა-ჩანთქმას რომ მოძღვრებდეს, მე კი ამის საპირისპიროდ, — ჩვენივე უჭკუობით და წინდაუხედავობით მათ თავს ნუ შევაკმევინებთ-მეთქი...

შენი ერის სიყვარული თუ შოვინიზმად გამოცხადდება, მაშინ შოვინისტი ყოფილა ჩინებული რუსი მწერალი, ნაომარი თედორე აბრამოვი, ამას წინათ ოსტაჟკინოს საკონცერტო დარბაზში ტელევიზიით რომ გამოვიდა და არაერთხელ მკაფიოდ თქვა:

„Советская русская земля... Советская русская земля... Сколько русских гениев полегло в эту войну...“

როგორ? მათში ქართველი, სომეხი, უკრაინელი გენიოსი ერთიც არ გამოერეოდა? თუ პატარძლეულები ანდა აშტარხანელები უფრო შოვალენი იყვნენ მკერდით დაეცვათ სტალინგრადი, ვიდრე რიაზანელ-პენზელნებს?!

იაკობ გოგებაშვილის აზრით, „რომელიმე ერის გაქრობა აღარიბებს და ასახიჩრებს თვით კაცობრიობას“ („ბურჯი ერონებისა“. გვ. 57).

ჰოდა, თუკი მე არ მინდა, რომ უკვალოდ გაქრეს, თანაც ასეთი კატასტროფული სისწრაფით, ნიჭიერი ქართველი ერი და და ამით სულ ცოტათი, ცო-ო-ოტათი მაინც არ გაღარიბდეს, არ დასახიჩრდეს კაცობრიობა, — განა ეს შოვინიზმია?! სად, რომელ გვერდზე, რომელ აბზაცში ამოიკითხა ამ მანდილოსანმა ჩემი ისტერიკული მიმართვა:

— ჰეი, თქვენ, ქართველებო! თუ გინდათ შეინარჩუნოთ სიცოცხლე და სამშობლო, ფიცხლავ ხელი ხმალს იკართ და დასცხეთ და გადარეკეთ მესხეთ-ჯავახეთიდან სატრაპ პასკევიჩის მიერ ჩამოთესლებული სომხები, კუდით ქვა ასროლინეთ რამ-

დენიმე საუკუნის წინათ ხიზნებად დასახლებულ ოსებსაც ცარიზმის დროინდელი გორის მაზრიდან გაძოყოფილ და სამხრეთ ოსეთად ხელოვნურად შერქმეული ქართული მიწა-წყლიდან, თათრებსაც — ქვემო ქართლიდან, ბერძნებსაც — თრიალეთიდან!..

როგორც ჩანს, თუ დავწერდი, ქართველებო, უკვე დროა, სულ ერთიანად ამოვწყდეთ და ჩვენი წალკოტი ქვეყანა უკვე მოსულებს და აწ მოსასვლელთაც, ჩვენს მესაფლავეებს დაეუტოვოთ-მეთქი, მაშინ იგი ზოგიერთის ფხიზელ თვალს, ალბათ, შემაწუხებელ ბეწვად არ მოეჩვენებოდა.

ღიას, არა მგონია, რომ „შავ წიგნს“ ეს ამჟამად ბევრისგან (უფრო ყოვლისშემძლე ქმრის წყალობით!) პატივსაცემად მიჩნეული მანდილოსანი, სხვა დროსა და სხვა სიტუაციაში, ამ ნაწერს შოვინისტურად მონათლავდა, ამიტომ დაე ვიყოთ სულგრძელნი და მიმტევებელნი, და ნუ მოვთხოვთ ნურც მას, ნურც სხვებს — მრავალი მიზეზით შებორკილთ — ილაპარაკონ ის, რასაც ფიქრობენ...

განა რომის პაპი გააჩერებს საკურთხეველთან თავის კარდინალს, თუ ის საჯაროდ ექვს გამოთქვამს ზენაარსის ყოფიერებაში?!

ჰოდა, ნუ გავკილავთ და ნუ დავაბრალებთ მათ სიმხდალეს!.. კერძოდ, ნურც აი მას, გუნებაში არსებითად ისეთნაირ „კომუნისტ-ბოლშევიკს“, როგორც მე ვარ გასრულწლოვანებიდან, ოღონდ განსხვავება ჩვენს შორის ის არის, რომ იგი, როგორც ნომენკლატურის მუშაკი, არ გახლავთ ჯოღლომოლო ხალხისათვის განკუთვნილი გასტრონომის ჩემსავით შემყურე... ამ ფრიად არაუმეცარ, ფრიად განათლებულ, ფრიად გონებაგახსნილ, იუმორის გამგებ არასქელი უურნალის რედაქტორს მე თვითონ მივართვი გასაცნობად „შავი წიგნი“, და როცა დამიბრუნა, ამანაც... შოვინისტურიყო, თუმცა, აქეთ-იქით მიხედ-მოხედვის შემდეგ (ვაითუ, ვინმემ გაიგონოსო) წამიჩურჩულა, ბევრს წააკითხე, ბევრს წააკითხეო...

ამ ჩემი ფრთხილი „თანამოაზრის“ რჩევის გარეშეც მე მას არცთუ ისე ცოტას ვაკითხებ და ვაერცელებ, თუმცა მისი ქსეროქსზე გადატანა ძვირი ჯდება, თან ყოველივე ამას გარკვეული შიშიანობაც ერთვის...

კონტრასტისათვის, ვფიქრობ, არ იქნებოდა მიზანშეუწონელი, თუკი გაგაცნობდით ჩემი წიგნის „შოვინისტობის“ თაობაზე რამდენიმე ამონაწერს, აზრს სხვადასხვა პროფესიისა და სხვადასხვა ასაკის მკითხველთა წერილებიდან (მრავალწერტილებით შეცვლილი მაქვს ჩემი მისამართით გამოთქმული ჩემთვის მეტად უხერხული ქების სიტყვები):

ვ. კ. — ომის მონაწილე, გადამდგარი პოლკოვნიკი:

„თქვენი შესანიშნავი წიგნი დიდი ყურადღებით წავიკითხე და დიდი სულიერი კმაყოფილება ვიგრძენი... ასეთი წიგნის დაწერა ჩვენს დროში შეუძლია ნამდვილ ქართველ პატრიოტს, თავდადებულს, მეტად... და ერის სატკივრით გულდამწვარ, ადამიანს. წიგნი გატაცებით იკითხება პირველი ფურცლებიდანვე და ყოველი დასმული საკითხი ღრმა ინტელექტუალური ანალიზით არის დასაბუთებული.

სანამ ბოლომდე წავიკითხავდი, ვიფიქრე, ეს წიგნი უსათუოდ უნდა გაიგზავნოს ზემდგომ ორგანოებში, ბოლოს კი გამოირკვა, რომ იგი უკვე გაგიგზავნიათ კიდევ ამხ. ე. ა. შევარდნაძის სახელზე. დარწმუნებული ვარ, მთელი რიგი საკითხები დადებითად იქნება გადაწყვეტილი“.

ლ. გ. — ერთ-ერთი პრემიის ლაურეატი მეცნიერების დარგში:

„მივესალმები თქვენს გაბედულად რომ წამოქვრით ჩვენი მტკივნეული პრობლემები. ეს კია, მეექვსეა, რომ ცოტნე დადიანი გამოგვიჩნდეს, მაგრამ ცდა ბედის მონახევრეაო“.

ლ. ც. — ახალგაზრდა მწერალი:

„ვინაც არ უნდა წაიკითხოს თქვენი ხალასი ქართულით და სასიამოვნო სტილით დაწერილი წიგნი, დარწმუნებული ვარ, რომ იგი ყველას ჩემსავით ჩააფიქრებს და აღაგზნებს, გამოაფხიზლებს.

მე ჟერ გაუთხოვარი გახლავართ, მაგრამ, როდესაც მეყოლება საკუთარი ოჯახი, პირობას გაძლევთ, იგი ექვს

სულზე ნაკლები არ იქნება, რა პირობებშიც არ უნდა მომიწიოს ცხოვრება.

ჩემი სურვილია, თქვენი წიგნი რაც შეიძლება მეტმა ახალგაზრდამ წაიკითხოს, რომ სწორედ მათ იგრძნონ, თუ რა საშიშროების წინაშე ვდგავართ, რომ ყველამ უნდა იზრუნოს ერის გამრავლებისათვის, მისი მარადის არსებობისათვის. თქვენი წიგნი კი, როგორც ფასდაუდებელი განძი ოჯახისა, ყოველი ქართველის საოჯახო ბიბლიოთეკაში უნდა იდოს როგორც აუცილებელი და საჭირო ყველა ქართველისათვის“.

ქუთათურების სახელით გამოგზავნილი, ახლანდელი დატეხილი პოეზიის თვალსაზრისით, პრიმიტიული ლექსიდან:

მარჯვენას ვუქებ, კალამს ვუქებ,
ვინც სწორად სჯის საუკუნეს,
ვინც ცხოვრებას შუბლგატეხილ
ვაჭრის თვალით არ უყურებს.
კაცი იყო, კაცად დარჩე,
ამ სიკეთეს, აბა, რა სჯობს,
ერის დარდით, ერის დარდით
დამწვარ შვილებს გაუმარჯოს!

დ. ჭ. — მათემატიკოსი:

„...მართალია, თქვენ ამ ნაშრომს თავმდაბლურად, უბრალოდ წერილს უწოდებთ, მაგრამ, სიმართლე მოგახსენოთ, მის ავტორობაზე... (სახელი და გვარი, — კ. ბ.)... უარს არ იტყოდა, ჩვენი დიდი პუბლიცისტი... (სახელ-გვარი)... კი თავის რჩეულ ნაწარმოებებში პირველ ადგილს დაუთმობდა ამ ბრწყინვალე ნარკვევს. თქვენი გონიერული წინადადებები უსათუოდ დიდ დახმარებას გაუწევს ჩვენი ერის გამრავლებას.

...ამ საკითხების მოგვარებას დიდი შემწეობა შეუძლია გაუწიოს ამხანაგ შევარდნაძემ, თუ, რასაკვირველია, გულით მოინდომებს... და ნუთუ არ მოინდომებს? ნუთუ არ უნდა ძვირფას ელუარდ ამბროსის ძეს, რომ სამუდამოდ უკვდავეყოს თავისი სახელი?“

რვა შვილის მშობლები, თბილისელი ზ. და მ. გ-ძეები:

„ვკითხულობთ თქვენს წიგნს და ვტირიბთ. ნამდვილად

რომ სატირლად გვაქვს საქმე... მაგრამ ქართველი კაცი პესიმისტი ვერ იქნება, ჩვენ გვაქვს იმედი, დიდი იმედი, რომ ყველაფერი გამოსწორდება“.

ასეთი გ-ძეები თუ იმრავლებენ, მაშინ მართლაც რომ გამოსწორდება!

ლ. კ. — ომის მონაწილე, სამი შვილის მამა; პროფესიასაც დაეასახელებდი, მაგრამ ვაითუ, ზოგიერთი მიხვდეს, აკი მის კოლეგებში სამი შვილი, რამდენადაც ვიცი, არაყის არა ჰყავს: „თქვენი წიგნი ჯერჯერობით წინ მიდევს და ეწუხვარ, რომ მალე წამართმევენ. თუ მოვასწარი, მინდა კიდევ ერთხელ წავიკითხო, უფრო გულმოდგინედ.

...არ შეიძლება არ მოეწონოს თქვენი ნააზრევი ქართველ კაცს, თუკი ჭეშმარიტი ქართველია იგი და თქვენსავე ფიქრობს საქართველოს ბედზე, მაგრამ ისიც უნდა ვთქვა... თუ არ ვცდები, ეს სიტყვები დენი დიდროს ეკუთვნის: „მე ბილწად ჩავთვლიდი ჩემს აზრს, თუკი იგი ყველას მოეწონებოდაო“. იქნებ ზოგიერთს მართლაც არ მოეწონოს თქვენი ნააზრევი სხვადასხვა, უფრო კი ეგონისტური მოსაზრებით...

...სულაც არ გამკვირვებია, რომ თქვენს წიგნს არ მოეხმაურნენ ისინი, ვისაც თქვენ უშუალოდ მიმართეთ, აგრეთვე თანამდებობის სხვა პირნიც... ისინი მხოლოდ ტრიბუნიდან გვირდებიან ხოლმე აშენებას. პათეტიკური სიტყვებით, როგორც სიმთვრალეში გაცნობილ თანამესუფრეს ივიწყებს ხოლმე გამოფხიზლებული. ეს ბევრს შეეხება, გარდა ჩვენი რესპუბლიკის ხელმძღვანელისა.

... პირდაპირ თავზარდამცემია იმის გაფიქრება, რომ 50 წლის შემდეგ საქართველო, თუ არაფერი ვიღონეთ, ერთ მილიონამდე დავა“.

სხვათა შორის, ამ ბარათში ასეთი ფრაზაცაა, რომელიც არ ვიცი კი, რამდენად ესადაგება ჩემს „შოვინისტობას“: „თქვენ გონიერ, ნიჭიერ ხალხად იხსენიებთ სომხებს“.

ექთანო მ. მ-ძე:

„წავიკითხე თქვენი წიგნი მთელი გულისყურით, და როგორ ვინანე სამი შვილის დედამ, რომ 20 წლის წინათ არ მყავდა თქვენისთანა ჭკუისდამრიგებელი. მართლაც, ყვე-

ლა ქართველ ქალს მზითევში უნდა გაატანონ იგი, რომ უფრო კარგად ჩაუფიქრდნენ ჩვენი ერის ყოფნა-არყოფნის საკითხს“.

შ. ნ. — ხანშიშესული კინომსახიობი:

„...ამ ჩვენი დიდი ეროვნული გასაჭირის დროს მთავარი მაინც ის არის, რომ ამ წიგნმა ჩვენი რესპუბლიკის ჰკვიან და ენერგიულ ხელმძღვანელამდე მიღწიოს. გაგონილი მაქვს, როცა მას მოახსენეს — შინაგან საქმეთა მინისტრობისას, — ერთი საზარელი მკვლევლობის ამბავი, მომიყვანეთ და შემახედეთ, ვინაა ამის ჩამდენი, კაცია თუ ნადირიო...“

ის დალოცვილი, თუკი მკვლელით დაინტერესდა, ნუთუ ამის დამწერის ხილვით არ დაინტერესდება?“

(გ ვ ი ა ნ დ ე ლ ი მინაწერი (1990 წ.): არა, „ამის დამწერის ხილვით“ არ დაინტერესებულა, და, შეიძლება, უფრო იმიტომ, რაკი იმ დროს, ი მ დ რ ო ს „შავ წიგნში“ გამოთქმული ბევრი აზრი ოფიციალურ იდეოლოგიას არ ემთხვეოდა; ეს კია, 1981 წლის წინა დამეს, კომკავშირულ ქალაქ ბორის ძნელადეში, როცა ახალგაზრდობას ახალი წელი მიულოცა, მართალია „შავი წიგნი“ არ უხსენებია, — ან კი როგორც ახსენებდა, „ნაციონალისტურ-შოვინისტურ „სამიზდატს!“ — მაგრამ საქართველოში დიდი ხნის დუმილის შემდეგ პირველად ჩამოავდო ტრიბუნიდან სიტყვა ერის ამ დიდ სატიკიარზე და მოუწოდა დამსწრეთ გამრავლებისათვის... ფაქტიურად სწორედ ამ დღიდან დაიწყო ამ საკითხზე წერა და ლაპარაკი ჯერ კანტიკუნტად, აქა-იქ, ზოზინ-ზოზინ, მერე და მერე კი ეს ამბავი იმდენად აზღვავდა, რომ ახლა, როგორც ყველამ ვიცით, ქ ა რ თ უ ლ ი დე-მოგრაფიული საზოგადოებაც კი დაარსდა და მოქმედებს კიდევ).

ახლა ერთ მოკლე ამონაწერსაც „შემოგაპარებთ“ იმ ნ ა მ დ ვ ი ლ ი მეცნიერის და ნ ა მ დ ვ ი ლ ი ქართველი მოქალაქის ბარათიდან, რომელსაც მე, როგორც დრამატურგი, მთავარი პერსონაჟის პროტოტიპად თუ გამოვიყვანდი, იმ პიესას სათაურად ვერ დავარქმევდი: „მხდალი—ჩვენი დროის გმირი“.

(„Трус — герой нашего времени“).

„თქვენ დაწერეთ არაჩვეულებრივი წიგნი, რომელიც ღირსია იმისა, რომ ყოველი მამულიშვილის ოჯახში იყოს როგორც ძვირფასი განძი. ძალიან არ გადავაჭარბებ, თუ ვიტყვი, რამდენ ოჯახშიც ეს წიგნი შევა როგორც საკუთრება და მუდმივად საკითხავე წიგნი, იმდენივე (თითქმის იმდენივე) ბავშვი შეემატება ჩვენს ქვეყანას: ქართველები ერის გადარჩენის მიზნით, არაქართველები კი — ჩვენს ჯიბრზე.“

განსაკუთრებული ზემოქმედება მოახდინა ჩემზე თქვენი უანგარო ქველმოქმედების ამაღლევებელმა ფაქტმა. რა თქმა უნდა, ასეთი რამ არც დაესიზმრებათ გააკადემიკოსებულ და გაგმირებულ მწერლებს — ერისადმი სამსახური შემოსავლის წყაროდ ან პირადი განდიდების წყაროდ რომ გადაუქცევიათ“.

(გვიანდელი მინაწერი (1990 წ.): სტრიქონები, რომლებიც ეს-ეს არის წაიკითხეთ, ამოღებულია მართლაც რომ უდროოდ გარდაცვლილი, ექვსი შვილის მამის, პროფესორ გელა ბანძელაძის წერილიდან).

კიდევ ერთი, ჩემი „შოენისტობის“ დამადასტურებელი, ერთობ საქებარი სიტყვებისგან გაცხრილული, ასე ვთქვათ, განჩინება რესპუბლიკის ერთ-ერთი საზოგადოებისა, რომლის სამეცნიერო მიმართულებას ვერ გავამელავნებ, — ვაითუ, მოხვდეს მის მესვეურს, მით უმეტეს, რომ იგი დაბეჭდილია ბლანკიან ქალაქზე და ზედ მრგვალი ბეჭედიც აზის:

„თქვენი ფუნდამენტური გამოკვლევა „ღია წიგნი“ არის ქართველი ერის გადარჩენისა და ხსნის ნათელი პროგრამა. მასში გაანალიზებულია ჩვენი ხალხის აწმყო და მომავლის პერსპექტივები. თქვენ . . . თქვენი ნათელი აზრით . . . მწერლური ნიჭით და . . . მეცნიერული რუდუნებით შესძელით ყველაზე დიდი ეროვნული გასაპირის ღროს . . .“.

ყველა ეს ციტატა მომყავს ხელნაწერიდან, და როგორც ალბათ შეამჩნიეთ, ავტორების გვარებს არ ვასახელებ, არა

იმიტომ, რომ მათ ჩემთვის საამისო თანხმობა არ მოუციათ, — მე მაინც ვუფრთხილდები მათ რეპუტაციას, — ჩეხოვის ბელიკოვისა არ იყოს, ვაითუ, დროთა განმავლობაში „как бы чего не вышло“.

ერთობ ვუფრთხილდები აგრეთვე ერთი თვალში საცემი თანამდებობის პირის სახელსაც; მან ხომ ჩვენი დროისათვის არნახული ვაუკაცობა გამოიჩინა და ჩემს დაუბეჭდავ ნაშრომ — „სამიზდატს“, „ამალელეებელი ნაწარმოები“ უწოდა არა კერძო ბარათში, არა ქუჩაში შეხვედრისას (სახით არც მიცნობს), არა ტელეფონით, — 50-ათასიანი ტირაჟით გამოცემულ თავის წიგნში!

მე უკვე ვწერდი, რომ ჩვენი ეროვნული ჭირის განსაკურნავად ჩემი „შავი წიგნი“ თუნდაც ცოტათი, სულ ცო-ტათი მაინც წამლად ვისმე თუ გამოადგება, ღმერთმა ხელი მოუშართოს და მოახმაროს იგი, თუგინდ წყაროს მიუთითებლადაც, ოღონდ ამ წყაროს მხოლოდ თავისივე კერძო წისქვილის ღარზე მისაშვებად ნუ გამოიყენებს.

ჩვენმა საერთო წისქვილის დოლაბმა კი წმინდად და მეტი რომ ჩამოუქვას, სწორედ ასე მოიქცა ეს საკმაოდ ცნობილი, საკმაოდ დიდ თანამდებობაზე მყოფი ავტორი, და აი, მას შემდეგ უკვე წელიწადი გადის, და ამ დროში კვირა დღე ერთიც არ გამომჩინია ისეთი, ზეცისკენ ხელები ვედრებით არ აღმეპყრო:

— ღმერთო, ჩემი გულისთვის მის დიდ უფროსებს ნუ დასჯევენებ მას და რასაც მე მამაცურ მოქალაქეობაში ვუთვლი, რომელსაც ჩვენ, საწყალი ხალხი, ასე დანატრებულნი ვართ საერთოდ, მათ აჩქარებასა და უგუხურებაში ნუ ჩაათვლევინებ...

ამ მონაკვეთის დასასრულს მინდა შემოგთავაზოთ კიდევ ერთი ამონაწერი, დიამეტრულად განსხვავებული იმათგან, ზემოთ უკვე ასე მრავლად რომ გაგაცანიო:

„ერი, რომელიც ამ ზომამდე მიიყვანს თავის თავს, ის არც არის სიცოცხლის ღირსი. როგორც ჩანს, აქ მოქმედებს ბუნების შერჩევის კანონი...“

დროთა განმავლობაში ჩვენს მაგალითზე სხვა ხალხები მაინც გაფრთხილდებიან და ისტორია ქართულისას სხვას თუ

არაფერს, ამ ანდაზას მაინც შემოინახავს; რაც მოგევა დავითაო, ყველა შენი თავითაო“.

არ იფიქროთ, ამის მომწერი ვაზგენი იყოს ანდა ის ერევნელი გიდი, არასომეხ ტურისტებს „გულისწუხილით“ რომ ანათლებდა, და არც ის ორი, უბრალოდ ჩაცმული სომეხი, მგონი ზელსონები, ვაკეში, ტროლეიბუსში სომხურად ხმამაღლა რომ ქაქანებდნენ, რასაც წინათ ჩურჩულით თქმასაც ერიდებოდნენ (მითარგმნა ერთმა ჩემმა ნაცნობმა, სომხურის მცოდნე თანამგზავრმა):

— ახლა ამ ტუტუც-ვრაცებს ჩვენი სომხური გულს უხეთქავთ... ჰამაც, ბოლმა რაც მეტი მოაწევებთ, აღსასრულიც მათი უფრო მალე მოვა...

დიახ, „დავითაო... შენი თავითაო...“ ამის მომწერი ჩვენი გაჩანაგებით სიხარულისგან აფოფინებული არც „ჩვენი ძმები ქურთებია“ და არც საკუთრივ ჩვენი „დიდები“, ჩრდილოეთს სიამაყის გრძნობით რომ უპატაკებენ ხოლმე, საქართველოში 100 სხვადასხვა ეროვნების მოსახლეა და ყველა ისინი ჩვენი ძმებიაო, — ამას მწერს არცთუ ახალგაზრდა, ნიჭიერი და განათლებული, სამწუხაროდ, გაუთხოვარი ქართველი ქალი, იწერება თითქოს ნიშნის მოგებითაც, მაგრამ, არა მგონია, ჩვენი საერთო უბედურებით ისიც არ იყოს გულდაკოდილი...

ესეც ადვილი სავარაუდებელია, რომ იგი ჩვენს ასეთ, საყოველთაო ეროვნულ პასიურობას უკვე შეურიგდა, და რომ, მისი თვალსაზრისით, ჩვენი მარადიული სიცოცხლის შესანარჩუნებლად უკვე ზედმეტია რაიმე მოქმედებაზე ფიქრი და ზრუნვა, და რომ სწეულ ერს აწი აღარაფერი ეშველება და... „სჯობს დავიხოცოთ როგორც რაინდები...“

ო, ამგვარი ბქობა ძალიან წააგავს ლიანდაგზე გადამავალ იმ ადამიანს, ჯერ კიდევ შორიდან გრიალ-გრიალით მომავალ მატარებელს თვალი რომ მოჰკრა და უმალვე შიშმა ისე აიტანა და მუხლები მოექცა, რომ სიცოცხლის მხსნელი ერთი ნაბიჯი, მხოლოდ ერთი ნაბიჯიც ველარ გადაუდგამს...

არა და არა!

თუ არ გვინდა საქართველო, სულ ერთიანად მაინც, არ გადაიქცეს საქურთელოდ, თუ არ გვინდა ჩვენი შვილები, შვი-

ლიშვილები არ აღმოჩნდნენ თავისავე, მაშინ უკვე ყოფილ სამ-
შობლოში საძულველ გერებად,—

ჩვენ ასეთი ნაბიჯი უნდა გადავდგათ,

უნდა გადავდგათ,

უნდა გადავდგათ!!

ჩვენ არა მარტო უნდა შევაჩეროთ ჩვენი დღევანდელი სა-
ბედისწერო კლება, — ჩვენ უნდა ვიმრავლოთ და ამ სიმრავ-
ლით მოვერიოთ ყველა ჩვენი სიკვდილის მნდომთ!

ჰმ, ამოვიხოცოთ...

ამოხოცვა შენივე თავით, შენივე ხელით, თითქოს სატრა-
ბახოდ, ისტორია რეგვენობად რომ ჩაგიწერს, ეს, ვიმეორებ,
რა რაინდობაა?!

გუშინ დაწერილი ამის წინა ფურცლები გადავიკითხე უფ-
რო სტილისტური, ვიდრე აზრობრივი დახვეწის მიზნით... აზ-
რში, აბა, რა შემეშლებოდა-მეთქი, თავმომწონედ გავიფიქრე
და... დახეთ, სწორედ რომ აზრში... მაინც, ეს რა დამიწერია,
ა?! „თუ საქართველო აღარ იქნება, ნულარ იქნებაო ნურც სხვა
ქვეყანა...“

სირცხვილი, ჩემი სირცხვილი..

ჩვენი ბეყეირათობა-უტაობით შავეთისაკენ, გულარხეინად
მიეიქანებოდეთ და...

რას ვერჩი და ჩვენს შემდეგ რატომ აღარ იცოცხლოს სა-
ქართველოზე პატარაზე პატარა, თუნდაც ისლანდიაში, თი-
თქმის უხმელეთო, ყინულოვანმა ისლანდიაში, რომელმაც არც
კი იცის, რას ნიშნავს „არა იპარო“, „არა კაც კლა?!“
(ამ სტრიქონების დაწერის დღეს მარტო თბილისში; მარტო
ბენზინის რიგში, უკვე მესამე ქართველი მოკლეს ქართველებ-
მა...).

რას ვერჩი და ჩვენს შემდეგ რატომ აღარ იდღეგრძელოს
საქართველოზე სივრცით ორჯერ პატარა და მოსახლეობის მი-
ხედვით სამჯერ მეტმა, თუნდაც ჰოლანდიაში, რომელმაც ხმე-
ლეთი ზღვასაც კი გამოსტაცა და ახლა, ეს „ქონდრისკაცი“, ამე-
რიკის მერე, მსოფლიოს მეორე მარჩენალია?!

დიახ, რას ვერჩი გარჯილობითა და გონიერებით კურთხე-

ულ დანიას, შვეციას, შვეიცარიას, ნორვეგიას, ფინეთს, სინგაპურს და, თუნდაც ამათზე ბევრად დიდ ტაილანდს, სამხრეთ კორეას, იაპონიას და სხვა, და სხვა საკვირველებათა ქვეყნებს?

რაკი ჩვენ აღარ ვიქნებით, ნუთუ ამათი სულდგმულობაც უნდა ამოიშანთოს მიწისა ზედა?

ლმერთო, შემინდე და მაპატიე წამიერად გონებადაბნედილ ცოდვილს წამონაროში ჩემი!..

ერთშვილიანო ქართველო დედებო,
ო, რარიგ მძულხარტი!..

(ამთავითვე უნდა განვაცხადო, რომ ეს ჩემი სიძულვილი ოდნავადაც არ ვრცელდება იმ ერთშვილიან დედებზე, რომლებმაც შეილი სამოქალაქო ქორწინების გარეშე იყოლიეს; ასეთ შვილებს გონიერების შეილება უნდა შევარქვათ).

ეს სტრიქონები და, საერთოდ, „შავი წიგნის“ ეს მეორე წიგნი დავრდომილთა სახლში იწერება.

საცხოვრებლად აქ მოსვლა ბევრს დიდად ერცხვინება, მაგრამ რა ქნას? — თავი მოიკლას?

ზოგს საამისოდ ნებისყოფა არ ჰყოფნის, ზოგსაც ღონე: თავი რომ ყულფში გაპყო, ჯერ მალლობზე თოკი უნდა ჩამოაბა, მერე სკამი უნდა მიიღგა, შედგე ზედ და გააქრა ფეხი...

ამას კი ფიზიკურად დაუძლურებულნი, ღონემიხდილი, აბა, რას მოერევა, განსაკუთრებით ის, ვინც მარტო განცხრომა-მხიარულების მარყუქში თავი ჯერ კიდევ ჯელობაში გაპყო, როცა ცხოვრება გასართობ კომედიად ეჩვენებოდა, მერე და მერე კი, წელთა მომატებასთან, ტრაგედიად რომ შეეცვალა...

...აქ ისეთი ცოლ-ქმარიც შეგხვდებათ, ახალგაზრდობაში რომ ამჯობინეს ერთადერთი გოგონას შემყურენი ყოფილიყვნენ, ის კი 17 წლის ასაკში წაართვა მათ ულმობელმა შემთხვევამ, რომლის მსგავსი ფათერაკი დღევანდელ საქართველოში ათასობით თავს გვატყდება...

და აი, თავისივე თავით გაუბედურებულებმა ველარ გაუძლეს ცისმარე დღე ეცქირათ შავარშიაშემმოვლებული სურათისათვის და იმ ეზოსთვის, სადაც მათი ერთადერთი იმედი და დასაყრდენი დანავარდობდა და... მიატოვეს ეზო-კარიც და ის პატარა ქალაქიც, სადაც არა ერთი და ორი წელიწადი უცხოვრიათ...

...და ახლა აქ ცხოვრობენ, — არავითარი ინტერესი, არა-

ვითარი მიზანი, არავითარი პერსპექტივა, სადილ-ვახშმის მოლოდინში რომ ელევათ წუთისოფელი...

მართლაცდა, დავრდომილთა სახლი, თუნდაც მას პერსონალურ პენსიონერთა პანსიონატი შეარქვე, და თუნდაც იგი სანატორიუმსაც არ ჩამოუფარდებოდეს, მაინც დავრდომილთა სახლია, და რაკი ცხოვრება ცხოვრებაა, სიცოცხლე აქ მაინც გრძელდება, „მარა“ „რავალი“ სიცოცხლე?..

აი, საინვალიდო ურიკაში, ბუდეში ჩხიკვივით ჩამჭდარი, წელსქვემოთ კიდურებწართმეული „კაი გვარის“ ქალი, —ახლო ნათესაებებმა უყოყმანოდ, ეკალშესობილი, ჰაერდაჩუტული ბურთივით აქ რომ შემოაგდეს და ახლა ის გამკივანი ხმით სანიტრებს დღე-ღამეში ბარე ოცჯერაც რომ გასძახის, და რატომ მეტჯერაც არა, — აკი ცოცხალ ადამიანს, თუნდაც მარტო წელს ზევით მგრძნობიარეს განა ცოტა რამ სჭირდება ადამიანური?..

— ა?.. რა ბრძანეთ?

ო, გმადლობთ, რომ მომაგონეთ...

კი, ნამდვილია, ფრანკლინ დელანო რუზველტიც წლობით გახლდათ ამ დღეში, მაგრამ მას ხუთი შვილი თავს დასტრიალებდა, — არა როგორც ამერიკის პრეზიდენტს, — როგორც მამას...

ამ „თავადის ქალ მაიას“ კი შვილები არ აკითხავენ, ანდა რას მოაკითხავენ, როცა მანიკიურ-პედიკიურ, თანამედროვე ფერ-უმარილზე გადაყოლილმა ერთის მეტი არც იყოლია, და ის ერთიც, ლოთობის ნიადაგზე, ციროზმა იმსხვერპლა, პირმშოზე დარდმა კი — მამა და ქმარი...

ეს ზეზეურად ჩამთმხმარი ხნიერი ქალი კი უფრო ფსიქიატრიულში უნდა იმყოფებოდეს, ვიდრე აქ „ნებიერობდეს“, აკი ის ქკუაზე გვარჩინად გადასულია, თუმცა აღრე, როგორც ამბობენ, საღ გონებაზე გახლდათ; შეპრეტეილობა მხოლოდ მის შემდეგ დაეტყო თურმე, როცა ერთ მშვენიერ მთვარიან ღამეს, მარტოხელას, ბინაზე მისი ვაჟის სამი ამხანაგი გამოეცხადა და „ღეიდა ვარდო“, როგორც გაზეთებში წერენ ხოლმე, ძვირად ღირებულ არაბულ დივანზე მხეცურად წამოაქციეს და გაუპატიურება დაუპირეს... კანონის მიხედვით!

ღიას, კანონის ძალით, რომლის ეს მუხლი თურმე გონების მიღმა არსებულ კოდექსში მოიხსენიება: ერთადერთ ნარკომან

შვილს დედა ზარში ამ პირობით გაუთამაშებია და წაუგია... რას იზამ, ძველი რომაელები აკი ამბობდნენ — კანონი მკაცრია, მაგრამ მაინც კანონიაო.

(ალბათ შეამჩნიეთ, ზემოთ სიტყვა „მხეტურად“ გამოვაცალკევე... დიახ, საწყალი მხეტები! რას არ ვაბრალებთ მათ! ისინი წელიწადში რალაც ერთხელ ახურდებიან, ისიც ბიოლოგიური სახეობის შენარჩუნებისა და გაგრძელების მიზნით, ასეთი ორფეხა მხეტები კი...).

ერთ არაქართულ იუმორისტულ ჟურნალში ისეთ სიუჟეტურ კარიკატურას წავაწყდი, რომელიც, ჩემი ფიქრით, პედაგოგიკის დარგში სულ ცოტა ათ დისერტაციას უკან მოიტოვებს, თუკი მათ ამ თემაზე ჩვენებურები დაიცავენ: „ფუფუნება, როგორც ქართველი ახალგაზრდობის გარყვნისა და დღუპვის უპირველესი მიზეზი“.

ეს კარიკატურა, ერთმანეთისგან მიყოლებით, რამდენიმე ნახატისაგან შედგება: მშობლებმა ჩვილს აკვან — „კალიასკაში“ პატარა სათამაშო ავტომობილი მიუგორეს; ცოტა რომ წამოიზარდა და „კალიასკას“ გამოეთხოვა, — სამბორბალა ველოსიპედი; მერე — ორბორბლიანი; მერე — მოტოროლერი; მერე — ავტომანქანა „ფიატ-კვიგული“.. ბოლო სურათში კი, უკვე აქა-იქ ჭალარაშერეულს, — ლიმუზინი „ვოლგა“ მიართვეს, რომლითაც აი, ახლა მან, ერთადერთმა შვილიკომ, ნაამაგარი დედ-მამა სწორედ იმ სახლთან მიაგდო, რომლის კარის თავზე აწერია: Дом престарелых — აბა, გამობრძანდით მანქანიდან და აქ შებრძანდითო...

ახალგაზრდობიდან შუახნობასა და სიბერეში ისე შეუმჩნევლად სწრაფად ვისკუპებთ ხოლმე ოცდაათ წელს უკვე გადაცილებულნი, ახლო ნაცნობებიც კი, ხუთ წელიწადში ერთხელ მაინც თუ ვერ ვნახეთ და ვერ შევხვდით ერთმანეთს, მერე ერთიმეორე, შეიძლება, ველარ ვიცნოთ.

ეს ჩემი ძველისძველი ნაამხანაგარიც ისე გადაეხატა წლებს (მისთვის ასევე მეც, ცხადია), რომ ძლივს შევიცანი, თანაც უფრო ხმით, ვიდრე სახით. მე იგი ბინაზე გამომეცხადა და, ჯერ ხეირიანად გამარჯობა-გავიმარჯოც არ გვეთქვა, რომ შეუპატივებლად ჩიქურ სამზარეულო მოინახულა, მერე სააბაზანოში შეიხედა, მერე...

თქვენ ჯვარი გწერიათ, ჩემთან თურმე დიდ უბედურებას მოუყვანია: ერთადერთი, 25 წლის ვაჟი ავარიაში დაღუპვია (მის მანქანას ტაქსი დაეჯახაო, სხვებმა კი სხვა თქვეს, გახეთქილი მთვრალი ტაქსს თვითონ შეასკდაო)... ამ ნიადაგზე დედა ლამის კუკუაზე შერყეულა და შეილის გასვენების შემდეგ დიდებული ბინა, რაკი მისი ყოველი კუთხისა და იქ მდებარე ყოველი საგნის დანახვა მასში აუტანელ კრუნჩხვებს იწვევდა, აუძულებია და გაქცეულა, და ახლა ხან ვისთან ათევს ღამეს და ხან ვისთან; მაგ ჯოჯოხეთში ვერ დავბრუნდები, გადაცვალო...

და აი, ახლა ეს ჩემი ნაამხანაგარი, თუმცა გრძნობს, რომ ეს შესაძლო გარიგება მის საზარალოდ ერთი ათს დაედრება, მაინც მთავაზობს გასაცვლელად თავის „ბარსკაია კვარტირას“, ნუ იტყვი, ცისფერი უნიტაზით, რომლის შოვნა მას, ალბათ, არცთუ გაუჭირდებოდა, რადგან მთელი თავისი დღე და მოსწრება სამშენებლო ტრესტებში მუშაობს...

ძნელია, უფრო კი ყოვლად შეუძლებელია, რომ ადამიანს თავს დატეხილი ასეთი უბედურება სიტყვით შეუმსუბუქო, — ცდაც კი ამის, ჩემი მხრივ, უსაშველო ცბიერება იქნებოდა, არადა, ვაი, რომ ვერც საქმით ვშველი, — ჯერ ერთი იმიტომ, რომ ბოდიში მომიხდია, უნიტაზი რა ფერისაც უნდა იყოს, — იყოს თუნდაც ცისფერი, პირადად ჩემთვის აბსოლუტურად სულ ერთია; მე ის მახარებს, როცა ზესკნელს ვხედავ ცისფერს, თორემ აქვლავ ბოდიშს გიხდით, უნიტაზი, თუნდაც კუპრივით შავიც იყოს, თავის პირდაპირ დანიშნულებას უნაკლოდ შეასრულებს; მეორეც იმიტომ, რომ მისი სახლი ისეთ შედმართზეა წამოკიმიული, — ხნიერი კაცი ფეხით ვერც მიხვალ; მე კი, შინიდან ყოველი გამოსვლისას და შინ დაბრუნებისას, ქირის მანქანა ყოველთვის სად ვეძებო, ანდა რა ჯიბე გაუძლებს ამას...

(სხვათა შორის, ამ ბედშავიანებს ეზოში მანქანა ორი ეყენათ: მამას თავისი, შეილსაც თავისი... დიახ, სამსულთან კომუნისტურ ოჯახზე „სულ რაღაც“ ორი მანქანა!).

ეს გულისგამპობი ამბავი უფრო იმიტომ გაუწყეთ, რომ გეგრძნოთ, რა ტრაგიკულია ერთშვილიანობა, მაგრამ, როგორ ფიქრობთ, ორშვილიანობა კი მასზე ბევრად ნაკლებტრაგიკულია?!

ერთ ქართველ კაცს თავისი გვარი — თურქაძე — ეჩოთი-რებოდა და იგი ქართველიშვილზე გადაიკეთა...

რა დაგიმალოთ, მისი ეს ნაბიჯი მაინცდამაინც დიდ გონივრულ ნაბიჯად არ მეჩვენება. შენი წინაპრები თუ ოდესღაც თურქია-თურქაძეები იყვნენ ანდა სომხიშვილი-ბაღდასარაშვილები ან კიდევ რუსია-რუსიშვილი, ეს იმას როდი ნიშნავს, რომ შენ ახლაც თურქი ხარ ან სომეხი ანდა რუსი... ამა თუ იმ პიროვნების პატრიოტული სულისკვეთება, მისი ჭეშმარიტი მამულიშვილობა გვარით, აბა რა გასაზომია „მამელუქის“ ავტორი — უიარაღო — გვარად თათარაშვილი გახლდათ, მაგრამ სამშობლოს სიყვარულში მას, აბა, რომელი დიდებულიძე, რომელი ერისთავი შეეცილებოდა!..

ამ ყოფილი თურქაძისა და აწ ქართველიშვილის ორმა ვაჟმა კი სამარცხვინოდ და საბედისწეროდ შეაფურთხეს თავიანთ მშობლებსაც, თავიანთ თავსაც და... საქართველო ხომ არ დაინდეს და არ დაინდეს!

რანაირი პატრიოტი ხარ, დალოცვილო, და რანაირი ქართველიშვილი ბრძანდები, თუკი სამშობლოს სალსა კლდეებსა გაცვლი „თათრების სამოთხეზედა“, მით უმეტეს, როცა ეს ოდნავაც არ არის გამოწვეული სახელმწიფოს მიერ შენი მოსალოდნელი შერისხვით, რასაც თავისუფლების ხანგრძლივი აღკვეთა მოჰყვება.

არათუ ეს, — ორივეს, ერთხელ კიდევ დალოცვილებო, ისეთი უნივერსიტეტი დაგამთავრებინეს, სადაც უარს უფასო სწავლაზე მსოფლიოს არც ერთი ზანგი არ იტყოდა და არც ხელმოკლე ინგლისელი ან ამერიკელი...

ორივეს ხელთ საშურველი პროფესია უკვე გიპირავთ, თქვენმა ასაკმაც ჩამოჰკრა უკვე საამისოდ ზარი და... ადექით და გააბედნიერეთ ორი კარგი ქართველი ქალიშვილი, იჯაქაცეთ და იყოლიეთ თითოეულმა ოთხამდე მაინც პატარა ქართველიშვილი და... საბოლოოდ ამით თქვენც გაბედნიერდებით — მეუღლეები, თქვენი მშობლებიც, თქვენი შვილებიც და საქართველოსაც მამულიშვილურ სამსახურსაც გაუწევთ...

...და არა იმით, რომ დედ-მამის მიერ ფეხისწვერებზე დღენიდაგ ვერცხლის ხონჩაზე მორთმეული ტკბილსიროფცხოვრება უკვე ისეთ დამტკბარ ფუფუნებად აღარ მოგეჩვენებათ და

მის შესაცვლელად სახიფათო მრუდე გზებს აირჩევთ, თითქოს-
და არ იცოდეთ, რა ქვეყანაში ცხოვრობთ და რა შინაწესს უნდა
დაემორჩილო, თუ გინდა, რომ ცოცხალი თავი შეგრჩეს...

ესეც არის, უცხოეთში საამური ცხოვრების ახალგაზრდა
მაძიებლები, ყველანი როდი ირჩევენ ასეთ მოლიბულ გზას...
ერთმა ჩემმა ახლო ნათესავმა თავისი ვაჟკაცური, წმინდა ქარ-
თული გარეგნობა ანაცვალა რუს ებრაელ ქალს, რათა ამ ქორ-
წინებით თავი ამოეყო ამერიკაში...

ო, არა, იგი სამუდამოდ არ დაგვეკარგება, სიბერეში უეჭ-
ველად დაუბრუნდება იმ ბუდეს, საიდანაც აფრინდა, — მინ-
და გულზე ქართული მიწა დამეყაროსო და... შეიძლება ბე-
რიკაცურად დაგვემოძღვროს კიდევ, თუ როგორ უნდა გვიყ-
ვარდეს ჩვენ, ქართველებს, საქართველო...

...დიახ, ერთშვილიანო ქართველო დედებო, ო, რარიგ მძულ-
ხართ, რარიგ მძულხართ!..

(გ ვ ი ა ნ დ ე ლ ი მინაწერი: ამ ბოლო დროს ამ „კდემამო-
სილებმა“ თითქოს პირი შეკრესო, თავის გასამართლებლად ერ-
თიანი „ტაქტიკა“ გამონახეს: „არ მიჩნდება, ბატონო და... რა
ვქნა?..“).

ბედნიერისთვის იოლია,
ჭკუა ასწავლოს უბედურს.

ესქილე.

ამას წინათ საღამოს გაზეთი ეკითხებოდა ერთ თავმდაბალ მამას, როგორ გამოზარდეთ ორი შვილი, ორივე სახელოვანი აკადემიკოსიო...

მამის პასუხი აღარ მახსოვს, ჩემი პასუხი კი ამაზე ასეთი იქნებოდა: არა, არ გამოუზარდია ისინი მამას აკადემიკოსებად, და ასეთი რამის მიღწევა არც ერთ მამას არ შეუძლია; ამ შემთხვევაში კი, მართალია, ყოველმხრივ ხელი კი შეუწყო, მაგრამ შვილებს დაბადებიდანვე ფართო გონებრივი და ჯანსაღი ფსიქიკური მონაცემები რომ არ დაპყლოდათ, — მამის შემწეობით და მას, თუ გნებავთ, დედაც წახმარებოდა, ისინი, პა, ასე, ტაატ-ტაატ, პატარა დოცენტებად თუ გამოიზარდებოდნენ (ჩვენი ქვეყნის საერთო, დაბალი მეცნიერული მასშტაბით)...

სომეხ ძმებს, ლეონ და იოსებ ორბელებს, მამა მეჭლანე ჰყავდათ, ისეთი „უბედური“ მეჭლანე, რომელსაც თავის დღეში სიტყვა ფიზიოლოგი, ფიზიოლოგია არც გაეგონა და არც ოდესმე ენახა არც ილია რეპინის და არც მარტიროს სარიანის ერთი სურათიც კი, და მაინც, მისი ერთი შვილი ლირსშესანიშნავ აღმოსავლეთმცოდნედ და ერმიტაჟის დირექტორად გამოიზარდა, დიახ, გამოიზარდა, მეორე კი — ივანე პავლოვის მარჯვენა ხელად, თვალსაჩინო ფიზიოლოგად.

საერთოდ, ასეთი საოცრად იღბლიანი შემთხვევები მრავალმილიონიან ერებშიც კი იშვიათია და ჩვენი პრესა, მით უფრო ამ ჩვენი ჭირიანობის ეამს, ჩვენ, ჭკუათხელიძეებს, დამაძინებელ ნანას არ უნდა გვიმღეროდეს და არ გვაიმედებდეს, აი, კაცმა სულ ორი შვილი იყოლია და ორივე აკადემიკოსი გამოიყვანაო.

ან კიდევ... გაზეთებმა და ტელევიზიამ დიდი სარეკლამო

ბათქაბუთქით რომ მოგვაწოდეს ხუთი ძმა — პროფესორის, ომიდან ხუთივესივე ცოცხლად დაბრუნების ამბავი...

ეს, რასაკვირველია, იშვიათზე იშვიათი იღბალია, სასწაულთ სასწაულია, მაგრამ ის კი, საუბედუროდ, უფრო ჩვეულებრივი ამბავი იყო, როცა ამ ომში სხვა ხუთი ძმაც — ქართველები, ქართველები — იღუპებოდა, რომლებზეც ახლა, დროდადრო, თვითონაც ნაომარი მიხეილ დავითაშვილის „სოფლის ცხოვრება“ მოგვითხრობს ხოლმე...

...დალუპვას ხუთივენი რომ გადაურჩნენ, თქმა არ უნდა, დიდად სასიხარულოა, მაგრამ ეს ხუთივე, ხუთივე ძმა ამჟამად ყველა რომ პროფესორია, — ამას საკვირველებად თუ მივიჩნევთ, ყოველ შემთხვევაში სარეკლამო საგნად ნუ გავხდით და კინოფილმს ნუ მიუძღვნით, თორემ ჩვენ, ჰკუათხელიძეებს, ისეც დაბნეული გონება სულ დაგვებნევა:

— რა გვარი იყო აი ის, იმანო... ხუთი ძმა, ხუთი ძმა... ტელევიზორში რო გამოათინეს... ხოდა, იმ იმანომ ხუთი შვილი თუ გააპრაფისორა, მე რა, იმაზე ნაკლები მოვჩერჩეტდი ამჟვეყნად თუ, რაღაც ორით მაინც თავი ვერ მოვიკოხტავო?!

საერთოდ, კმარა! კმარა, მოვეშვათ საყოველთაო განათლებამეცნიერების პროპაგანდა-აგიტაციას, ნამდვილსაც კი, მით უმეტეს ცრუმეცნიერება, ცრუგანათლება დღითი დღე აჩანაგებს, აქცევს საქართველოს...

მილიონ ორასათასიან თბილისში სულ რაღაც რვა მეშუშეა, თანაც ქართველი მათ შორის ერთიც არ არის (ვასახლებ მართო მეშუშეს, ცხადია, მხოლოდ მაგალითისთვის).

დასასრულ, არცთუ სასიხარულო შინი-ცნობა: როგორც შევიტყვე, იმ ხუთი ძმა — პროფესორიდან ერთიც ვერ დაიტრაბახებს შესაშური შვილიერებით, შედარებით კი ამ სფეროში „აკადემიკოს“ მამამათივით...

ესეც, ვფიქრობ, იმის ნათელი დასტურია, ერის მთლიანი „გაპრაფისორება“ რა შემმუსგრელ როლს ასრულებს ერის ამოწყვეტაში...

ხმალსა არ უშლის სიმოკლე,
ფეხ წადგი, წაემატება,
არცა ვაჟკაცსა—სიღაბლე,
თუ თავი გაემეტება.

ხალხური

ერთი ჩემი მეგობარი ქალის მამას „შავი წიგნი“ წაეკითხა და ჩემი ნახვა-გაცნობის სურვილი გამოეთქვა; რაკი იგი მეცნიერების იშვიათი დარგის ნამდვილი პროფესორი ბრძანდებოდა, ამავე დროს წესიერი და პატიოსანი მოქალაქე, და თან ხნოვანებით ჩემზე უფროსიც, — შინ თავად ვეახლე...

...და როცა კალათბურთელისთვის ამ საშუალო სიმაღლის კაცმა ჩამოსართმევად ხელი გამომიწოდა და ზემოდან— მეტი რა გზა ჰქონდა! — დამხედა (ჩემი სიმაღლე „უქუსლებოდ“, ვიდრე ჟერ კიდევ არ მოვხრუკულეარ, 168 სანტიმეტრია), დიმილნარევი გაკვირვებით მითხრა, მეგონა, უფრო ვაჟკაცური შესახედაობისა იქნებოდიო...

— რატომ, ბატონო? — ვკითხე მე..

— ო, თქვენ ისე გაბედულად წერთ...

მერე, სუფრასთან, როცა ჩემს ხელში ნაინკუბატორალი, ფერმის ქათმის კანჭს ხორცი ძვალს, კბილისა და დანა-ჩანგლის მოუშველებლად, იოლად და სწრაფად გამოეთხოვა, მე, არაპროფესორმა, მასპინძლის ეს პროფესორული აზრი მაინც არ დავინდე და...

— ისე, როგორც ქმნა სიკეთისა არ არის დამოკიდებული ქონებაზე, ასევე სულიერი ვაჟკაცობის წყარო არც ფართო მხრებია და არც ცადაწვდილი ტანი; ამის მექანიზმი მოცულობით სულ პატარა ორგანოში — გულში მდებარეობს...

ნუთუ არ გეშინიათ, სწორედ ამ ფრიად პატივსაცემმა პირმა მითხრა, ჩემი მომავლით, სათუო ბედით შეწუხებულმა...

ო, მეშინია, რასაკვირველია, მეშინია, მე ხომ სტალინური ეპოქის ღვიძლი შვილი ვარ და ძველი შიშინაობის კომპლექსი

ძვალ-რბილში მაქვს გამქდარი და განუკურნავი სენივით დღემ-
დღე მომყვება...

მეორე მხრივ, მე ის მამხნეებს, რომ ჩემი ეს, ეს ნაწერი
შიკროსკოპული ოდენობითაც თითქოს არ ეწინააღმდეგება ჩვე-
ნი დიადი ქარტიის — კონსტიტუციის არც ერთ მუხლს; ამას
ახლა ისიც ემატება, რომ მიმდინარე წლის 12 თებერვლის
„პრავდაში“ სათაურისთვისაც კი ჩვეულებრივზე უფრო მოზ-
რდილი ასობით დაბეჭდილი რამ ამოვიკითხე:

«УПРАВЛЯТЬ ГОСУДАРСТВОМ ДОЛЖЕН КАЖДЫЙ»

ბუნებრივია მე, როგორც არცთუ სულ უკეუომ, ჩინებუ-
ლად ვიცი, ჩემი შეუმჩნეველი, პაწაწინა ქინქლას ადგილი საბ-
კოთა სახელმწიფოში და, აბა, გულშიც როგორ გავივლებ, მის
მართვა-გამგეობაში ცხვირი თუნდაც ოდნავ შეეყო, ოღონდ ურ-
ვა-დარდი ჩემსავე სამშობლოში ჩემი პატარა ხალხის ყოფნა-
არყოფნაზე სულს თუ მიხუთავს და ამის ირგვლივ, თუნდაც წე-
რილობით, ჩემს ღარიბულ აზრს გამოვთქვამ, ამისათვის შავი
დღე არ უნდა გამითენონ, მით უმეტეს, რომ ახლა ნამესტნიკი
კოვანოვები დამსახურებულ პენსიაზე იმყოფებიან და დამსა-
ხურებულადაც ისვენებენ...

ესეც არის, ჩვენს ცხოვრებაში მცირე დიაპაზონის ქართველ
კოვანაშვილ-კოვანაძე-კოვანაიებს, აბა, რა გამოლევს და... პრო-
ფესორ წიბახაშვილის ბედი, ვინ იცის, ეგებ მეც მეღის, ა?!

მარტალია, ეს ჩემი, ასე ვთქვათ, თხზულება სულაც არ არ-
ის „ანონიმკა“, მაგრამ რაკი იგი ოფიციალურ თვალსაზრისს ასო-
ასო არ ემთხვევა, მისი „ანონიმკად“ და მავნე ნაბოდვარად, მი-
სი ავტორის კი თუნდაც ნარკოტიკების საიდუმლოდ მოვაჭრედ
გამოცხადება ვითომ-ასე ღიდად გაუჭირდებათ მოსისიანებულ
ახალ ნინიძეებს?!

მოსისიანებულს-მეთქი, რადგან ისინი თავისით, ზემოდან
დაუვალებლად, არც არაფერს წერენ და არც არაფერს აკეთე-
ბენ, ამიტომ, ცხადია, მეშინია, როგორ არ მეშინია, მაგრამ მა-
ინც, იმის იმედი ნურავის ექნება, ამ შიშის გამო „შავ წიგნსა“
და მის ამ მეორე ნაწილს, ჩემი სიცოცხლის ბოლო ორმოცი

წლის ნატანჯ ნაფიქრ-ნააზრევს, თუნდაც რა „მოსარჯულებელი ნემსებიც“ გამოიკეთონ, როდისმე წიხლი ვკრა, თავზე ნაცარი დავიყარო და საქვეყნოდ, ანდა ცალკე, ერთი ერთთან, ავწყმუტუნდე, — შევცდი, დიდად პატივცემულო დიდო უფროსებო, მივქარე, მივეთ-მოვეთე, მოვჩმახე და... ამიერიდან მეც იმ ულტრაინტერნაციონალისტად მიგულეთ, რომელსაც სხვა ხალხი და სხვა ქვეყანა ურჩევნია-მეთქი თავის ხალხს და თავის სამშობლოს...

მე მწამს ჩემი მოქალაქეობრივი პოზიციის ალაღმართლობისა, და ეს მანიჭებს ერთგვარ გამბედაობას...

ფარულს, მალვით, ანონიმურად, ანტისახელმწიფოებრივს, ძველად რომ იტყოდნენ, არალეგალურს მე არაფერს ვწერ... და თუ ვისმე ასეთად ეჩვენება ან მოეჩვენება, ეს მხოლოდ იმიტომ, რომ სიცრუეს, ორპირობა-გაორებას, მლიქვნელობა-პირმოთნეობას, სტანდარტულ-დაპრესილ ესპერანტო-ფრაზებს ისე შევეჩვიეთ ჩვენ — ნიღბოსნები, ცოტა გადახვევატ კი ამ ყოველდღიური საცხოვრებო ნორმებიდან უკვე მძიმე დანაშაულად, იურიდიული ენით თუ ვიტყვით, კვალიფიცირდება, ქართულით კი — ინათლება...

ისე კი, თუ ზოგჯერ, ნაუცბათევეად ფეხი ამიცდება ამ ლარივით სწორ გენერალურ გზაზე, დაე, ეს პოლიტიკურ ცოდვად ნუ ჩამეთვლება, და თუ მაინც ჩამითვლიან...

ოღონდ ქართველების საქართველომ მარად იცოცხლოს როგორც ქართველების საქართველომ და...

თქვენი ავტობიტი და ჩემი გულისფიცარი!

ერთს კი ვითხოვდი: ამ სასიამოვნო პროცედურას არაქართველებს ნუ დაავალებენ, — ო-ო, ისინი სახელმწიფოს ზარალს არ მოერიდებიან და ტყვიას ბევრს მომახარჯავენ...

(გ ვ ი ა ნ დ ე ლ ი მინაწერი: ერევანში რუსულ ენაზე გამოშვებული გაზეთ „Эпоха“-ს 1990 წლის 11 ოქტომბრის ნომერში ქართველი მეცნიერების მეცადინეობით მეცნიერად ფეხადგმული პარულირ მურადიანი „შავ წიგნზე“ წერს: „Чудовищная книга...“).

ერთმა „უცხოეთში“ მცხოვრებმა, არცთუ ანთიმოზ ივერი-ელივით მოღვაწე ჩვენმა თანამემამულემ, უშვილომ, — ამას წინათ ჩვენ რომ ცხარე ცრემლით დავიტირეთ, იმ „უცხოეთში“ კი, სადაც იგი თითქმის ნახევარი საუკუნე შემოჭმედების ჰა-პანს ეწეოდა, და რომლის ხსოვნას სტანდარტული „Спова прощания“-ც არ მიუძღვნა იმ 24-გვერდიანმა გაზეთმაც კი, რომლის სარედაქციო კოლეგიის წევრიც ის გახლდათ, და არც კომისია გამოიყო განსვენებულის ლიტერატურული მემკვიდ-რეობის შესაგროვებელ-შესასწავლად, რაკი იგი, როგორც ჩანს, მდარედ და უმნიშვნელოდ მიიჩნიეს, — მთელი თავისი, შვიდ-ნიშნისანი მემკვიდრეობა „ღარიბ“ ახლობლებს დაუტოვა (მათ შორის მეღვინეს და იმ პროფესიის ქალს, რომელიც მე ასე „მი-ყვარს“)...

ეს იმ დროს, როცა მის მშობლიურ სოფლის სკოლას ქარი არწევს, გზა კი ისეთია იმ სოფლიდან რაიონულ ცენტრამდე, — სამშობლიაროდ ზარდარეკილი ქალები ჩქარ, მაგრამ მოჩაყჩაყე ავტობუსს მამაპაპური ურმით მგზავრობას ამჯობინებენ, რათა გზად მუცელი არ მოეშალოთ...

არ ვიცი, იცოდა თუ არა მან, — რა კაი კაციაო რომ თქვან შენზე, მარილიან მომხიბლავ ღიმილს, რომელიც არსებითად არაფრად გიღირს და მარცხნივ და მარჯვნივ ხელგაშლილად არი-გებ, — ამას ხელშესახებ სიკეთესაც თუ დაამატებდი, ო, რა დიდად გაახარებდი იმათ, ვინც ამის ღირსია და მონატრულია კიდევ ამისა...

სხვათა შორის, როცა მან ჩემი „ფულების“ ამბავი შეიტყო, — ის ფარა ჩემთვის უნდა მოგეცა, ბაბუაჩემს შვიდი შვილი ჰყავ-დაო... რასაკვირველია, მითხრა ეს სალადობოდ და სიცილით, ბევრმა კი, ვინც ფულით გამოტენილ ლეიბზე განცხრომით წევს,

ჩემი საქციელი გუნებაში და ერთმანეთთან საუბარშიც, ზოგ-
მა ჩემს გასაგონადაც, მაიმუნობა-მატრაკვეცობად მიიჩნიეს,
უფრო მეტიც — შერეკილობაში ჩამიწერეს...

ვთქვა, ამან გული არ მატყინა-მეთქი, გულწრფელი არ ვიქ-
ნებოდი...

(დ ა ნ ა რ თ ი: ორი ბარათი აკადემიკოსს ზურაბაშვილს:

ბატონო ავლიპი!

ორი წლის წინათ თქვენ წერდით:

„სინდისი ნიშნავს შინაგან განწყობას, რწმენას, ცოდნას,
რომ ადამიანი-მოწოდებულია იზრუნოს სხვაზე და უყვარ-
დეს ადამიანი“.

„სინდისისა და მოვალეობის ადამიანი ამავე დროს არის
ზუსტი, მართლის მთქმელი, სიმართლის მაძიებელი, შრომი-
სა და გარჯის პატივისმცემელი და მოხვეჭის სასტიკი მგმო-
ბელი“.

ბევრად ადრე, ვიდრე ამ სტრიქონებს გაზეთ „თბილის-
ში“ ამოვიკითხავდი, საქართველოს სხვა და სხვა სოფელსა
და ქალაქში ათამდე მრავალშვილიან ოჯახს, ცხადია, ქართ-
ველთ და ხელმოკლეთ, მე, პენსიონერისა და უმნიშვნელო
მწერლის, მაშასადამე, მცირე შემოსავლიანი კალმოსნის კვა-
ლობაზე, ფულადი დახმარების ხელი გაუწოდე...

ამას ისიც მოჰყვა, რომ ზოგიერთმა, ჩემი აზრით, ბევრი
არაფრით გამორჩეულმა, მათი წარმოდგენით კი ყოველმხ-
რივ ბევრად გამორჩეულმა და, რაც ჩემთვის უფრო საკვირ-
ველია, ერისკაცებად ცნობილებმაც კი, ჩემი ეს ნაბიჯი მე-
ტიჩრობაში ჩამითვალეს, უფრო უარესიც — შექანჯალებუ-
ლობაში...

დიახ, სულ გიჟად ჯერჯერობით თითქოს არ მნათლავენ.
მაგრამ სიგიჟის დაწყებითი ფორმით რომ ვარ თურმე შეპყ-
რობილი, ეს მათ არ აეჭვებთ.

სხვათა შორის, ახალგაზრდობის დროინდელ ერთ ჩემს
ნაამხანაგარ ქალს, ამაჟამად კი თქვენს უმცროს კოლეგა-თანა-
მშრომელს, დიდი ხნის წინათ გაკანდიდატებულს და ახლა,

მგონი, უკვე დოქტორს, როცა გაეგო ჩემ მიერ „ფულები-
განიაყების“ ამბავი, მწუხარებით ამოეთქვა, ო, კი, ეს გონზე
გადასვლის უთუო მაუწყებელიაო...

...ვინ იცის, შეიძლება ისინი მართლაც არ ცდებიან და
ვცდები მე: ჩემზე უკეთ, რასაკვირველთა, თქვენ მოგეხსენ-
ებათ, გადარეულს თავი გადარეულად თუ მიაჩნია, ის არც
იქნება გადარეული, მე კი ჩემი თავი სრულ გონზე მყოფი
მგონია, უფრო მეტიც: თქვენს ზემოთ მოყვანილ სიტყვებს
თუ დავესესხები, ჩემს თავს, ასე თუ ისე, „მართლის მთქმე-
ლად“ და „მომხვეჭის სასტიკ მგმობელადაც“ ვთვლი და...

ეგებ ვტყუვდები, ა?

ამაზე სწორი და მართებული პასუხის გაცემა, რა თქმა
უნდა, შეგიძლიათ მხოლოდ თქვენ, საქვეყნოდ აღიარებულ
დიდ ფსიქიატრს.

ამიტომაც გიგზავნით ჩემს „შავ წიგნს“ და გთხოვთ, სწო-
რედ ამ თვალთახედვით გულდასმით გადაიკითხოთ იგი; და
თუ ვინიცობაა უტყუარი დიაგნოზის დასასმელად ის არ იქ-
მარებს და საჭიროდ დაინახავთ, მე მზად ვარ გეახლოთ, პი-
რადად გეჩვენოთ და, თუ ინებებთ, ხანგრძლივი დროით სა-
რეცელიც კი გავიშალო ფსიქიატრიულ სტაციონარში (ეს ერ-
თთავად ჩემთვისაც იქნება საინტერესო, რათა შევეამოწმო:
ამბობენ, თუ წინათ გიყებს თავი ნაპოლეონად და მეფეებად
მოქპონდათ, ახლა თავი კომუნისტური პარტიის ცენტრალუ-
რი კომიტეტის მდივანებად მოაქვთ!).

ჰოდა, ბატონო ავლიპი, ჩემი ამ ნაშრომის გაცნობისა და
თქვენი ჩემზე უშუალო დაკვირვებების შედეგად შეპრეკი-
ლად თუ არ მოგეჩვენებით და პაწაწკინტელა ეპვიც არ შე-
გუპარებათ ჩემს ჰომო საპიენსობაში, — გთხოვთ მომცეთ
ამის დაშადახტურებელი ოფიციალური ცნობა.

ფრანზის ამ ბოლო სიტყვებს ხაზს ასე თავგამოდებით იმი-
ტომ ვუსვამ, რომ ამ შემთხვევაში ჩემს მიმართ მარტო სი-
ტყვიერი შეგონებით თუ შემოიფარგლებით, რა ბრძნული და
გულსა და გონებაში ჩამწვდომიც უნდა იყოს იგი, მე მაინც
ვერ დამამშვიდებს...

და თუ ჩემი ამ თხოვნის პასუხად, საერთოდ, დუმილს აიჩ-
ჩევთ, ამისათვის მორიდებულ საყვედურსაც არ შემოგადრებთ:

აკი ვიცი, კვლავ გადასულს ამის დამამტკიცებელ ცნობა-მოწ-
მობას ფსიქიატრები ხელზე არ აძლევენ.

პატივისცემით

კიტა ბუაჩიძე

15 ოქტომბერი,

1984 წელი

ბატონო ავლიბი!

ერთობ გამაოცა იმ ამბავმა, რომ თქვენ ჩემი „შავი წიგ-
ნი“ არათუ წასაკითხად დაიტოვეთ, — თითქოს მასში დინა-
მიტი დებულიყო, უბრალო ცნობისმოყვარეობამაც კი ვერ
წაგძლიათ, რომ იგი აქა-იქ მაინც გადაგეფურცლათ.

თქვენი დანაბარები სიტყვა კი ზუსტად მომიტანა ჩემმა
„ფოსტალიონმა“ და მეგობარმა ვაჟა ჩინჩალაძემ:

— გადაეცით ბატონ კიტა ბუაჩიძეს, რომ მე ცენზურაგა-
უვლელ წიგნებს არ ვკითხულობ...

ჰოდა, რაკი თქვენ, დიდად პატივცემულო ავლიბი, მხო-
ლოდ ცენზურის მიერ ნებადართულ წიგნებს კითხულობთ,
გიგზავნით ამჯერად საბჭოთა კავშირის კომუნისტური პარ-
ტიის ცენტრალური კომიტეტის გენერალური მდივნის, ამ-
ხანაგ კონსტანტინე უსტინის ძე ჩერნენკოს რჩეული სიტყვე-
ბისა და სტატიების ქართულ ენაზე ამას წინათ საგულდაგუ-
ლოდ თარგმნილ, 512-გვერდიან კრებულს:

პარტიული და სახელმწიფო

აპარატის

გუზაოვის საკითხავი

იკითხეთ და დატკბით!

კვლავ პატივისცემით

კიტა ბუაჩიძე

18 ოქტომბერი,

1984 წელი

...დიახ, ვთქვა, ამან გული არ მატკინაო, გულწრფელი არ
ვიქნებოდი...

არა, შეიძლება არც მტკენოდა, რომ მაშინ, და არა ახლა, სამი წლის შემდეგ, დიდად ნიჭიერი ჟურნალისტის, ტატიანა ტესის „Зазвучали в ответ голоса“ წამეკითხა; მასში ერთი პატარა, თითქოს უმნიშვნელო ისტორიაა მოთხრობილი: მოსკოვის ერთ-ერთი კვლევითი ინსტიტუტის მოსამსახურე ქალი ხანგრძლივად ავად გახდა, და ვიდრე იგი საავადმყოფოში იწვა, მარტოღმარტო დარჩენილი, მისი მოხუცი დედის მოვლა-პატრონობა ინსტიტუტის თანამშრომლებმა ითავეს.

ამ ნარკვევის გამოქვეყნებისთანვე რედაქციამ და ავტორმა მრავალი წერილი მიიღო. ბევრი იწონებდა იმ კეთილი აღამიანების გულისხმიერებას, მაგრამ ცოტანი როდი აღმოჩნდნენ ისეთებიც, რომლებსაც...

„У них просто вызвал раздражение сам факт чужой доброты. Они с гневом обрушились на отзвучивших сослуживцев, искали в их поступках тайный расчет... Упрекали в желании выслужиться, выгодно отличиться, чего-то не по праву добиться“
(„Известия“, № 164, 1982 г.)

ჰოდა, თუკი ჩვენმა დრომ წარმოშვა ისეთი საბჭოთა ჰუმანისტები, რომლებსაც გულზე ეკლად ესობათ ისიც კი, მავანი და მავანი უმწეო მოხუცს თავისი ყურადღების მცირეოდენ ნაწილს თუ დაუთმობს, მით უმეტეს დიდფულიანი კომუნისტ-ჰუმანისტების გულს ხომ გახურებული შანთით დაწვავდა იმის გაგება, რომ ერთმა პენსიონერმა თავისი მართლაც დანაზოგი არ დაინანა საერო საქმისათვის...

...და განა გული უნდა დაგეკოდოს, თუკი ესენი შენზე იტყვიან, ამ ბითურმა სახელი სხვა გზით რომ ვერაფრით გაითქვა, ახლა ამ მიზნით ფულები ჩამოარიგა და, ამით, არსებითად, ჩვენ ჩაგვიყო ჯიბეში ხელი, რაკი ნამუსზე შეგვაგდოო...

კი, მაგრამ, გინახავთ კი სადმე. ანდა გაგიგონიათ, ჩვენს დროში და ჩვენს ქვეყანაში სახელის მოხვეჭისათვის ვინმეს ათასები მიეფანტოს? თუ ის უფრო გსმენიათ და, ვინ მოთვლის, რამდენჯერაც გინახავთ, როცა სახელის გატეხას სულაც არ მოერიდებიან, ოღონდაც ამის საფასურად „ლენინის სურათები“ მოეხვეჭ-მოეხვეტათ?!

ერთმა ისეთმა ახლო ნაცნობმა, რომელსაც თავი მოაქვს ჩემთან შედარებით იმ უპირატესობით, რომ იგი არ არის ბოთე და ლენჩი, და მე კი ბოთეც ვარ და ლენჩიც, როცა შეიტყო ჩემი დამთხვეულობის კიდევ ახალი დამადასტურებელი — ჩიქოვან-ფახურიძე-ფანქველაშვილ-ჯაბიძისა და სხვების დასაჩუქრების ამბები, ამჯერად უკვე თანაგრძნობით მისაყვედურა კიდევ და მიჩიჩა-კიდევ:

— შენსას მაინც არ იშლი?! იყავი, კაცო, ისეთი, როგორიც ყველა ჩვენა ვართ!

მე არ ვიცი, როგორი არიან ყველანი სხვანი, ოღონდ ეს კი ზედმიწევნით ვიცი, როგორიც არის ჩემი ჭკუის ეს დამრიგებელი, და თუ საყოველღეო ცხოვრების მოდელს მისგან ვადავიღებ, მაშინ მეც მასსავით თუნდაც მშრომელთა ინტერესების დაცვა შევალბოდეს, მშრომელთა წარმომადგენელს, ჩემს პერსონალურ შოფერს, უნდა ვეპყრობოდე ისე, როგორც ძველი დროის მოჯამავირეს (ეს კია, ამის საკომპენსაციოდ დროდადრო „გარე-გარე სიარულის“ ნებას ვაძლევდე), პიონერთა ბანაკებში ბავშვებს „მანი კრუპას“ ვპარავდე, საგზურების დიდ ნაწილს „ვაიმასქნებდე“, ცოლის გარდაცვალებისას ჩემზე უშუალოდ და არაუშუალოდ შემომყურეთა შორის ჩემს ხელქვეითებს იმოდენა ბეგარისებურ შემოწირულებათ ავაკრეფინებდე, რომლებიც ერთ ცოლს კი არა, სვანილენდის მეფის, სობხუზ მეორის ას ცოლსაც კი დიდებულად დამარხავდა და, საერთოდ, შუა საუკუნეების არაბ თუ თურქ დამპყრობელივით ხარკს ვადებდე ამათ, ამათ და ამათ... ამისათვის და ამისათვის... და მრავალი, მრავალი სხვაც, რაც „გვამშვენებს და რაც გვაძალღებს!“...

ამას წინათ ტელევიზიით ერთი კარგი მწერალი გამოვიდა: მე იგი კიდევ უფრო უკეთეს მწერლად მომეჩვენა იმის გამო, რომ გაბედა და თქვა... თუმცა, რა იცი, მადლობა, შეიძლება, უფრო იმათ ეთქმით, ვინც ეს „გაბედული აზრი“ არ ამოჭრა და საშუალება მოგვცა ჩვენ, „ძვირფას ტელემაყურებლებს“, მოგვესმინა იგი...

ეს აზრი კი სულ უბრალოა, და არც ახალია, მისი ჭეშმარიტების დასამტკიცებლად პირის ერთხელ ვაღებაც საკმარისია, მაგრამ რაკი მოხდა სასწაული და საჯაროდ გადმოიცა... შეუძ-

ლებელია ცხრაშვილიანი ოჯახი დალხინებულად ცხოვრობდესო...

ღიახ... არა, ეს კი არ უბრძანებია, მრავალშვილიანებს, ამჟამინდელ საქართველოში ასე გაიშვიათებულ ერის ბურჯთ, მატერიალურად ხელი მოვეუშართოთ, დავეხმაროთო... ეს ან არ ათქმევინეს, ანდა ამის თქმას თვითონაც მოერიდა, მაშინ ხომ რაიმე თავადაც უნდა მოემოქმედა, მით უმეტეს, რომ საამისოდ მას ფართო ფულადი გასაქანი მოეპოვება...

(გ ვ ი ა ნ დ ე ლ ი მინაწერი: საიუბილეო თარიღის აღსანიშნავად („იუბილე მერე, მერე!...“), 1990 წელს ამ უშელავათოდ ნიჭიერი მწერლის ერთი პატარა მოთხრობა გაზეთში დაიბეჭდა, რომლის ჰონორარი (სულ დიდი, ალბათ 40—50 მანეთი) იმავე გაზეთში გამოცხადებით, ვაჟკაცურად დემოგრაფიულ ფონდს გადაურიცხა...

საერთოდ, ბოლო დროს, ფონდების მომრავლებასთან ერთად, მომრავლდნენ გაზეთებში, მხოლოდ გაზეთებში დაბეჭდილი წერილების ისეთი პატრონი, გულუხვი ავტორები, რომლებიც თავიანთ ჰონორარებს, რასაკვირველია, პრესის გზით, — შემეცანით რა დიდი ქველმოქმედიც ვარ, — სწირავენ ამა თუ იმ საზოგადოებას: ზოგი 3 მანეთს, ზოგი 5 მანეთს, ზოგი თუმანსაც კი...

ჩემდა სამარცხვინოდ, ამ მხრივ თავს ვერ მოვიწონებ; ვერა და ვერ ავიღე ამათგან მაგალითი: გაზეთში დაბეჭდილი წერილების გასამრჯელო, ნაცვლად იმისა, მთელი ქვეყნის წასაკითხ-გასაგონად რომელიმე ფონდში გადამერიცხა, კაპიკ-კაპიკ შინ წავაძანძალე...).

...არათუ ორიათასმანეთიანი ყურადღებით, — ორმანეთიანი შენი წიგნითაც შევიძლია, თურმე, გაახარო შენი ერის ჯერ კიდევ აქა-იქ ამართული დედაბოძნი...

წყალტუბოს რაიონის სოფელ ქვემო მესხეთში მცხოვრებ ლამარა და რომან მარგველაშვილებს რვა, ათ და თორმეტთაზიან კაპიტალურ სახლებში მიკარგული ორშვილიანი თანასოფლელები, ზოგი პირდაპირ, ზოგიც პირსუკან დასცინოდნენ, კილაედნენ, კბენდნენ...

შერედა, რისთვის, არ იკითხავთ? თუკი, საერთოდ, მესამე შვილის მომლოდინეზეც კი მესხეთელები ენაკეიმატობდნენ, ნუ იტყვი, კიდევ ფეხმძიმედ არისო: „ჰოდა, თვითონვე განსა-ჯეთ, რაღას იტყოდნენ მაშინ, როცა ჯერ კიდევ ასალგაზრდა ლამარამ მეშვიდე შვილი შობა?!“

მე, რა თქმა უნდა, დიდად აღმაშფოთა დიდად „კულტურუ-ლი“ მესხეთელების ამ დიდმა „სააბორტო კულტურამ“ და „მგზნებარე პატრიოტიზმმა“, და რაკი იმ დროს სხვა არაფერი მომენახებოდა, ცოლ-ქმარ მარგველაშვილებს ჩემი პიესების კრებული გავუგზავნე, — „სასიქადულო მამულიშვილთ, მი-საბამ ქართველთ სიყვარულით და პატივისცემით“...

ღიას, მხოლოდ წიგნი, წიგნი! და მარტო ამ წიგნმაც კი...

„კიდევ მრავალჯერ გაგეხარებინოთ მრავალშვილიანთა ოჯახები, როგორც ჩვენ გაგვახარეთ და დაგვაფასეთ. აქამდე ჩემთვის რომ ვინმეს რაიმეთი ყურადღება მოექცია, ალბათ დღეს 9 შვილის დედა ვიქნებოდი“.

ზუგდიდის რაიონის სოფელ აბასთუმანში მცხოვრები, 14 შვილის მშობლები თინა და არჩილ გულუები კი...

„დიდ მადლობას გიცხადებთ მთელი ჩვენი ოჯახით, ასე რომ შეგვაფასეთ და გამოგვიგზავნეთ სამახსოვროდ თქვენს მიერ დაწერილი წიგნი, რომელმაც დიდი სიხარული მოიტანა ჩვენს ოჯახში.“

თქვენი ჩვენი დაფასება არასოდეს არ იქნება დავიწყებული, თქვენი წიგნი კი მუდამ გვექნება შემონახული“.

„მაგათზე სახელმწიფო იზრუნებსო...“

სახელმწიფო მრავალშვილიანებზე შეიძლება, ასე თუ ისე, ზრუნავს კიდევ... მაგრამ მაინც... ხედავთ? — თვალთ დასანახავი, ხელით შესახები, კონკრეტული კაცის სულ უბრალო ყურადღებაც კი რარიგ ახარებთ მათ?!

ზოგჯერ თურმე ამგვარი ნაბიჯის გადადგმას მეტიც ვაკეთებაც კი შეუძლია... მარგველაშვილების თანასოფლელებმა, ვისაც „ძღვენი“ გავატანე, მიამბო: რომანმა, ქმარმა, მეზობლები შეჰყარა და თქვენი წარწერიანი წიგნი, გახარებულმა, ყველას სა-

თითაოდ შეახარბა, მოდით ერთი, დახედეთ, მე და ლამარა თქვენი მასხარად ასაგდები თუ ვართო...

...და ეს ვილაღ კიტა ბუაჩიძის წიგნის გამო...

ზოგჯერ მოსაჩვენებელი თავის დამცირებით არსებითად თავს უფრო იქებენ. არ იფიქროთ, ამ „ვილაღობით“ მეც ასე ვიქცეოდე, ადრეც ვწერდი, დრამატურგს, შექსპირის გარდა, აბა, ვინ იცნობს-მეთქი...

ჰოდა, ახლა თავად წარმოიდგინეთ, ვთქვათ და, მათ მიეღოთ რადიო-ტელევიზიის, პრესის და მრავალი სხვა საინფორმაციო-სარეკლამო საშუალებათა მიერ განდიდებული, ზოგიერთისა კი — მართლაც ნამდვილი შემოქმედებით ცნობილზე ცნობილთა ავტორისეული თხზულებანი — მათს ოჯახებში რა ამბავი დატრიალდებოდა! -

აი, თუნდაც ნოდარ დუმბაძის, ჭაბუა ამირეჯიბის, გრიგოლ აბაშიძის, ირაკლი აბაშიძის ანდა, კერძოდ, წყალტუბოელ მარგველაშვილს წყალტუბოელი ოტია იოსელიანისგან, ან კიდევ მეორე წყალტუბოელი შოთა ნიშნიანიძის დიდტანიანი ერთტომეული, რომელშიც, სხვათა შორის, გაუმართავ ლექსს ერთსაც ვერ წააწყდებით, — ხომ შესძახებდა მაშინ, პოეტთან ერთად, შვიდი შვილის მამა რომანი, უფრო კი, გაულამაზებლად, ქართულად, რომანოზი:

„აი, ასეთი მწამს კომუნისტი!...“

ჰოდა, თქვენ ჰეი, დიდნო მამულიშვილნო, დიდნო ერისკაცნო, დიდნო ქართველნო, დიდო კომუნისტებო, გესმით თუ არა ჩემი?..

ო-ო, ეს ვინ მომეპარა და იღუმალი ხმით ყურში ვინ ჩამძახის? — მათ თქვენი სიტყვა ისე ესმით, როგორაც ბუზის ბზუილი, როცა რაიკომის მესამე მდივანსაც მქუხარე ტაშს უკრავენო...

...წუხელ, გვიან, როცა ეს სტრიქონები ჩამოვკენჭე და შავფიქრებგასივებული თავი ბალიშზე მივდე და ის-ის იყო თვალეზიცი მივლულე, მაჯლაჯუნა ყვავ-ყორნების სახით საშინელი სიზმარი დამაცხრა თავს:

მცირეშვილიან და მცირეშვილიშვილიან ნოდარ ღუმბაძეს, ერთშვილიან და ჯერ უშვილიშვილო ზურაბ წერეთელს თავიანთი ლენინური პრემიებისგან, ერთშვილიან და ჯერ უშვილიშვილო შოთა ნიშნიანიძეს თავისი სახელმწიფო (ყოფილი სტალინის) პრემიისაგან, მცირეშვილიან და მცირეშვილიშვილიან გრიგოლ აბაშიძეს და ერთშვილიან და ერთ შვილიშვილიან ოთარ თაქთაქიშვილს მრავალი, მრავალი წლის მანძილზე მიღებული თავიანთი სადეპუტატო ორას-ორასმანეთიანი საზღაურისგან და ბევრ სხვა დიდ ქართველსაც, რომლებიც წელში წყდებიან ხოლმე თავიანთი ფულოვანი მთა-გორების მწვერვალზე ასვლისას, —

ვითომ გადაეწყვიტათ ზურგს მოკიდებული ეს მძიმე ტვირთი შეემსუბუქებინათ და განბანილიყვნენ უკვე მოვლინებული ან აწ მისავლინებელი პატარა ქართველთა სასიხარულოდ და აღსაზევებლად და თავად კი — ოი, უბედურნი! — დარჩენილიყვნენ ხაჭაპურმშიერნი და ღვინომწყურვალნი, ტანთუცმელნი და ფეხთუცმელნი, უბრილიანტონნი და უმანქანონნი...

ამ კომპარით შეძრწუნებული ის-ის იყო საფრთხობელა ყვავ-ყორნების კლანჭებს თითქოს თავს ვაღწევდი, როცა ანგელოზის სახით გამომეცხადა კიდევ ერთი ცნობილი ლოყებლაუდაჟა — ტრიბუნაზე ერისკაცი, შინაურობაში მუცლისკაცი — და მომაძახა, მეც მინდა განვიბანო ჭუჭყისაგან, მაგრამ, რა ვქნა, ცოლი და ჩვენი ერთადერთი შვილი არ მომიწონებენო, და სწრაფად თავი შეეყო თეთრ „ვოლგაში“...

მე მას ხტომა-ხტომით დავედევნე და მივაძახე, მეც არავინ მყავდა მომწონებელი, მაგრამ არავისაც არ მოვეერიდე, 28 წლის უჯიათობის „ლურჯაზე“ შემქდარ ვაჟს, რომელიც ოჯახს არ ეკიდება, უკვე ამთავითვე მოვუსპე ყოველივე სამემკვიდრეო და ახლა გარეთაც გავუძახებდი, საბინაო კანონი ამის ნებას რომ იძლეო...

სიტყვის დამთავრება აქ ჩამაწყვეტინა უჯმაჯური ყვავ-ყორნების საზარელმა ჩხავილმა, საქართველოს პანაშვიდი მოთავეებულია და უკვე დადგა ქამი, მიცვალბულის გამოსატანად თადარიგი დაიჭიროთო...

ამით დარეტიანებულ-ზარდაცემულს, ჰირის ოფლში გაწუ-

რულს, მოზეიმე ყვავ-ყორნებთან ჰიდილში პერანგშემოხეულს, გამომღვიძა კი, მაგრამ ვაი ასეთ გამომღვიძებას!..

ფოთში, უკვე ერთშვილიან ოჯახში სამი ტყუპის ცალი და-იბადა, სამივე ბიჭი, და მათ შოთას გმირების სახელები ჩამო-ურიგეს... ეს დიდად სასიხარულო და, თანაც, ქართველებში სა-იშვიათო ამბავი პრესამ კი მოგვახარა, მაგრამ თავად ჩვენ გა-ვახარეთ კი ისინი რამეთი? სულ მცირედი კი მაინც გავუგზავ-ნეთ ჩვენ — დიდ ერისკაცებად, დიდ მამულიშვილებად წო-დებულებმა, — ტარიელ-ფრიდონ-ავთანდილის დედას. ან მათ მამას სასიყვარულოდ ყური მაინც ავეწიეთ?!

არა... ვითომც აქ არაფერი, ვითომც აქ არაფერი!

(გვიანდელი მინაწერი (1990 წ.): სულ ახალგაზრდა ცოლ-ქმარს — მელიქიძეს და მერაბიშვილს — სამი ტყუპი შე-ეძინათ. რაც ჩვენმა პრესამ ტექსტიტაც გვამცნო და ფოტო-სუ-რათითაც. უბინაობის გამო ღროებით ისინი საბავშვო საავად-მყოფომ შეიფარა... მე ისინი განგებ ცოტა მოგვიანებით მოვი-ნახულე და ვკითხე, ვინმე თუ იყო თქვენთან-მეთქი... კიო, მო-ვიდნენ წითელი ჯვრიდან, დემოგრაფიული საზოგადოებიდან, აღმასკომიდან... ახლა ასე უთვალავად მომრავლებული „მამუ-ლიშვილებიდან“ — კერძო პირს ერთსაც არავის შემოუხედავს. ასე იოლად მისაგნებ, ყოფილ ათარბეგოვის ქუჩაზე მდებარე მათს თავშესაფარში!)

იმედი დიდ ცეცხლად თუ გესახებოდა, რეალობაში კი მხო-ლოდ ნაპერწკალია შემოგრჩა, ამით გაბრაზებულმა იმ ნაპერ-წკალს ნაცარი კი არ უნდა მიაყარო, პირიქით — სული უნდა უბერო და უბერო, ვინძლო მოლონიერდეს, ნაკვერცხლად იქ-ცეს და კვლავ ცეცხლად აგიზგიზდეს!..

მე უკვე გაამბეთ საშინელ სიზმრებზე ყელში დასახრჩობად რომ მებჭინებოდნენ, წუხელ კი ერთსერიიანი ისეთი საამო სიზ-მარი ვნახე, არ მინდოდა გამღვიძებოდა, რა იცი, იქნებ იგი მრავალსერიიანად გადაიქცეს-მეთქი:

ვითომ პროფესორ შალვა ამონაშვილს; რომელსაც სხვისი ბავშვები თავის ორად ორ შვილზე არანაკლებ უყვარს, რის და-

მადასტერებლად თენდაც ისიც იკმარებს, რომ სულ ახლახან მოსკოვში, ჯერ არნახული და არგაგონილი ოთხასი ათასი ტირაჟით გამოცემულ მის წიგნს „გამარჯობათ, ბავშვებო!“ — ჰქვია და, თურმე, ასეთი ტირაჟიც კი, როგორც წინასიტყვაობაში ერთი დარბაისელი აკადემიკოსი წერს, ჩვენი დიდი ქვეყნისათვის წვეთი იქნებაო ზღვაში, და მართლაც იგი, „გამარჯობათ, ბავშვების“ მშობლებმა რუსეთში, რაღაც რამდენიმე საათში ისეთი წიწვა-გლეჯით დაიტაცეს, ვინ ვის მიუშტვრია გვერდები, ეს ახლა ისევე ძნელი გასარკვევია, როგორადაც შარშანდელ თბილისობაზე ვინ მიუღწეა ბორტები წითელწყაროდან გასაყიდად ჩამოტანილ ყველით სავსე სატვირთო მანქანას...

მაგრამ ეს ჩემი სიზმარი მარტო ამით როდი იყო საამუხრად სახილველი: თითქოს ბატონმა შალვამ თავისი ამ წიგნის ერთობ დიდი პონორარის ლომისწილი მრავალდაძმიან ლომგულა ქართველ ბავშვებს, გასაზრდელ-დასავეყვაცებლად, „დედაენის“ ავტორივით, ისე უჭოკმანოდ მიუძღვნა, იფიქრებდით, ეჭვი არც ეპარებაო, რომელიმე მათგანი მის ასაკში ასეთსავე საინტერესო (აქა-იქ, შეიძლება, სადავო) წიგნს დაწერს, ოღონდ სხვა სათაურით:

გამარჯობათ, კეთილო ძია!

უკვე რა ხანია ამდენი ლაპარაკია ქართველი ხალხის გამრავლებაზე (გამრავლებას ვილა ჩივის, — არსებულები დონე მაინც რომ შევინარჩუნოთ). ამდენივე ხანია ჩემი „შავი წიგნი“, ქსეროქსზე გადატანილი ხელნაწერის სახით და მიკროსკოპული ტირაჟით, ნამალეუად თუ აშკარად, ამოწყდომის გზაზე შემდგარ სამმილიონიან ხალხში აქ-იქ დადის მაინც...

ეს კია, მას უკვე კარგად იცნობენ გაზეთებისა და ჟურნალების, თეატრის, რადიოს, ტელევიზიის მუშაკები; მაგრამ... თითქოს მისი დაწერით რაღაც დიდი პოლიტიკური ცოდვა ჩამედინოს, არც ერთ მათგანს ჩემთვის, თუნდაც ყასიდად, ფორმალურად ერთხელაც არ მოუმართავს, ეგებ ამ თემაზე გაზეთისათვის რამე დაგვიწეროთ, ეგებ პიესა შექმნათ თეატრისათვის, ანდა იქნებ გა-

ესაუბროთ ჩვენს მსმენელ-მაყურებლებს ამ საგოდებელ სა-
კითხზე, რომელსაც თქვენ, თითქოს, სხვებზე ნაკლებად არ იც-
ნობთ და სხვებზე ნაკლებად არ გიკლავთ გულსო...

არასოდეს!..

არ იფიქროთ, ამ ფუტკრებისგან ჩემი ბუზადაც კი ეს ჩაუგ-
დებლობა მოსვენებას არ მაძლევდეს, სულს მიფორიაქებდეს,
ასიათასობით ნერვისგან ერთს მაინც მიწეწდეს, — ოღონდ სა-
ქართველოს ეშველოს ჩამე და...

სწორედ ეს ბოლო ფრაზა, ოღონდ სრულად, ვუთხარი კიდევ
ერთ მართლაც ცნობილ მწერალს, როცა მან მთხოვა, მისთვის
ნება დამერთო, ზოგი რამ ესარგებლა ჩემი ამ ნაშრომიდან. და
თან დასძინა, წყაროსაც მივეუთითებო...

თუკი ჩემი ეს ნაწერი სულ ცოტათი მაინც გამოდგება სა-
ქართველოს გამოსაღვიძებლად, დაე იგი სარგებლობის მომტან
ფიანდაზად გაშლოდეს ყველა ავტორს, წყაროს მიუთითებლა-
დაც-მეთქი, მიუუგე მე მას... (სხვათა შორის, ამ ავტორმა წყა-
რო კი მიუთითა, მაგრამ იგი ამოუგდო ვ. ქელიძის „ლიტერა-
ტურულმა საქართველომ“, „სამიზნატიანო“).

...ოღონდ ბატონო ავტორო, დიდო ბატონო ავტორო, თავს
ისე ნუ მოგვაჩვენებ, თითქოს შენ ის არათუ წავიკითხავს, —
მის მოარულ არსებობაზეც კი ვითომ არც არაფერი ვსმენია, და
თუ ამით ერთგვარ ზიანსაც მიაყენებ წმიდა საერო საქმეს, სა-
ხეზე სიწითლე არც მოგერევა...

ეურნალ „მნათობში“ (№ 2, 1984 წ.) ერთი ქართველი ლი-
ტერატორის... რაკი ამ შემთხვევაში ამას არსებითი მნიშვნელობა
აქვს, მის კუთხურ „ეროვნებასაც“ დავაზუსტებ: სვანი ლიტე-
რატორის ერთობ დაკვირვებულად დაწერილი სტატია გამო-
ქვეყნდა: „სადამდე ივლის ქარავანი?“ იგი გვაცნობს, გვისახე-
ლებს კიდევ მესტიის რაიონში მცხოვრებ მრავალშვილიან ოჯა-
ხებს, რომელთა შორის ერთი რვაშვილიანიცაა დასახელებული,
მაგრამ მათ შორის ვერ შეხვდებით სასიქადულო და სამაგალი-
თო ქეთევან ნიგუზიანს, რომელმაც მეთორმეტე შვილი მაში-
ნაც კი შობა, როცა... შვილიშვილი უკვე სამი წლისა ჰყავდა!

ჰოდა, რას გვიბრძანებთ; დავიჯეროთ, რომ მთელი სვანე-
თისათვის ცნობილი ეს ამბავი ამ სვანი ეურნალისტის, ყოვ-
ლისმცოდნე ე უ რ ნ ა ლ ი ს ტ ი ს უნაპირო თვალსაწიერს გამო-

ეპარა და მის მახვილ ყურამდე ვერ მიაღწია?! ან ეგებ მიაღწია კიდეც, მაგრამ ქალბატონ ქეთევან ნიგურჩიანის „და მრავალ სხვაში“ მოხვედრის მიზეზი, მისი დანაშაული ის არის, რომ იგი ახლოს იცნობს კ. ბუაჩიძეს, რომელთანაც სტუმრადაც გახლდათ თბილისში ქმართან და უფროს ქალიშვილთან ერთად, მერე კი, ეს ყოფილი მასპინძელი თვითონ ეწვია მათ სვანეთში...

ამ ნარკვევ-წერილში პირადად ჩემთვის საინტერესო უფრო ის არის, რომ მასში, პირველად ჩვენს, ასე ვთქვათ, ლეგალურ პრესაში მიუკიბ-მოუკიბავად ნათქვამია:

„მართლაც საოცარია პირდაპირ, ნუთუ ერთხელ მაინც არ უნდა აღეძვრას მიწაში ფულების მფლობელსა და ოქროს კრუხისა და წიწილების მქონებელ ჩვენებურ კაცს ძველქართული მოვალეობის გრძნობა ქვრივ-ობოლთა, გაჭირვებულთა, მრავალშვილიანთა დახმარებისა“?..

ო, რა თქმა უნდა, რასაკვირველია, დასტურ, რომ ოქრო სიტყვებია, ოქროზე უფრო ოქრო სიტყვებია!

ეს კი, მაგრამ... ნუთუ ეს მირონ... მირონცხებული სვანი პუბლიცისტი იმდენად „გადასვანდა“, რომ მისი მშობლიური კუთხიდან თუ ვერ ჩამოაღწია თბილისამდე ამ ხმამ, სვანეთში ასვლისას მაინც, ნუთუ ყური ვერ მოჰკრა, რომ 6—7 წლით ადრე, ვიდრე შენი თხზულება გამოქვეყნდებოდა, გამოჩნდა ქვეყნად სწორედ ისეთი თანამოკალმე შენი, რომელიც არ დაელოდა საამისო სახელმწიფო დადგენილებებს და მთლიანად დაეყრდნო მხოლოდ თავის მოქალაქეობრივ სინდისსა და პიროვნულ ენთუზიაზმს, და თუმცა არც მიწაში ჰქონდა ჩაფლული ფულები და არც ოქროს კრუხი უდებდა ოქროს კვერცხებს (ამის გაგება სულ იოლად შეიძლება საავტორო უფლებათა სააგენტოში), და მიუხედავად ამისა...

იქნებ ახლა მაინც გადავხედოთ მესტიის რაიონული გაზეთის ერთ-ერთ ადრინდელ ნომერს, სადაც შეუძლია, რასაკვირველია, თვალხილულს ამოიკითხოს ასეთი სათაურიანი „გმადლობთ ძმური დახმარებისათვის“...

ო-ო, ქეთევან ნიგურჩიანის უღლის გამწვევი, ამ მადლობის მთქმელი იღია ნიგურჩიანი, ალბათ, ამიტომაც არ მიიჩნია ჩვენმა შორსმჭვრეტელმა და მიუკერძოებელმა მკვლევარმა ხსენ-

ნების ღირსად, აქაოდა, არავინ იფიქროსო, თითქოს ვილაცასი რალაც „შავი წიგნი“ იყო ჩემი „ქარავენის“ ბიძგის მიმცემიო— მასში გამოთქმული ყველა აზრიც ჩემია და მათი პირველი ამ- ლალადებელიც მე გახლავართ და არავის არაფერს დავსესხე- ბივარო...

ქეშმარიტად, ქეშმარიტად!

...ოლონდ ამ საგოდებელ-საგონებელს ერთიანი ძალით და საერთო შემართებით როგორმე თავი დავადწიოთ, ოლონდ მო- მავალს ნურც შევიმოკლებთ და ნურც მოვისპობთ, ოლონდ ქარ- თველების, ცოცხალი ქართველების ხსენება ნუ ამოიძირკვება და მერწმუნეთ...

ო, ძნელი კია, როცა დღეს ცინიზმს, ორპირობას, სიცრუ- ეს, თვალთმაქცობას, სიყალბეს, ავკაცობას ასეთი თვალუწდე- ნი სამოქმედო ასპარეზი აქვთ, კაცი ვინმეს გულწრფელობას ენდო, და მაინც...

მზად ვარ დღესვე ფერფლად ვიქცე ჩემ „შავ წიგნებიანად“, ოლონდ საქართველო ნუ დაიფერფლება...

Всякий вербующий человек —
негодяй.

Ж.-Ж. Руссо

Освобождение себя от труда есть
преступление.

Л. Толстой

ერთმა თბილისელმა გურულმა ქალიშვილმა, ახლახან უმაღლესი სასწავლებელი რომ დაამთავრა და სამ დაძმას გვერდს უმშვენებს, რაც იმისი დამადასტურებელია, რომ შრომისმოყვარეობით და მამულიშვილობით საქები ოჯახიდან გახლავთ, ბევრად უფრო გონივრული ბარათი მომწერა, ვიდრე ჩვენი ხალხის მესიობის პრეტენდენტმა, ამ წიგნის დასაწყისში სტრიქონ-სტრიქონ რომ გაგაცანით.

ცხადია, თქვენ უკვე გაიფიქრეთ, მე მას ხოტბას ვასხამ, ალბათ, უფრო იმიტომ, რომ მე-18 საუკუნის ერთი ბრძენი ფრანგის — ლაროშფუკოსი არ იყოს... „როცა სულელი გვაქვებს, ჩვენ ის უკვე არცთუ ისე სულელად გვეჩვენება“.

არა, ეს რომ ასე იყოს, მაშინ მე მას ჩემი იმ გამჭიქებლის გვერდით არ მოვიხსენიებდი, — ეს ქალიშვილი თითქმის მიწასთან მასწორებს... თითქმის-მეთქი, რადგან ჩემგან ცოტა რაღაცას მაინც ტოვებს მიწის ზემოთ:

„თქვენ გინდათ, კიდევ ერთი საქრთამო ადგილი დააარსონ“...

„თქვენ გავიწყდებათ, რომ ცხოვრების წესად სიყალბე გავიხანდეთ, ყველგან და ყველათში სიყალბე! გინახავთ კი, როგორ კრეფენ ამ ბოლო დროს ჩაის? ეგებ არ დამიჯეროთ, მაგრამ მაინც გეტყვით — ხის ცულებით“.

მივაქცევ მკითხველის ყურადღებას, რომ „ცულების“ ამბავი გაგონილი ბევრად ადრეც მქონდა, რაიც მერე, საკმაოდ მოგვიანებით, ჩვენ ყველამ ეგრეთ წოდებული მაღალი ტრიბუნის-

დანაც მოვისმინეთ. ეს კია, იმ ტრიბუნიდან და არც რომელიმე სხვა ტრიბუნიდან აი, ამის მსგავსი ჟერ არაფერი გვსმენია:

„...ანდა, აბა რა ქნან მეჩაიეებმა, როგორ შეასრულონ ეს გრანდიოზული გეგმები? და განა მარტო მეჩაიეები არიან ან დღეში?“

აქ თითქოს პატარა კენჭი კი არა, მოზრდილი კოლბოხია ნასროლი ვენახსა და ზვრებში, და ბევრგან სხვაგანაც...

ჰო, მაგრამ... ეს მეც მომეხსენება, გენაცვალე ჩვენში ხარისხი და რაოდენობა ძალიან ხშირად ერთად რომ არ მიდიან და შეხმატკბილებულად არ მიიმღერიან,—ამაში რომ ურკვეოდე, ამისათვის არ არის აუცილებელი კაცმა უნივერსიტეტი დაამთავრო, თანაც სულ უწიგნური არც მე ვახლავართ,—დამთავრებული მაქვს სტალინის სიკვდილამდე სტალინის სახელობის (და არა ივანე ჯავახიშვილის!) თბილისის უნივერსიტეტის კულინარიის ფაკულტეტი პირველი ხელის მზარეულის დიპლომით, და თუმცა ხუთწლიანი სწავლის პერიოდში თეორიულად არაერთხელ შევამზადეთ, პრაქტიკულ ცხოვრებაში კი, რა თავპირიც არ ვიმტვრიეთ, ვერც მე და ვერც ჩემმა თანაკურსელებმა ერთხელაც, ერთხელაც ვერ ვავაკეთეთ ინდაურის რიგიანი საცივი... ნიგოზიც ვუყავით, მიხაკ-დარიჩინიც, ზაფრანაც და ზოგი რამ სხვა საკმაზიც, გვერდით ღომიც მიეუდგით, მაგრამ ინდაურის საცივს მაინც ვერ დავამსგავსეთ, რამეთუ ამ კერძის მთავარი რამ, ასე ვთქვათ, ბაზისი გვაკლდა, — ინდაური!

რამდენიმე დედაკაცმა „შავი წიგნის“ გაცნობის შემდეგ, მისაყვედურა, ასე თავგამეტებით რატომ გვესხმით თავს, მშვენიერ სქესსო...

ბუნებას ამის გასამართლებლად რალაც მოსაზრება, ალბათ, უძველად ექნებოდა, როცა აწესებდა: ქალების თუნდაც რომელიმე ერთი ფენა აუგად რომ მოიხსენიო, მთელი მღვდრობა, თავდაცვის მიზნით ბზიკივით გეცემა, რაიც, სხვათა შორის, მამაკაცებში მიახლოებითაც არ შეინიშნება.

ჩემდა სასიხარულოდ, ეს ჩემი უცნობი ქალი-კორესპონდენტი ამ მხრივაც იშვიათი გამონაკლისი აღმოჩნდა... აბა, მოვეუსმინოთ:

„გეთანხმებით, დღეს საქართველოს უჭირს უფრო მეტად, ვიდრე ოდესმე, და ეს გაქირვება — ო, როგორ მიმძიმს ამის დაწერა! — ჩვენი ერის სულიერი დაკნინებაა, ხოლო დაკნინების ყველაზე უფრო საზარელი გამოხატულება აბორტები და აბორტმახერების ასე ბელუჩებივით მომრავლებაა. ამ სიტყვების უკან დგას ათასობით გაზარმაცებული ქართველი ქალი, რომლებიც თავიანთ უნიათობას და სიზარმაცეს იმით ამართლებენ, რომ... „რა ვქნა, ბატონო, ოჯახს ეუფელი, ვმუშაობ, მესამე როგორღა გავაჩინოო“...

ახლა ესეც გავარკვიოთ, მუშაობენ კი? მსგავსი ქალებით გამოტენილია კვლევითი ინსტიტუტები და საპროექტოები, ლაბორატორიები და გამომცემლობები... ჰოდა, ვინ რას აკეთებს? უფრო ერთობიან, ვიდრე მუშაობენ, სამსახური მათთვის ალიბია, სიზარმაცის ალიბი!“

არა, საქმე სულ არც ასეა, როგორც ამას ეს ფრიად დაკვირვებული ახალგაზრდა ქალბატონი გეიხატავს, მაგრამ ამ სურათში სიმართლის, სულ ცოტა, 80 პროცენტი მუქი ფერი რომ ბრჭყვიალებს, ამას სოციოლოგიური არც გამოკითხვა სჭირდება, არც გამოკვლევა.

დასტურ, საერთოდ გვეჭირდება კი ჩვენ რაიმეში სოციოლოგია, როგორც საკვლევაძიებო მეცნიერება? ბრძმებისთვისაც კი ნათელს, ყველასათვის თვალხილულს და სულ იოლად გონებამისაწვდომს განა კიდევ სჭირდება რაიმე კირკიმალი და კირკიტი ჩვენს სარკესავით კრიალა სინამდვილეში?!

ერთხელ ცირკში, არენაზე, კლოუნმა პატარა, მინიატიურული—მუხლებამდე რომ სწვდებოდა — ჭიშკრის მაკეტი გამოიტანა, ასეთი წარწერიაანი: „შესასვლელი სამოთხეში“.

ჰოდა, რა ხერხს არ მიმართა, რამდენი არ იწრიალა, რათა სამოთხეში შესულიყო, მაგრამ ვერა და ვერ შეაღწია, — უბრალოდ ჭიშკარში ვერ ეტეოდა... მერე უეცრად, თითქოს მის თავზე ეს გაიხსნაო და სამოთხეში უკვე მყოფმა, ალბათ თვით ალბერტ აინშტაინმა სტყორცნაო თითქოს ეს გენიალური აზრი, ადგა და „ჭიშკარს“ გადააღაჯა და უსაზღვროდ გაიხარა, რაკი საოცნებო ედემში თავი, ბოლოს და ბოლოს, მაინც ამოყო.

შეიხედეთ ჩვენს რომელიც გნებავთ დაწესებულებაში და თვითონვე დარწმუნდებით, რამდენი ქალია... ზოგი ქსოვს, ზოგი თელემს, ზოგიც, პირში სიგარეტგაჩრდილი, ცისა და ბარისაზე ლაპარაკობს, მოკლედ, — საქმეს ერთი თავი რომ გააკეთებს, იმას ცხრას „აკეთებინებენ“.

(მინი-ცნობა ანგდოტების მოყვარულთათვის: თბილისში არსებობს ერთი მუზეუმი... ჩვენი პირველი, სახელმწიფო მუზეუმი კი არაა, არც ხელოვნებისა, და არც ენთოგრაფიული და არც ზაქარია ფალიაშვილისა... და ეს შედარებით პატარა, არცთუ ცნობილი, უმნახველებო მუზეუმი, რომლის საქმიანობა მართო „ფუნქციონირობით“ იფარგლება... 77 თანამშრომელს ითვლის!).

გ ვ ი ა ნ დ ე ლ ი მინაწერი (1990 წლის სექტემბერი): ჩემი ოპონენტი — ქალიშვილი, რომლის მღელვარე ბარათიდან ამონაწერები ეს წუთია შემოგთავაზეთ, ამ შვიდი წლის წინათ როგორღაც გავიცანი: იგი აღმოჩნდა სასიამოვნო გარეგნობის, უნივერსიტეტდამთავრებული არა მარტო დიპლომით, — მართლაც ცოდნით და მართლაც განათლებით... და რაც უფრო სასიხარულოა ჩემთვის დღესაც, სიტყვანი მისი და საქმენი მისი, მით უმეტეს, ეროვნულ სფეროში, ერთმანეთს არასოდეს არ შორდებიან: გათხოვდა და... თუმცა პირველზე ერთობ მძიმედ იმშობიარა, მეორე ბავშვის ყოლას მაინც არ მოერიდა... არც მეორემ ჩაიარა პირველზე ნაკლებ გაუწვალებლად, და მაინც... ახლა მესამეზეა ორსულად და, როგორც მითხრეს, გეგმაში მეოთხეც ჰყავსო, და ეს არც გამიკვირდება, აკი მას ქმარიც ღირსეული შეხვდა, თანამოაზრე...

მიამბეს ესეც: როცა იგი, ფეხმძიმობით შეუძლოთ მყოფი, ერთმა მასზე ადრე გათხოვილმა თანაკურსელმა, ყოველდღიურად ორი „პაჭკა“ სიგარეტმომსუნთქავმა, ყოველდღიურ ცხოვრებაში კი ერთშვილიანობის პრინციპზე საღ კლდესავით მდგარმა, მოინახულა და უსაყვედურა, რას იკლავ, სულელო, თავს, ჯერ მეორე რა იყო და... ეს მესამე მაინც რაღა ჯანდაბად გინდაო, ამაზე ბრალდებულმა მბრალმდებელს მიუგო:

— ზოგი დედად იბადება, ზოგი ბოზად... მე დედად დავიბადე, და ამისთვის ღმერთს უზომო მადლობას ვწირავ.

დედაო ღვთისავ, გვიმრავლე ქართველებს ასეთი დედები,
ისეთი „დედები“ კი... მმ...

კიდევ ერთი, ზემო მინაწერზე ცოტა უფრო გვიანდელი:
გუშინ, 10 ოქტომბერს, ჩვენს ტანმომცრო, სულით და სახით
ამ ლამაზ ქალბატონს, ღირსეულ ქალბატონს ბიჭი შეეძინა:
საბა!

ვინ იცის, საბას შეიძლება სულხანიც მოჰყვეს! ასეთი ქარ-
თველი დედისგან ყველაფერი „ავია“ მოსალოდნელი!..

დაუდევრები ვართ ქართველები,
და კიდევ ეგ მოგვიღებს ბოლოს.

ილა

არ არსებობდა და არ არსებობს ქვეყნად ძეხორციელი, რომელიც არასოდეს არ შემცდარა. გენიოსებიც კი. ბევრი მათგანი ამას თვითონვე აღიარებს და ეს მათ გენიალობას ჩვენს თვალში ჩრდილს სრულეებითაც არ ჰყენს, პირიქით — უფრო ამალღებს.

ერთი გადამდგარი პოლკოვნიკი მწერს (გადაუმდგარი, ალბათ, ჯერ კიდევ შემორჩენილი შიშიანობის გამო, არ მომწერდა):

„თუ ეს ყოველივე მართალია, რასაც თქვენ ვაზგენზე წერთ, მაშინ ის გასახლებული უნდა იქნას საბჭოთა კავშირიდან“.

ამ ორი სტრიქონის ჩემეული კომენტარით კაცმა კურდღელი შეიძლება ორიც კი დაიჭიროს:

ჯერ ერთი, — ჩემს ნაშრომში არაფერი მოგონილი არ არის, შეიძლება ზოგი რამ, თანაც ძალიან ცოტა რამ, უფრო მეტ დაზუსტებას საჭიროებს და ეს, მგონი, უნდა მეპატიოს, მე ხომ უმადლესი მათემატიკის დარგში სადოქტორო დისერტაცია არ დამიწერია, თუმცა, აბა, რომელმა ოპონენტმა არ იცის, — შესაძლო შეცდომებისგან არც ზუსტი მეცნიერების ეს წარმომადგენლები არიან დაზღვეულნი, და თუ ეს ასეა, მაშინ რაღა უნდა მოეთხოვოთ „ემოციურ სიტყვათა მსახურთ“...

და მაინც, ერთმა კანდიდატმა, რაკი მისი სტანდარტული, მაგრამ ოფიციალურად დაკანონებული პედაგოგიური აზრის წინაშე მუხლი არ მოვიყარე, ამ ჩემს „დისერტაციაში“ მიუტევებელი შეცდომა მიპოვა და შემომწყრა, მე ოთხი კი არა, სამი შვილი მყავსო, — შევცდი, ბატონო და ამისათვის მოწიწებით ბოდვის გიხდით; ეს სტატისტიკა თქვენმა ერთმა ახლო

ნათესავემა მომაწოდა, რომელსაც, მართალია, ფიზიკა-მათემატიკურზე არ უსწავლია, კაცი ფილოლოგია, მაგრამ მაინც, განა ვიფიქრებდი, რომ მას თვლა ოთხამდეც არ ეცოდინებოდა?!

(რა ზნისა და რა გონის ადამიანს არ შეხვდებით ჩვენს თვალგაუზომავ პლანეტაზე და, მით უფრო, მის მუხუდოს მარცვლის ოდენა საქართველოში! „ამან“, სამი შვილის მამამ, ოთხი შვილის მამობა რატომ მომაწერეთო, „იმან“ კი, გურიის სოფელ აკეთიდან, სპეციალურად მომაკითხა და ორი შვილი ოთხად შემომატყუა, რათა „შავი წიგნი“ ავტორისაგან სამახსოვრო წარწერით მიეღო).

მეორეც, — არავინ ვაზგენს არ გაასახლებს, და თუნდაც, ვთქვათ, გაასახლონ კიდეც, მაშინ მას სხვა, რომელიმე ნერსესი შეცვლის, და ისიც პირწმინდად თავის წინამორბედივით მოიქცევა, — კვლავ ისარგებლებს რა ჩვენი უპკურო უდაზღველობით, თავის საერო საქმეს, ცქვიტად და გეგმაზომიერად, იმავე რელსებზე შეაყენებს.

ისე კი, კაცმა რომ თქვას, ვერავითარი ვაზგენები — არ ვიცი კი, ამ გამოთქმისათვის ბოდიშის მოხდა მევალება თუ არა, — ფეხებსაც ვერ მოგვჭამენ, თუკი თავად ჩვენ, ქართველები, ყველანი გამოფეხიზლებით და გონს მოვალთ...

(აქაც და ყველგან ვაზგენი ჩემთვის კრებითი სახელია, რომელშიც ჩვენი ამოწყდომის ყველა მოსურნეს ვგულისხმობ).

...და განა უკვე დრო არ არის, რომ გონს მოვიდეთ?

უკანასკნელი გ ვ ი ა ნ დ ე ლ ი ჩანაწერი (1990 წლის დეკემბერი): ტელევიზიამ გაგვაცნო ერთი ცხინვალელი ახმახი ოსი, რომელსაც ქართულმა მილიციამ ხელყუმბარა აღმოუჩინა... როცა ჰკითხეს, რად გინდოდაო, მან უტიფრად უპასუხა: „მე ვიცავ ჩემს მიწა-წყალს!..“

ეჭვი ნუ შეგვეპარება, ასეთი ოსი „ეროვნული“ ბანდიტები წელს არ დაბადებულან, იმათ ნაფი ჭუსოითები ხანგრძლივი დროის მანძილზე ზრდიდნენ და ჯერ სულიერად აიარაღებდნენ, ახლა კი ხელყუმბარები ჩამოურიგეს საძუველელი ქართველებისგან „საკუთარი მიწა-წყლის“ დასაცავად: ჩოჩიეების მამა და მოძღვარი, დღეს უკვე საქართველოს მეცნიერებათა აკადემიის წევრ-კორესპონდენტობით დამშვენებული ნაფი ჭუსოი-

თი ჯერ კიდევ 1972 წელს წერდა სამაჩაბლოზე, სამხრეთ ოსეთი ჩემი მშობლიური მხარეა, ხ უ თ ი ა თ ა ს ი წელიწადი ცხოვრობს ჩემი ხალხი ამ მშვენიერ მიწაზეო... (იხ. „შავი წიგნი“, გვ.28).

...როცა შევიტყვე, რომ „შავ წიგნს“ სხვადასხვა ასაკისა და სხვადასხვა პროფესიის ადამიანები გაფაციცებით დაეძებენ, მთებში მოსიარულე გეოლოგებიც კი, გავიფიქრე, წესით, მათზე ადრე გინეკოლოგები (ცხადია, არა შუბლგარეცხილნი!) უნდა გაეცნონ, უწინარესად კი — ქალის ფიზიოლოგიის ინსტიტუტი, აკი პოპულაციის (გამრავლების) საკითხები სხვებზე უფრო მას უნდა აწუხებდეს, — დიდებულმა მამულიშვილმა იოსებ ჟორდანიამ განა სწორედ ამ მიზნით არ დააარსა იგი?!

ჰოდა, მეც ბევრი აღარ დავაყოვნე და თვითგამოცემის ის წიგნი ჩემეული მიძღვნა-წარწერით...

ო, რა ძლიერ შევცბუნდი, როცა მხოლოდ იქ მისვლისას გახდა ჩემთვის ცნობილი, რომ ახლა ჟორდანიას სახელობის ინსტიტუტს სათავეში უდგას არაქართველი სპეციალისტი, რომლის ქართულის ცოდნა, დღეს-დღეობით მაინც, მარტო „გენაცვალეთი“ ამოიწურება, ამიტომ მისი კაბინეტის კარი აღარც შევალე და სახტად დარჩენილმა ჩემი საბოძვარი, გამოუკითხავად, იქვე მდგომ ერთ თეთრხალათიანს დავუბრუნე, რომლის გარეგნობაც მის ქართველობაში ეჭვს არ იწვევდა... რაკი ქართველი კაცია, გავიფიქრე, სანიტარიც რომ იყოს, ამ ხელნაწერ წიგნს, უეჭველია, სათანადო გზას მოუწახავს-მეთქი.

და აი, გადის მარტის იმ შეტემუტა დღიდან თვე-ერთი, თვე-ორი, თვე სამი... ნახევარი წელიწადიც, მაგრამ იქაური მედიკოსებიდან ბაიბურიც კი არ ისმის — გაეცნენ — არ გაეცნენ; ამ ამბავს, ვფიქრობდი, თუ კაცი არა, ჩიტი მაინც გამომიტანდა-მეთქი, მაგრამ...

რის ჩიტი, რა კაცი, ან ერთს, ან მეორეს რა საბაბით უნდა დაემდურო, როცა იმ თეთრხალათიანს, როგორც მოგვიანებით დავადგინე, ჩემი „ნობათი“ თურმე, სულაც არ გამოუჩენია; შინ წაიღო და საკუქნაოში შეაგდო, თუ ინსტიტუტის რომელიმე გაუქმებულ უჯრაში ჩაკეტა-დაამწყვდია, ეს დღემდე იღუპალებით არის მოცული.

ალბათ შეამჩნევდით, ამ ჩემს ნაწერში გვარით იშვიათად თუ ვიხსენიებ ვისმე, ამ შემთხვევაში კი... რაკი არ მინდა ეჭვი აიღოთ ამ ინსტიტუტის რომელიმე, ამჯერად, სრულიად უცოდველ თანამშრომელზე, აი თუნდაც პატივისაცემ, ოთხი შვილის მამა ჯამბაკურ ბაქრაძეზე, ეს თეთრხალათიანი, როგორც გაიზკვია, გვარად ბეგიაშვილი ბრძანებულა... სანიტარიო, მასზე რა სათქმელია, — ექიმში, უფრო მეტიც: დირექტორის მოადგილე...

ჰოდა, ასეთი მოადგილეები რომ გვეყოლება ჟორდანის ინსტიტუტშიც კი, —

ჩვენ გავმრავლდებით და ჩვენ მოვერევით ვაზგენს?!?

ტიკტორაია...

მამაძალური გზებით მოსაპოვებელი შემოსავლის მრავალხერელიანი პატარა დაწესებულების პატარა უფროსი, დიახ, პატარა უფროსი, მაგრამ მაინც უფროსი, ხელქვეითების მიერ დამზადებული პროდუქციის ღირებულების 70 პროცენტს თვითონ რომ მიითვლის, მწარმოებელ-შემსრულებელს კი დანარჩენ 30 პროცენტს აძლევს და ამასაც ამადლის... რაკი მას „შავი წიგნის“ არსებობის ამბავი გაეგო, და თან ისიც, რომ მასში ნახსენებია ერთი ღირსეული მისი ახლობელი, „წიგნის“ თხოვებაზე უარი ვერ ვუთხარი...

დიახ, ვათხოვე და როცა დამიბრუნა, ვკითხე, შენს გარდა თუ ვინმემ წაიკითხა-მეთქი, — არაო, მიპასუხა, ჩემი სახლიდან გარეთ ერთი საათითაც არ გასულა, არ მინდა თქვენ, კომუნისტი ტიკტორაია ასეთ წიგნებს კითხულობს და ავრცელებსო...

ასეთი კომუნისტები, თქვენც კარგად მოგეხსენებათ, რამდენიც დაგვეთვლება, ჰოდა, —

ჩვენ გავმრავლდებით და ჩვენ მოვერევით ვაზგენს?!?

ნუ იტყვი, ბედისწერა არ არისო... მთებში დაიღუპა უებრო ალპინისტი... დარჩა პატარა ბიჭი... როცა გაიზარდა, სათაყვანებელი მამის გზას დაადგა, უნდოდა ამით მამის ხსოვნა ერთგვარი შარავანდედით შეემოსა და თავისი მამაცობით სამშობლო ესახელებინა, მაგრამ...

ო, ბედო მუხთალო, — შვილიც მამასავით ყინულოვანმა მთებმა შეიწირეს... ახალნათხოვი ცოლი ორსულად დარჩა... ბუნებრივია, თავზე დატეხილმა უბედურებამ ფენმძიმობის პერი-

ოდი ერთობ გაართულა, მაგრამ ზნეობრივად და სულიერად სპეტაკი ახალგაზრდა ქალი („ქვერივის“ ხმარებას ვერიდები, რაკი ეს დარბაისლური სიტყვა ჩვენი სალაპარაკო ენიდან ამო- აგდეს, ალბათ, აქაოდა, წყეული წარსული არ მოგვაგონოს!) სიძნელეებს არ შეუშინდა და, თუ ეს საჭირო იქნებოდა, მზად იყო თავისი სიცოცხლე მსხვერპლადაც გაეღო, ოღონდ დაე- ტოვებინა ამქვეყნად საყვარელი ქმრის სახსოვარი და მისი გვა- რის გამგრძელებელი...

და აი, წევს იგი თბილისის ერთ-ერთ სამშობიარო სახლში და ვუქაატურად იბრძვის ნაყოფის შენარჩუნებისათვის, მთავა- რი ექიმი კი...

არა, ცოდვა იქნებოდა ამის უთქმელობა, — მკურნალობით კი მკურნალობს, და მკურნალობს, ალბათ, ყოველმხრივ სათანადო ყურადღებითაც, მაგრამ როცა მშობიარის სარეკლიდან თავის კაბინეტში გადაინაცვლებს, ცინიკურად ეუბნება კოლე- გებს:

— სულელი არ არის ახლა ეს ქალი? რად უნდა აწი ამას ბავშვი?!

გინეკოლოგიის დარგში ასეთი ლოგიკით შეიარაღებული, შუბლგაშლილი მთავარი ექიმები და, მით უმეტეს, რიგითი ექიმები, თქვენც კარგად მოგეხსენებათ, რამდენიცა გვყავს ამჟამინდელ, როგორც გეარწმუნებენ ხოლმე, მხრებგაშლილ საქართველოში, ჰოდა, —

ჩვენ გავმრავლდებით და ჩვენ მოვერევით ვაზგენს?!?

ექვი არ არის, ჰიპოკრატეს ფიცის დამდებთ და არასოდეს (?) მის დამრღვევთ უფრო გაახარებდათ ერთი საკმაოდ ცნობი- ლი მოსიმღერის ახალგაზრდა რძლის საქციელი, რომელსაც ქორწინებიდან სულ მალე ავარიში ქმარი დაეღუპა და მას, ახლა სრულიად ძირფესვიამოგდებულმა მამამთილ-დედამთილ- მა რა ვედრებით არ მიმართეს და რა სანთლები არ დაუწოეს, რომ მუცელი არ მოეშალა და ნაყოფი მათთვის ეჩუქებინა („ჩვენ გავზრდით, ჩვენ გავზრდით!..“), მაგრამ არა და არა, ჩანს, უფრო მანქანაზე, ვიდრე საყვარელ ადამიანზე მითხო- ვილმა „კდემამოსილმა“ ქართველმა ქალმა არარად ჩააგდო მათი ცრემლი და ვიში და მალბორო-სიგარეტიდან ნათაზი „სვეტსკად“ დაურტყა...

საინტერესოა და დამახასიათებელიც, რომ ამ სამშობიარო-ში ერთი ექიმიც არ მოინახება ისეთი, ერთზე მეტი შვილი ჰყავდეს; ამას თეორიულ სარჩულსაც კი უდებენ: ერთმა მათგანმა, რომელმაც ჩინებულად იცის, რა ზოოლოგიური სიძულვილითაც ვარ გამსჭვალული მათს საძრახისობამდე გამრუდებული პროფესიისადმი, — ამაყად და ნიშნის მოგებითაც კი მითხრა, ახლაც კი, ხანდაზმულობაში, არავინ ამას არ ვდარღობთ და თავსაც ბედნიერად ვგრძნობთო...

ცხადია, იგრძნობენ-იგრძნობენ, აკი ამ „მანდილოსნებისთვის“ რა არის ქართველი ერის მარადიული სიცოცხლე და რა არის მათთვის საქართველო? — ერთი ნაჭერი იმპორტული საპონია — ინდური მაჰარანი, — რომლის სუნიც ჩაურეცხავი უნიტაზის სუნს თუ მოგაგონებს, შეგიძლია სააბაზანოდან ღია აივანზე გაიტანო...

ამათთვის ბედნიერების საზომი ხომ ზვინებად დაწყობილი ათასებია, რომლებითაც ოქროც შეგიძლია მოიმარაგო, „ნორკაც“ მოიგდო ჯორჯო ტანზე, ბინაც გადაცვალო: რიგიანი — „ექსტრაზე“ და საამისოდ 70.000 მანეთიც არ დაგენანოს, აკი მას შენს ერთადერთ, 40 წლის გაუთხოვარ და აწ გათხოვების ყოველგვარ იმედს მოკლებულ ქალიშვილს უტოვებ საბედნიეროდ...

...და როცა ამ „ბედნიერს“ დედა გარდაეცვლება, მაშინ ის კიდევ უფრო მეტად იგრძნობს, თუ რა „ბედნიერების“ ქერის ორმოში ჩაადგო ცხონებულმა: თუ ვერავინ მონახა ისეთი, რომელიც სამადლოდ მასთან გაათევეს ღამეს, „ვერსალის სასაზღის“ პატრონი ახლობლებში იღებს სასთუმალს, აკი შიშის ზარი იპყრობს ხოლმე მარტოკას ასე ძვირად ღირებულ, უსაზომო სამკვიდრებელში...

ალბათ თვითონაც გულში, და მისი შემხედვარე სხვებიც (რასაკვირველია, არა ბრჭგუ გონების პატრონნი!) ერთმანეთში ამბობენ, დალოცვილს უძრავი ქონების ნაცვლად მოძრავი ქონება — და-ძმები დაეტოვებინა, არა სჯობდაო?..

უხერხულად და, ცოტა არ იყოს, თავაგდებულ უზრდელობათაც კი მივიჩნე, რომ „შავი წიგნი“ არ გამეცნო საშუალო თანამდებობის მქონე ერთი პირისათვის, რომელსაც სხვა მოვალეობასთან ერთად გამრავლების პროპაგანდის წარმართვაც

ევალეზა აი, იმის მეშვეობით, ეე... იმის... აღრე, გამოგონები-
სას, უმავთულო ტელეფონი რომ შეარქვეს.

გაცნობისას მან ჩემზე ერთობ სიმპათიური შთაბეჭდილება
მოახდინა და, ვიფიქრე, წაიკითხავს და, ალბათ, ჩემთან მეორედ
შეხვედრის სურვილიც აღეძვრება, თანაც, აბა, ისე როგორ
იზამს, მისდამი დაქვემდებარებული გამრავლების საბჭოს სხვა
წევრებსაც არ წააკითხოს-მეთქი...

ო, არა! არც მათ წააკითხა და აღარც მე გამომესაუბრა,
ორიოდე დღის შემდეგ უკანვე დამიბრუნა შიკრივის, შ ი კ რ ი-
კ ი ს ხელით.

ჰოდა, ეს, საერთოდ, წესიერი და პატროსანი კაცი, რომელ-
საც ასაკგადასულობის გამო უკვე მოთავებული აქვს თავისი
პარტიული და საზოგადოებრივი ცხოვრება, და არც უდიდეს
სიმდიდრეს — კილო ხორცსა და ამდენივე ყველს ღებულობს
კვირაში ერთხელ დახურულ მაღაზია-განმანაწილებელში, —
თუკი ასეთი „გზნებით“ მოექცევა თავისი ერის სატკივარს,
რომლის ერთ-ერთი მკურნალი — ყოველ შემთხვევაში თანამ-
დებობით მაინც — ისიც უნდა იყოს, —

ჩვენ გავმრავლდებით და ჩვენ მოვერტვით ვაზგენს?!?

(ისე კი, „სახიფათო-საშიში“ წიგნი ამ ნაომარმა უტრნა-
ლისტმა ბოლომდე რომ ჩაიკითხა, ამაში დავრწმუნდი მაშინ,
როცა იგი ჩემს ერთ ახლო ნაცნობს და თავის სანდო მეგო-
ბარს ქებით გამოუტყდა, რა დაწერილია, რა დაწერილიაო...

კი, ბატონო, ეს „კაია“, „მარა...“ დაწუნებით „შავი წიგნი“
არც სხვა ამხანაგ კომუნისტს, ტიკპორაიას დაუწუნებია, პირი-
ქით, სურვილიც კი გამოთქვა რა ძვირიც უნდა ღირდეს, მაინც
სიამოვნებით შევიძენდი და შევიინახავდი შილიიშვილე-
ბისთვის).

სოფელ ხორშაში მცხოვრებ ნელი ღვამბერიას შებინდე-
ბისას უშიშროების სენაკელი წარმომადგენელი „ეწვია“ და 13
შვილიან გმირ დედას ავტორის მიერ მიძღვნილი „შავი წიგნის“
წართმევა დაუპირა, და თუმცა ამ; ერთი შეხედვით, თითქოს
ლონემიხდილმა, ტანხმელმა ქალმა საპროტესტო პირმოხეული
კივილით კუდი უშიშრად კი ამოაძუებინა შიშიანობის მთეს-
ველს, და მაინც...

ჩვენ გავმრავლებით და ჩვენ მოვერევით ვაზგენს?!?

კონსტიტუციის თაობაზე ჩემზე ნაწყენმა ერთმა „კონსტიტუციონალისტმა“, ერთხელ მასზე უკვე რომ გაიმბეთ, პროსპექტზე შემთხვევით შეხვედრისას, საყვედურს კეთილი და იმედიანი ღიმილიც მოაყოლა, — რამდენი ქალიც შემხვდა, ვისაც თქვენი წიგნი წაეკითხა, ყველამ მითხრა, ისეთმა სასოწარკვეთილებამ შემიპყრო, გავიფიქრე, ახლავე გავაჩენო...

ასეთი სიტყვების გაგონებისას, ღიახაც რომ, ყურებს ვცქვევთ და ფრთებიც მესხმება, აკი „შავი წიგნი“ სწორედ ამგვარი გრძნობების გასაღვიძებლად იყო ჩაფიქრებული და დაწერილი, მაგრამ უბედურება ის არის, რომ ეს სასოწარკვეთა, რაკი ის ქართველური სასოწარკვეთაა, არც დიდხანს გრძელდება და არც საერთო-სასარგებლო პრაქტიკულ საქმიანობაში იჩენს თავს და, კვლავინდებურად, ისევ და ისევ ერთმანეთის პასიურ შემყურედ ვრჩებით.

ერთმა, ხალხის ფართო წრეებისათვის ნაკლებად ცნობილმა, მაგრამ მისი პრფესიის სფეროში მომუშავეთა შორის მსოფლიო მასშტაბის მეცნიერად მიჩნეულმა, ჰიდროტექნიკოსმა, ჩემი ნაშრომის გაცნობის შემდეგ მითხრა: რაც საქართველოს სადიდებელი სადღეგრძელო დაგვიღვია, ყველა ჩვენგანს მის ნაცვლად საერო მშენებლობაზე თითო-თითო აგური რომ მოგვეტანა, საქართველო ახლა ზღაპრულ ქვეყანას ემსგავსებოდაო.

ამ აგურებში იგი, რასაკვირველია, შვილიანობასაც გულისხმობდა.

ჰაი-ჰაი რომ, ჩვენდა უკვე საბედისწეროდ, თუკი ვინმე მიიტანს აგურს ამ მშენებლობაზე, ეს კი მოგვეწონს, მაგრამ თავად ჩვენ მის ასაღებად არც დახრა გვეხალისება და არც ხელი გვემორჩილება...

სტალინის სახელობის, ახლა ყოფილის, ქარხნის მრავალტირაჟიანი გაზეთის, მგონი, რედაქტორი, ერთშვილიანი ტაბატაძის ქალი, არაერთხელ დაემუქრა და ახლაც ემუქრება ხოლმე ყაჩაღანა მრავალშვილიან ქეთევან დათიაშვილს. შენ მაგ ან-

ტისაბჭოთა „შავ წიგნს“ აქეთ-იქით დროშასავით ნუ დააფრიალებ, თორემ... მე რე ნახავ, სადაც ამოყოფ თავსო...

ჰოდა, ჩვენ გავმრავლდებით და ჩვენ მოვერევით ვაზგენს?!

ერთმა ჩემმა ყოფილმა თანაკურსელმა, სხვათა შორის, იმ ფეხბურთელის ახლო ნათესავმა, რომლის გვარიც ამჟამად საქართველოში ქართველი ერის ისტორიის დამწერის გვარზეც კი უფრო ცნობილია, გვიან ღამით დამირეკა, ეს-ეს არის დავამთავრე შენი წიგნი და ისეთ მოწამლულ გუნებაზე დავდექი, ახალგაზრდა რომ ვიყო, უეჭველად ათ შვილს გავაჩენდიო...

გესმით?

ახალგაზრდა რომ ვიყო... დაუბრუნებელს — წლებს — რომ ველარ დაიბრუნებს, ეს მან საუცხოოდ იცის და, ალბათ, ამიტომაც გვპირდება ცაში წეროს, და არ გვპირდება, — რაც ბევრად უფრო რეალური იქნებოდა, — ჩემს ორივე შვილს აწი გაგანია ცეცხლს შევეუნთებ და მანამდე არ გამოვუნელებ, ვიდრე მესამე ბავშვს კალთაში არ ჩამიგორებენ, და არც საქვეყნოდ ცნობილ იმ ფეხბურთელს, ჩემი დის შვილიშვილს მოვეშვები, რომლის პირადი მაგალითი ახალგაზრდებზე ძალზე შთამბეჭდავად იმოქმედებსო.

ისიც უნდა მოგახსენოთ, რომ ამ, საერთოდ, კარგ ქალს დედისათვის მართლაც საამაყო ვაჟი ჰყავს, გონიერი და წესიერი; არა მგონია, საქართველოს უნუგეშო მომავალი მასაც არ აფიქრებდეს, და მაინც, ამის მიუხედავად ჩემთან საუბრებში, ერთხელაც არ დასცდენია, რომ მესამე შვილს იყოლიებს, თუმცა საამისოდ ასაკიც უწყობს ხელს, ბინაც და ბევრი სხვა სიკეთეც.

ჰოდა, თუკი ეს ყოველმხრივ მოსაწონი ქართველი ახალგაზრდაც კი ასე ყრულ და მყარად დგას მისი შშობელი ერისათვის დამლუბველ ფიცარნაგზე, მაშინ რაღას უნდა მოველოდეთ ათიათასობით ზნედაცემული ადგილშვილებისგან, ერთ-ერთმა მათგანმა სწორედ ფეხბურთის მატჩის მსვლელობისას სანატრელი დრო რომ იხელთა და „ფინტი“ აუარა გვერდი მგლის სინდისსაც კი და „ოსტატურად დაურტყა კუთხური“, — გაქურდა თავისივე კბილა, 80-ათასიანი სტადიონის ძალდაუტა-

ნებელი, გულიდან ამოხეთქილი ტაშის ლუარეატის, გარემარბ რამაზ შენგელიას ბინა?!

(მინდა ბოდიში მოვიხადო ზემოხსენებული გვარის კრებითი ფორმისათვის, რომელთანაც საერთო არა აქვს რა ჩინებულ ახალგაზრდას, მოთარიაკავე ადღეიშვილს, სწორედ ნაძირალეებმა რომ მოუსწრაფეს მამაცი სიცოცხლე...).

პრესაში ხშირად წაიკითხავდით და ჩადიო-ტელევიზიითაც, ალბათ, არაერთხელ მოგისმენიათ, ჩვენ შესანიშნავი ახალგაზრდობა გეყავსო...

დღევანდელ ახალგაზრდობას მე, სამწუხაროდ, მარტო, ასე ვთქვათ, გარეგნული საქციელით თუ ვიცნობ და მასზე ჩემი მსჯელობა, რასაკვირველია, არც სრული იქნებოდა და არც შემუშდარი, ამიტომ მკაცრი განმსჯელის უფლებას, ბუნებრივია, ჩემს თავს ვერ მივცემ.

ისე კი, რასაც ქუჩაში ვხედავ ხოლმე და ტრანსპორტში ვუკვირდები, ამის მიხედვით ვერ ვიტყვი, ვისაც ასეთი ახალგაზრდობა ჰყავს, შეუძლია დიდებული აწმყოთი და მასზე კიდევ უფრო დიდებული მომავლით თავი დაიმშვიდოს-მეთქი...

ეჰ, ვინ მოთვლის ტროლეიბუს-ავტობუსში რამდენჯერ ვყოფილვარ მოწმე, — შუახნის ხალხზე ხომ აღარაფერს ვამბობ! — ქართველი ახალგაზრდები, მათ შორის ქალიშვილებიც კი, რომლებიც, დღეს თუ ხვალ, თვითონაც დედები უნდა გახდნენ, — თუ საერთოდ მიაქციეს ყურადღება, როგორ ჰკოჭმანობენ, როგორ ებრძვიან თავს, თითქოსდა დიდი სასიცოცხლო პრობლემის წინაშე იდგნენ, თითქოს ოპერის თეატრიდან ლენინის მოედნამდე კი არა, — ზესტაფონს მიემგზავრებოდნენ, პატარა ბავშვიან ქალს, ზოგჯერ ხელში აყვანილ თოთობიანსაც კი, — დაუთმონ თუ არა ადგილი, —

ჰოდა, ჩვენ გავმრავლდებით და ჩვენ მოვერევით ვაზგენს?!

(სხვათა შორის, ერთხანობას საცდელ-საექსპერიმენტოდ, უფრო სასეიროდ, ფეხი თვითონაც გადავდგი: როცა თეატრი თეატრობდა და მარჯანიშვილის თეატრში ბილეთები „ავ ძალზე“ ძნელი საშოვარი იყო, თან დამქონდა ხოლმე კონვერტით (რა თქმა უნდა, მომრთმევის ვინაობის გაუმეღავენებლად) ორორი ბილეთი ჭილდოდ მისთვის, ვინც თავს გასწირავდა და გულ-

მოწყალებას გამოიჩინდა — „დავებრდი, დაეჩაჩანაკდი, წვერი შემეჭმნა ქალარას“ მიმართ...

სამწუხაროდ, ამ „აქციამ“ ვერ გამაღარბა: მთელი სამი სეზონის მანძილზე ასეთი სიკეთით სავსე, 'თავგამოდებულ ძალგულოვანს მხოლოდ სამიოდე პირს გადავეყარე).

უნივერსიტეტის ერთ-ერთი ფაკულტეტის ჩასათვლელ გამოცდაზე პროფესორ „ამას და ამასთან“ შედის მესამე კურსის სტუდენტი „ესა და ეს“...

— მაგ ფორმაში ჩემთან მოსული მეორედ არ გნახო, — მუქარით შეფერილი ტონით მიმართავს მას გამომცდელი, რომელსაც პირველი დანახვისთანვე თვალში არ მოუვიდა ამ ახალგაზრდა ქალის „ფორმა“...

ახლა ესეც ვიკითხოთ, მაინც რა ასეთ სასირცხვილო ფორმაში გამოეცხადა იგი მას? ეგებ გულმკერდი ისე გადაუშვლეს, რომ ძუძუები ნახევრად მაინც უჩანდეს, ანდა იქნებ ჭინისის ისეთ ვიწრო შარვალში გამოსალტულა, რომ, მიბრუნ-მობრუნებისას, ჭერ კიდევ ამ მხნე მამაკაცს სექსუალურმა გრძობებმა გონება ისე დაუბნოს, რომ დადებითი ნიშანი სულაც არცოდნისთვისაც დაუწეროს, ა?!

ო-ო, არც ერთი, არც მეორე: ამ სტუდენტი ქალის საძრახისი ფორმა თურმე... ორსულობა ყოფილა, განიერ კაბაშიც რომ ვერ მიუმალავს, ჩასაბარებელი დისციპლინის, რომელიც მოძმე ხალხის ლიტერატურის ისტორიის, ასათვისებლად კი აუცილებელია, თურმე, „ერთსულობა“ და არა დედობა...

ჰოდა, ჩვენს პირველ ეროვნულ ტაძარშიც კი ასეთი მოაზროვნე გინდ ერთიც თუ გამოერევა, —

ჩვენ გავმრავლდებით და ჩვენ მოვერევით ვაზგენს?!

(გვიანდელი ჩანაწერი (1990 წ.): რუსუდან ჯ-ლი, უკვე სამი შეილის ახალგაზრდა დედა, ღვთისმორწმუნე („რამდენსაც გაიმეტებს ჩემთვის განგება, იმდენს ვიყოლიებ“), მიუყვანს ბინაზე თავის ძუძუწოვარს ვაკეში მცხოვრებ პედიატრ ი. მ-ს და დიდ მადლობასთან ერთად უტოვებს ათმანეთიანს ცნობილ მკურნალს, რომელიც შეავლებს თუ არა თვალს გასამრჯელოს, ცივი ხმით დაადევნებს უკვე ქართან მისულს:

— შენ ეი, ქალო, მობრუნდი!.. არ იცი, რომ მე ვიზიტში
ოც მანეთს ვიღებ?!

— ბოდიშს ვიხდი... მეტი არა მაქვს, ბატონო... მე, საერ-
თოდ, მიჭირს... ვიშოვი და მოგართმევთ... არ დაგეკარგებით...
ღმერთმანი, არ დაგეკარგებით... არ დაგეკარგებით... უეჭვე-
ლად მოგიტანთ...

ჰოდა, თუკი ასეთი „ივანე გომართელი“, თანაც ბავშვის
ექიმი, საქართველოში თუნდაც ერთი გვეყოლება, —

ჩვენ გაგმრავლდებით და ჩვენ მოვერევით ვაზგენს?!

„Грузины—вымирающая нация“, — ვფიქრობ, გეხსო-
მებათ, ვინც ამ ფრაზას, უცხო მოგზაურთა გასანათლებლად,
„თანაგრძნობით და გულისწუხილით“ აღმოთქვამს ხოლმე, —
ვიყოთ მიმტევებელნი და შურისსაძიებლად ნუ მივახლით მას,
შენს ენას მუწუყიო...

სულ ერთია, ჩვენი წყევლა მაინც არ მიუვა... მიუვიდოდა
კი, რომ ეს იყოს ცილისწამება...

...ღიახ, ერთი შვილი, ერთი... თუნდაც ორი... განა მყარი
იმედია ჩვენს ფათერაკებით აღსავსე დროში და ჩვენს-პატარა
სამშობლოში, სადაც ტრიბუნისა და რადიო-ტელევიზია-პრე-
სის გარდა, ცხოვრების თითქმის ყველა სფეროსა და კუნძუ-
ლში შეძახილი — რა გვეშველება? — ყურში გოდების ზარნი-
ვით ჩაგვესმის ხოლმე?..

და განა გაგვემტყუნება? როცა დიპლომათი ექიმი, და არა
ჯარა-ექიმი, რუსეთში „костоправ“-ის სახელით რომ არის
ცნობილი, ყმაწვილს ბრმა ნაწლავის ნაცვლად უვიციობით სა-
შარდე ბუშტს ამოაჭრის, როცა ანესთეზიოლოგი, ქირურგ-პრო-
ფესორის დასტურით, საოპერაციოდ მომზადებულ, ნარკოზით
მძინარე ქალს ოქროს ბეჭედს წააძრობს; როცა აბორტმახე-
რები ერის სისხლის მორევში ათეული წლების განმავლობაში—
ნეტარებით იბანავებენ, განა უმართებულო და უსაფუძვლო იქ-
ნება, თუ მოთქმა-გოდების ზარს შემოვკრავთ და სასოწარკვე-
თილნი წავიშენთ თავში ხელს და ავღრიალდებით, — ღმერთო,
რა გვეშველება?..

როცა ერთადერთი შვილი, ჯერ სულ ყმაწვილი, ფულისთ-
ვის დედას თავში ჩაქუჩის რტყმევით წამებით მოკლავს, აკუ-
წულ გვამს კი ხის ტახტში ჩაყრის და მასზე გაშლილ ლეიბ-
368

საბანზე, ვითომც აქ არაფერი, არხეინად წამოწვება („ვეჩერნი ტბილისი“, 15.06.82); როცა მოზარდი მოზარდს დანით სიცოცხლეს მოუსწრაფავს; როცა მეცხრეკლასელი გოგო თავის თანაკლასელ გოგოს სამართებლით სახეს დაუსერავს, — გაგვემტყუნება განა, თუ გლოვის ზარს შემოგვკრავთ და წავიკივლებთ, — ღმერთო, რა გვეშველება?

როცა ბურთით თამაში გამოცხადდება „იმედად ერის არსობისა“; როცა შენი პატარა ქვეყნის პირველ თეატრში სქესობრივი აქტის თუნდაც შენიღბული დემონსტრაცია მიიჩნევა ხელოვნების გამოვლინებად და ასეთ სპექტაკლს ბავშვებსაც კი უჩვენებენ; როცა სამიოდე უღიმღამო მოთხრობის ავტორი ისარგებლებს ცნობილი პირის გარდაცვალებით და საკუთარი თავის განდიდებისათვის დაწერს მასზე მოგონებას და გაზეთი კი დაბეჭდავს, — „იგი უდიდესი ყურადღებით ექცეოდა ჩემს შემოქმედებასო“, რომელ „შემოქმედებასაც“ ამ გაზეთის ათი-ათასობით მკითხველთან ერთად მისი რედაქტორიც არ იცნობს, — განა უნდა გვიკვირდეს, თუ მწუხრის ზარს შემოგვკრავთ და მისუსტებული ხმით წავიკვნესებთ, — ღმერთო, რა გვეშველება?..

როცა შენს მცირერიცხოვან ერში სიკვდილიანობა უკვე შეიძობს შობადობაზე; როცა შენს ეროვნულ პრინციპად იქცევა — ჩემს შემდეგ, თუ უნდა, ქვა ქვაზე დადუღებულა და წარღვნაც მოსულაო; როცა დამთხვეულები, თითქოს ავტომატებით შეიარაღებულები, მანქანით უმოწყალოდ ხოცავენ დიდსა და პატარას, სახელოვანსა და უსახელოს; როცა ნახევარი საუკუნისათვის გაანგარიშებული მუხათგვერდის სასაფლაო რაღაც 10 წელიწადში ამოივსება, — ყოველივე ამის შემდეგ გულშეწუხებულნი თუ წავილულულლებთ, — ღმერთო, რა გვეშველება, ვიღუპებითო, ნუთუ ამისათვის საქვეყნოდ უნდა გაგვიცხოვნონ „ჩვენი ნათელი სინამდვილის გამუქებისათვის?!“

ო-ო, მარტო გაკიცხვა თუ გვაკმარეს, თითქოს მეორე სიცოცხლე გვიბოძესო და... მიუქნელს ათასი ჩვენი მადლობა, ათასი, ათასი..

კურთხეულ არს ნაყოფი მუცლისა შენისა

სახარება

ახალგაზრდებო,

შუახნისანო,

ხნირებო და მოხუცებო,

დანო და ძმანო,

ქ ა რ თ ვ ე ლ ე ბ თ ა

მრავალი ჩვენი ოჯახური უბედურება გამოწვეულია ჩვენი მცირეშვილიანობით, ერთი თუ ორი ხელიხელ საგოგმანებელი, ხატად ქცეული, სათაყვანო პირმშობით!..

ვიცოდეთ და გვახსოვდეს:

— მამაკაცებო, მცირეშვილიანობით ცოლებს ძალაუნებურად თავად თქვენვე უწყობთ ხელს საძრახის გზაზე დადგომაში!

დიახ, როცა ქალს ერთსა და ორ შვილზე ფიქრი და საზრუნავი გამოელევა, მის თავში თქვენი შემარცხვენელი აზრები იკიდებენ ფეხს!

— ცოლებო, ერთი და ორი შვილია მთავარი მიზეზი იმისა, კერია რომ გენგრევათ და მიტოვებული რჩებით; სამი შვილიც კი უკვე ფრთებს უკვეცავს გასაფრენად შელერებულ ქმრებს!

საერთოდ, გიხაროდენ, ქალებო, თუ დედად დაიბადეთ და არა ბოზად, და ხელოვნურად ნუ ჩაკლავთ ფქვენში საამაყო დედობის ამ მადლცხებულ გრძნობას!

დედებო და მამებო, სიხარულით კვიცივით ნუ ავკუნტრუშდებით ხოლმე და 18-20 წლით ადრე თავს ნუ დავიმშვიდებთ და ნუ გამოვიტანთ იმ სანეტარო დასკვნას, რომ ჩვენი ერთადერთი სასოება და იმედი უთუოდ ნიჭიერი და ქვეყნის თვალი გამოვა, რაკი უკვე ახლაც ორი-სამი წლის ასაკშიც კი ტიტინებს — „რაო, ბატონო, მელაო...“

გულს ნურც იმით გავიკეთებთ და უდარდელ შვება-ლხენას ნუ მივეცემით იმ იმედით, თუკი ნორჩობაში თქვენი იიკო თუ

სიციკო „პირდაპირ კუკლა“, დაქალიშვილებისასაც ასეთივე „კუკლა“ იქნება...

— ნუ დაიზარებთ, — წაბრძანდით ზოოპარკში და შეათვალიერეთ: პატარაობაში ბექემოტიც კი ლამაზი და მიმზიდველია!

კოზაყიცი!

ბულდოგიც!

...და როცა მშობლების ეს ვარაუდი მეტწილად არ მართლდება, მათი ერთადერთი „ნაკუკლარი“ რჩება მწარე ბედის მომღურავი, და დედ-მამის ცხოვრებიდან წასვლის შემდეგ კი სულაც მიუსათარი: გვერდით არც ძმა, არც და... ახლა დრო დაგვიდგა ისეთი, ბიძაშვილ-დეიდაშვილებსაც აღარ სცალიათ სანათესავოდ...

ნუ იქნებით სულელურად გულდაჭერებული და თავს ნუ მოიტყუებთ იმ უნიადაგო რწმენით, რომ ასეთი ბედი შეიძლება ეწიოს თქვენს ნაცნობს, თქვენს მეზობელს, თქვენს ახლობელს, თქვენს მტერს, მაგრამ არა და არა — თქვენს ერთას!..

ახლა ხშირად ამოიკითხავთ, ანდა გაიგონებთ საქებრად ნათქვამს, ესა და ეს ამდენ და ამდენ შვილს უზრდის მამულსო...

კი, მამულსაც, მაგრამ... ეს შორსმჭვრეტელი, გონიერი ადამიანი, უწინარესად, მათ თავის თავს უზრდის, და-ძმებს უზრდის, ოჯახის საძლიეროდ ზრდის...

პოდა, სადაც ოჯახი ძლიერია, იქ მამულიც ძლიერია!

...მიიხედ-მოიხედეთ, ბოლო ხანს ამ ჩვენს სიტყვით სათაყვანო მამულში როგორ მომრავლდნენ ქართველი მათხოვრები, — წინათ მათ ანთებული კვართაც ვერ ნახავდით...

ყველა ისინი ეულები არიან.

რაკი ამ ფრაზაში ჩაქსოვილი აზრი ორივე შავი წიგნის საფუძველთა საფუძველია, და თუმცა იგი არაერთხელ უკვე ითქვა, მე მას მაინც ერთხელ კიდევ მოგაგონებთ:

— შეილი რაც მეტი გეყოლება, მით უკეთესია: ზოგი კაი გამოვა და ზოგიც გლახა... ჭკუითაც, გარეგნობითაც, საქციელითაც!

ეს ბუნების სიბრძნეა, დიდი სიბრძნე, რომელიც არც პროფესორს უთქვამს და არც აკადემიკოსს, არც მწერალს, არც მინისტრს...

ამ გონიერებით სავსე დასკვნამდე ერთი ისეთი მრავალშვი-

ლიანობის პრაქტიკოსი ქალი მივიდა, რომელსაც სკოლის პირველ კლასშიც კი არასოდეს ფეხი არ შეუღვამს...

მიიხედ-მოიხედეთ: თვითონ ცხოვრება გვიდასტურებს, რომ ხშირად, ძალზე ხშირად მშობლებს ათი შეილიც არ გაამწარებს ისე, როგორც ერთი, მამისა და დედისერთა!

ღიახ!

მაშ ასე: გულთ საყვარელო, ჩემო მკითხველო, მოაწია ღრომ, როცა უნდა დაგემშვიდობო და ერთხელ კიდევ მოგმართო: ის „შავი წიგნი“ და ეს „შავზე შავიც“ თეთრად რომ იქცნენ და ჩვენმა მძიმე სატკივარმა არ შეგვიწიროს, ეს დიდად არის შენზე დამოკიდებული, და არა, მარტო შენზე, — ჩემზეც, მასზეც, ყველა ქართველზე, თუკი იგი, ცხადია, ჯერ საკუთარი თავისა და მერე კი თავისივე ქვეყნის რეგენი მტერი არ არის...

მე მოგმართავთ თქვენ, ქართველებო, არა სიტყვიერი, გატლექილი ენით გამრავლებისკენ...

პაპა ხარ თუ ბებია, შვილიშვილზე იმოქმედე, მამა ხარ თუ დედა, შვილებზე იმოქმედე, ახლად შეუღლებულნი თუ ხართ — ერთმანეთზე იმოქმედეთ, თუ ასაკი ხელს გიწყობთ და ჯერ არ შეუღლებურხართ, — იჩქარეთ, ნუ გადასდებთ...

საქართველო განსაცდელშია, ახლა წყდება ბედი მისი...

ვიხსნათ, ვიხსნათ ჩვენი სამშობლო აღგვისა და მოსულ-მომსვლელთა წალეკვისაგან!

ტსს...

აბა ყური მიუგდეთ... გესმით? ქართველების სასაფლაოზე ქართველების მესაფლავენი — მიკიჩ-აბდულ-ზაურბეკ-კუმფი — ამ სამი წლის წინათ გულში თუ ღიღინებდნენ, ახლა უკვე მოუჭრიდებლად ნახევარი ხმით მღერიან და...

ნუ, ნუ!..

ნუ მივცემთ მათ ჩვენი ბედოვლათობით,

ჩვენი უდარდელობით,

ჩვენი დაუდევრობით,

ჩვენი უქნარობით,

ჩვენი უქკუობით

გახარების საბაბს, რომ მთელი ხმით ამღერდნენ:

საპართველო მალე თქვენი აღარ იქნება — ა...

10 მარტი — 25 ივნისი,

1982 წელი,

თემქა, დავრდომილთა სახლი, ოთახი № 321

დამატებანი

საქართველოს კომუნისტური
პარტიის ცენტრალური
კომიტეტის პირველ მდივანს
ე. შევარდნაძეს

ბატონო ელუარდ!

ხატზე თუ არა სიტყვით მაინც
დავიფიქვებდი, რომ სწამდეს ჩვენ-
ში კიდევ ვისმე ძალა ფიცისა, და
მაინც, გთხოვთ მენდოთ, ამ ბა-
რათს წინამდებარე ქალაქის მე-
ტი, არავინ იცნობს, და თუ მას
ხელით ნაწერს გიგზავნით, ესეც
იმით აიხსნება, რომ მისი შინაარსი
საბეჭდ მანქანასაც არ გავუმხილე.

არაფერი არ იმალება ამქვეყნად, და არც ჩემთვის დაიმალა
ის ამბავი, რომ თქვენ, ამ რამდენიმე ხნის წინათ, საკმაოდ მწვა-
ვედ შეახურეთ ერთი მნიშვნელოვანი საპროპაგანდო-სახელოვ-
ნო დაწესებულების ხელმძღვანელი, — რა არის, რა ვაი-უშ-
ველებელი ატეხეთ ბუაჩიძის „პადაჩკის“ გამოო.

და როცა ეს შეიტყო სხვა ხელმძღვანელმა ამხანაგმა, თბი-
ლისის ერთ-ერთი დიდი გაზეთის რედაქტორმა, სარედაქციო
კოლეგიის სხდომაზე გულშემოყრილმა განაცხადა:

— ...ხედავთ, რაოდენი სიფრთხილეა თურმე საჭირო?!
ჩვენ კი საგანგებო სტატიის მიცემასაც ვაპირებდით, ეს „პა-
დაჩკა“ და მისი წამომწყები რომ გამოგვეჩინა... ო, რა საზარელ
სკანდალს წავაწყდებოდით!

ღვთის მადლით, მან დროულად აიცილნა ეს საჭაყი სკან-
დალი, ოღონდ სავალალო ის არის (მხოლოდ ჩემთვის, რა თქმა

უნდა!), რომ ამ რედაქტორს მე არც სახით'ვიცნობ და არც ხელის ჩამორთმევით, და არც იგი და არც რედაქციის სხვა რომელიმე მუშაკი არც ოდესმე შემიწუხებია, გამომაჩინეთ-მეთქი.

როგორც ჩანს, მისთვის ძნელი წარმოსადგენია, ჩვენს დროში და ჩვენს ქვეყანაში კიდევ შეიძლება მოინახებოდეს თუნდაც ერთი ისეთი ადამიანი, პირადი კეთილდღეობის მომტან სახელ-დიდების მოსაპოვებლად ათასგვარ ხერხსა და ფანდს რომ არ მიმართავს, მეტწილად, რასაკვირველია, ისეთს, წინათ საძრახისად რომ ითვლებოდა, ახლა კი ჩვენი ყოველდღიური ცხოვრება-საქმიანობის ნორმად იქცა.

მე არ შემოგებხვეწებით მერწმუნოთ, რომ ჩემს ხანგრძლივ სიცოცხლეში რაიმე თავის გამოჩენაზე — გარდა დრამატურგიისა, და ისიც პროფესიული თვალსაზრისით, — არ მიზრუნია და არც მიფიქრია, თუმცა ამასაც ვიტყვოდი, თუკი ვინმე, თუნდაც თავის გამოსაჩენად საქვეყნო, სასიკეთო საქმეს გააკეთებს, ეს ჩემი უბადრუკი აზრით, არაფერი დასაგმობი და დასაძრახია, აკი ობიექტური შედეგი ამისა, საზოგადოებისათვის მხოლოდ სარგებლობის მომტანია.

ლიტონ სიტყვას აბა რა დაეჭვრება, ამიტომ თავს ნებას მიეცემ ერთი-ორი ფერით დავხატო-დავასურათო, თუ როგორ ეძვრებოდი ტყავში მე, თვითრეკლამისა და თავის გამოჩენისათვის:

პირველი „პადაჩკა“, 2.000 მანეთი, კაი ქართველქალობის დაფასების ნიშნად, ათშვილიან სოხუმელ ნათელა შელეგიას გავუგზავნე, — გავატანე სხვას, მე მზეზე კი არა („ერთი შემომხედეთ, რა კეთილი, მოწყალე გმირი ვარ!“), ჩრდილში ყოფნა ვამჯობინე, თანაც გაზეთ „საბჭოთა აფხაზეთის“ რედაქტორის მოადგილეს, ზურაბ ნაყოფიას, საგულდაგულოდ ბარათი მიეწერე, რომ ამის ირგვლივ სტრიქონიც არ დაებეჭდათ, და ეს მან, ჩემი „უცნაურობით“ ვაკვირვებულმა, შეასრულა კიდევ.

ასევე, ჩემი, როგორც „კაი კაცის“ მისვლით არ ამიფორიაქებია არც ღვაძბერიები სენაკში, არც ლომიძეები ქარელში, არც ნიგურჩიანები სვანეთში, არც ფახურიძეები სამტრედიისში... თბილისელ გელაძეებს — შვილებს კი, მაგრამ მშობლებს სულ შორიდანაც არ ვჩვენებოვარ. ვიყავი მხოლოდ ქიათურის

რაიონის სოფელ კაცხში, სოციალისტური შრომის გმირ შურა ახობაძესთან; არ მჯეროდა გაგონილის და მინდოდა დავრწმუნებულიყავ და, ნეტამც არ დავრწმუნებულიყავ: იმხანად ეს ხელებწართმეული, ინვალიდი გმირი, ოთხი შვილის დედა შეყუებული იყო ეგნატე ნინოშვილის დროინდელ, გოგია უიშვილის ქოხში (მეზობლად მდებარე, სოფლის პირობაზე ორსართულიანი სრა-სასახლე ეკუთვნოდა ჩვენი დროის დავით დროიძეს — ადგილობრივ ავტოინსპექტორს!).

ნიგურიანები მესტიიდან თავად, დაუპატიჟებლად, მესტუმრნენ თბილისში, — დედა, მამა და ათი შვილიდან ყველაზე უფროსი — გასათხოვარი ქალიშვილი, — სამი სული ალბათ იფიქრეს, მათთვის „პადაჩკის“ გამღები დიდი მდიდარი კაცია, სულ ცოტა ხუთი ოთახი მაინც ექნება, ისე, როგორც ეს აქვთ იმავე სახლის მარჯვენა მხარეს მდებარე აპარტამენტებში მცხოვრებ პროგრესულ ამხანაგებს... სინამდვილეში კი სვანი სტუმრები ღამით რომ მომესვენებინა, ვაჟის, სამხედრო პირის არათუ შევიწროება, — სულაც მისი „გაგდება“ მომიხდა „პაგონებიანად“...

ღიახ, მსგავსად იმ ქათმისა, ერთ წრიპა კვერცხს რომ დადებს და გაუთავებელი კაკანით მთელ ეზო-გარემოს აიკლებს, — თავის გამოჩენის სურვილს მოსვენება რომ არ შოეცა ჩემთვის, ისე ავიკლებდი ჩადიო-პრესა-ტელევიზიას, რომ სვანეთის მთავარი თერაპევტის ლუბა ნიქარაძის თვალსა და ყურამდეც მიალწვედა, რომ მე „პადაჩკა“ შეიდ ოჯახს „გადაუგდე“, და იგი მაშინ თავის სიტყვაში პროფკავშირების ბოლო ყრილობაზე სათვალავში არ შეცდებოდა:

„...ამასთან დაკავშირებით არ შეიძლება მადლიერების გრძნობით არ მოვიხსენიოთ ჩვენი სასიქადულო დრამატურგი კიტა ბუაჩიძე, რომელმაც თავისი დანაზოგი მოახმარა ორი მრავალშვილიანი ოჯახის კეთილდღეობას ცხაკაიას და მესტიის რაიონებში“.

...კიდევ ორიოდე „მსხვილმანი“ იმის დასადასტურებლად, — თუ როგორ ეღვრიდი ოფლს მე, „პადაჩკების“ მეშვეობით, სახელისა და დიდებისათვის:

პირველი კორესპონდენცია — „მწერლის გულის სითბო“, — გაზეთმა „თბილისმა“ ლოტკინის მთაზე მცხოვრებ რვაშვილიანი გელაძეების დაჟინებული თხოვნით მოათავსა („ტრამვაიში ვინმეს დამტვრეული ზონტიკი რომ დარჩეს და იგი ვატმანს ჩააბარონ, ჩვენ ესეც გვიკვირს და ჩამბარებელს, როგორც დიდად პატიოსან გმირს, გაზეთში მადლობას ვუხდით და...“). რაკი ჩემი, შედარებით, ახლო ნაცნობი, რედაქტორის მოადგილე ადრე გაფრთხილებული მყავდა, არაფერი ამის შესახებ არ დაებეჭდა, და მაინც მიგვერდა, მე წაყითხვისას წნევამ სახიფათოდ ამიწია, მაგრამ ჩხუბს მაინც არ მოვერიდე, მან კი თავი ისე იმართლა, გული ველარ დავიმორჩილე, რომ მისი კაბინეტის კარი გამომეჭახუნებინა:

— მე გაზეთის საქმე გავაკეთე, საერთო საქმე, თქვენი კი არა... რა არის ამდენი ნეგატიური, ნეგატიური, სულ ნეგატიური, — პოზიტიური ვერაფერი მონახეთ? — გვეუბნებიან ზევიდან. ჰოდა, ასეთი პოზიტიური ფაქტი ჩაგვივარდა ხელთ და თქვენს ახირებულ თხოვნას გავუწევდით ანგარიშს?!

აბა რა იცოდა დალოცვილმა, რომ ორიოდვე წლის შემდეგ ეს „პოზიტიური“ ნეგატიურ „პაღაჩკად“ თუ გამოცხადდებოდა და ამ ამბის ერთგვარი პოპულარიზაციისათვის მისი, საერთოდ, ფრთხილი კოლეგა საყვედურსაც დაიმსახურებდა, და მერე ვისგან? ვისაც მისი გარედაქტორება თვალის დახამხამებაში შეეძლო... სკოდნოდა ეს, რასაკვირველია, იმ პოზიტივს უმაღლვე ნეგატივად მონათლავდა; მე თქვენ გეტყვით და, საამისოდ ემბაზი დასჭირდებოდა, ბარძიმ-ფეშხუმი თუ მირონ-საკმეველი?! ან ეგებ დიდი ჭკუა, ანდა დიდი ჭაფა!..

ახლა მეორე „მსხვილმანი“:

დოკუმენტური ფილმების სტუდიაში ერთი რეჟისორი მუშაობს, აი ის, რომლის კაბუკობის მომსწრე და თანამედროვე გახლდით, და სწორედ იმ დროს, ჭერ კიდევ უფრო წალენჯიხელს, ვიდრე თბილისელს, ჩიქოვანების ნამოქაშაგირალს ყოფილი თავადის ტანწერწეტი ასული გააფთრებით რომ შეუყვარდა, ეს კი პასუხად არათუ გულს, — ხელსაც არ უწვდიდა, და ამით შეძრწუნებულმა, რაკი იფიქრა, ამ ზვიად, ნათავადარ ქალიშვილს კომუნისტურ ჭკუაზე „ზაკკრაიკომი“ თუ გადმოიყვანსო, და ბერიას ბარათი მისწერა:

„ქართველი ხალხის საამაყო შვილო, ძვირფასო ლავრენტი პავლეს ძე! რომანიულ ნიადაგზე თავის მოკვლას ეპაირებ და, როგორც პარტიის წევრს, გთხოთ მპატიოთ“-ო,

ბერიამ კომუნიზმის მშენებლისათვის ეს ყოველად შეუფერებელი განზრახვა პატიებით კი აპატია, მაგრამ ამის შემდეგ თავად მას, როგორღაც, მხედველობის მინუსი პლიუსად შეეცვალა და პოტენციური თვითმკვლელის სიყვარულის მუხათვითონ „მიიმუხა...“ ჰოდა, ამ რეჟისორმა, უკვე კარგა ხანია დეაწლმოსილად შემოსილმა, ჩემს „პადაჩებთან“ დაკავშირებით, მით უმეტეს, რომ იმ მრავალშვილიანებში სამი მგრელი დედა ერია, ბარემ ორჯერაც მომმართა, შენზე სურათი უნდა გადავიღო, მე კი, როგორც თქვენ უკვე იცით, თავის გამოჩენის სულსწრაფმა მაძიებელმა და მოტრფიალემ, პირველაც ცივი, მეორედ კი ცივზე ცივი უარი ვუთხარი.

ალბათ შენიშნავდით, ვინც მე, თქვენამდე, „მეპადაჩკედ“ არ ჩამთვალა, მათი გვარები არ გამიმელანებია, რადგან არ მინდა, მათზე გული მოგივიდეთ (ვეფრთხილდები როგორც თქვენს, ისე იმათ გულსაც!), თანაც ყველა ზემოთ მოთხრობილი ისტორიების ისტორიული სიმართლის დადგენა ახლა თქვენთვის შეიძლება უხერხულიც იყოს და არცთუ საინტერესოც, ამიტომ ამათი მომდევნო, მთავარი და, ამავე დროს, უახლესი ისტორიის სიმართლე რომ უფრო ირწმუნოთ, მისი ჩარხის დამტრიალებლის სახელ-გვარს მიუკიბ-მოუჭიბავად დავსახელებ:

ამ სამიოდე თვის წინათ მე, ასეთ პატარა კაცს, უპარტიოსა და უთანამდებობოს (რაც არც არასდროს მიძებნია და არც ახლა ვეძებ), ბინაზე მეწვია არათუ სახელის ძიების პროცესში მყოფისთვის, არამედ ყველა სახელმორკმულთათვისაც კი ასე დიდად სასურველი და საჭირო პირი — გიორგი ლებანიძე, „პრაედის“ კორესპონდენტი... (არ დავფარავ, ერთთავად არც მესიამოვნა, რომ იგი ტელეფონით გასაუბრების სულ რაღაც ნახევარი საათის შემდეგ, ისე ჭიჭურ დამესხა თავს, რომ ველარც კი მოვასწარი ბინაში შემოსასვლელი, დიდებული მუხის კარების გამოცვლა ფანერისაზე, და ვერც სააბაზანოსა და სამზარეულოს კაფელით შემმოსვა, და ვერც იაპონური მაგ-

ნიტოფონისა და ფერადი ტელევიზორის გადამალვა, და ვერც 15 ათასად ღირებული ჭადის ჩამოღება და ვერც უნგრული „ტიულპანის“ კარადაში სამუხეუმო, ანტიკვარული ფინჯნების, ბაკლების, სევრის ფაიფურისგან სკულპტურული ნაკეთობათა კოლექციისათვის გაზეთ „Труд“-ის გადაფარება; სამაგიეროდ უშპალერო კედლის სამალავში, „სტენკაში“, დროულად მიეუჩინე ადგილი ჭერ კიდევ მცხეთაში არსებული ასანთის ფაბრიკის წუმწუმის კოლოფში დამალულ ერთ გამობრულ ოქროს კბილს!).

უნდა ვთქვა, რომ ჩვენ შორის, საუბრის დაწყებისთანავე, სწრაფად და იოლად დამყარდა აი ის, ახლა რომ კონტაქტს ეძახიან, და ეს მიუხედავად იმისა, რომ ჩემი თანამოსაუბრე სახითაც და ხმითაც პირველად ვიხილე.

და რარიგ დამენანა, რომ ასეთი იშვიათი სტუმარი, რომელმაც არა მარტო თავისი სტუმრობით, — შემოთავაზებული წინადადებითაც ეგზომ დიდი პატივი დამლო, — ცოტა არ იყოს, ნაწყენი წავიდა ჩემგან...

მისი წინადადება კი, ამნაირად გამოიყურებოდა: გაზეთ „პრავდის“ 70 წლის საიუბილეო თარიღთან დაკავშირებით მზადდება სატელევიზიო ფილმი, რომელშიც, სხვა რესპუბლიკებთან ერთად, საქართველოსაც ეთმობა, ცხადია, არცთუ ისე დიდი ადგილი, და იმ პატარა ადგილშიც დაეთმობა „პრავდის“ კორესპონდენტის ინტერვიუს... ჩემთან! დიახ, ჩემთან!..

რასაკვირველია, მე იმდენად არ გავითამამდებით და არ შეგეკითხებით, წარმოგიდგენიათ-მეთქი?! არა, მე ეს თავად უნდა წარმომედგინა, და წარმოვიდგინე კიდევ: ერთი პატარა დრამატურგი (რომელიც კიდევ უფრო იმით არის დაპატარავებული, რომ მის კომედიებს არ ღვამენ, რაც იმითაც აიხსნება, რომ იგი ჩვენს გმირულ პირფერულ-მლიქვნელურ დროში იმდენად სულელურად ამაყია, რომ, როცა მისი, როგორც დრამატურგის, მეუფე-რეჟისორები სივარეტს აბოლებენ და საფერფლის ძებნაში უქმაცოფილოდ, სულთან აბდულ-გამიდივით შუბლშეკმუხვნაილნი მიიხედ-მოიხედავენ, ეს, სხვა ავტორებივით, წელში ორად მოხრილი, ხელისგულს არ უწვდის მათ და არ წკმუტუნებს: „ამაზე დაყარეთ, ბატონო, ამაზე დაყარეთ!“)... დიახ, ეს არად მისაჩნევი დრამატურგი, რომელმაც წვერი რომ მოუშვას, ალბათ იტყოდნენ, ვინ არის ეს მათუსა-

ლაო, და ამ ასაკშიც უორდენო, უმედლო, უსიგელოც კი (და კიდევ რამდენი „უ“-ა ასეთი, ვინ მოთვლის!), — უეცრად და რალაც ზღაპრულ ბედად, შეიძლება, მილიონ ტელემაყურებლების სახილველ და გამორჩეულ კაცად იქცეს, — ხაბაროვს-კიდან დაწყებული მის მშობლიურ ხარაგოულამდე.

და მაინც, სახელ-დიდების მოპოვების მიზნით ფულების ეს გამნიავებელი არც კი შეყოყმანებულა და წამითაც არ უფიქრია, რომ თავისი ფეხით კარზე მომდგარი ბედნიერების გამო, სიხარულით სამი თვის ბოჩოლასავით აკუნტრუშებულისო... მან, პირიქით, როგორღაც დამნაშავეს მორიდებული, სევდიანი ღიმილი შეაგება მის კეთილმოსურნე კორესპონდენტს:

— რა ვქნა... მაშინაც კი, როცა სადმე ხალხით სავსე შეკრებილობაში მოვხვდები და პროექტორებსა და ტელეკამერებს მაყურებელთა დარბაზისკენ მოაბრუნებენ, — თავს დაბლა ვხრი ანდა სახეზე გაზეთს ვიფარებ, რომ ეკრანზე არ გამოვჩნდე, თუმცა, როგორც ხედავთ, არცთუ სულ კვაზიმოდოს ოღროჩოღრო სიფათით შემოგყურებთ... აი, აგერ ახლა ვახტანგ ესვანჯიამ ორსართულიანი სახლი რომ აუშენა თერთმეტ-შვილიან ღვამბერიებს სოფელ ხორშაში, მეც მიმიწვიეს იქ, ახალმოსახლეობაზე, — პირველი სადღეგრძელო, როგორც ბალაერის ჩამყრელის, თქვენი უნდა დაილიოსო, და სწორედ ამიტომაც, და აგრეთვე იმიტომაც, რომ ვიცოდი, ტელეოპერატორი უკვე იქ იყო, — არ წავედი, მოსალოცი დეპეშა კი, ცხადია, გავუგზავნე ყველა ქართველისათვის ამ მისაბამ ოქ-ახს...

და მაინც, ჩემს სტუმარ-ეურნალისტს რომ არ ეფიქრა, რომ მე უეჭველად წასაყვანი ვარ საბურთალოში, ასათიანის ქუჩაზე, გონგადასულთა გონზე მომყვან ავლიპი ზურაბაშვილთან, ეკრანზე გამოჩენაზე, ასე თუ ისე, კიდევ დავთანხმდებოდნი, რომ მას მეორე, ჩემთვის ერთობ დიდად პრინციპული წინადადება არ მოპყოლოდა:

ამ ინტერვიუში, თურმე, როცა შემეკითხებოდნენ, რატომ ჩამოვარიგე ეს ჩემი დანაზოგი, უნდა მეპასუხა... არა ის, რასაც მე ვფიქრობდი და მართლა რისთვისაც გავისარჩე (თუნდაც ერთი ქართველი რომ გამომელვძიებინა), არამედ ის, რასაც ამხანაგი კორესპონდენტი ფიქრობდა და ჩემი პასუხიც უკ-

ვე გაეშაადებინა: — ...მე მინდოდა ამით მომხვეჭელობას შევ-
ბრძოლებოდიო...

ო-ო, ეს რა გაიგონა ჩემმა მარცხენა ყურმა (მარჯვენა ამ
ორმოცი წლის წინათ გამოიქმეს ერთი სტალინური სიფხიზლის
(УДИТЕЛЬНОСТЬ) მდარაჯებელ დაწესებულებაში)?! მე ხომ ეს
შორეულ აზრადაც არ მომსვლია, აკი მომხვეჭელობას მთელი
ჩვენი უზარმაზარი, დედამიწის ერთ მეექვსედზე გადაჭიმული
სახელმწიფო ებრძვის და ჯერ ამ ბრძოლის პოზიტიური შედეგი
ცხოვრებაში, ცხოვრებაში ბევრი არაფერი შეიმჩნევა და,
მე ვისი ტიკი-ტომარა ვარ, რომელი მეცამეტე გოჭი მე გამოვ-
ხტი, რომელი... კუმ ფეხი გამოყო, მეც ნახირ-ნახირიო!

ჩემი მომავალი ინტერვიუერი... არ ვიტყვი, რომ მტკიცედ
და დაეინებით, მაგრამ ასე თუ ისე მაინც ეცადა დავერწმუნე-
ბინე, რომ ჩვენში მრავალშვილიანი ოჯახებიც კარგად ცხოვ-
რობენ და, საერთოდ, მატერიალურ მხარეზე სიტყვის ჩამოგ-
დება, ცოტა არ იყოს, უხერხულიაო...

ჰოდა, ნურც ჩვენ ჩამოვაგდებთ-მეთქი, ბატონო!

ისე კი, გულახდილობა პოლიტიკურ დანაშაულში თუ არ
ჩამეთვლება, მე მაინც რატომღაც შეეჭვება, რომ ათშვილიანი
ოჯახი, მით უმეტეს მათში პატარები თუ სჭარბობენ, ერთ და
ორშვილიანი ოჯახებივით დალხინებულად იცხოვრებენ. ასე
რომ იყოს, მაშინ კარლო და დუშა ლომიძეები, ქარელის რაი-
ონის სოფელ ფცადან, ჩემი „პადაჩკით“ ძროხას აღარ იყიდიდ-
ნენ და მეზობლებს სინარულით არ გადასძახებდნენ, ახლა
ჩვენს შვილებს რძე აქვთო, და არც თოთხმეტშვილიანი ვარდო
და ჭინჭიკო ხასაიები წლობით არ იქნებოდნენ წალენჯიხის
რაიონის ჯვარზენის კოლმეურნეობის გამგეობის დანაპირების
შემყურენი, როდის გვიყიდიან სამასმანეთიან ტელევიზორსო...

შეიძლება ვცდები, მაგრამ მაინც, როგორღაც გუმანით
ვგრძნობ, რომ ჩემი ეს „ურჩობის“ ამბავი, რომელსაც პირველ-
წყაროდან შეიტყობდით, დიდად არაფრად მოგეწონებოდათ
და, ალბათ, გაგაგულისათ კიდევ, აკი...

ო-ო, „ჩვენ“ ისე შევეჩვიეთ ყველაფერზე თავი გვიქნიონ,
თავი გვიქნიონ და... აი, გამოტყვრა ვილაც, რომელსაც საუფ-
ლისწულო პატივი დასდეს, ის კი...

უცნაურია, მართლაც, მაგრამ... წინათ იმერეთში ასეთ ან-

დაზას გაიგონებდით: თურქაძის გლესს საბან-ბუმბულში აწვენდნენ, ის კი ჭილოფს იშლიდაო.

ვინ იცის, მე, როგორც უბირს, ეგებ მეპატიოს ეს კანდიერება, მე ზომ ისე კარგად როდი გამეგება, როგორც ბევრ სხვა, სამიკროფონოდ განკუთვნილ მწერლებს, ქვეყნის დღევანდელი პოლიტიკა-იდეოლოგიაში რა არის მთავარი, შეიძლება მომხვეჭელობასთან ბრძოლა იყოს მართლაც მთავარი... ისე, ესეც გულახდილად რომ გითხრათ, საყოველთაოდ ფეხგადგმული მომხვეჭელობა მე, რა თქმა უნდა, მაწუხებს კიდევ, მაგრამ არა იმ ზომით და არა იმ მასშტაბით, როგორც ჩვენი, ქართველი ხალხის დიდი ეროვნული უბედურება, — ჩვენივე ხელით რომ ვისწრაფავთ სიცოცხლეს.

ამის ირგვლივ სამიოდე წლის წინათ მე დავწერე „წამხედურობამ ქვეყანა ამრავლო“, რომელიც თუმცა მოკლე დროში კი დაიწერა, მაგრამ მასზე ფიქრი არა ერთი ათეული წელიწადი მაწვალებდა და, ცხადია, მაწვალებს ახლაც... ჰოდა, ის „შავი წიგნი“ (საბოლოოდ ასეთი სახელი შეერქვა მას), ბევრი საფათერაყო თავგადასავლის შემდეგ, როგორღაც მოვახერხე თქვენთვის გადმომეგზავნა, ოღონდ დღესაც არ ვიცი, მიიღეთ თუ არა და წაიკითხეთ თუ არა... მე მაინც მგონია, რომ მიიღეთ და, ყოველ შემთხვევაში, თვალი მაინც გადაავლეთ, და თუ ამის შესახებ ჩემამდე ჩამიჩუმმაც ვერ მოაღწია, ეს არც უნდა მიკვირდეს. მე არც ისეთი ბოთე ვარ არ ვიცოდე, რომ ყოველივე ის, რაც ოფიციალური თვალსაზრისის თუთიყუშური გამეორება არ არის, თქვენი თანამდებობის პირს, როგორც მინიმუმში, უხერხულ მდგომარეობაში აყენებს, გამომხაურებაზე კი (დადებითზე!), რასაკვირველია, ფიქრიც ზედმეტია.

თქვენ ჩემზე ნაწყენი იქნებით იმის გამოც, რომ ჩემი ეს ნაშრომი, ასე თუ ისე, ხალხში გავრცელდა, — იგი არათუ ხელიდან ხელში გადადის და მის კითხვაში ღამეებს ათენებენ, ზოგიერთი, საკუთრივ რომ ჰქონდეს, თითქმის ორასამდე გვერდის ხელით გადაწერასაც არ ეპუება...

ეს კი არ მოხდებოდა, რომ მათ, თქვენთან ახლო მდგომ პირთ, ვისაც ჩემი ეს ნაწერი თავდაპირველად გავუგზავნე თხოვნით, რომ მისი მოკლე შინაარსი მაინც ეცნობებინათ თქვენ-

თვის (რასაც მთელი წელიწადი ველოდე), — არათუ ეს გააკეთეს, მეც არ ჩამთვალეს რაიმე პასუხის ღირსად, — არც სიტყვიერის, არც წერილობითის (როგორც ჩანს, ყველაფერი კვიანური და, მით უმეტეს, საერო საქმე მხოლოდ მათგან უნდა მომდინარეობდეს!)... დიახ, ჩაიგუბეს პირში წყალი და, თუ ჩუღურეთელ მკითხავ ალათი ნინუას დაეჭვება, ცოტა არ იყოს, თითქოს კურარეთი გაედენტთილმა ისარმაც გაუარათ გულში, როცა იმ გვერდებამდე მივიდნენ, სადაც ვწერდი, თქვენისთანა საქვეყნოდ ცნობილი, დიდი ადამიანების ყურადღება, რა დიდად გაახარებდა მრავალშვილიან ოჯახებს... ამ გახარებაში მე, ცხადია, მატერიალურ მხარესაც ვგულისხმობდი, რაც მათ სულ იოლად გაშიფრეს და... გულს შემოეყარათ!

შერედა, უნდა შემოყროდათ კი?! თუკი მე, მარტო პენსიისა და ერთი სპექტაკლის შემყურემ (იმ დროს თემურ თორელი ჭერ კიდევ არ იყო მარჯანიშვილის თეატრის აღმადორობნებლად მოვლენილი და „ავი ძაღლის“ ბოხი ყეფა მას მხატვრულ ძილს არ უფრთხობდა) შევძელი ეს, თუნდაც მცირე მასშტაბით, ათეული წლობით ყოველმხრივ გალაღებულ დიდ ერისთავებს — გრიგოლ აბაშიძეს, ნოდარ დუმბაძეს, ოთარ თაქთაქიშვილს, ვახტანგ ჭელიძეს განა ეს არ შეეძლოთ?!

ანდა, შეიძლება ისინი წინასწარ გრძნობდნენ, რომ თქვენ — რესპუბლიკის ხელმძღვანელი — ამას მათ საძრახის საქციელში, „პადაჩკაში“ ჩაუთვლიდით, ა?!

კი, მაგრამ, ბოლოს და ბოლოს, არის კი ეს „პადაჩკა“, რომელიც ამცირებს, აკნინებს, თავმოყვარეობას ულახავს „პადაჩკის“ ამლებს? თუ ეს, ასე თუ ისე, მაინც სიკეთის ქმნა?

აბა ერთი ჩავიხედოთ ოქეგოვის „Словарь русского языка“-ში:

«Подачка, 1. Кусок еды, брошенный животному. 2. переносное. То, что дают кому-нибудь из милости, из снисхождения (презрительное)».

როგორ, მე, ვინც იმის ფიქრშია, ყველის ფერი რომ არ დამავიწყდეს, ბაზარში მას, დროდადრო, შორიდან ვუცქერი, რადგან ჩემთვის მის საყიდლად 6 მანეთი მენანება და, ამავე დროს არ მენანება თხუთმეტი ათასი (შედარებით წვრილმანი „პადაჩკების“ ჩაუთვლელად) სრულიად უცნობ, მაგრამ სამაგალი-

თო ქართველებისათვის, — მე ამას, თქვენი აზრით, მათ დასამცირებლად, ზიზღით და სიძულვილით ვაკეთებ?!
მესტიაში მრავალშვილიან დედებს, რაიონულ შეკრებაზე, ისეთმა მდიდარმა „ვაჰარმაც“ კი, როგორცაა ცეკავშირი, ხუთმანეთიანი თავსაფრები მიაბრთვა, ზუგდიდში კი, ასეთივე შეკრებაზე, საჩუქრებად რაიონის ხელმძღვანელობამ ადგილობრივი წარმოების ფაიფურის ლარნაკები ჩამოურიგა (თუნდაც ბროლის ყოფილიყო), — ეს არ მიგაჩნიათ „პადაჩ...“ ჰმ!..

შარშან სამტრედიის მახლობლად მდებარე ახალ სოფელში ანზორ ფახურიძის ოჯახში საზარელი ტრაგედია დატრიალდა: თვით იგი მანქანამ გაიტანა და სინდისგარეცხილმა, ბოროტმა გამტანმა იმდენი იმამაძალდა რაიონის „მართლმსაჯულების“ ხელის შეწყობით, რომ უმამოდ დარჩენილი მცირეწლოვანი ბავშვებისათვის მასზე შეწერილი სულ მცირე პენსიის გადახდისგანაც შეეცადა თავი დაეძვრინა. მალე ჭავრისგან დედაც მიიცივალა და დარჩა ხუთი, ხუთი პატარა ობოლი, რომლებსაც არც ერთმა სულიერმა კაცმა არც სოფელში, არც რაიონში, კოლმეურნეობის გამგეობამაც კი, დახმარების ხელი არ გაუწოდა, არც მორალურის, არც მატერიალურის... ერთმა ამით გულდამწვარმა ახალგაზრდა მწერალმა, ჩემი „პადაჩების“ გამგონებ, მიმართა ამის თაობაზე თქვენთვის კარგად ცნობილ ერთ დიდ, ნიჭითა და ფულით სავსე მწერალს, უებრო საზოგადო მოღვაწედ მიჩნეულს, კომუნისტს, მან კი მოკლედ მოუქრა, იმათზე სახელმწიფო იზრუნებსო...

ერთმა უშვილძირო, აგრეთვე კომუნისტმა, აკადემიკოს ჯიბლაძის კლასიფიკაციით, მსოფლიო მნიშვნელობის ხელოვნება, რომელიც აგერ ახლა მიიცივალა და, სამწუხაროდ, მიცვლისთანავე აღმოხდა სული ხელოვნება-ლიტერატურაში მისწამოქმედარსაც, თავისი რამდენიმე მილიონი (ძველი კურსით) თავის ერთშვილიან აბორტმახერ დას და მელვინე სიძეს დაუტოვა...

რალაც არც ის გვსმენია, რომ ამ უდავოდ კარგ, ერთშვილიან კომუნისტ—პოეტს, რომლის ჰონორარებმა სულ ბოლო წლებში თუ საბუღალტრო უწყისებიდან გამომდინარე ხმებს დაეჭვრებათ, ორასი ათასს მიაღწია, — მხოლოდ მეტროთი მგზავრობისათვის გამოსადეგი შაურიანის გაღებაც არ მოსვ-

ლია ფიქრად, მოძველებულ სიტყვას თუ ვიხმართ, მოყვასთა სასარგებლოდ.

კარგი, ბატონო, დაეხმარო ფულადად აქა-იქ, წამლად შე-
მორჩენილ მრავალშვილიან ქართველებს, — ეს გარდა იმისა,
რომ ნაციონალიზმია, შეურაცხმყოფელია საბჭოთა სახელმწი-
ფოსათვის და ამისათვის, თუ არ დაგვსჯიან, ყოველ შემთხვე-
ვაში არც მოგვიწონებენ, მაგრამ როგორღაც არც ის გაგვიგო-
ნია, რომ, მაგალითად, ჩვენმა თანამემამულე, ლენინური პრე-
მიის ლაურეატებმა თავიანთი პრემიებიდან რაიმე შეიტანეს
მათი მშვიდობიანი ცხოვრების დამცველ მშვიდობის ფონდში,
რისთვისაც, საქვეყნოდ, არათუ წერილობითი მადლობით, —
მხურვალე ტაშითაც კი გვაჯილდოებენ (ეს ტაში მოიმკეს კი-
დეც მიკოლა ბაქანმა კიევეში და ბორის პოლევოიმ მოსკოვში!).

ჰოდა, დაე ეს მწერლები იყვნენ თქვენს თვალში ეგრეთ წო-
დებული მაღალი ზნეობის მატარებლები, მე კი დაბალის...

ჩვენში რა ხანია წეს-კანონად იქცა, პატარა „ურჩი“ კაცი,
რომელიც თუ სულ შენი აზრების მატარებელი არ არის და,
საერთოდ, ის შენ, დიდ კაცს, როგორღაც თვალში არ მოგდის,
შეგიძლია პრესაში გამოლანძლო, უფრო სწორად კი, — გამოა-
ლანძღვინო, რის შედეგაც თავს არხეინად გრძნობ, აკი გალან-
ძლულს არავითარი საშუალება არ მოეპოვება თავი იმართლოს
და, სულ ცოტა, თუნდაც მასზე მიკრული ობივატელის იარ-
ღიყი მაინც ჩამოირეცხოს, — ჰოდა, თუ მეც ეს სასჯელი არ
შელის, „ვიეაქაცებ“ და ამ სიმართლეში გამოგიტყდებით:

ამ ჩემი „პადაჩკებით“ მე არც თქვენი წყენა მინდოდა და
არც თქვენი გახარება, მე ეს გავაკეთე ჩემი სინდისისა და გუ-
ლის კარნახით, მე მხოლოდ ნამდვილი ქართველი მამული-
შვილების გახარებაზე ვფიქრობდი, ამ მიზანს კი იმდენად მი-
ვალწიე, რომ ზოგიერთმა მათგანმა გაცეცებისა და მოქარბე-
ბული სიხარულისგან მადლობის თქმაც ვერ მოახერხა (ნაწი-
ლობრივ სწორედ ეს დაუდო საფუძვლად ჩემთვის პირადად
უცნობმა რ. მიშველაძემ თავის მოთხრობას „ქველი“, — „ცის-
კარი“, № 6, 1981 წ.).

ღიახ, ჩვენ ხშირად აჩქარებით და დაუფიქრებლად, ზოგჯერ,
აღბათ, შეუგნებლადაც, ცხოვრებაში ბევრ სიგლახეს ვნერ-
გავთ, მერე კი, როცა ურემი იმ ზომაზე გადაბრუნდება, რომ

ეს ბრძმებისთვისაც თვალხილული ხდება, თვითონვე ვიწყებთ ბრძოლას მათ წინააღმდეგ, მაგრამ, ვაი რომ, სიგლახის დანერგვა იოლია, მისი ამოძირკვა კი მეტწილად შეუძლებელიც...

ასე, მაგალითად, არათუ საქმით და საქციელით, — სალაპარაკო ენიდანაც კი განვლევინებ ბევრი ისეთი რამ, რაც ადამიანად ხდიდა, ამკობდა და ალამაზებდა მას.

ამის საილუსტრაციოდ, რაკი ვიცი, სოკრატედაც რომ გადავიქცე, ჩემს სიტყვას ფასი მაინც არ დაედება, ამიტომ სულ ბოლოდროინდელი მოსკოვის პრესიდან მრავალზე მრავლიდან მხოლოდ რამდენიმე ამონაწერს მოვიშველიებ:

„Очень жаль, что у нас забыто и даже произносится с презрением слово „благотворительность“. Творить благо необходимо. Это нужно не только детям, но и тем взрослым, которые согреются рядом с ними“.

(„Литературная газета“, № 19, 1982 г.)

„Не слишком ли много разума и эгоизма в наше время? А добро? А сочувствие к ближнему, сострадание к нему?“

(„Лит. газета“, № 2, 1982 г.)

„...Самое бескорыстное и самое бесценное, что было и есть на свете, — это она, доброта, я сколько бы ни пытался указать, обезобразить ее смысл и суть — ничего не выйдет: добро со злом несовместимо“, как „гений и злодейство“.

(„Комсомольская правда“, № 131, 1982 г.)

„...Доброту надо не только получать, но и давать. И что ваша доброта долго еще жила после вас“.

(„Неделя“, № 24, 1982 г.)

„...Доброта — вещь удивительно ценная. Как нынче выражаются, дефицитная вещь. По знакомству ее не добудешь, а люди так в ней нуждаются...“

(„Неделя“, № 7, 1982 г.)

Черствость

„...Каленым железом надо выжигать из нашего высокогуманного советского обихода, где милосердие должно стоять на первом плане“.

(„Известия“, № 24, 1982 г.)

„Сестра милосердия.

Рассказ о женщине, которая стала матерью для десяти детей, обездоленных войной“.

(„Комсомольская правда“, № 56, 1982 г.)

ჰო, მაგრამ, ხომ შეიძლებოდა ამ ბავშვებზე სახელმწიფოს ეზრუნა და პატარა ფახურიძეებივით ინტერნატში გაზრდილიყვნენ?!

ამ კითხვაზე ჩემზე უფრო ავტორიტეტულ პასუხს „Неделя“ (№ 25, 1982) გასცემს:

„Люди высокого нравственного долга не будут все перекладывать на плечи государства“.

დაბოლოს ერთიც („Лит. газета“, № 1, 1982):

„...Доброта — лучшее из человеческих качеств.
Урок доброты—поступок, а не пустые разговоры“.

აღბათ არ იქნებოდა ურიგო, ამდენ რუსულთან ერთზე მანც, ქართულ წყაროზეც თუ მივუთითებდი, აი თუნდაც...

თქვენთვის კარგად ცნობილი ვერა ქემაშვილი, სოციალისტური შრომის გმირი:

„ქართველი კაცი ყოველთვის უწვდიდა მეგობრულ ხელს სახსარმოკლებულ ან ობლად დარჩენილ ოჯახს, მორალურად ამხნევებდა და მატერიალურად ეშველებოდა. ეს დიდებული ჩვევა და მას მეტი განმტკიცება სჭირდება.

(„თბილისი“, 14.01.81.)

დიახ, ქმნა სიკეთისა, — მატერიალიზებული, ხელშესახები, და არა ცარიელი სიტყვებით ბრახაბრუხი („ჩვენს გამრავლებას გაუმარჯოს!“ „საქართველოზე ფიქრი ნუ მოგვეშალოს!“),— მით უმეტეს, თუკი შენ, კომუნისტ კაცს, აღარც კი გახსოვს ფულით დატენილი ტომრების სათვალავი (მე აქ, ცხადია, კანონიერი გზით დაგროვილ ტომრებს ვგულისხმობ)...

აღბათ გაგვიგონებათ, არის ასეთი დიდად ნიჭიერი ჟურნა-

ლისტი — ტატიანა ტესი, „იზვესტიის“ მუდმივი თანამშრომელი, მხოლოდ მორალის საკითხებზე რომ წერს და რომლის ყოველი წერილი მკითხველთა მილიონების ყურადღებასა და ინტერესის არეში უმაღვე რომ ექცევა; იგი გულისწუხილით გვიზიარებს:

„Есть у нас люди, у которых даже чужая доброта вызывает неодобрение и раздражение“.

(ექვი არ შეგეპაროთ, სწორედ ასე წერია, და არა ისე, როგორაც ჩვეულებრივად იწერება ხოლმე უარყოფითის შესარბილებლად: „Есть у нас ЕЩЕ люди...“).

თავს არც აღრე ვიმართლებდი, როცა სწორედ ამ ტიპის ადამიანები, ჩემს „პადაჩკებთან“ დაკავშირებით (თითქოს მათს ჯიბეში ჩაეყავი ხელი!), ცდილობდნენ ჩემთვის, აქეთ მოეცხოთ მათთვის ხელსაყრელი ცილისწამების მური, — ამიერიდან — მით უფრო, ოღონდ, ჩემი სულიერი, ასე თუ ისე, სიმშვიდისათვის სჯობდა კი, ტესის ეს „Зазвучали в ответ голоса“ („Известия“, № 164, 1982) ბევრად აღრე რომ დაბეჭდილიყო.

მე, რა თქმა უნდა, ჩინებულად ვიცი, რომ არათუ თქვენ, — რომელიც გნებავთ რაიკომის მესამე მდივანიც კი, არ არის ჩვეული და ამიტომაც ვერ მოითმენს, რომ ვინმემ, თუნდაც სიტყვა ოდნავ შეუბრუნოს, მით უმეტეს წერილობით (აქ „ვინმეში“, ცხადია, ჩვენი მრავალსართულიანი იერარქიის კიბის ქვედა საფეხურზე მდგომი იგულისხმება).

როგორც ხედავთ, მე ამას, მეტად თუ ნაკლებად, ასე თუ ისე, მაინც გიბედავთ, და ეს თქვენ, დაე, ნუ გაგაგულისებთ: როცა ჩვენი, მშობელი ხალხის ბედი ყოფნა-არყოფნის სასწორზეა შეგდებულვი, ერის სასიცოცხლო ინტერესები პირად ნაწყენობაზე მალლა უნდა დავაყენოთ. მით უფრო ეს ერის წინამძღოლს მართებს და, სწორედ აქ გამოჩნდება მისი, ან კაცუნას წერილმანი ბუნება ან მისი სახელმწიფოებრივი, საერო სიბრძნე.

შეიძლება იცოდეთ, შეიძლება არა, — ფაქტი კი არის: რაც საქართველოში ყოველდღე, ყოველთვე, ყოველ წელს ხდება, ავიც და კარგიც, ხალხი თქვენ გაწერთ... ხახვი გამოჩნდება ბოსტნეულის მაღაზიაში, — ეს თქვენი დამსახურებაა,

ხახვი გაქრება იმავე მალაზიაში, — ესეც თქვენ გეთვლებათ უგერგილობაში...

რა თქმა უნდა, ასეთი განსჯა-მსჯელობა სასაცილოა, მაგრამ, თითქოს, არც ხალხია ამაში დამნაშავე: სწორედ ასეთი სიბრძნით აღჭურვეს იგი მრავალ წელთა მანძილზე.

ჰოდა, თუ ამ ლოგიკით, უფრო სწორად — ანტილოგიკით ვიმსჯელებთ, მაშინ ჩვენი დღევანდელი ასეთი სწრაფი სვლა თვითამოხოცვისკენ, — თქვენ უნდა მოგეწეროთ, აკი ბოლო ათწლეულში ეს ამოხოცვა სულ უფრო და უფრო ინტენსიური გახდა (1940 წელს საქართველოს მოსახლეობის ბუნებრივი ზრდა ყოველ ათას მოსახლეზე 19 სულით განისაზღვრებოდა, 1970 წელს იგი 12-მდე შემცირდა, 1980 წელს კი 9 სულამდე დაეცა... და ეს „ნამატიც“ პირწმინდად არაქართველებზე მოდის).

რასაკვირველია, თქვენთვის ასეთი ბრალდების წაყენება მტკნარი სისულელე იქნებოდა: თქვენს ნაცვლად, ამ ათი წლის მანძილზე, ვინც უნდა ყოფილიყო რესპუბლიკის სათავეში, ეს პროცესი მაინც ამგვარად განვითარდებოდა. პირიქით, თქვენ შეებრძოლეთ კიდევ ქართველი ერისათვის სიცოცხლის ამ მომსწრაფავ პროცესს, შეებრძოლეთ და ბრძოლას აგრძელებთ კვლავაც, ოღონდ...

ბრძოლის ეს გზა, საუბედუროდ, ვერა და ვერ გაგვიყვანს სამშვიდობოზე; სულ ზერელე დაკვირვებაც კი საკმარისია, რომ დავასკვნათ, ამ ბრძოლას ჭერჭერობით არავითარი ხელშესახები, დადებითი შედეგი არ მოაქვს და, მერწმუნეთ, რა ხანგრძლივადაც უნდა გაგრძელდეს ეს „ჭერჭერობით“, არავითარ, ჩვენთვის სასურველ ნაყოფს არ გამოიღებს, აკი ამ ბრძოლის მეთოდი და საშუალებანი, ჩვენდა სატრაგედოდ, ფუჭი სროლის დარი არიან, მსგავს რამეებს თქვენამდეც მიმართავდნენ, და რომ მათ რაიმე სარგებლობის მოტანა შესძლებოდათ, მაშინ დღეს უარეს დღეში არ ამოვყოფდით თავს...

ნუ გეწყინებათ და... პრესით, ტელევიზიით, რადიოთი, ტრიბუნნიდან სიტყვიერი გამოსვლებით ხეირიანად სამეურნეო საკითხებიც ვერ მოგვარებულა და, შედარებით, ისეთი ინტიმური, წმიდათაწმიდა ამბავი, როგორც ერის გამრავლებაა, საჭარო მოწოდებებით მოგვარდება?!

კარგი, ბატონო, მოვიტყუოთ თავი, ოღონდ უსაშველოდ დიდი ხნით მაინც ნუ მოვიტყუებთ!

წინათ, რევოლუციამდე, ჯერ კიდევ შემორჩენილი პატრი-არქალები ყოფიან დროს, განსაკუთრებით მთაში, ეგონათ, ესა თუ ის ადამიანი თუ შენზე ხნიერია, მაშასადამე იგი შენზე ჰკვიანია და ამიტომაც უნდა ყველაფერში ერწმუნო, ენდო და დაუჯერო მას; ჩვენმა დრომ ყველაფერი უკუღმა შეაბრუნა, — შეაბრუნა ჰკუთის ამგვარი საზომ-გამზომიც; სხვა „შებრუნებულებზე“, თუ რამდენად მართებული იყო მათი შებრუნება, არაფერს ვიტყვი, — ეს კი მართლაც მართებულია და სწორი: ახალგაზრდობაში უპკუო, სიბერეშიც უპკუო იქნება; წლები ადამიანს მხოლოდ გამოცდილებას მატებენ, თანაც, გამოცდილებით რომ აღიჭურვო, ჰკუა ამასაც სჭირდება, ცოტაოდენი მაინც...

თუ ჩემს მტრებს ყურს ათხოვებთ, ამ ცოტაოდენ ჰკუას მე მოკლებული არა ვარ, თანაც თქვენზე უფროსი ვარ თითქმის მთელი „ეპოქით“, — მაშასადამე, ერთგვარი ცხოვრებისეული გამოცდილებაც მომეპოვება, ასე რომ, თითქოს ცოტა რამ მაინც, მეც უნდა დამეჯერებოდეს...

დიახ, ჩვენი ერის უკვდავების შესანარჩუნებლად, მით უმეტეს მისი არსებობის მთელი ისტორიის ყველაზე კრიტიკულ მომენტში, რომელშიც ჩვენ ახლა ვიმყოფებით, ყოველგვარი საშუალება გაამართლებს მიზანს, — ასე განსაჯეთ, თქვენთვის ასე საძულველი „პადაჩკებიც“ და, რომ ეს შესაძლო იყოს — ნუ გაგეცინებათ! — მრავალცოლიანობაც...

ჩვენი ხალხის თუ გამრავლებაში არა, მის ოდნავ გამოფხიზლებაში მაინც, თითქოს „შავ წიგნსაც“ შეუძლია ერთგვარი სარგებლობის მოტანა, ამიტომაც იგი არ უნდა წაერთვას სტუდენტ-ახალგაზრდობას, როგორც კრამოლა (აკი წაართვის კიდევ!), მით უმეტეს რომ... „ყოველგვარი დისიდენტობა, ქართველობის მხრივ, დიდი უპკუობაა, მთელი ჩვენი „დისიდენტობა“ უნდა წარიმართოს პრაქტიკული ნაბიჯებისკენ ერის გასამრავლებლად“.

გასართობად მოგაგონებთ, რომ ნიკოლოზ პირველმა პუშ-

კინის ერთ ლექსს, რომელიც თვითმპყრობელობის საწინააღმდეგოდ მიიჩნია, წააწერა:

„Печатать нельзя, а распространять можно“.

გასართობად-მეტყი, აკი ჩვენ — ჰუმან კომუნაძეები — ნიკალაი პალკინს ხომ არ წაებდავთი ისე კი, იმ „შავ წიგნშიც“ შეიძლება ამოიკითხოს კაცმა ზოგიერთი ისეთი რამ საგულისხმოდ, რაც ქართველი ხალხის ამ დიდი სატყვიერის მოსაშუშებელ მალამოდ, ცოტათი მაინც, რომ გამოდგებოდა, მაგრამ უბედურება ის არის, რომ მიუხედავად ჩემი დიდი სურვილისა და ბევრი ცდისა, იმ წიგნმა თქვენამდე თუ საერთოდ მოაღწია, ყოველ შემთხვევაში დროულად ვერ მოაღწია და ამიტომ ახლა, როცა მას, ხელნაწერი ნაშრომის პირობაზე, საკმარის ბევრი გაეცნო, თქვენ მასში ტყვილების დამაყუჩებელი მალამო კი არა, კიბოს მომჩინი რადიკალური საშუალებაც რომ აღმოაჩინოთ, ამაზეც უარს იტყვიოთ, და ეს თითქოს ბუნებრივი იქნება, აკი ჩვენი დემოკრატიის დაუწერელი კანონით, სინათლის შუქი დემოსს მხოლოდ და მხოლოდ ზემოდან, მაღლიდან უნდა ეცემოდეს, თუმცა...

სამ მილიონში ერთხელ შეიძლება იშვიათმა გამონაკლისმაღ გაიეღოს! ასე მაგალითად, ექვიც არ მეპარება, ის „შოვინისტური“ წიგნი თანამედროვეობის მარადისობის კანონის აღმომჩინს რომ დაეწერა, — თქვენ მას, რასაკვირველია, კეთილი თვალთაღ შეხედავდით და მასში გამოთქმულ მოსაზრებებსაღ გულთან ახლოს მიიტანდით.

და რარიგ დასანანია, რომ თქვენთან დაახლოებული დიდი, ბრძენი მწერლები, უბადლო მამულიშვილ-ერისკაცებად უვადოდ ჩამანდატებულნი, უფრო საკუთარი თავის მარადისობაზე ფიქრობენ, და ამ ყოველდღიურ საზრუნავ გაწამაწიაში ავიწყდებათ ის უბრალო ჰუმანიტება, რომ მათი მარადისობა შერწყმულ-გადაჯაჭვულია მათივე მშობელი ერის მარადისობასთან.

ახალგაზრდობის ოქროს წლები სტალინის სახელობის საპატიმრო ადგილებში გავატარე, უფრო სწორად — გამატარებინეს სისხლის სამართლის კოდექსის 58 მუხლის მე-12 პუნქტით

გათვალისწინებული დანაშაულისათვის (недонесение). ჰოდა, თუკი მაშინ არ დავაბეზღე, მით უმეტეს ახლა, სიბერეში ასეთ ცოდვას რა პირით ჩავიდენ, რომ თავად ეს „დასაბეზღებელი“ საკუთარ თავს თვითონვე არ აბეზღებდეს: ჩემი „შავი წიგნის“ გაცნობის შემდეგ, ამ თქვენთვის საკმაოდ კარგად ნაცნობმა, ჩემ სახელზე გამოგზავნილი „ღია წერილი“ ვინ იცის, ვის არ ჩამოუერიგა, ცხადია, იმის დასამტკიცებლად, თუ რამდენი თავით მალლა დგას იგი, როგორც უებრო პატრიოტი, კიტა ბუაჩიძისთანა გონებადახშულ, ვითომ პატრიოტზე... ამ, არსებითად, გამომლანძღველ, ყველასათვის წასაკითხად განკუთვნილ წერილში ავტორმა ერთ-ერთ სერიოზულ ბრალდებად ის წამომიყენა, რომ მე თქვენ, როგორც რესპუბლიკის პირველ კაცს, ჩემს წიგნში პანეგირიკით გმოსავთ და გემლიქვენელებით...

ჰოდა, რაკი „გემლიქვენელებით“ და „როსტომ-ხანებს ვაკისრებ ცოტნე დადიანობას“, ერთხელ კიდევ, პირდაპირ და მოურიდებლად, გეტყვით იმას, რაც ღრმად მწამს:

მალამო, რომელსაც, პროპაგანდა-აგიტაციის არხების მეშვეობით, თქვენ ახლა ხმარობთ ჩვენი ერის განსაკუთრნავად, საბოლოო ანგარიშით მძიმე სენით შეპყრობილი ერის მომრჩენი ვერ აღმოჩნდება.

იყოს, ბატონო, ესეც, მაგრამ...

ახლა ჩვენს განსაკუთრნავად ყველაზე მთავარი, ყველაზე ეფექტური მალამო მხოლოდ და მხოლოდ პირადი მაგალითია!

და კიდევ ზოგი რამ სხვაც, უხმაუროდ და მხურვალე გულით რომ უნდა გაკეთდეს!

როცა თემქის დასახლებაში, 17—კვადრატულ მეტრიან ოთახში მცხოვრებ, მაგრამ ცენტრში შემანქანედ მომუშავე ორშვილიანმა ახალგაზრდა ქალმა მთხოვა მეჩუქებინა მისთვის „შავი წიგნი“, მე კი ამის სანაცვლოდ, ზვეწნის სიტყვებით, მესამე შვილის გაჩენა მოვთხოვე, მან ასე მიპასუხა:

— კი, ბატონო, ვიყოლიებ, ორი ბიჭის პატრონს თვითონაც მინდა მესამე, გოგო მყავდეს, მაგრამ სად დავაწვინო? მატარებლის ორსართულიან კუპესავით მაინც მომიწყვეთ ოთახი, სადაც ხუთი სული ვცხოვრობთ...

თან ესეც მოაყოლა დაუფარავი საყვედურით:

— მე რომ მეუბნებით, იყოლიე-იყოლიეო, შვილები კაპიტალიაო, საქართველოს რომ თავი დავანებოთ, ამას ისევ თქვენი და თქვენი შვილების სამომავლო-სასიკეთოდ ვამბობო, ამ სასიკეთოს რატომ მინისტრებს არ ეუბნებით და არც მათს. თავმჯდომარეს, პატარაძეს, თვითონაც ერთი შვილი რომ იყოლია და ამდენი ხანია ერთადერთი შვილიშვილის შემყურია?! როგორ, მათ საამისოდ, ბინა აკლიათ, ფული თუ შებოლილი სულაუნნი?!

აი, თურმე, რა ძალა ჰქონია პირად მაგალითს, და რა იოლად გამოეთხარა ძირი ჩალის ფეხებზე შემდგარ ჩემს უბადრუკ მოწოდება-აგიტაციას!..

მაგრამ ყოველთვის როდის განვიცდი ასეთ მარცხს, და თუ მეც კი, მაშინ თქვენ... თქვენ...

მერწმუნეთ, თქვენს სიტყვას, მით უმეტეს თხოვნით შეფერილს, არა ტრიბუნიდან, საჯაროდ თქმულს, — კერძო საუბარში, პირად ურთიერთობაში „ჩუმად“ ნათქვამს, კვლავ მერწმუნეთ, უფრო მეტი ძალა ექნება, ვიდრე ძველად მეფეთა სიტყვას ჰქონდა, — აქი ხალხი იმ დროს თუმცა მეფის ქვეშევრდომად კი ითვლებოდა, მაგრამ მაინც არ იყო მეფეზე ისე დამოკიდებული, როგორადაც ახლა პარტიის ცენტრალური კომიტეტის პირველ მდივანზეა!

ჰოდა, რაკი ასეა, ისარგებლეთ ამ თქვენი სუპერმეფური უპირატესობით და ნუ დაინანებთ არა პრესისათვის განკუთვნილ თქვენს სიტყვას, თუ მოსამრავლებლად არა, ყოველ შემთხვევაში დღევანდელ სავალალო დონეზე „ნამრავლის“ შესანარჩუნებლად მაინც, რაფა ეს საშინელი სიკვდილიანობა არ სჭარბობდეს სასიცოცხლო შობადობას!

ნაპოლეონს სტალინიც კი აფასებდა და, მე მგონია, არც თქვენ უნდა მიგაჩნდეთ ის ახირებულ ობროდად, და თუ ეს ასეა, ნაპოლეონიც კი იჩენდა დაინტერესებას მასთან ახლო მყოფ პირთა დაოჯახებით... თუკი მეც კი ვიცი, რომელიც უფრო ახლოსაა დალაი-ლამას საპატრიარქოსთან, ვიდრე ცენტრალურ კომიტეტთან, თქვენ, აბა, როგორ არ გეცოდინებათ, რომ თქვენს აპარატში არა ერთი და ორი მუშაობს, რომელთაც ჟამი ამისა თუმცა კარგა ხანია დაუდგათ, ოჯახს მაინც არ ეკიდებიან; თუ არ ვცდები, ერთ-ერთი განყოფილების გამგე უცო-

ლოა (მეორისამ, მგონი, შეირთო), უცოლოა აგრეთვე N რაიკომის მდივანი და N ქალაქკომის მდივანიც... ვინ დაიჭერებს, რომ თქვენ ისინი ამისათვის ბაბუაწვევრასავით სულ ოღნავაც შეარხიოთ, განა უმაღვე „გვირგვინს არ იფსკვნაინა?“ ცეკას მდივნები იქნებიან ისინი თუ პარტიის რაიკომების, ანდა, კომკავშირის, მინისტრები თუ სხვა, თქვენზე უშუალოდ დამოკიდებული ათასები, — მივცეთ პატარა ხალხს მაგალითი, იყოლიეთ მესამე და მეოთხე შვილიცო, როგორ, ისინი თქვენ მიერ დასახულ „გეგმას“ უდრტვინველად არ შეასრულებენ?!

და ასე შეიძლება აგორდეს ტალღა, ტალღა, რომელიც თანდათან გამოგვიყვანს გადაგვარების იმ ქაობიდან, რომელშიც ახლა გულის ფიცრამდე ვართ ჩაფლული, აქედან ყელამდე კი სულ ერთი მტკაველი მანძილია!..

ღიასაც, თქვენ ამ მხრივ, რომ ეს არ მოხდეს, ბევრი, ბევრი რამის გაკეთება შეგიძლიათ, და უნდა ეცადოთ კიდევ!

სხვა არა იყოს რა, ნუთუ სამარცხვინო არ უნდა იყოს ის ფაქტი, რომ თუკი, თქვენი აზრით, გეორგიევსკის ტრაქტატმა შეუნარჩუნა ქართველ ხალხს ფიზიკური არსებობის შესაძლებლობა, საბჭოთა წყობილების დროს ისე შეთხელდეს ეს ერი, რომ გეორგიევსკის ტრაქტატის 250 წლის თავზე ჩვენს შვილიშვილებს, როგორც სამშობლოს გერებს, ქურთი და სომეხი ურტყამდეს თავში, თუნდა ერთიც და მეორე საბჭოთა ქურთი და საბჭოთა სომეხი იყოს, იმავე ტრაქტატის 300 წლის თავზე კი, ქართველებს სულაც ველარ ეზეიმოს ეს თარიღი, უკვე ფიზიკურად არარსებობის გამო.

იაკობ გოგებაშვილი ბრძანებს:

„რომელიმე ერის გაქრობა აღარბებს და ასახიჩრებს თვით კაცობრიობას“. („ბურჯი ეროვნებისა“. გვ. 57).

ჰოდა, ალუდექით ვაეკაცურად წინ ამ ტრაგედიას, და მაშინ თქვენი სახელი არა მარტო ქართველი ხალხის ისტორიაში, — შეიძლება ბოლო დროის მსოფლიო ისტორიაშიც მოიხსენიონ, ოღონდ, ცხადია, არა იმ კონტექსტით, რომ თქვენი მმართველობის დროს ცხრაჯერ მიიღო საქართველომ გარდამავალი წითელი დროშა ჩაისა და ყურძნის დამზადების გეგ-

მების შესრულებისათვის, არამედ კაცობრიობა რომ ააცდინეთ
გალარიბება-დასახიჩრებას.

ამ ბარათს ვამთავრებ თქვენდამი დიდი იმედით და ერთი
პოეტის, რევოლუციამდე გაზეთ „საქართველოს“ რომ რედაქ-
ტორობდა, სტრიქონებით:

იყო ხალხი, ბრძენი ჰყავდათ მმართველი,
მიტომ შერჩა ამ ქვეყანას ქართველი.

უფრო მეტი პატივისცემით, ვიდრე თქვენ
გამოიჩინეთ ჩემდამი:

კიტა ბუაჩიძე

მარტი, 1982 წელი.

თბილისი, თემქა,

პერსონალურ დაერდომილთა

სახლი

პატივცემულო გიგლა!

ჩვეულებრივ, ვინც ბავშვობის სახელით თავს არ „იმშვენებს“, მე მათ, როგორც წესი, ყველას ბატონობით მივმართავ ხოლმე.

თქვენ უკვე ოცდათვრამეტის ბრძანებულხართ და, ცხადია, „ბატონო“ უფრო შეგფერით, ვიდრე...

ოღონდ გიგლა და „ბატონო“, ყოველ შემთხვევაში ჩემს წარმოდგენაში, ერთმანეთს როგორღაც ვერ ეწყობა, ამიტომაც „პატივცემულო“-მეთქი, თუმცა... საქართულოდ მიმართვის ამ ფორმას გამორჩეული პატივისცემით მაინცდამაინც არცთუ ვეპყრობი.

მაგრამ ეს საერთოდ...

მწერთ, მარნეულში მივლინებაში ყოფნისას ერთმა აზერბაიჯანელმა სუფრაზე, სადღეგრძელოში მითხრაო,

ეს ჩემს მარნეულს და თქვენს საქართველოს გაუმარჯოსო, რამაც გული მოგიკლათ...

აღბათ იცით, მარტო მარნეულის რაიონში ასი ათასამდე მუსულმანი მცხოვრებია, მაშინ, როცა, მაგალითად, ყაზბეგის რაიონში ქართველობა შვიდ ათასამდე ძლივს დაითვლება.

...იწერებთ, რომ ორი ბიჭის მამა ხართ და ჩემი „შავი წიგნი“ ცოტა აღრე რომ წაგეკითხათ, უეჭველად ოთხს მაინც იყოლიებდით, ახლა კი იმედი შვილებზე გადაგაქვთ, ჩემს შეცდომას გამოვასწორებინებო...

ო-ო, გიგლა ჩემო, გიგლა ჩემო,

ყველაფერი ეს ზღაპარია, ცრუიმედები და თავისმოტყუება! როცა დღევანდელი ჩვენი მცირეწლოვანი შვილები ჩვენი საბედისწერო შეცდომების გამოსწორებას შეუდგებიან (ესე-

ცაა, შეუდგებიან კი?) მაშინ წულიკიძე-ხონს „მათა მარნეულ-მა“, შეიძლება, შემოაღწიოს კიდეც.

ალბათ გახსოვთ, ჩემს წიგნში, რომელსაც თქვენ ასე გაუ-ტაცინხართ, რომ ერთ ღამეში თავაუღებლივ წაკივითხავთ, ეწერ, — ჩვენ ყველას საქართველო თითქოს გვიყვარს კიდეც, ოღონდ სამოთხეში შესვლა ყველას სხვისი ფეხით გვინდა-მე-თქი...

ამ მხრივ, როგორც ჩანს, არც თქვენ უნდა იყოთ გამონაკ-ლისი...

კაცი ჭერ ორმოცი წლისაც არ ბრძანდებით, თქვენი მეუღ-ლეც, არა მგონია, თქვენზე უფროსი იყოს და... ვითომ ასე ხანდაზმულნი ხართ მესამე შვილი, თანაც გოგო, თქვენს ბიჭებს რომ მოუვლინოთ, და აგრეთვე თქვენივე თავსაც, — განა არ შეგიმჩნევიათ, მოხუც მშობლებს ქალიშვილები უფრო გუ-ლისხმიერებით და მზრუნველობით რომ ეპყრობიან?

ვინ იცის, ეგებ იმის გერცხვინებათ, რომ თქვენი უმცროსი ბიჭი უკვე თერთმეტი წლისაა?!

ჩემი მშობლები თქვენზე ხნიერები იყვნენ, როცა მე ამ ქვე-ყანას კნავილ-ღნავილით გამოვეცხადე, — შვილებში სათვა-ლავით მეცხრე...

ნაბოლარასა და სულ უფროს ქალიშვილს შორის ასაკობრი-ვი განსხვავება თითქმის ოც წელს აღწევდა.

გიცი იტყვით, იმ დროს ქართველი ხალხი ჩამორჩენილი და გაუნათლებელი იყო, ახლა კი ყველანი გავნათლდით და დრო-შიც ათასჯერ უფრო ბედნიერში ვცხოვრობთო, და სხვა ამის-თანები...

ჰო, მაგრამ...

ჩემს ნაშრომში მოხსენებულმა 46 წლის ქეთევან ნიგური-ანმა მეთორმეტე შვილი მაშინ შობა...

არა, კი არ გაპარვია, როგორც ამას ზოგჯერ გულისწუხი-ლით აღნიშნავენ, — სრული შეგნებით იყოლია მეთორმეტე შვილი მაშინაც კი, როცა პირველი შვილიშვილი... უკვე სამი წლისა ჰყავდა!

აი, ვინ არის საამაყო ქართველი ქალი, და არა გადავვარე-ბის გზაზე შემდგარი ის ერთშვილიანი და ორშვილიანი დღე-ვანდელი ქართველი ქალები, რომლებიც ასეთი მცირეშვილია-

ნობით საკუთარ თავსაც მტრობენ და თავისივე პირმშობსაც. ახლა ჩვენში რადიო-ტელევიზორიდან ხშირად გაიგონებთ და ასევე ხშირად პრესაშიც ამოიკითხავთ უკვე ტრაფარეტად ქცეულ, გაცვეთილ ფრაზას, ესა და ეს ამდენსა და ამდენ შვილს უზრდის მამულსაო, ამან და ამან ამდენი და ამდენი შვილი მამულს აჩუქაო...

არა, ბატონო, მამულს კი არა, — თავის თავს აჩუქა, თავისივე შვილები გააბედნიერა...

ღიახ, მრავალი შვილი ეს, უწინარეს ყოვლისა, დაძმების, მშობლების, ოჯახის ძლიერებაა,

მერე კი, რაც აქედან ბუნებრივად გამომდინარეობს, ეს ერისათვის, საქართველოს სამარადეამო სასიცოცხლოდ ნაბოძები ნობათიცაა!

თქვენ გეამაყებათ, რომ შვილებს მურთაზი და ჭამბული კი არ დაარქვით, არამედ გიორგი და ზურაბი...

ეს თავისთავად, რასაკვირველია, კარგია და მოსაწონი, ოღონდ, ნუ ვიფიქრებთ, რომ უკვე ახლაც ათი ათასობით მოზღვავებულ ალიასა და მიკიჩასაგან თითო-ოროლა ზურაბი და გიორგი გვიხსნის...

ღიახ, „მარნეული“ და „ახალქალაქი“ დღითი დღე სულ უფრო და უფრო გვიახლოვდებიან, და თუ გინდათ, გიგლა ჩემო, თქვენი ზურაბი და გიორგი და მათი შვილები და შვილიშვილები თავისივე სამშობლოში, ჩვენს შემდეგ, ლაღად და გულგონად ცხოვრობდნენ, ამთავითვე უნდა იმოქმედოთ მათივე სასიკეთოდ.

ეს, რასაკვირველია, მარტო თქვენ როდი გეხებათ, — ასი ათასობით თქვენებრ ქართველთ!

გვახსოვდეს: ჩვენი მხსნელი მხოლოდ პირადი მაგალითია!

ამას, მგონი, მეასეჯერ ვიმეორებ და მისი გამეორებით, თუკი ეს ჩვენს ეროვნულ საქმეს ოდნავ მაინც წინ წასწევს, არც ოდესმე დავიღლები, ოღონდ ესეც არის...

ამას წინათ ჩემთან სტუმრად მოსულმა თერთმეტშვილიანმა სვანმა, დავითიანმა, გულდაწყვეტით მითხრა, ბრიყვსა და უგუნურს გინდა შავი წიგნი უკითხე, გინდა თეთარი, სულ ერთია, მაინც აბორტმახერთან გარბისო.

თქვენი წერილის მიხედვით თუ ვიმსჯელებთ, უგუნურთა სიაში თქვენი ჩაწერა ჯერ ნაადრევია იქნებოდა...

ღმერთმაც ქნას, ამ სამარცხვინო სიაში არც მერე შემეტანეთ.

კიტა ბუაჩიძე.

16 თებერვალი, 1986 წელი.
თბილისი.

P. S. რაკი ჩვენი ფოსტის მუშაობას სულ მთლად ვერ ვენდობი, გთხოვთ ამ ბარათის მიღების ფაქტი თუნდაც სულ ერთი სიტყვით დამიდასტუროთ: „მივიღე“.

სხვათა შორის, ჩვენში ვისაც თავი დიდთავა ინტელიგენტად მოაქვს, წერილზე პასუხისათვის, ჩვეულებრივ, თავს არ იწუხებს, ვისაც კი საამისო პრეტენზია არ გააჩნია, მეტწილად უფრო ისინი იძლევიან პასუხს.

თქვენ კი...

„მე ერთი უბრალო გურული კაცი ვარ“, აკი ჩემდამი მოწერილ ბარათს ასე იწყებთ.

გიგლა ჩემო!

თქვენი ბარათი მივიღე.

მის საპასუხოდ გიგზავნით ჩემს „შავ წიგნს“ საჩუქრად, რაკი მას თქვენზე იმდენად დიდი შთაბეჭდილება მოუხდენია, რომ, როგორც იწერებით, მე და ჩემს მეუღლეს კი არა, ღრმა მოხუცებსაც კი ჩააფიქრებსო.

მაგრამ მარტო ჩაფიქრება და სინანულით გულზე ბაგუნს სულაც არ ეყოფა ახლა ჩვენს ერთსა და ორ შვილს, და ჩვენც სამომავლოდ, როგორც მშობლებს, და არც ჩვენს პატარა ქვეყანას ქართველურად სასიცოცხლოდ...

მოხარული ვარ, რომ არ გსურთ მოხვდეთ „ბრიყვთა და უგუნურთა სიაში“, და რომ თქვენ და თქვენი მეუღლე ყოველ-

თვის იქნებით ერთგული იმ მოწოდებისა, რომ არ გადავშენდეთ და პრაქტიკულად ეცდებით წვლილი შეიტანოთ თქვენი ოჯახისა და ჩვენი ერის სიძლიერის საქმეში.

თქვენი ეს სიტყვები მე იმგვარად გავიგე, რომ მესამე შეილს უეჭველად იყოლიებთ, და როცა ის გეყოლებათ და ამ სასიხარულო ამბავს შემატყობინებთ, მე თვითონ ჩამოვალ ხონში და სამადლობელ სიტყვებს წაგიწერთ ამ წიგნის თავფურცელზე...

მინდა იცოდეთ, რომ ავტორისეული წარწერით ერთ ან ორ-შვილიანისათვის ჯერ ეს წიგნი არავისთვის მიმიძღვნია და არც ოდესმე მივუძღვნი, თუნდაც იგი ქვეყნის მპყრობელი იყოს და ამის საფასურად მეორე სიცოცხლეც მაჩუქოს.

კიტა ბუაჩიძე.

6 მარტი, 1986 წელი

P. S. სიახლისა და პროგრესის მტრობაში ნუ ჩამითვლით, რაკი წულუკიძე ხონად მოვიხსენიე...

რა ვქნა, თუმცა ნახევარ საუკუნეზე მეტი გავიდა, რაც წიგნით ქართულ ქალაქს სახელი გვარებზე შეუცვალეს, მე კი ამას დღემდე ვერ შევგუბივარ, რადგან ასეთი რამ ქართული ენის ბუნებიდან არ გამომდინარეობს.

ქალბატონო მზია!

მადლობას მოგახსენებთ ბარათის გამოგზავნისათვის და მოხარული ვარ იმის გაგებითაც, რომ თქვენ და თქვენი მეგობარი ქალები ჩემმა „შაემა წიგნმა“, ასე თუ ისე, სულიერად აგაფორიაქათ და ცოტათი მაინც გამოაღვიძა თქვენში პატრიოტული გრძნობა.

ეს ერთობ კარგია, ოღონდ ცუდი ის იქნება, თუკი თქვენი გულისწუხილი მხოლოდ წუთიერად გაიელვებს და წიგნის დახურვისთანავე აორთქლდება და გაქრება.

ამჟამად ქართველ ერს მარტო სიტყვიერი მოთქმა-კვნესა „ვაი ჩვენს თავს, რა გვეშველება!“ — როდი უშველის, ყველა ჩვენგანმა, პირველ ყოვლისა კი ქალებმა, ჩვენი ეროვნული ტაძრის უკვე ასე ძალუმაღ მორყეული საძირკვლის გასამაგრებლად, სულ ცოტა, თითო-თითო აგური მაინც მივიტანოთ.

მაგრამ ჩვენი დიდი ეროვნული უბედურება სწორედ ის გახლავთ, რომ ამის გაკეთება თითქმის არავის გვინდა, არ გვინდა საკუთარი და, ამავე დროს, სასამშობლო საქმისათვის გავისარჯოთ და თავი შევიწუხოთ.

აი, თქვენ ახალგაზრდა ქალი ბრძანდებით, მხოლოდ ორი შვილი გყავთ, თანაც ორივე ბიჭია (ხანში შესვლისას, და მით უმეტეს სიბერეში, როგორც წესი, ვაჟები მშობლების მიმართ უფრო ნაკლებ გულის სითბოს იჩენენ, ვიდრე ქალიშვილები)...

ჰოდა, აბა ისეთი რა დაგიშავდებათ, რომ ამ ჩვენი დიდი ეროვნული განსაცდელის უამს მესამე შვილიც იყრილით და ამით ცოცხალი მაგალითი მისცეთ ნათესავეებს, ახლობლებს, ნაცნობ-მეგობართ და, თუ გნებავთ, მეზობლებსაც; დრო რომ გაივლის, მაშინ კი მიხვდებით, რომ ამით საკუთარი თავიც გაიბედნიერეთ, შვილებიც გააბედნიერეთ და, საერთოდ, სამშობლოსაც მხარში ამოუდგეკით.

მე ჩემს წიგნში ხაზგასმით ვწერ და ახლა პირადად თქვენთვის ვიმეორებ, რომ ჩვენ, როგორც ერს, იმ ტრაგიკული ჩიხიდან, რომელშიც უკვე კარგა ხანია ვიმყოფებით, შვილიერების პირადი მაგალითი თუ გამოგვიყვანს.

და თუ ჩვენ უკვე კარზე მომდგარ უბედურებას თავს დავალწევთ, მაშინ თქვენს შვილებს, 30—40 წლის შემდეგ, თავში ველარ ჩასცხებენ, როგორც ნაციონალური უმცირესობის წარმომადგენლებს (თავისავე სამშობლოში!) ვერც სომეხი და ვერც ქურთი, ვერც ოსი და ვერც აფხაზი, და ვერც თათარი-აზერბაიჯანელი...

და მაშინ თქვენ და თქვენისთანებს აღარ დაგჭირდებათ სინანულით ლოყაზე ხელის შემორტყმა, როგორადაც ახლა ირტყამენ კიდეც შვილიერების ასაკს გადაცილებული, მცირე-შვილიანობით შეწუხებული, გვიან გონს მოსული ქართველი „მანდილოსნები-სიგარეტოსნები“...

მე პირადად ამ ბოლო დროს ასეთები ბევრი შემხვედრია, ჰოდა, ნურც თქვენ გაიხდით მომავალში სადარდებლად მსგავს საქციელს.

ამას წინებზე ავთანდილს, თქვენს მეუღლეს, სიტყვა ჩამოვუგდე, რა დაგიშავდებათ, მესამე შვილი. რომ იყოლიოთ-მეთქი...

არა, მას ქვა არ აუგდია და მისთვის თავი არ შეუშვერია, ეს კი ბრძანა ლამაზ თვალეზზე ცრემლმორეულმა, ცოლს ხომ ვერ დავჩაგრავო...

გამელიმა, სიმწრით, ცხადია... თქვენ ის სხვა მხრივ ნუ დაგჩაგრავთ, თორემ ეს დაჩაგვრა კი არა...

დედაჩემმა ცხრა შვილი შობა და, ღრმად ვარ ამაში დარწმუნებული, ერთ-ერთი მიზეზი ესეც იყო, რომ მან 95 წელიწადი იცოცხლა, და იცოცხლა არა როგორც ცოცხალმა გვამმა, — სულ საქმით მოფუსფუსემ, შვიდშვილიანმა დედაჩემმა კი — 97!

მშობიარობა ქალის ორგანიზმს მხოლოდ აახალგაზრდავებს, აბორტები კი ხშირად „აკიბოებს“ კიდეც მას.

ერთხელ თქვენმა ქმარმა ესეც მითხრა... ამით უნდოდა, ალ-

ბათ, თავის ორშვილიანობისთვის, ჩემს თვალში, საბოლოოდ ლოგიკური წერტილი დაესვა, — მე კაი ბიჭები მყავსო.

ექვი არ მეპარება, რომ თქვენ „კაი ბიჭებით“ ხშირად იღვრებთ ყელს, და ეს ბუნებრივიცაა, აბა, ეს რომელ დედას დაეძრახება, ოღონდ...

ღმერთმაც ქნას, თქვენი ბუთხუზა ბიჭები ბუთხუზებად დარჩენილიყვნენ — ამ სიტყვის იდეალური გაგებით — ჭაბუკობასა და მოწიფულობაშიც, და მერეც, მაგრამ ამით თავის დამშვიდება მეტწილად ნაადრევია ხოლმე და ხშირად იგი საბოლოოდ თავის მოტყუებით მთავრდება; ბავშვობაში, ვიდრე ჩვენ დედის კალთაზე ვართ ჩაფრენილი, ყველანი „უი, ღედა, რა კარგები“ ვართ, მერე და მერე კი... ალბათ გაგიგონიათ, რაც უფრო იზრდება, მით უფრო ვირდებაო. მით უფრო ახლა, ამ ჩვენს უკუღმართ დროში, — აბა ერთი, ირგვლივ მიიხედ-მოიხედეთ, თითქმის მასობრივად რა თავისმომპკრელი ამბები ხდება, თავისმომპკრელი საკუთარი თავისა, თავისმომპკრელი მშობლებისა და თავისმომპკრელი შენივე სამშობლოსი!..

ღიახ, რა სრულყოფილადაც უნდა ზრდიდე — მუსიკასაც ასწავლიდე და ინგლისურსაც, ცეკვაზეც დაგყავდეს და ცურვაზედაც, — მაინც არავინ არა ვართ ამისგან, ე. ი. სიგლახისგან დაზღვეული, ამიტომ დედაჩემის აზრი, რომელიც მან საკუთარი შვილების „გააანალიზებისას“ გამოთქვა, არც ახლა კარგავს ერთგვარ პრაქტიკულ სიბრძნეს: შვილი რაც მეტი გეყოლება, მით უკეთესია; ზოგი კაი გამოვა და ზოგიც გლახაო.

აღამიანის ავი და კარგი, მისი ხასიათი დედის საშოშივე ჩანასახთან ერთად ისახება, და მერე, დიდობაში, იგი აღზრდისა და სოციალური გარემოს ზეგავლენით, შეიძლება ცოტათი გაფუჭდეს, ან ცოტათი გაუკეთესდეს, მაგრამ მხოლოდ ცოტათი...

თქვენ პედაგოგი ბრძანებულხართ და როგორც პედაგოგს, მე ვფიქრობ, არ გაგიჭირდებათ, აი თუნდაც, თქვენი ქმრისა და თქვენი მაზლის ხასიათი შეადარ-შეაპირისპიროთ. განა ისინი ერთმანეთს ყველაფერში ემთხვევიან? არადა, ხომ აბსოლუტურად ერთნაირ პირობებში და ერთნაირ გარემოცვაში იზრდებოდნენ?!

ამ რამდენიმე დღის წინათ ერთშვილიანი ახალგაზრდა ცოლ-ქმარი, ნინო და ვანო ყიფიანები მესტუმრნენ, და მე იმ დღეს, ავადმყოფ კაცს, გულის გასამხნეველად წამალი აღარ დამჭირვებია, ნიტროგლიცერინის მაგივრობა სიხარულმა გამიწია: არათუ ჩემთვის, ღვთის მადლით, ჯერჯერობით კარგად მხედველისთვის კი არა, ნახევრად ბრმისთვისაც ქალის ორსულობა ადვილად შესამჩნევი იქნებოდა: უკვე მეცხრე თვეში იღვა და მე როგორღაც ანაზღად მომაგონდა სახარებიდან: „კურთხეულ არს ნაყოფი მუცლისა შენისა...“

შემოსვლისთანავე ვაჟმა ცოტა ზნაწეული ტონით მომმართა, თითქოს უნდოდაო, რომ ეს ცოლსაც გარკვევით გაეგონა:

— ეს სულ თქვენი წიგნის წყალობაა, ბატონო, და თუ ახლო მომავალში მესამესაც არ იყოლიებს, თქვენი თანდასწრებით ვუცხადებ, — სხვასთან გავაჩენ.

— ო, ღმერთო!..

გვიხსენ, ღმერთო, საქართველოში ახლა ასე მომრავლებული „გადედლებული“ ქართველი კაცუნებისგან და გვიმრავლე ასეთი „მამალი“ ქართველი ვაჟკაცები!..

ჩალაც ბედად, მეორე დღემაც დიდი სიხარული მომიტანა: მივიღე თემქაში მცხოვრებ 160-ე საშუალო სკოლის მასწავლებლის, სამშვილიანი ლიანა მარსაგიშვილის ბარათი, რომელშიც ასეთი რამეც ამოვიკითხე:

„თქვენი წიგნის წაკითხვისას ჩვენმა პედაგოგმა ნანა კაპატაძემ გადაწყვიტა, აღარ დაღუპოს ნაყოფი და მესამე შვილის შემდეგ, რომელიც შვიდი თვის მერე დაიბადება, მეოთხეც იყოლიოს“.

ღიახ, მე ის როდი მახარებს ხოლმე, როცა წერილობით თუ სიტყვიერად სულელურად მაქებენ, თითქოს მე დიდი მამულიშვილი ვიყო, რომ დადგება დრო და წმინდანებში შემრიცხავენ, რომ „შავი წიგნი“ ჩვენი დროის „ვეფხისტყაოსანია“ და სხვა ამისთანები, — მე მახარებს მხოლოდ ჩემი წიგნის პრაქტიკული ნაყოფი, რაც ასე გადაუდებლად გვჭირდება ყველა ჩვენგანს — გასათხოვრებსა და უცოლოებს, ერთ-

სა და ორშვილიანებს, თავად ამ ჩვენს შვილებს და, საერთოდ
კი ახლა გადაშენების გზაზე შემდგარ ჩვენს სამშობლო-სა-
ქართველოსს..

იმედით და პატივისცემით
კიტა ბუაჩიძე.

25 დეკემბერი,
1983 წელი.

თ ბ ი ლ ი ს ი

გ ვ ი ა ნ დ ე ლ ი მ ი ნ ა წ ე რ ი (1990 წ.): ამ ბარათმა ბევრი ვე-
რაფერი გაქრა: ავთანდილმა ცოლი არ „დაჩაგრა“ და არც მზი-
ამ „დაიჩაგრა“. თავი... ყიფიანების ქადილიც სულ ფუჭი გა-
მოდგა...

საით მიექანება ქართული თეატრი?!

(„შავზე შავი ფიგნის“ ერთი ნაწილი,
როგელის შეიქლება ცალკე იკითხებოდეს)

Театр — высшая инстанция для
решения жизненных вопросов.¹

А. Герцен

თეატრის დანიშნულება ხალხის ცხოვრებაში ასე განსაზღ-
ვრა აღუქსანდრე გერცენმა...

აუ, ჯერ კიდევ როდის!

როცა ნიკოლოზ პირველმა გოგოლის „რევიზორი“ ნახა, სა-
მეფო ლოჟის სავარძლიდან წელი ძლივს აითრია და ნაღვლია-
ნად წარმოთქვა: „Попало всем, и прежде всего — мне!“

სხვათა შორის, თუმცა „попало и ему“, იმპერატორს გულ-
ში ფიქრადაც არ გაუვლია, რომ მისი რეჟიმის გამაბახებელი
კომედია აეკრძალა.

და მაინც, ისეთი „თავისუფლების“ დროსაც კი თეატრს არ
შეეძლო გადაეწყვიტა ცხოვრებისეული საკითხები, და ვერც
ვერასოდეს გადაწყვეტს იგი ასეთ საკითხებს. თეატრს მხოლოდ
მათი დასმა-წამოყენება შეუძლია.

ესეც არის, თუ წამოაყენებინეს, თუ საამისოდ გზა არ გა-
დაულობეს!

ცოტა არ იყოს, მეუხერხულება საკუთარ თავზე ლაპარაკი,
მაგრამ ჩემი ამ აზრის გასამაგრებლად სხვა, უფრო დამარწმუნ-
ებელი მაგალითი, თანაც დოკუმენტურად შემონახული, არ
მეგულება.

თითქმის ოცი წლის წინათ მე დავწერე სატირული კომედია
„პლატონი“ („ფორმულა პლატონისა“), რომელშიც, მგონი,
პირველმა ავსახე ჩვენი იმდროინდელი ცხოვრების ზოგიერთი
მაზინჯი მხარე, უფრო შერბილებულად ნეგატიურ გამოვლენ-
ებს რომ ვეძახით, და რომლებიც არ გვალამაზებდა (არც ახ-
ლა გვალამაზებს).

ეს მაშინ საკმაოდ შესამჩნევი მოქალაქეობრივი და შემოქ-
მედებითი გამბედაობა იყო, რაიც, ჩვენს დროში — ეს ბევრს

¹ ციტატები მომყავს ამ ენაზე, რომელზეც ამოვიკითხე.

მოეხსენება, — მაინცდამაინც დიდი მოწონებით არ სარგებლობს, და ეს იყო, ალბათ, მიზეზი იმისა, რომ ეურნალ „ციცქარის“ ჯერ ძველმა რედაქტორმა მისი დაბეჭდვა გააძაღლა, მერე კი, ახალმა, ქალაქის დასუფთავების ტრესტის მსახურთა მეთოდით, როცა რედაქციის დანაგვიანებულ უჯრებს ასუფთავებდა, ერთი ახალგაზრდა მწერლის ხელით უკან გამომიგზავნა — მადლობა მას! — არა როგორც ნაგავი, არამედ... ეს რომ დაებეჭდოთ, დაგვიჭერენო.

დაქერით, არა მგონია, დაეჭირათ, მან უფრო ის იანგარიშა, რომ მისთვის უცნობი, ხანდაზმული ავტორის გამოსამზეურებლად არ ღირდა დეფიციტური საეურნალო ქაღალდის განიავება, ავი იგი, მისი დანიშნვით გახარებულ თავის უახლოეს მეგობრებსაც არ ეყოფოდა... და არც აუტკივარი თავის — ვინ იცის! — შესაძლო ატკივებაც მიიჩნია სავაჟაკო საქმედ.

შემდეგ კი, როცა საქართველოში 1972 წლის მიწურულს ახალმა სიომ დარის დადგომა გვაუწყა, მე გავიფიქრე, ეს ძველი, ჩამოხუთული ჰაერის გასაფილტრავად დაწერილი პიესა ეგებ ახლა მაინც დაიდგას, აი იმ დიდი ავღრიანობის ამსახველი, თუნდაც როგორც უკვე ისტორიული ნაწარმოები-მეთქი...

თქვენ არ იცით, რა არის პროფესიონალი დრამატურგისათვის დაუდგმელი პიესა, — მკვდარია, რომელიც დროზე, დანიშნულ დროზე უნდა გასვენდეს...

ახსოვს კი ვისმე, ჰირისუფლებს განცხადება გამოეკრათ, უამინდობის გამო გასვენება გადადებულიაო?!

ჰოდა, რაკი ასეთ შავ დღეში არა ერთი და ორი წელიწადი ვიყავი, ჩემი მკვდარი რომ დამარხებულიყო, რანგით არცთუ ისე დიდი, მაგრამ მაინც საკმაოდ მოზრდილი კაცის შეგულისხმებით, იმ მართლაც უმაღლეს ინსტანციას მივაკითხე, რომელიც წყვეტს ჩვენში არა მართო დიდ ცხოვრებისეულ საკითხებს, — სულ პატარასაც კი...

იმ ხანებში იქ, ამ მოზრდილი კაცის ხელქვეითად მუშაობდა იმწყო ერთმა ნამდვილმა ლიტერატორმა, პროფესორმა... პირველ დავალებად მას თურმე ჩემი პიესა მისცეს ზეპირ-სარეცენზიოდ და, როგორც ჩანს, თავის უფროსს ისე შავად მოახსენა მისი ავ (-კარგის გამოკლებით!), რომ მას, რაღა გასაკვირია, სულ დაეკარგა სურვილი დამხმარებოდა, და თუმცა

პირველად თავად წამაქება, ახლა კი, ვითომ აქ არაფერ შუაში ვარო, თვლსაწიერს გაპონივით მიეფარა, — ჩვენ ვერ ვეტყვით თეატრს, ეს დადგი, ის დადგი, ეს თვითონ თეატრის საქმეა, ჩვენ არ ვერაფრით თეატრის ფუნქციებშიო...

გამეცინა, რა თქმა უნდა, სიმწრით გამეცინა, აკი მკვდრის გასვენების გზა ამით სულ მეკეტებოდა, და მაინც, რომ არ ეფიქრა, მე ის გულუბრყვილო ფერეიდნელი რეპატრიანტი ვარ, რომელიც ჩვენს ქვეყანაში არც დაბადებულა, არც გაზრდილა და არც დაბერებულა, — ცოტა მკვახედ მივუგე, უთქვენოდ თეატრი კი არა, მღვდელიც არ ინიშნება სულ მიყრდნობულ ეკლესიაში-მეთქი...

კარს აბა რას ვერჩოდო, ამიტომაც უხმაუროდ გამოვიხტე და... ამასობაში ეს ჩემი (და არა ჩემი მკვდრის) დამმარხავი პროფესორიც შემომეყარა: მარმარილოს კიბეზე ვორონცოვ-დაშკოვის დარბაისლური ნაბიჯებით ამოდირდა და იოლად შევატყვე, წინათ რომ იტყოდნენ 14 შაურად და ახლა რომ აზბობენ, 70 კაპიკად ღირებული მშვენიერი სადილი მიერთმია მახლობლად მდებარე დახურულ, „წითელ“ სასადილოში და მშვენიერ გუნებაზეც იყო; ჩემს საყვედურზე, თქვენისთანა დიდმა ლიტერატორმა, ძველი ბერძნული და ლათინური ენების მცოდნემ, ჩემისთანა პატარა ლიტერატორს ასე ერთი ხელის დაკვრით, თითქოს ბზიკს კლავდეს, კალამი რატომ უნდა გააგდებინოს ხელიდან-მეთქი, — მიპასუხა, აბა როგორც შეიძლება სცენიდან გაკიცხვით წარმოითქვას, აი თუნდაც ასეთი ფრაზა: „ჩვენდენი დიპლომი არავის არა აქვს მსოფლიოშიო...“

ჰაი, დედასა!

თავად მას დიპლომი მართლაც დამსახურებულად უღვეს თავშიც და ჯიბეშიც... ჰოდა, მით უარესი, — შენ რომ ნამდვილი პროფესორი ხარ, არც ყოველდღიურ 70 კაპიკზე და არც დიდ ოქროულზე უნდა გაყილო შენი მოქალაქეობრივი სინდისი, და თუ ასეთ, სხვათა ბედის გადამწყვეტ თანამდებობაზე დადგები, — ლომობას ვინ მოგთხოვს, მაგრამ არც სულ ტახიკარდით შეპყრობილ ბაჰიას უნდა ემსგავსო, რომ ბელიკოვის „Как бы чего не вышло“-ს აჩრდილივით თან დაგდევედეს და შოზომილი ხორცის ნაჭრის დაკარგვის შიში კოშმარულ სიზმრებს გგვრიდეს!

რასაკვირველია, ასეთი ბელიკოვების წყალობითაც თეატრ-მა ჩვენში რა ხანია დაკარგა უმაღლესი „ინსტანცია“, ის აღარც ტრიბუნაა, აღარც კათედრაა და არც უნივერსიტეტი...

ანდა რა კათედრაზე შეიძლება ლაპარაკი, როცა ჩემი თაობისთვის არცთუ ისე დიდი ხნის წინათ — ამა თუ იმ პიესის დადგმა-არდადგმის საკითხს ცენტრალური კომიტეტის ბიუროზე იხილავდნენ. მახსოვს, რა ყვითელი ციებ-ცხელებით შეპყრობილივით ეხეთქებოდა აქეთ-იქით გენო ქელბაქიანი, რომლის ერთი „საქარხნო“ პიესა დაიწუნა მრეწველობის დარგის მდივანმა თოფურაძემ მხოლოდ იმიტომ, რომ მასში ავტორს ადგილკომის თავმჯდომარის გამოყვანა დავიწყებოდა (ადიულტერი — ქმარი, ცოლი, საყვარელი — იმ დროს პიესებში საწარმოო სამკუთხედმა შეცვალა: დირექტორი, პარტკომის მდივანი, ფაბკომ-ქარხნის თავმჯდომარე, და ყველა ამათ რალაც სიყვარულობიანზე არც უნდა ეფიქრათ და არც უნდა ელაპარაკათ, — მხოლოდ გეგმებზე! მოგეცათ ლხენა, სცენაზე, „საწარმოებში“ გეგმები იოლად სრულდებოდა, საწარმოებში კი...).

საბედნიეროდ, ეს ანეგდოტური წამოწყება დიდხანს არ აბოგინა ვალერიან ბაქრაძემ, მინისტრთა საბჭოს თავმჯდომარემ, ბუნებისაგან მომადლებული ინტუიციის წყალობით, — რა ჩემი საქმეა პიესების კითხვა, ან საამისოდ დრო სადა მაქვს, ანდა, დროც რომ მქონდეს, მე პიესას რა უნდა გავუგოო...

ნათელი დაადგეს მის ხსოვნას, სხვა, მისი რანგის კოლეგები განა ასე მსჯელობდნენ, — რაკი ერთხელვე ძალაუფლება ჩაიბარეს, ექვიც აღარ ეპარებოდათ, რომ მათ ყველაზე უკეთესი თვალთახედვა აქვთ, რომ მათ ყველაზე უკეთესი ყურთასმენა აქვთ, რომ მათ ყველაზე უფრო დახვეწილი გემოვნება აქვთ, რომ ყველაფერი, ყ ვ ე ლ ა ფ ე რ ი ი ც ი ა ნ და არასოდეს არაფერში, ა რ ა ფ ე რ შ ი არ შეცდებიან, მეიხვეობიდან ბალანჩინის ბალეტამდე!

1955 წელს აკაკი დვალიშვილმა რუსთაველის თეატრში ერთი ადამიანური პიესა — მ. ჯაფარიძის „ჩვენებურები“ — ფსიქოლოგიური სიმართლის ამსახველი ფერებით დადგა და, მასაც და დრამატურგსაც რა ცოდვა არ შესწამეს!

ცენტრალური კომიტეტის იმდროინდელმა მდივანმა (იდე-

ოლოგიის დარგში) ბარემ ხუთჯერაც დაადგა მას ცერბერის თვალი, — გაეშვა-არ გაეშვა; გაეშვა და... ვაითუ ამით საბჭოთა წყობილებას საძირკველი შერყეოდა, მაშინ?!—აკი საამისო გაფრთხილება-სიგნალები მის ყურს უხვად მოესმოდა თეატრის ფოიეში, ანტრაქტების დროს მოფუსფუსე სახეაწითლებული ფადეი ბულგარინებისაგან; ერთი მისი ყოფილი წინამორბედი, იმჟამად თეატრალური ინსტიტუტის რექტორი, ავტორიტეტულად იმასაც კი ამტკიცებდა, ჩემი მდივნობის დროს (სწორედ იმ დროის ერთი სოფლის ცხოვრებას ასახავდა ეს უკვე ჭვარზე ჩამოცმული ღრამა) ბევრად უკეთესი კოლმეურნეობები გვექონდაო.

„ყვარყვარე“, გაშვებამდე, რამდენჯერმე შეამოწმეს თვითდაზღვევის შეუღარბელი ოსტატის ბელიკოვის შავი სათვალეებით შეიარაღებულებმა, სულ აგერ ახლა კი ილია ქაეკვაძის სამი ნაწარმოებისაგან შემდგარი სპექტაკლი ერთ დიდ, გავლენიან პირს რომ არ ეხსნა, — თითქმის განწირული იყო პატარებისგან...

მერედა, მოჰყვა კი რომელიმე ამ სპექტაკლს რაიმე ექსცესი მაყურებლის მხრივ? ვინმემ თუნდაც ერთხელ მაინც, ყრუ ტაში კი შემოჰკრა მოხვევის შემოსვლისას ან გასვლისას? აკი ყველაზე მეტად ბელიკოვებს ამისა ეშინოდათ, ვაითუ... ვაითუ...

ფიქრი კი „ვაითუზე“ სულ ზედმეტია, თითქმის აღარავის აღარ აინტერესებს, რას იტყვიან სცენიდან, თანაც ისიც იციან, რომ საგულისხმოს ამ „კათედრიდან“ ბევრს არაფერს იტყვიან, ამიტომ განა ის არა სჯობს, თეატრის დარბაზშიც კი, იმაზე იფიქროს, ზვალ რა იშოვოს, რა დაითრიოს, რა მოიპაროს, ანდა თავად მას არაფერი მოჰპარონ: ვინ მოატყუოს, არადა, ფრთხილად იყოს, რომ თვითონ ის არ მოაღორწონ?!

ღიახ, თეატრმა დაკარგა არათუ იდეური ზემოქმედების ძალა, — მხატვრული ზემოქმედების ძალაც! იდეური ზემოქმედება კი შესაძლებელია მხოლოდ მხატვრული ზემოქმედების გზით! ახლა კი... ზიხარ შენთვის ტომარასავით სავარძელში და არავითარ ემოციას, არავითარ გრძნობებს არ აღვიძებს შენს გულში სცენიდან მონაბერი ქარი, აკი ის ნამდვილი ცხოვრე-

ბისეული როდია, — ხელოვნური, ვენტილატორით გამოწვეული ქარიშხალია კიქა წყალში.

საქმე ის კი არ არის, რომ მე პირადად ყველაფერი კლასიკური მხიბლავს—მუსიკაც და არქიტექტურაც, მხატვრობაც და ტრადიციული თეატრიც, და რომ ისინი არასოდეს არ დაძველებიან, ყოველივე დღევანდელი მოდური დროთა განმავლობაში გაქრება, კლასიკური კი დარჩება...

საქმე საერთოდ ის არის, რომ ყოველგვარი სანახაობა, ფეხბურთიც კი და საციკო წარმოდგენაც, თუ იგი ემოციურ სამოსში არ არის გახვეული, მაყურებლის გულს ვერ დაიბყრობს და ვერ მოინადირებს. მით უმეტეს, თეატრი, ადამიანის სულიერი სამყაროს ეს ერთ-ერთი მთავარი დასაყრდენთაგანი, უგანცდებოდ დიდი არაფერია. თუ სხვით არა, თეატრი ამით მაინც ხომ უნდა განსხვავდებოდეს საჯარო ბიბლიოთეკის სამკითხველო დარბაზისაგან!

მით უფრო ახლა გვჭირდება ჩვენ ეს, როცა ადამიანის ბუნება გაველურების გზით მიიშრთება, როცა ცრემლი აღარც თავად გვდის და აღარც სხვისი ცრემლი მოქმედებს ჩვენზე...

ინტელექტუალური თეატრიო...

სისულელეა!

ნამდვილი ხელოვნება, ნამდვილი თეატრი არასოდეს არ იყო მოკლებული აზრს, გონებრივ საწყისს, ეგრეთ წოდებულ ინტელექტუალობას, ოღონდ მაშინ ახლა უკვე ამ მოარულ სიტყვას არ ხმარობდნენ, ეს თავისთავად იგულისხმებოდა...

როგორ, იბსენი, ჰაუპტმანი, ჩეხოვი, გორკი, რომელთა პიესები სულს (და გონებასაც) უფორიაქებდა იმდროინდელ საზოგადოებას, — უინტელექტონი იყვნენ? რევოლუციამდე მცირე თეატრს მოსკოვის მეორე უნივერსიტეტს ეძახდნენ და... ჩვენ შევეჩვიეთ ყველაფერი ძველის გაქიაქებას, მაგრამ ამას მაინც ნუ ვიტყვი, რომ წინათ უნივერსიტეტებში მხოლოდ რიკ-ტაფელას თამაშობდნენ.

ჩვენი ახლანდელი, აღარც თუ ისე ახალგაზრდა რეჟისურა (ახალგაზრდა ხარ 30 წლამდე!) ტყავში ძვრება და რა ხერხებს არ მიმართავს, რომ ინტელექტუალობის სამოსელში მოგვევლინოს, ანდა, უფრო უკერ, თავი მოგვაჩვენოს ასეთად...

ბევრია კი მათში, ასე თუ ისე, შესამჩნევი ინტელექტით მი-
რონცხებული?

იყო დრო, როცა ფორმალიზმთან ბრძოლის საბაბით, ფორმა-
ლისტობას აბრალებდნენ სრულიად უვიც „ხელოვანთ“, მაშინ,
როცა, თუ გნებავთ იცოდეთ, ნამდვილი ფორმალისტი მხოლოდ
დიდი კულტურის ადამიანისაგან შეიძლება წარმოდგეს.

ჩვენი ამჟამინდელი „ინტელექტუალი“ — რეჟისორები
არსებითად ანტითეატრის მებაიარახტრედ გამოდიან, უფრო მე-
ტიც — ნამდვილი თეატრის მესაფლავედ, ოღონდ იმ განსხვა-
ვებით, რომ საფლავის სანიტარული ნორმა ორი მეტრია, ისი-
ნი კი თეატრს საფლავს მხოლოდ ერთ მეტრ სიღრმეზე უჭრი-
ან...

ამ თხუთმეტიოდე წლის წინათ რუსთაველის თეატრში და-
იდგა ა. კ. ტოლსტოის დიდად ცნობილი ტრაგედია „იოანე
მრისხანეს სიკვდილი...“ წარმატება მას, მით უმეტეს ისეთი,
როგორც ტრაგედიას უნდა ახლდეს, სულაც არ ჰქონია... ან
საიდან ექნებოდა, როცა ტრაგედიის მთავარი გმირი, მრისხანე
მეფე იოანე, ტრაგიკულ სიტუაციაში, ტრაგიკული მონოლოგის
წარმოთქმის უმაღვე, სცენის ადგილმდებარეობის შესაცვლე-
ლად, სცენის მუშებთან ერთად, მაყურებელთა თვალწინ, მა-
გიდებსა და სკამ-ლოგინს აქეთ-იქით თვითონვე ეზიდებოდა,
და მერე, ამ დაწყობა-დალაგების შემდეგ, კვლავ იწყებდა ტრა-
გიკულ აბობოქრებას, რაც, ბუნებრივია, სიცილს უფრო იწვევ-
და, ვიდრე ჩვენს თანაგრძნობას მისი მუხთაღი სახელმწიფო-
ებრივი ბედისადმი...

და ამის დამდგმელს სურდა დავერწმუნებინე მე, მაყურე-
ბელი, რომ ის ნოვატორი რეჟისორია, და რომ ეს დაბალი რან-
გის მაიმუნობა კი არაა, — მაღალი რანგის ინტელექტუალობა!

როცა შენ, ნოვატორი-რეჟისორი, სცენის, ე. ი. (უნდა ვი-
გულისხმობთ) ოთახის ჰერზე მიკიდებ რკინის „კრაოტს“, —
მე რომ არაინტელექტუალი მაყურებელი ვარ, მოწიწებით გე-
კითხები, — რატომ, რისთვის? რა გამართლება და რა დანიშ-
ნულება აქვს? აკი „ვარიაციები“, მგონი, არ ასახავს გერმანელ
შილდბიურგერელ და ჩვენებურ მოხისელთა ცხოვრებას, ძრო-
ხა დასაკლავად სახლის სახურავზე რომ აიყვანეს, დანა იქა გვა-
ქვსო?! ან, ეგებ, ეს ისეთი ღრმა ინტელექტულობაა, რომ მე,

ბეჩავი, გაგრია მაყურებელი ამის აღსაქმელად ჯერ კიდევ არ მოემწიფებულვარ და, ცხადია, არც უნდა მიკვირდეს, თუკი მას ვერ ჩაეწვდები, ა?!

როცა შენ, ნოვატორი-რეჟისორი, მოქმედ პირთ, რაც არ არის ნაგულისხმევი პიესის, მოქმედების მიხედვით, — აკი ის არ ხდება არც შინდორზე და არც პლიაჟზე, — იატაკზე გაშოტილთ ალაპარაკებ, მწოლიარეთ უდგამ წინ ღვინოსა და ღვინის კიქებს, — რატომ, რისთვის? ადამიანს მილიონი წლები დასჭირდა მაიმუნის წახრილი მდგომარეობიდან რომ გამოსულიყო და ვერტიკალური პოზა მიეღო, ახლა კი მას ისევ მაიმუნობისკენ რომ აბრუნებ, — ეგებ გვითხრათ, ბატონო, რატომ, რისთვის, და რა ინტელექტუალობაა ამაში ჩაქსოვილი, რომლის ამოსახსნელად ჩემი ლატაკი ინტელექტი, როგორც ვრწმუნდები, საკმარისი არ არის?

როცა შენ აუქმებ ფარდას და მე, მაყურებელს, ფარდის ახლის მომლოდინეს, მართმევ იმ საიდუმლოს შეგრძნების სასიხარულო ინტერესს, თუ რა იმალება მის იქით, და რა აღმოჩენა და რისი ხილვა მომელის მის ახდისას, — რა გამართლება აქვს, ჩემო დიდო ბატონო, ამ ინტელექტუალობას, რომლითაც შენ თავი ასე დიდად მოგაქვს ჩემისთანა გამოყრუებულის წინაშე?! ცირკი რომ ცირკია, ფარდას არენაზე ცირკიც კი იყენებს: უნიფორმისტი გასწი-გამოსწევს მას და ჩემდა სასიხარულოდ და ჩემდა მოულოდნელად მეცხადებიან ორფეხი თუ ოთხფეხა არტისტები...

აბა, როგორ გავკადნიერდე და შევეპასუხო, უთვალავი მაყურებლის სახელით, ამ ჩვენს დიდ ინტელექტუალებს, თორემ... ჩვენი უბადრუკი აზრით, მოულოდნელობა, ანაზღეულობა ერთი მთავარი პირობათაგანია ყოველგვარი სანახაობისა, მათ შორის სცენური ხელოვნებისაც.

როცა შენ, ნოვატორი-რეჟისორი, სრულებით უგულებელყოფ გრიმს, რითაც, ჯერ ერთი, ისეც არტისტული საქმიანობისადმი პროფესიულ დამოკიდებულებას გადაჩვეულ მსახიობს კიდევ უფრო აზარმაცებ, მეორეც, — დილით ბაზარში რომ ვნახე თავისი სახით, უგრიმოდ, — სცენის ეს ოსტატი მარნეულელ ყიზის პამიდორსა და ტარხუნას რომ ევაჭრებო-

და, — სადამოთი, თეატრში მოსულმა, იმავე „გრიმში“ მყოფი, როგორღა ვიწამო ინგლისის მეფედ?!

როცა შენ, ინტელექტუალი-რეჟისორი, პირველ ქართულ თეატრში, თითქოს ქართულ სპექტაკლში მოქმედ პირთ ნახევრად ქართულად ალაპარაკებ და ნახევრად რუსულად, და როცა შენ ავტორის სრულიად ბუნებრივ, ნორმალურ ჩანაფიქრს — ჰყავდეს მთლიანი, ერთი ისტორიული პერსონაჟი, შენ კი მას სამად აქუცმაცებ და მახინჯ მე, შენი ინტელექტუალური სპექტაკლებით, ბოლოს და ბოლოს უკვე „გაინტელექტუალეზულ“ მაყურებელსაც კი, — რატომ, რისთვის?! თუ ეს ბრეხტის გაუცხოების მეთოდით აიხსნება?! მე რომ თეატრის დიდი მოტრფიალე ვარ, მაგრამ მაინც ჩვეულებრივი მაყურებელი ვარ, და რომლის მსგავსთა მოუსვლელობითაც შენი თეატრი, დოტაციად მთავრობისაგან მილიონიც რომ მიიღო, მაინც ვერ იარსებებს, — არც ვიცი და არც მაინტერესებს არც გაუცხოების არსი და არც სხვა თეატრალური თეორია, მე თეატრში მოვდივარ არა რებუს-კროსვორდების ამოსახსნელად, მე მოვდივარ იმიტომ, რომ ვიხილო მხატვრულ სახეებად ჩამოქნილი ცხოვრება, წინანდელი და ახლანდელი, ოღონდ სიმართლის თვალით დანახული...

და თუ შენ მართლაც ნიჭით სავსე რეჟისორი ხარ, სცენიდან თვალის დამაბრმავებელი პროექტორები კი არ უნდა მომანათო და წამდაუწუმ თავში კი არ უნდა მიკაკუნებდე შესახსენებლად, რომ მე თეატრში ვიმყოფები, სადაც ყველფერი მოგონილია და ყველაფერი ილუზიების ოჩოფეხებზეა შემდგარი; პირიქით, — შენი ნიჭის წყალობით, მე თავი უნდა მაგრძნობინო ცხოვრების შუაგულში, ამ ამბების უშუალო მონაწილედ, რომლებიც ჩემ თვალწინ გადაიშლება...

მე არ ვიცი, რას ქადაგებს თავისი თეორიებით ბრეხტი, ოღონდ ეს კი ვიცი, ხშირად, ძალიან ხშირად სიტყვით ქადაგებენ ერთს, საქმით კი აკეთებენ სხვას, უფრო სწორად, — ინტუიცია მათ, უნებლიეთ, სულ სხვას, უკეთესს აკეთებინებს (პირიქითაც ხდება ხოლმე, ცხადია!)...

გოგოლი მონარქისტი გახლდათ, მაგრამ, რომელიც გნებავთ მისი ნაწარმოები, ძირს უთხრიდა მონარქიას. ბრეხტის „სამგაროშიანი ოპერა“ „ბერლინერ ანსამბლის“ თეატრის დადგმით—

ეს იყო წმინდა წყლის რეალისტური სპექტაკლი, რაღაც გაუცხოების ნატამალიც არ იგრძნობოდა მასში; მე ის ამ ათიოდე წლის წინათ ვნახე, ამ თეატრის თბილისში ჩამოსვლისას, და მიუხედავად გერმანული ენის სუსტი ცოდნისა, მეხსიერებაში ისე ჩამებეჭდა, მაშინ მიღებული შთაბეჭდილება დღესაც არ წამშლია. სამწუხაროდ, ამასვე ვერ ვიტყვი ამავე პიესის რუსთაველის თეატრისეულ დადგმაზე... ჩვენი და მათი მსახიობების შესრულების, თამაშის დონე ისე განსხვავდებოდა ერთმანეთისაგან, როგორც ჰველი დროის სასწორი, რომლის ერთ თეფშზე ოყა დევს, მეორეზე კი — გირვანქა... თეატრი კი, არსებითად, იმდენად არა რეჟისორით, — მსახიობით სულდგმულობს და, მეპატიოს ეს თავხედური აზრი, — მგონი, დრამატურგითაც, ა?!

შვისა და მთვარის ქვემოთ მოქცეულ მათს საბრძანებელში რეჟისორის ხსენება არც იყო, მაგრამ იყო თეატრი და იყვნენ სოფოკლე და პლავტი, შექსპირი და მოლიერი, ბომარშე და შერიდანი, ტალმა და კინი, ელეონორა დუზე და სარა ბერნარი, ლადო მესხიშვილი და ვასო აბაშიძე... ნამდვილად კარგ პიესას ნიჭიერი მსახიობები ურეჟისოროდაც შეასხამენ ხორცს და ჩაუდგამენ სულს, სიტყვასაც ააღვარებენ უმუსიკოდაც, ახლა კი, განსაკუთრებით რუსთაველის თეატრისათვის სახელის მომტანი სპექტაკლების, განსაკუთრებით „კავკასიური ცარცის წრის“ წარმატების, სულ ცოტა, 40 პროცენტი მუსიკას უნდა მიეწეროს, მაგრამ ეს ვითომ დიდ ღირსებად უნდა ჩაეთვალოს დრამატულ თეატრს?!

— — —

ტელევიზიაში „თეატრალურ შეხვედრაზე“ საერთაშორისო ასპარეზზე ბოლო დროს ქართული თეატრის წარმატებამ ათქმევინა, ალბათ, ამ შეხვედრის „თამადას“, თავად მსახიობს, — ჩვენ მსოფლიოში ყველაზე უკეთესი მსახიობები გვყავსო.

შენი ერის გულწრფელად მოყვარულ ადამიანს პირდაპირ გული აგერევა ასეთი უკიდვანო ტრამახისაგან. რასაკვირველია, ქოსატყუილასავით ასე რომ გააფრინო, საამისოდ, ცოტა არ იყოს, საზღვარგარეთული პრესაც გათამამებს. ის კი გვა-

ქებს და გვაქებს, მაგრამ ჩვენც წომ უნდა გვეკონდეს ანალიზის, საკუთარი თავისადმი მიდგომის უნარი?! უპირველეს ყოვლისა არ უნდა ვივიწყებდეთ, რომ იქაურმა თეატრალურმა კრიტიკოსებმა ჩვენი მსახიობები იხილეს ერთ თუ ორ სპექტაკლში, აბა ერთი ნახონ ჩვენსავით ათობით სპექტაკლში, თანაც წლების მანძილზე, მაშინ ვნახავდით, როგორ შეგვაფასებდნენ.

ესეც არის, სულ არც მაშინ გავგწირავდნენ... აბა თვითონვე წარმოიდგინეთ, მოზამბიკელებმა რომ ჩამოგვეიტანონ „დარისპანის გასაჭირი...“ როგორ შევხვდებოდით და რას დავწერდით?! ცივ წყალს გადავასხამდით და არც ტაშს დავუკრავდით?! ეს კი არა, როცა ჩვენი მომღერალთა გუნდები საზღვარგარეთის დიდ ქვეყნებში გამოდიან, მათ სიურპრიზად მომზადებული აქვთ საგასტროლოდ ჩასული ქვეყნის სულ ერთადერთი ხალხური სიმღერა, რომელსაც, იქაური მაყურებლის შოულოდნელად, კონცერტის დასასრულს ასრულებენ და... დარბაზი ინგრევა ხოლმე ტაშისაგან, თუმცა, არა მგონია, მათ სიმღერას მათზე უკეთ ჩვენ შევასრულებთ, და მაინც... რას იზამ, ეროვნული გრძნობა დიდ ერებსაც ისე აქვთ სისხლში გამჭდარი, როგორც პატარებს. ჩინეთიც კი, ჩვენ რომ კომუნისტური გვეგონა, მილიარდიანი ჩინეთიც კი, საბოლოო ანგარიშით, ისეთივე ნაციონალისტი აღმოჩნდა, როგორადაც ერთ-მილიონიანი ბასკეთი.

რასაკვირველია, „გარეთ“ ეს არ ითქმის, მაგრამ შინ, ჩვენ შორის ამის უთქმელობა, ისეც ყოველმხრივ თვითკმაყოფილებით შეპყრობილ ხალხს მხოლოდ უკან დაგვეწევს: ამჟამად საქართველოში რიცხობრივად თეატრი უფრო მეტი გვაქვს, ვიდრე გვეყავს ნამდვილად ნიჭიერი მსახიობები, დიდი მსახიობები კი ერთი ხელის თითებზეც არ ჩამოგვევთვლება...

და ასეთი მწირიანობის დროს რა ათმაგად გულსაკლავია ეროსი მანჯგალაძის გაუჩინარება!

მე ბევრი სახალხო არტისტის გასვენებას მოვსწრებივარ, ვანო სარაჯიშვილის გასვენებაც კი არცთუ სულ ბუნდოვნად მახსოვს, მაგრამ ეროსი მანჯგალაძის...

ასე გაასვენა პარიზმა ჟერარ ფილიპი, ასე გაასვენა ლენინ-გრადმა ნიკოლოზ ჩერკასოვი, ასე გაასვენა თბილისმა...

(მე არ ვწერ, მთელმა თბილისმა-მეთქი... თეატრთან მოზ-

ღვაეებულ ხალხში ერთს შაუმიანის მოედნისაკენ გზა ვერ გა-
ეკვლია და ბურღლუნებდა:

— მამაძალი, ერთი ვინმე მოკვდა და... ამდენი ამბავი?!

კაცი შინ ვერ მისულხარ...
ამის გაგონებისას რომელიღაც თვალცრემლიანმა ახალგაზ-
რდამ მოაკერა კიდეც მას ყურისძირში და მეორისთვისაც
ემზადებოდა, რომ არ შემეკავებინა:

— თქვენი ვინმე რომ მომკვდარიყო, ხაჩატრიანი თუ ხაჩ-
მანუკიანი, — ის ხომ ვინმე არ იქნებოდა?..).

ეს გრანდიოზული და ნამდვილად ეროვნული გლოვა ხალ-
ხმა გულიდან აღმოხეთქილი ტაშით შეამკო, და ეს მსახიობს,
პიცვილსაც კი, თითქოს შეპფერის კიდეც, ოღონდ მტკიცედ
არ ვიცი, საქართველოზე ადრე ამას ვინ და სად მიმართა, და
თუ ეს პირველად ჩვენში მოხდა, თბილისელებმა იგი ბათუმე-
ლებისგან გადმოიღეს.

(მინი-ცნობა: საერთოდ, ბათუმი ბევრი კარგი რამის წამომ-
წყებია. მაგალითად, ამ ოციოდე წლის წინათ, იქაური ახალგაზ-
რდები, სწორი ქართულით ლაპარაკის დასანერგავად, ვისაც
ჩიქორთული სიტყვა, რუსიციზმები წამოსცდებოდა („ვობშჩემ,
ნაგლია, გრუბია, დაეე“ და ასობით ამისთანების), ერთმანეთს
აჯარიმებდნენ, რაც „Известия“-ს თბილისელმა კორესპოდენ-
ტმა ზ. ზვიაგინმა ნაციონალიზმად მონათლა და „რაზაბლაჩი-
ტელნი“ სტატიაც გამოაცხო; ეს იმ დროს, როცა თვით რუსეთ-
ში ტომები გამოდის თუნდაც იმის გასარკვევად, წარმოსათქმე-
ლად რომელი სიტყვა უფრო მართებულია ანდა სად უნდა იყოს
მახვილი: желчь თუ жёлчь, звонит თუ звонит, бытиё თუ
бытиё, Кижъ თუ Кíжи...

...ღიახ, ასე დიდებულად გაასვენა თბილისმა ეროსი მანჯ-
გალაძე...

რატომ?

სიტყვა მიეკეთ ჯერ პოეზიას:

ეიფელის კოშკს შენ გერჩია ჯვარი და გრემი,
უცხოთა „ბრაგოს“ — აღტაცების ქართული ცრემლი.
დიდებისათვის არ წასულხარ არსად სალაშქროდ,
ამერ-იმერში მაინც ქუხდი გაღმა-გამოდმა...

მე-19 საუკუნის დიდმა იტალიელმა ტრაგიკოსმა თომაზო სალვინიმ, რომელმაც ვერ განსჭვრიტა, რომ დადგებოდა დრო, როცა რუსთაველის თეატრის სცენაზე ინტელექტუალური რეჟისურა მიკროფონს დიდ პატივს დასდებდა, თქვა: „Актеp — это гoлoс“.

მსახიობი — ეს არის დიქციაც, — დაძვინდი მე, — რაკი მხედველობაში მყავს ქართველი მსახიობი, თორემ, მაგალითად, იტალიელი თუ რუსი მსახიობისათვის ეს უბრალო, ასე ვთქვათ, საყოველღეო, პირველი მოთხოვნის კეშმარიტებაა, მათს ქვეყნებში არათუ დრამატულ თეატრში, ოპერაშიც კი უნაკლო ფრაზირებაზე, ო, რა დიდად ამახვილებენ ყურადღებას!

საიუბილეო-საზეიმო დღეებში ერთი იუმორისტი პოეტი სულაც არ იყო ხუმრობის გუნებაზე:

შოთა რუსთველის თეატრო,
ქართული სიტყვის დიდო ცაე...

ქართული სიტყვის რა დიდი ცაც არის, — ამ შემთხვევაში დიქციის მხრივ! — თუნდაც რუსთაველისა და სხვა ჩვენი თეატრები, ამ საყოველთაო უბედურებაზე მე უკვე ვწერდი და მის გამეორებას არც ახლა დავიზარებდი, რომ ვიცოდე, ვინმე კეთილი გამკითხავი გამოჩნდება და ამ წაქეულ საქმეს თუ ვერ წამოაყენებს, ყოველ შემთხვევაში შეეცდება მაინც, რომ წამოაყენოს.

ეროსი მანჯგალაძე კი თანამედროვე ქართველ მსახიობთა შორის (დაე, ცოცხლები ნუ მიწყენენ!) პირველი იყო, ვინც შემკობილი იყო იშვიათი ხმით, იშვიათი დიქციით და იშვიათი სცენური მომხიბლაობით.

მე, როგორც, ასე თუ ისე, მაინც გაგებულ მაყურებელს, რომელსაც თეატრმცოდნეობის პრეტენზიები არ გააჩნია, მანჯგალაძის ოდიპოსს უფრო მალლა ვაყენებ, ვიდრე დანარჩენი სამი ტიტანისას (ზორავა, ზაქარიაძე, ვასაძე)...

და ასეთ ბაჭადლო ტალანტს, მართლაც სტიქიურ, და არა ორგანიზებული წესით მიღწეულ ხალხისათვის სათაყვანოს, არ გავუფრთხილდით და, უფრო მეტიც, გული დავუჭიანეთ...

და როცა ასეთი მარგალიტი ხელიდან გამოგვეცლება, მხო-

ლოდ მაშინ შემოვირტყამთ ხოლმე თავში ხელებს და, ბევრიც მშობელ დედასავით აკვეთინდებით, ზოგიც — რიჩარდით (იმ შავ ღღებში „ერთი“ წერდა: „მე გეთხოვებით, ბატონო ეროსი, დიდი გულისტივილით, რომ ბოლომდე ვერ გაგიზიარეთ ჩემი სიყვარული, და დიდი სინანულით, რომ ველარასოდეს ვიმუშავებ დიდებულ მსახიობთან — ეროსი მანჯგალაძესთან“).

ზოგიერთი ადამიანის და მით უმეტეს მსახიობის გული ერთობ მგრძნობიარეა, სულ უმნიშვნელო ჩხვლეტასაც კი ხანჯლის დარტყმასავით განიცდის.

ამ თხუთმეტიოდე წლის წინათ თუკი შეიძლებოდა, როგორც რეჟისორს, ნამდვილად კი თეატრალურ ადმინისტრატორს, საბჭოთა ქვეყანაში არტისტისათვის დაწესებული უმაღლესი წოდება მიეღო, რაც ყველასათვის მოულოდნელი და განსაცვიფრებელი იყო („რა არ იკვაჭება ამქვეყნად!“), თუკი შეიძლებოდა ილიუზიონისტ კიოსთვის, რომელსაც საქართველოსთან, გარდა გასტროლებისა, არაფერი არ აკავშირებდა, არც დაბადება და არც მოღვაწეობა, — ჩვენი რესპუბლიკის ხელოვნების დამსახურებული მოღვაწის წოდება მიგვეერთმია (მივაქცევ თქვენს ყურადღებას, რომ, ამავე დროს, მე სადავოდ და სათუოდ არ მიმაჩნია ჩვენი მადლობის გამოხატულება მოსკოველი კლავდიუს პტიცასა და ლუდმილა ერმაკოვასადმი, — მათ მართლაც მიუძღვით ღვაწლი ქართული მუსიკის წინაშე), რატომ არ შეიძლებოდა გაგვეხარებინა ეროსი მანჯგალაძე, რომელსაც საამისოდ ყველაფერი უწყობდა ხელს — ცინცხალი ნიჭი, შემოქმედებითი სტაჟი, ხნოვანება (ხორავეს და ვასაძეს თიოქმის ბალერინებისათვის დაწესებულ ასაკში მინიჭათ საბჭოთა კავშირის სახალხო არტისტობა!)...

ეს კი სულ სხვა საკითხია, რომ ოფიციალური გამორჩეულობისათვის ნამდვილად ნიჭიერი, მართლაც შემოქმედი კაცი — რა დარგშიც უნდა იღვწოდეს! — გულს არც უნდა იტეხდეს; დასავლეთში წოდებებით არტისტების დახარისხება არ არსებობს, მაგრამ იქ მაინც ყველამ იცოდა, და იცის, ვინ იყო ჩაპლინი, ანა მანიანი, ჟან გაბენი და ვინ არის ლოურენს ოლივიე, სოფი ლორენი, გრეგორი პეკი... პიტერ ბრუკს არაფერი არ ემძღვარება გვარის წინ, მაგრამ...

ცონტრასტისათვის, ამონაწერი გაზეთ „კომუნისტიდან“:

„სპექტაკლი დადგა თეატრის სამხატვრო ხელმძღვანელ-მა და დირექტორმა, საქართველოს სსრ ხელოვნების დამსახურებულმა მოღვაწემ, საქართველოს კომკავშირის პრემიისა და საქართველოს სსრ სახელმწიფო პრემიის „ხუთწლედის მატინის“ ლაურეატმა გოგი ქავთარაძემ“.

გაეწიოთ ქალაქის ეკონომიო, მას კი, საერთოდ, რაში ვხარჯავთ?! — ვიდრე დამდგმელის გვარამდე მიაღწევდე, 29 (ოცდაცხრა!) სიტყვა უნდა ჩაიკითხო! სხვას რომ თავი დაე-ნებოთ, ეს ნიჟიერი რეჟისორი საქვეყნოდ დირექტორადაც, ე. ი. არსებითად სამეურნეო მუშაკადაც რომ არ მოვიხსენიოთ, ამით მის რეჟისორულ ნიქს რამე დააკლდება?!).

სხვათა შორის, არც ჩვენი ლადო მესხიშვილი იყო მთავრობის განკარგულებით „დამსახურებულიც“ კი, მაგრამ მის სახალხოობაში თავად ხალხს ექვი არ ეპარებოდა...

(კურიოზული მინი-ცნობა: 1930 წელს საქართველოს ცენტრალური აღმასრულებელი კომიტეტის დადგენილებით ვლადიმერ (ლადო) სარდიონის ძე ალექსი-მესხიშვილს მიენიჭა რესპუბლიკის სახალხო არტისტის წოდება...)

კი, მაგრამ ჩვენი „უკაზი“ მენშევიკების დროისათვის შეიძლებოდა ყოფილიყო უფლებამოსილი?! აკი მესხიშვილი 1920 წელს გარდაიცვალა! ამას უფრო ის ხომ არ აჯობებდა, რომ მისი საფლავისათვის მიგვეხედა, რომელიც, ფიროსმანისა არ იყოს, როგორღაც მიიკარგა...

ისე, კაცმა რომ თქვას, უნათესავებო, მიუსაფარი ფიროსმანის — კიდევ ჰო, მაგრამ... ლადო მესხიშვილის?! ლადოს შვილებმა მამის სიკვდილის შემდეგ კიდევ კარგა ხანს იცოცხლეს, შვილიშვილები კი სულ ახლახან მიიცვალნენ!..

აი ესეც ჩვენში ვითომ არსებული მიცვალებულის კულტი!).

ღიან, ნიჟიერ აღამიანებს ბუნება ძუნწად იძლევა, დიდად ნიჟიერთ კი — მეტისმეტად ძუნწად. მათ, რასაკვირველია, უნდა გაეუფრთხილდეთ, კრიზისულ სიტუაციაში კიდევაც მოვე-

ფეროთ და მივეუალერსოთ, ოღონდ ეს ისე არ უნდა გავიგოთ, რომ თავხედი ნიჭიერი თავზე დავისვით და „შენ გენაცვალე, შენი ჰირიმეს“ შეძახილებით მუდამ თავზე დასმული ვატაროთ, მონად ვექცეთ და ერთხელაც არ ვაგრძნობინოთ, რომ უტიფრობა და თავგასულობა ნიჭიერს მით უფრო არ ამშვენებენ.

არც ის უნდა დავივიწყოთ, რომ ესა თუ ის რეჟისორი შეიძლება მართლაც ნიჭიერი იყოს, მაგრამ ეს კიდევ იმას როდი ნიშნავს, რომ ყველა ნიჭიერი რეჟისორი გამოდგება მთავარ რეჟისორად და რომ ის თეატრს ღირსეულად წარუძღვება...

ვასილ ყუშიტაშვილი მარჯანიშვილის თეატრს მხოლოდ რამდენიმე თვე ედგა სათავეში, ის კი დიდი რეჟისორი იყო, და თუ დღეს ასეთად არ იხსენიება, — მარჯანიშვილისა და ახმეტელის შემდეგ არათუ მესამედ, საერთოდაც თითქმის არ იხსენიება, ეს იმით აიხსნება, რომ, ზოგიერთ სხვა გარემოებას რომ თავი დავანებოთ, მას, საწყალს, გულშემატკივარი ნათესავები არ დარჩენია, რომლებიც, მაგალითისთვის მოგახსენებთ, თუნდაც ნებას არ მისცემდნენ პატარა რეჟისორს და საკუთარი კეთილდღეობის მრავალწლიანი გეგმების ყოველთვის წარმატებით დიდ შემსრულებელს, — თავის ღროზე, ერთ-ერთი ჩვენი საზოგადოების თავმჯდომარეობისას, მისი (ყუშიტაშვილის) დაბადების მე-80 წლისთავი თუნდაც სულ მცირე შეკრებილობით მაინც აღენიშნა. და ეს მხოლოდ იმიტომ მოიმოქმედა, ურთიერთობაში პირდაპირობით ცნობილი, „ენაგესლიანი“ ყუშიტაშვილი არასოდეს მისი — არც კაცის და არც შემოქმედის — მაქებარი არ ყოფილა...



წარმოშობით ირლანდიელმა, მაგრამ საყოველთაოდ დიდ ინგლისელ დრამატურგად აღიარებულმა ბერნარდ შოუმ ერთხელ თქვა:

«Пьесы создают театр, а не театр пьесы».

ჩვენი დროისა და ჩვენი პატარა ქვეყნის წვრილფეხა და მსხვილფეხად მიჩნეული რეჟისორები, როგორც ჩანს, ამ აზრს არ იზიარებენ, — ზოგიც, ალბათ, უვიცობის, ყოველ შემთხ-

ვევაში დრამატურგიის სფეროში უვიცობის გამო, ზოგიც — ფულის იოლი შოვნის იმ წყურვილით, რომელმაც ჩვენი ცხოვრების ყველა კუნძულში შეაღწია და მას წინათ ხელოვნების წმიდა ტაძრად მიჩნეულმა თეატრმაც ვერ გადაუკეტა კარი.

თეატრისა და დრამატურგიის მრავალსაუკუნოვანი ისტორიის მანძილზე ერთი შემთხვევაც არ მოიპოვება, — მსოფლიოს რომელიმე თეატრში დაწერილიყო თუნდაც ერთი პიესა, რასაკვირველია, მხატვრულ ღირსებათა მქონე ისეთი პიესა, რომელსაც დროის თუნდაც სულ მცირე მონაკვეთისათვის გაეძლო.

ვერც ჩვენი თეატრალური ინსტიტუტის რექტორი და პრორექტორი, ორივენი პროფესორ-დოქტორები და ვერც მათ მიერ შებრაწულ-გამოცხობილი თეატრმკოდნეები დამისახელებენ, არათუ საქართველოში, — მის გარეთაც ერთ რეჟისორსაც კი, რომელსაც ოდესმე, თუნდაც ერთი ხეირიანი პიესა დაეწეროს (ბერტოლდ ბრეხტი თავდაპირველადვე ლიტერატორი და დრამატურგი გახლდათ, და მხოლოდ ამის შემდეგ ჩაუდგა სათავეში საკუთარ თეატრს, რაღა სხვებმა დაასახიჩრონ ჩემი პიესები, მე თავად დავდგამ მათ ისე, როგორც დამიწერიაო; ესევე ითქმის ელუარდო დე ფილიპოზეც).

ისეთმა ვეებერთელა კულტურის მქონემ, როგორც იყო ვლადიმერ ნემიროვიჩ-დანჩენკო, „მხატვის“ ერთ-ერთმა დამაარსებელმა და დიდმა რეჟისორმაც ფეხი მოიტეხა დრამატურგიის სარბოელზე. მისი ყველაზე საუკეთესო პიესაც კი — „Цена жизни“ — რუსული თეატრის დღევანდელ ისტორიკოსებსაც აღარ ახსოვთ და თითქმის აღარც ახსენებენ, ამ ბუმბერაზ თეატრალურ მოღვაწეს ჩრდილი რომ არ მიაყენონ...

რაკი ჩრდილზე ჩამოვარდა საუბარი, ბარემ იმასაც ვიტყვი, რომ ამ რამდენიმე წლის წინათ წიგნის ბაზარზე გამოჩნდა „მარჯანიშვილი როგორც დრამატურგი...“

ჩემს აზრს ამ ნაშრომზე არ გამოვთქვამ, — მე მგონია, ბევრად უფრო დამარწმუნებელი იქნებოდა აზრი მასზე ერთი ჩვენი დიდად პატივსაცემი, მართლაც ღვაწლმოსილი მეცნიერისა, რომელიც პირადად იცნობდა მარჯანიშვილს და მის მალმერთებლად დარჩა დღემდე: „გამოსცე წიგნი „მარჯანიშვილი როგორც დრამატურგი“, ეს იგივეა, გამოსცე... „მარჯანიშვილი როგორც

დურგალი“, ანდა, „მარჯანიშვილი როგორც კალატოზი...“ სწორედ ამას ჰქვია დათვური სამსახური...“

(სული მისწრებს, რომ „ამის“ გვარი დავასახელო, როგორც სარწმუნო ავტორიტეტისა, მაგრამ რაკი მან ეს თავისი მსჯავრი ჩურჩულით გაჰანდო, ვაითუ, ეწყინოს და სიბერეში თუნდაც ერთი წამით გული ვატკინო, მან ხომ მთელი თავისი ხანგრძლივი და ნაყოფიერი სიცოცხლე „არავის ვაწყენინოს“ დევიზით განვლო და, ღმერთმა ხელი მოუმართოს, გზა კიდევ ელის წინ!).

სიკვდილამდე ორიოდ წლით ადრე რუბენ სიმონოვს, ვახტანგოვის სახელობის მშენიერი თეატრის ხელმძღვანელსაც წასძლია სულმა და დაწერა პიესა „Жизнь...“ წაიკითხა კიდევ დასში და, რა გასაკვირია, ზარ-ზეიმით მიიღეს — თეატრი ხომ ყოველთვის იყო და, ახლა მით უმეტეს არის პირმოთნეობის, ფარისევლობის, შენობული ვერაგობის ბუნაგთა ბუნაგი... მაგრამ აი, დაიწყო რეპეტიციები და ეს ჩვენი სამართლიანად ქებული რეჟისორი და უსამართლოდ ნაქები დრამატურგი მსწრაფლ დარწმუნდა, რომ მისი ეს შედეგად მიჩნეული ნაწარმოები სხვა არაფერია, თუ არა დამწყები (და მწყები!) დილეტანტის კალმის ნათხუბნი და... როგორც ჰქვიაანმა სომეხმა. თავი ბოლომდე არ შეირცხვინა და რა ბრძანებითაც დაიწყო რეპეტიციები, იმავე ბრძანებით შეწყვიტა ისინი...

ღიას, რეჟისორების გადრამატურგება თვალუწვდენ რუსეთში, სადაც ოთხასამდე დრამატული თეატრია, ცხადია, ხდება ხოლმე, მაგრამ ხდება ეს იქ შედარებით მაინც იშვიათად, ჩვენში კი, საქართველოში, რამდენიც თეატრია, თითქმის იმდენივე რეჟისორი-დრამატურგი მოგვეპოვება!

ეს სენი ისე მოედო ჩვენს თეატრალურ სამყაროს, რომ იმის გაგებაც კი აღარ გვიკვირს, — ამა და ამ რუსული თეატრის მთავარი რეჟისორი წერს თურმე, ცხადია, თავის თეატრისთვის პიესასო.

აქ ორმაგი უბედურება ის არის, რომ ეს მთავარი რეჟისორი მწყრალად არის გრიბოდოვისა და ოსტროვსკის არათუ სამწერლო, — სალაპარაკო ენასთანაც კი და, საერთოდ, პირწმინდად ქართველი რეჟისორის ამ თეატრში მიყვანა, რაც გასაკვირი არც უნდა იყოს, აღინიშნა თეატრის ისეთი მკვეთრი დაქვეი-

თებით, რომ ახლა უკვე ბევრმა ისიც კი არ იცის, რომ თბილისის ამის და ამის სახელობის, ოდესღაც ცნობილი თეატრი კიდევ არსებობს თუ არა, თუმცა, საგაზეთო რეცენზიების მიხედვით, არათუ არსებობს, — შემოქმედებით ზენიტშია...

ისე კი, რეცენზიების მიხედვით, აბა რომელი თეატრი არ არის მხრებგაშლილ საქართველოში მხებჩამოყრილი?!

ერთმა (შ. მაჭავარიანმა) ოციანი და ოცდაათიანი წლების ქართული თეატრის ისტორია იმდროინდელ პრესაში გამოქვეყნებული, სწორედ რეცენზიების მიხედვით შეადგინა. ის რეცენზიები, ასე თუ ისე, შედარებით მაინც, ობიექტური იყო, მერე კი, ორმოცდაათიანი წლებიდან მოყოლებული დღევანდლამდე და, ეს საეჭვო არც უნდა იყოს, რომ მომავალშიც...

მოსკოვის ერთ-ერთ დიდ თეატრში ერთი ქართული პიესა დაიდგა. დადგა დიდად ცნობილმა ქართველმა რეჟისორმა ქაჩუცა ქაქუცაძემ... ბოღიში, ქაქუცა ქარაქუცაძემ.

მე გახლდით პრემიერაზე და, როგორც ქართველი კაცი სირცხვილით ვიწვოდი, თანაც გულის რომელიღაც კუნჭულში თითქოს მიხაროდა კიდევ, რომ ბუნებამ ერემია წარბას გარეგნობა არ მომშადლა, რომ რუს საზოგადოებას ერთბაშად ვეცნე ქართველად...

ღიახ, სცენაზე იატაკი არ ჩანგრეულა, თორემ ამაზე უარეს ჩავარდნას ძნელად თუ წარმოიდგენდა თეატრის რომელიმე მოყვარული, რაც, ნაწილობრივ, იმის ბრალიც იყო, რომ თვით პიესაც არ შეეფერებოდა ამ თეატრის მხატვრულ ტრადიციებს, — მაგრამ ქართულ გაზეთებში ამ უხეირო სპექტაკლის ირგვლივ ისეთი ბუკი და ნალარა დასცხეს, თითქოს მარჯანიშვილი და ახმეტელი ერთდროულად მკვდრეთით აღდგნენო და... პირველი „ურიელ აკოსტას“ ახლებურად დადგმას შეუღდა, მეორე კი — „ლამარასი“...

ამაზე უფრო ადრე კი, მოსკოვში მუდმივად მცხოვრები, ერთი ჩვენებური მეწვრილმანე ეურნალისტი, მოსკოვის სხვა თეატრში და სხვა ქართული პრემიერის „არაჩვეულებრივ წარმატებას“ იმითაც გვიტკიცებდა, რომ... სპექტაკლის დამთავრების შემდეგ ქუჩაში გამოსული აღფრთოვანებული მაყურებლები ტკბილ ხმაზე მღეროდნენ თურმე სპექტაკლიდან გამოყოლილ ქართულ სიმღერას...

გჯერათ კი ამის, ჩემო სულგრძელო და არცთუ ყველაფრის ჩამყლაპავო მკითხველო? „უუუუნა წვიმა მოვიდას“ დასწავლას თვით პროფესიონალი მსახიობებიც კი ორ თვეს მოუნდნენ და... თეატრში ალაღბედად მოსულმა მოსკოველებმა სპექტაკლში ერთხელ ნამღერი და ერთხელ მოსმენილი ქართული სიმღერა რა ჯადოთი დაიხსომეს ისე, რომ პუშკინის მოედანზე, გვიან ღამით (პიესა სამმოქმედებიანი გახლდათ!), დეკემბრის 30-გრადუსიან ყინვაში დააგუგუნეს, ა?!

ამიტომაც...

შთამომავალნო! ამ და სხვა მრავალზე მრავალთა ცაში ამყვანი თეატრალური რეცენზიების არაფერი დაიჭროთ და არ ენდოთ მათ! ამ ქება-დიდების ნიაღვარში წმინდა წყლის მხოლოდ ერთი-ორი წვეთი თუ გამოერევა, — მეტი არა! უსაშველო სიყალბე და უსირცხვილო ტყუილი, რაც დაფუძნებულია „აქედან რას გამოვჩეხების“ პრინციპზე, — მათი მამოძრავებელი ძალაა, ბევრ შემთხვევაში კი ამ „თხზულებათა“ არაგულწრფელობას და წინასწარ გამიზნულ პირობათნობა-მლიქვნელობას ავტორების უფიცობა და უგემოვნობაც ემატება.

(ღმერთო დიდებულო, რას ვიფიქრებდი, თუ ამ სტრიქონების დაწერიდან სამიოდე თვის შემდეგ მომიხდებოდა ამ გვერდის შევიწროება და მიწევ-მოწევა, რომ რამენაირად მომენახა ადგილი უახლესი პრესის ბადეში გაბმული ღლავისათვის:

„აგერ ოცი წელია გასული იმ ამბიდან. გვიან ღამით მოსკოვის მეტროთი ვმგზავრობდი. გაჩერებაზე ვაგონში ახალგაზრდების მოზარდილი ჯგუფი შემოვიდა. სიცილით, ხმა-მალლა ლაპარაკით ერთბაშად მიიქციეს ყურადღება. გატაცებით ყვებოდნენ მხიარული სპექტაკლის შესახებ, რომელიც ახლახან ენახათ ოპერეტის თეატრში. საუბარში ქართული სახელები მომესმა. ერთმა ქართული მელოდიაც წაილიღინა. გულმა არ მომითმინა და საუბარში ჩავეერიე. როცა გაიგეს, ქართველი ვიყავი, ერთმანეთს არ აცლიდნენ, ისე

მიამბობდნენ ქართული ოპერეტის შინაარსს, აღტაცებას გამოთქვამდნენ, რატომღაც მე მიხდიდნენ მაღლობას.

პიესის ავტორი ვიკითხე და, ჩემდა გასაკვირად ერთმაც ვერ მითხრა.

— რაღაც უცნაური გვარია... ხან... ხუნ... — ენა წაიტეხა ერთმა“. (გაზეთი „თბილისი“, № 135, 1982 წ.).

არ ვიცი, მკითხველს; ამ გრძელ ამონაწერში რომელ გრძელფეხებიან ტყუილზე შევაჩერო თქვენი ყურადღება...

ახალგაზრდები სიცილ-კისკისით ხმამაღლა ლაპარაკობდნენო (ხმამაღლა ლაპარაკს თბილისის მეტროშიც კი ერიდებიან ჩვენი თავგასული ბიჭბუჭები)...

ერთმა ქართული მელოდიაც კი წაიღიღინაო (ეს არაფერი, რომ გლინკასავით ასე უცბად დაიხსომა, ოღონდ ამღერება მოსკოვის მეტროში... არა, ეგებ იტალია-რომში მოხდა ეს ამბავი, ა?!

თანაც, როცა გაუგიათ, რომ ეს შემთხვევითი მათი თანამგზავრი, თურმე ქართველია, ო, ისე გაიხარეს, თავიანთი გაჩერებებიც გადაავიწყდათ და...

არა, მე მგონია, ჩვენი მემუარისტი, ზედმეტ თავმდაბლობას უნდა იჩენდეს, თორემ შეუძლებელია, რომ მოჩინურო ხან...ხუნის მეგობარი ამ აღფრთოვანებულ მელომან ჰაბუკებს და ქალიშვილებს სასტუმრომდე არ მიეცილებინათ და იქ, რესტორანში, მის გასამასპინძლებლად მთელი თავიანთი სტიპენდია არ მიეფშვნათ!

მკითხველს არც იმას დაეუმალავ, რომ მიუხედავად ჩემი სიმპათიისა კომპოზიტორ „ციბ...ცაბისა“ და ლიბრეტისტ „ხან...ხუნისადმი“, ჭეშმარიტებას მაინც ვერ ვულალატებ და ვიტყვი, — სინამდვილეში ეს ოპერეტა, სამწუხაროდ, ისე „გახმაურდა“, რომ შეიწირა კიდევ მისი დამდგმელი, ცნობილი მომღერალი ვლადიმერ კანდელაკი; მოსკოვის ოპერეტის თეატრის მთავარი რეჟისორობიდან იგი, „რბილად“ რომ ვთქვათ, გადააყენეს, „მაგრად“ რომ ვთქვათ, მოხსნეს.

ასე რომ, ძვირფასო შთამომავალნო, თქვენი დღევანდელი წინაპრების მოგონება-მემუარებსაც თვალი ეჭვით შეავლეო ხოლმე!).



მე არ ვიზიარებ იმ დებულებას, თითქოს დრამატურგად უნდა დაიბადო...

არა, დიდ დრამატურგად, ისე, როგორც დიდ პოეტად, დიდ ორატორად, დიდ მსახიობად, დიდ მუსიკოსად, დიდ მხატვრად, რასაკვირველია, უნდა დაიბადო, მაგრამ...

რაკი საუკუნეში ასეთები ერთეულები იბადებიან, მარტო მათ იმედად, ცხადია, ხალხი ვერ დადგება. ამიტომ რაკი მოთხოვნილება შობს მიწოდებას, ცხადია, პატარებიც ეცდებიან (და ცდილობენ კიდევ) დიდების ადგილი დაიკავონ (იკავებენ კიდევ!).

რუსთაველის თეატრის ასი წლის იუბილესთან დაკავშირებით...

ბოდიშს ვიხდი, რომ ამ ფრაზას არ ვამთავრებ, აკი ამ იუბილეს ჩატარების დღიდან დრო თუმცა საკმაოდ ბევრი გავიდა, მე მაინც ახლაც მეხამუშება ეს... რუსთაველის თეატრი ასი წლისააო!

საიდან სადაო, წმინდა საბაო!

ახმეტელმა 1934 წელს იზეიმა მისი მხოლოდ ათი წლისთავი, სულ რაღაც ორიოდ წლის წინათ კი საზღვარგარეთ გასტროლების გამო გამოსულ ბუკლეტ-პროსპექტებში გვეუბნებოდნენ, რუსთაველის თეატრი თავის დასაბამს იწყებს 1922 წლიდან და, მაშასადამე, წლეულს შეუსრულდებოდა მას სამოცი წელი, როგორც მუდმივ, უწყვეტ, ერთიან თეატრალურ ორგანიზმს და, თუ გნებავთ, ჩვენთვის ყველასათვის ნაცნობ და საყვარელ შენობაში მყოფს...

ეს მიბრძანეთ, ხელოვნურად რომ არ დაგვემრგვალებინა ეს ასი წელი და სულ ცოტა ხნის შემდეგ გვედღესასწაულა მისი მესამოცი წლისთავი, ამით რუსთაველის თეატრის სახელსა და დიდებას ვითომ რამე დააკლდებოდა?! ერთგვარი შეჭიბრების სურვილმა ხომ არ გვიბიძგა და მაგალითი მოსკოვის თეატრალური ინსტიტუტის პროფესორ გევორქ გოიანისაგან ხომ არ ავიღეთ, რომელმაც რაკი იცოდა, რომ მის დიდტანიან ნაშრომს არასომეხი მკითხველი თავს არ მიაბტვრევდა, — წიგნის მალაზიების ვიტრინებში სათაურს ხომ მაინც წაიკითხავენო და... „2000 лет армянского театра“ შეარქვა?!
ისტორია უნდა იყოს მართალი, მით უმეტეს გუშინდელი

დღის ისტორია, რომლის თანამედროვენი ბევრი ახლაც ცოცხალია.

აი, ეკითხოთ, თუნდაც, როგორც ადრე მოგახსენებდით, აშუამადაც გონებაგაუცვეთელ 95 წლის ბატონ აკაკი შანიძეს, რომელი წლიდან ახსოვს რუსთაველის სახელობის თეატრი?

ისტორია არ უნდა იწერებოდეს იმის იმედით, ჩვენ ჩვენი ვთქვათ, და... აბა, შედავებას ვინ გავვიბედავსო; ეს დღეს კი, მაგრამ... ხვალინდელი ისტორია ამას გაბედავს, რის დამადასტურებელი ფაქტები ათობით შემიძლია დავასახელო, მაგრამ საამისოდ ენგურის ქალაქი, რომელზეც ეს სტრიქონები იწერება, არ გამოდგება: იგი სირცხვილით არ წითლდება.

დღესასწაული, აბა, რის დღესასწაულია, თუ იმ დღეს რამე სასწაული არ მოხდა!.. შარშანდელი ფაზისობაც ვერ ასცდა ამ „ღვთის რისხვას“:

„— მე ვალში ვარ ჩემი ქალაქის წინაშე, — თქვა გრძნობამორეული პროფესორმა პავლე...“

კონსერვატორიის ამ პატივსაცემი პროფესორის გვარს გამოვტოვებ და იმ ქურნალისტი ქალის გვარსაც არ დავასახელებ, რომელიც ასევე ჰარბად გრძნობამორეული განაგრძობს, თავის მხრივ, კალმის მოსმას:

„პატივცემული პავლე ახლა არქივში მოძიებულ მასალებზე მუშაობს, რომლებითაც ირკვევა, რომ პირველი საბავშვო თეატრი რესპუბლიკაში ფოთში ყოფილა“.

ასე რომ, იუბილეებისაგან დაღლილ-მოქანცულ ძვირფასო მკითხველო, ჯერ ნუ ჩაიმუხლებ და მოსვენებას ნუ მიეცემი, ერთი დიდებული იუბილეს, როგორც ჩანს, კარზეა მომდგარი: ქალაქ ფოთის არქივში უკვე აღმოუჩენიათ საქართველოში პირველი საბავშვო თეატრის არსებობის დამამტკიცებელი სიგელ-გუჯრები და ახლა ისღა დარჩენიათ დაადგინონ, როდის — ასი, სამასი, ხუთასი, ათასი თუ ორი ათას ხუთასი წლის წინათ აიხადა ამ თეატრის ფარდა, ფაზისელი გოგონებიქუნებისათვის რომ ეჩვენებინათ „კომბლე...“

ჰო, „კომბლე“, ოღონდ ნახუცრიშვილისა კი არა, — ხუცი-
შვილისა!..

ო-ო, თქვენ არ იცით, ფოთის არქივის დამტვერილი თარო-
ები რამდენ საიდუმლოს იტევს, — აი, ნახავთ, ასეთი დრამა-
ტურგიც თუ არ აღმოჩნდეს, ოღონდ...

ეძიებდეთ და პოეზებდეთ! ეძიებდეთ და პოეზებდეთ,

და მაშინ ვალი მოხდელი გექნება შენი მშობლიური ქალა-
ქის წინაშე!..

ჩვენი დროის თუკიდიდებმა და პლუტარქებმა ყველაფრის
უარმყოფლის იარლიყი რომ არ მომაკრან, ვჩქარობ იმის თქმა-
საც, რომ ჩვენი თეატრალური საზოგადოება მართლაც რომ
ასი წლისაა, ამაში ნატამალი ეჭვიც არ შეპარება, აქი გარდა
ცოცხალი მოგონებებისა, ამის ისტორიული დოკუმენტიც არ-
სებობს, რომელსაც არქივებში არავის ქექვა არ სჭირდება.

— — —

რუსთაველის თეატრის ასი (!) წლის იუბილესთან დაკავ-
შირებით თავად რუსთაველის თეატრიდან ერთი ისეთი ფრთი-
ანი ორიგინალობის პრეტენზიის მქონე ფრაზა გადმოისროლეს,
რომელსაც, ჩემი ფიქრით, მომაბეზრებლადაც ისე ხშირად იმე-
ორებდნენ, თითქოს რალაცაში ვილაცას ბრალი დასწამეს და
ახლა თავს იმართლებსო:

„თაობა მიდის, თაობა მოდის!“

რაიმე ახალი ამით თითქოს არაფერი თქმულა, ეს ბუნების
წესია, რომ თაობა მიდიოდეს და თაობა მოდიოდეს, ოღონდ
ეს კია, ადამიანებისთვისაც და ბუნებისთვისაც, ცხადია, დიდად
სამწუხარო და დასანანი იქნებოდა, თავიანი თაობა თუ წავი-
დოდა და უთავო მოვიდოდა, ანდა თავიანი თაობის წასვლას
უთავო თაობა თუ დააჩქარებდა...

ანალიზის ნიჭი თანდაყოლილია და, დავფარავდი კიდევ,
რომ ეს მოსახერხებელი იყოს, — მე საამისო უნარი არ დამეცა,
ამიტომ გადაჭრით ვერც იმას ვიტყვი, მაგალითად, ახმეტელის,
როგორც თაობის წასვლა, რა „თავის“ თაობამ დააჩქარა („1935
წელს ახმეტელი ტოვებსო თეატრს“, — არა, ახმეტელს თეატ-
რი დაატოვებინეს!), ანდა, მიხეილ თუმანიშვილის წასვლა და,

შემდეგ, მისი შესაძლებელი დაბრუნება რომელმა თაობამ... შეაბრუნა?!

ჩემი თაობის დრამატურგები, ამ მხრივ, ბედნიერები ვართ: ჩვენ არავითარი თაობა, არც თავიანი და არც უთავო, წინ არ გვისწრებდა, სამაგიეროდ ჩვენ ერთი ისეთი თავი გვყავდა, რომელიც, — როგორც ხშირად გვაყვებოდნენ, ჩვენი ჭიალუობა რომ არ დაგვეიწყებოდა, — მთელ ჩვენს თაობას იწონიდა: თითქმის ნახევარი საუკუნის განმავლობაში გრანიტის კვარცხლებეზე შემდგარი ეს დიდი თავი, რომელიც, სხვათა შორის, თავისი უმცროსი — ნიჭით და სახელით! — თანამოდმეებისას არც არაფერს კითხულობდა და არც არაფერს ნახულობდა, ერთს კი, სულ პატარას (ტანით!) ისიც კი უთხრა, შენი ნაგავიც უნდა იდგმებოდეს, აბა მარტო მე ხომ ვერ ამოვავსებ ქართული თეატრის რეპერტუარსო...

ამის თქმის უფლება, ალბათ, ჰქონდა კიდევ, აკი მთელი მსოფლიო დრამატურგიის ძველსა და ახალ ისტორიაში იგი პირველი იყო, რომელიც სიცოცხლეშივე, თანაც ადრეულ, 35 წლის ასაკში, მესამე პიესის დაწერისთანავე გამოაცხადეს ცოცხალ კლასიკოსად...

არ ვიცი, რამდენად არის ეს კანონზომიერი, ეს კია, სიცოცხლეში დადგმული ძეგლები სიკვდილის შემდეგ როგორღაც ნაცემივით გამოიყურებიან. რუსთაველის თეატრმა ორი მისი ადრინდელი, სახელგანთქმული კომედია დადგა, ორივე დადგეს ნიჭიერებით. დიდად სახელგანთქმულმა-რეჟისორებმა, მაგრამ ორივეში ღიმილს მხოლოდ რეჟისორების მიერ ჩართული სცენები იწვევდნენ: პირველში — უსიტყვო, ქალების ჩხუბი, მეორეში კი... მეპატიოს გამეორება: საიდან სადაო, წმინდა საბაო! — სულ სხვა ავტორის — ეროვნებითაც და დრამატურგიული ხელწერითაც, — პიესიდან ამოღებული დიდი, სცენა-მონოლოგი!

ძველად ამბობდნენ, ყველა გზა რომისკენ მიდისო. მე ვფიქრობ, რომაელები ცდებოდნენ: ყველა გზა მიდიოდა (და მიდის!) სასაფლაოსკენ!

და ჩემი თაობის დრამატურგები, — მით უმეტეს მის მერე, როცა ჩვენმა დიდმა წინამძღვარმა დაგვაობლა, რის შედეგადაც კიდევ უფრო დაეცა თეატრალურ ბაზარზე ჩვენი, ჭიალუა

დრამატურგების, მაზანდა, — უკვე დროა თითქოს, რომ უკანას-
კნელ გაჩერებას თვალს ვუსწორებდეთ, მაგრამ...

მაგრამ არა!

და ამის მიზეზი ის გახლავთ, რომ ჯერ კიდევ არ ჩანან მე-
სამე ზარის ჩამომკვრელნი!.. აკი სამიოდე მეზარე — ეს კიდევ
არ არის მთელი თაობა, სამიოდე მეზარე სულაც არ კმარა პა-
ნაშვიდის გადასახდელად, და არც წესის ასაგებად, რათა ერთს
გზა დაულოცო საიქიოსკენ, მეორეს კი მიულოცო — სააქაოს-
კენ!..

მაგრამ ვინც უკვე მოვიდა, და მათაც, ვინც უკვე გზაშია
და მოდის, მე მათ მთელი გულით მივესალმები, — წრფელი
გულით მივესალმები, — წრფელი გულით იმიტომ, რომ ყო-
ველივე ქართული, რაღა თქმა უნდა, მხოლოდ კარგი და მოსა-
წონი, მე გულით მახარებს, მე ამით ვცოცხლობ.

ცხოვრების ყველა სფეროში, და არა მარტო დრამატურგი-
ასა და თეატრში, — ახალი, გონებით და ჯან-ღონით სავსე
ახალგაზრდობა თუ არ მოვიდა, ეს ნიშნავს ერის, ამ შემთხვე-
ვაში, ჩემი საყვარელი ერის დაბერებას, ორივე ჩემი „შავი
წიგნი“ კი, ალბათ დამეთანხმებით, ამ დაბერების, რომლის ბუ-
ნებრივი დასასრული სიკვდილია, — თავიდან ასაცილებლად
არის მიმართული.

ყოველ დროში ახალგაზრდობას ახალი სუნთქვა, ახალი
სურვილები, ახალი მგზნებარება შემოჰქონდა ცხოვრებაში,
კერძოდ, იმ დარგებში, რომლებიც ამ წუთში ყველაზე მეტად
გვაინტერესებს, — თეატრსა და დრამატურგიაში...

ასეა, ალბათ, ახლაც, ყოველ შემთხვევაში ასე უნდა იყოს,
ოღონდ ყველაფერი ახალი როდია ახალი, თანაც არსებობენ,
კერძოდ, მორალის მარადიული კანონები, რომლებიც არავი-
თარ გადახედვასა და განახლებას არ საჭიროებენ, ადამიანის
ბუნებაში მათ დანერგვასა და დამკვიდრებას კაცობრიობამ მი-
ლიონი წლები შეაღია და ახლაც მათი შეცვლა-დამხობა, ახლის
ძიებისა და პიროვნების თავისუფლების მომიზეზებით, ვერა-
ფერი ნიჭიერებისა და ვერაფერი ორიგინალობის მაჩვენებე-
ლია.

რუსებს აქვთ ერთი მშვენიერი სიტყვა... უფრო სწორად,
ის სიტყვა თავისთავად მშვენიერი კი არ არის, — მშვენიერად

გამოხატავს ნაბეჭდი ან ცოცხალი სიტყვით უკვე უხსოვარი დროიდან გაადამიანებული ადამიანის, და მერე კი პირუტყვის ღონემღე დასულ მოქცევას სექსუალურ სფეროში — пошлость, пошлятина. ჩვენ მას უხამსობას ვეძახით... ფსიქიატრიაში იგი ექცისბიონიზმის ტერმინით არის ცნობილი და, საერთოდაც, იგი მთლიანად და სრულად ფსიქიატრიას მიეკუთვნება და არა ლიტერატურას და მით უმეტეს თეატრს, სადაც ათასი თვალი და ათასი ყური მიდარაჭებულია, რას იტყვი და რას აჩვენებ...

მე არ ვიცი, რა ხნისაა „შეშლილი ახალი წლის“ ავტორი, ვეარაუდობ, რომ ახალგაზრდაა, აკი დიდ აფიშაზე მისი გვარი პირველად გამოჩნდა, სამაგიეროდ დანამდვილებით ვიცი, რომ ეს პიესა ჩვენს უპირველესი სახელგანთქმული, აკადემიური, ასო (!) წლის ისტორიის მქონე რუსთაველის სახელობის თეატრის სცენაზე იდგმება, და რომ ის, ცხადია, ბევრი კირკიმალის შემდეგ, ჯერ თვით თეატრის რაფინირებული გემოვნებით ცნობილმა ხელმძღვანელმა არათუ მიიღო, — ალბათ შეასწორა-შემოასწორა კიდევ, და მერე კულტურის სამინისტრომ მისცა ვიზა, და რომ მერე მას ეძღვნა აღფრთოვანებული რეცენზიები...

ასეთი საერთო მოწონების ღირსი არის კიდევ, ალბათ, ეს სპექტაკლი, აკი ის თითქმის დღეგამოშვებით იდგმება, მას დილის წარმოდგენადაც უშვებენ ბავშვებისათვის (იხილე განცხადება 1982 წლის 5 იანვრის გაზეთ „ნორჩ ლენინელში“)...

პიესის ავტორზე მტკიცედ და გადაჭრით ვერაფერს ვიტყვი, აკი პიესა ჯერ დაუბეჭდავია და არ წამიკითხავს, ამიტომ არც ვიცი, რაში სცოდავს იგი და რაში სცოდავს თეატრი, მაგრამ სპექტაკლის დამდგმელ, მიმღებ და სიხარულით აყლოჭინებულ რეცენზენტთა გასაგონად კი ვიტყვოდი:

— დარბაისელნო! დასავლეთში უკვე კაი ხანია მოთავდა ეგრეთ წოდებული სექსუალური რევოლუცია, რომელმაც თურმე მრავალსაუკუნოვანი ბორკილები აპყარა ადამიანს წელს ქვემოთ, სქესის სფეროში და მიაღწია საუკუნოვან ოცნებას — გაეთანაბრებინა იგი პირუტყვთან, და ის სექს-ფილმები, რომელთა სანახავად

უცხოეთში მოხვედრილი ზოგიერთი ჩვენებური ტურისტო. მის ხელთ რაც არის — იმ მცირეოდენ ვალუტასაც არ იშურებს, და რომელთა სანახავადაც იმ ქვეყნის მკვიდრნი კი სალამოს დროსაც აღარ კარგავენ, არ • ფერი გადმოსატანია ჩვენს მიწა-წყალზე, მით უმეტეს თეატრში, ორჯერ მით უმეტეს — ჩვენს პირველ თეატრში, ეროვნულ ტაძრად რომ უნდა ითვლებოდეს!

ექვი არ მეპარება, რომ ეს „წამყვანი ამხანაგები“ ამ ჩემს ნათქვამს ყოვლად ჩამორჩენილობასა და ბერიკაცულ ბუზღუნში ჩამითვლიან...

არა, ასეთი „დედღური“ მოსაზრება, ახლა როდის მწვევია, სიბერეში, რომელსაც უკვე აღარ ეთანამგზავრება ერთი მწერლის სხარტული გამოთქმა, — როცა სისხლი ღელავს, ენა ფიცით არ იღლებათ. არა, მე ეს ჯერ კიდევ ცხოვრების გარიყრაჟზე, ადრიან ახალგაზრდობაში ციცერონმა ჩამაგონა:

«Делать не постыдно, а говорить и показывать непристойно».

„შეშლილ ახალ წელიწადში“ კი სქესობრივი აქტი... თუნდაც მისი შორეული იმიტაცია ისე უგვანოდ და ურცხვად არის ნაჩვენები, იფიქრებ, აქამდე რომ გვეგონა, ეს ორი ადამიანის, ქალისა და ვაჟის საიდუმლო სერობას უნდა წარმოადგენდესო და მისი საჯაროობა კი...

ჰო, მაგრამ, მატებს კი მაინც რამეს ასეთი „მხატვრობა“ პიესის სიუჟეტს. ამდიდრებს და ამრავალფეროვნებს კი პერსონაჟების ხასიათს?!

დაბოლოს, ეს უნდა გავხადოთ, ეს უნდა ვაქციოთ ხელოვნების საგნად? მაშინ ძაღლებზე უკეთეს ხელოვანთ ადამიანებში განა მოვნახავთ?!

ამ სპექტაკლის უნახავი მკითხველი, ვფიქრობ, ახლა უკვე მიხვდება, რატომ აჩვენებს თეატრი მას თითქმის დღეგამოშვებით, და რატომ იყიდება მასზე ბილეთები პირდაპირ სალაროში, და არა ბილეთების გამავრცელებლების ძალდატანების წყალობით (ჟრომლისოდაც, სხვათა შორის, ჩვენი დიდი თეატრებიც კი, მე-19 საუკუნის მიწურულს მოქმედი, დიდი ჭიხაიშის სცენისმოყვარეთა ფაციას თ ი ა თ რ ი ს დღეში ჩავარ-

დებოდნენ და მათი ხელმძღვანელებიც არ დააყოვნებდნენ პროფესიის გამოცვლას).

კი, მაგრამ... აქვს კი რაიმე ფასი ასეთი „სანახაობით“ თეატრში შემოტყუებულ მაყურებელს? ამას ჰქვია „Высшая инстанция для решения жизненных вопросов?“

ეს არის თეატრი-ტრიბუნა, თეატრი-კათედრა?! ამის ჩვენებალა აკლია ჩვენს ახალგაზრდობას, რომლის ზნეობრივი დონე არასოდეს ყოფილა ისე დაცემული, როგორც არის ამჟამად?!

ეს ჩემი „ცილისწამება“, უეჭველია, არ მოეწონება ერთ ჩვენს მეცნიერს, რომელმაც ტელევიზიით გვამცნო, ჩვენ შესანიშნავი ახალგაზრდობა გვყავს, ოღონდ მასში ერთი-ორი ზარმაციც ურევიაო...

კი, მაგრამ თუკი სანატრელად და საოცნებოდ გადაგვექცა, რომ ჩვენი შვილები არ გახდნენ ხულიგნები, ლოთები, მორფინისტები, ქურდები, ავაზაკები, მკვლელები — ერთ-ორ ზარმაცზე ღირს კი ყურადღების შეჩერება?! ანდა ეს... „ჩვენ შესანიშნავ აწმყოში ვცხოვრობთ და მერმისი მასზე უფრო დიდებული გველოდებაო“. რაკი ასეა, განა არ აჯობებდა, შესანიშნავ აწმყოში მცხოვრებთ დიდებულ მერმისზე ფიქრით ტვინი აღარ დაგვექანცა?!

(გ ვ ი ა ნ დ ე ლ ი მ ი ნ ა წ ე რ ი : 17 აგვისტოს საღამოს ათის ნახევარზე (მოსკოვის დროით) ოსტანკინოს საკონცერტო დარბაზში ლენინგრაძელი ნაომარი მწერალი დანიელ გრანინი შეხვდა მრავალრიცხოვან მკითხველთა აუდიტორიას; თუ რა მასშტაბის მწერალია თავად გრანინი, ამის მიხვედრა თუნდაც იმიტაც შეიძლება, რომ რუსი მწერლებიდან ამ დარბაზში პატარას და საშუალოს კაციშვილი არ გააქაჟანებს!

ჰოდა, ერთ-ერთ შეკითხვაზე, როგორ უყურებთ თანამედროვე ახალგაზრდობასო, გრანინმა ასე უპასუხა:

— Как я смотрю? Ну, как вам сказать... Не очень спокойно... Посудите сами: мы плохо работаем, о-очень плохо работаем. Второе... Не знаю, как у вас в Москве, а у нас, в Ленинграде, каждый второй брак оканчивается разводом... В-третьих, — пьянство...

როგორც ხედავთ, ამ მოკლე პასუხში მოურიდებლად არის ხაზგასმული არცთუ სახარბიელო მდგომარეობა შრომის, ზნეობის, „სულიერი გართობის“ სფეროებში... და თუ ვისმე ეპკვი შეეპარება გრანინის სიტყვების ჩემ მიერ გამუქებაში, — შეუძლია შეამოწმოს, ამიტომაც მიუუთითებ კიდევ ასე ზუსტად თარიღსა და დროს, თანაც იმასაც დავძენდი, რომ ეს არ იყო პირდაპირი გადაცემა, მსგავსად ფეხბურთის მატჩისა, რომლის სტიქიურობა ცენზურის მიღმა რჩება ხოლმე).



მარჯანიშვილის თეატრის ახლად დანიშნულმა ხელმძღვანელმა თემურ ჩხეიძემ, მე და ჩემისთანა დრომოკმულ-დახავსებულნი დიდად გაგვახარა პრესაში გამოქვეყნებული იმ საპროგრამო აზრით, რომ მას უნდა შექმნას ფსიქოლოგიური თეატრი. მაგრამ თეატრი არსებითად ხომ ახალგაზრდობისათვის არის განკუთვნილი, და არა ხანდაზმულთათვის, და რა ბედნიერება რქნებოდა, თუ მას, ფსიქოლოგიური თეატრის მეშვეობით მოვაქცევდით ფაქიზი და ხალასი გრძნობების, დიდი, საერო ფიქრების სამყაროში, შევძრავდით მის სულსა და გონებას, რასაც ვერ შეძლებს, უკვე თავისი ჟანრობრივი პროფილის გამო, ვერც ცირკი და ვერც მუსკომედია, ვერც გამაყრუებელი ელექტროგიტარა და ვერც მეცო-ხრინწოს ხმის მფლობელი მიკროფონაძე...

ისე კი, ამასაც შევნიშნავდი, ყოველი ნამდვილად დრამატული თეატრი არ შეიძლება არ იყოს ფსიქოლოგიურ საწყისებზე დაფუძნებული, ყოველ შემთხვევაში ასეთი იყო ერთ დროს მოსკოვის სამხატვრო თეატრი და ასეთი იყო, კერძოდ, მარჯანიშვილის სახელობის თეატრიც...

ცხადია, ორი-სამი, დაწყებითი სპექტაკლით ფსიქოლოგიური თეატრი ასე ერთი ხელის დაკერით არ შეიქმნება, საამისოდ, უპირველეს ყოვლისა, სათანადო რეპერტუარია გამოსაძებნი.

ამ მხრივ კი, ცხადია, აბა, ვინ შეიძლება უკეთესი ავტორი მოინახოს, ვიდრე ილია ჭავჭავაძეა?! ილიას კი ძებნა არც სჭირდება, კაცი-მთა, დიდი მთა მარად აზიდულია ჩვენ თვალწინ, უფრო მეტადაც კი, ვიდრე მყინვარი, აკი მყინვარს დროდადრო

ნისლი ფარავს, ილიას კი ვერც ნისლი და ვერც ღრუბელი მუხ-
ლებამდეც კი ვერ უბედავენ დაჩრდილვას.

მით უმეტეს, თეატრმა არ უნდა შეჰკადროს ეს, თანაც
ისეთმა ხელოვანმა, რომელიც, თითქოს, მის ყოველ სიტყვას
საკუთარი თვალისჩინივით უფრთხილდება (ჩვენი ქართული,
ლიტერატურული, ნაბეჭდი ქართული ამ ორმოც წე-
ლიწადში, მთელი ჩვენი ხალხის საბედნიეროდ, ისე დაიხვეწა
და ისე ჩამოყალიბდა, რომ ახლა აღარც ილია დაგვიწერდა
„ასის წლის წინათ“ და არც „თარგმანს ინგლისურიდან“),
მაგრამ, თუკი მაინცდამაინც არჩევანზე მიდგება საქმე, რო-
გორც ჩანს, უფრო აჯობებს დიდი მწერლისას აზრს უფრო
ვუფრთხილდებოდეთ, ვიდრე ცალკეულ სიტყვას...

როცა შენ კლასიკურ ნაწარმოებში, რომელიც ყოველმა
ჩვენგანმა ზეპირად იცის, ლუარსაბის რძლის, ელისაბედის
როლს თანამედროვე კოსტუმში გამოწყობილ მსახიობ-ვაჟს
ათამაშებ, რომლის ქალობაში გინდა დამარწმუნო მისი ჰიპერ-
ტროფირებული ქალური მანკვა-გრეხიანობით, ბაკენბარდებიან
თავზე კოპლებიანი თავსაფრის მოხურვით, — რად მივიღოთ,
ბატონო, ეს, ილია ჭავჭავაძისადმი ფანტიკურ ერთგულებად
თუ ილია ჭავჭავაძის ნოვატორულ, ახლებურ წაკითხვად, ან
ეგებ, იმ ღრმა ფსიქოლოგიზმად, რომელსაც ჩვენი შიდაწნევით
გამხმარი თავის ქალა ასე იოლად ვერ ჩასწვდება?!

შეიძლება ამ მსახიობმა-ვაჟმა, ქალების როლის უბადლო
შესრულებით, თქვენი ყურადღება ჯერ კიდევ თეატრალურ ინ-
სტიტუტში მიიქცია და არ გინდათ ასეთი ნიჭი დაიკარგოს და
გინდათ, რომ ის გამოჩნდეს თეატრის ზოცვარულთა სასიხარუ-
ლოდ...

ამ კეთილშობილურ განზრახვას, აბა, ვინ ერთი დაგიწუ-
ნებთ, მაგრამ... დაგედგათ, ბატონო, მაშინ, სპეციალურად მის-
თვის, წარსულში დიდად ცნობილი ინგლისური კომედია „ჩარ-
ლის დეიდა“ და არა „კაცია-ადამიანი?!“

(სულ უახლესი მინი-ცნობა:

1 Протест драматурга

Сэмюэль Беккет наложил авторское вето на по-
становку его пьесы «В ожидании Годо» в западно-
германском городе Касселе. Режиссер этого театра

вознамерился провести эксперимент и отдал мужские роли актрисам. Протест драматурга был удовлетворен. Спектакль не состоится.

«Сов. культура», 21 сентября 1982 г.

აღბათ, არ იქნება ჩვენთვის ძნელი წარმოსადგენი, თუკი აბსურდული დრამატურგიისა და აბსურდის თეატრის მამამთავარი სამუელ ბეკეტი აღაშფოთა რეჟისორის ხელყოფამ — შეეცვალა სქესი მისი პერსონაჟებისათვის, მაშინ როგორღა მიიღებდა — ცოცხალი რომ იყოს, — ქართული რეალიზმის მამამთავარი ილია ჭავჭავაძე, ჯერ კიდევ არცთუ სულ აბსურდულ მარჩანიშვილის თეატრში მისი ელისაბედის... გაელიზბარე-ბას?!).

ამ სპექტაკლშივე, ამაზე ბევრად უფრო სამწუხაროდ (რა თქმა უნდა, მხოლოდ ჩვენთვის — გადაღჭუებულ-ჩამორჩენილთათვის!) „სექსუალური რევოლუციის“ მონაწილედ გვეცხადებდა... ღმერთო, ნუ მიწყენ და... დარეჯანი!

როცა თავის თანამეცხედრე ლუარსაბს იოლად მისახვედრად ქარაგმებით ბრალს სდებს უშვილობაში და, შესაძლოა, ცვედნობაშიც, იატაკზე (აღბათ უნდა ვიგულისხმობთ, რომ ეს „კრაოტია“) ფეხებგაჩაჩხული ისეთ პოზას იღებს, რაც არც რეჟისორის ფანტაზიას ეკადრება, არც მის თეატრს, არც სიწითლემორეულ უხერხულობაში ჩავარდნილ მაყურებლებს, ილია ჭავჭავაძეს კი — ხომ არა და არა!

და არც მსახიობმა, მით უმეტეს საქვეყნოდ ცნობილმა მსახიობმა, არ უნდა იკადროს იაფფასიანი „პოშლიატინის“ დემონსტრაცია! ალექსანდრე იუჟინი იქნებოდა თუ ალექსანდრე წუწუნავა, განა ამაზე დაითანხმებდნენ მარია ერმოლოვას თუ ნუცა ჩხეიძეს?!

ვიცი, საამისო პასუხი „ნოვატორებს“, ისე, როგორც ყოველთვის, ახლაც მზად ექნებათ:

საერთოდ,

„ეგრეთ წოდებული „საშუალო“ მაყურებელი ძნელად იღებს ახალს... მას სურს ყოველთვის ნაცნობი, ტრადიციული...“

(იხ. „სკოლა და ცხოვრება“, № 3, 1981 წ. გვ. 66).

კერძოდ,

მაშინ სხვა დრო იყო...

დრო კი სხვა იყო, მაგრამ ზემოთაც მოგახსენეთ, არსებობს მორალის, ზნეობის მარადიული კანონები, რომლებზეც დრო ხელს ვერ აღმართავს, თუკი, რა თქმა უნდა, სირცხვილის გრძნობას არ ამოვმანთავთ ჩვენში და სულ არ დავეშვებით იმ ჩვენი-წინაპრების დონემდე, ზოოპარკის გალიაში, მზეზე, წელს ქვემოთ, „საჯაროდ“ რომ იქექებიან და ჩვენ, მათ შთამომავალთ, თვალის წუთიერი შეჩერებაც რომ გვერიდება, თუნდა იმ დროს მარტონიც ვიყოთ...

შარშან ეურნალ „საბჭოთა ხელოვნებაში“ (№ 7) დაიბეჭდა „გარეუბნის მარტოსახლი“. ამ პიესის ავტორი, როგორც მითხრეს, ახალგაზრდა დრამატურგია, უფრო სტაჟით, ვიდრე ასაკით. მიუხედავად ამისა, მე მგონია, იგი მაინც უნდა მივაკუთვნოთ იმ თაობას, რომელიც მოდის, სამწუხაროდ, მეტად ნელი ნაბიჯებით რომ მოდის და ასე დიდად იგვიანებს...

ახალგაზრდა შილერს „ყაჩაღები“ უკვე დაწერილი ჰქონდა, და ის მაინც, საგონებელში ჩავარდნილი, გულს ეხეტებოდა:

«22 года, и ничего но сделано для бессмертия!»

სხვათა შორის, „მარტოსახლშიც“ მოქმედებენ ყაჩაღები, ყოველ შემთხვევაში მოყაჩაღო ყაჩაღები, თუმცა არა იმ ზომისა და არც იმ სულის ყაჩაღები, როგორნიც იყვნენ გერმანელი დრამატურგისა; შეიძლება ესეც იყოს მიზეზი იმისა, რომ „მარტოსახლის“ ენობრივი ქსოვილი, სიტყვიერი მასალა, შილერთან შედარებით, სულ სხვა შედგენილობისაა. სადეგუსტაციოდ მხოლოდ ერთ გვერდზე (112) დაბეჭდილს (და ბ ე ჯ დ ი ლ ს!), მაღალფარდოვნად რომ იტყვიან ხოლმე, შემოგთავაზებთ:

„ა ლ ე კ ო. ისეთ შავ დღეში ვარ, ჩემო მაგდა... გაჩაჩხული ვარ გაგლეჯამდე. გაგლეჯილი მაქვს შარვლის უბე. კუტუტუ გარეთა მაქვს გამოვარდნილი. ყვავი მაზის მხარზე. ქვემოდან ნაგაზი ცდილობს ამოხტომას. კუტუსს მოკმას მიპირებს.

მ ა გ დ ა (თავგამოდებით). მოვუხმობ საშველად ყველას.

ალეკო. ...ასე გაჩაჩხული ვარ მე დღეს! რადგან კუტუს მოქმას მიპირებს კავკასიური ნაგაზი... მაგდა, რად უნდა ყვავს მაგნიტოფონი? რად უნდა ძაღლს ჩემი კუტუ?

...უთხარი დოდონას: ალექოს რომ ფისი მოუნდეს-თქო, არ დასჭირდება შარვლის შეხსნა, გამოვარდნილი აქვს-თქო გარეთ კუტუ“.

ახლათ დაინტერესდებით მოქმედ პირთა წლოვანებით... მოვიშველიოთ ავტორი: ალექო „შუა ხნის წარმოსადეგი მამაკაცია“, მაგდა „მოწიფული ქალიშვილია“, დოდონა „ბებიია მაგდასი, ას წელს მიტანებული“, თუმცა მოძრაობასა და სიტყვაპასუხში სულაც არ ეტყობა, რომ იგი იმ წელს მოვევლინა ამ ქვეყანას, როცა სანკტ-პეტერბურგის ყოფილი გენერალ-გუბერნატორის ქალიშვილმა, სოფიო პეროვსკაიამ სანკტ-პეტერბურგშივე გააგორა იმ დროისათვის ბევრი პროგრესული რეფორმის შემომღები ალექსანდრე მეორე...

ისიც მინდა შევახსენო მკითხველს, თუ ის მამაკაცია, რომ ათი-თორმეტი წლის შემდეგ შეიღები თანდათან შორდებიან მშობლებს, ცალკევდებიან, ბიჭი ამ ასაკში დედას ტანს უკვე აღარ აბანინებს, ერცხვინება...

ახლა კი, ყოველივე ამ მიხვეულ-მოხვევის შემდეგ, გთხოვ, მკითხველო, ერთი წუთით მაყურებლად გადაიქცე და თავად წარმოიდგინო, რა ამადლებული, რა შთამაგონებელი, რა სულისა და გონების გამწმენდი სანახაობა გელის, თუნდაც ამ პატარა სცენისა და დიალოგის მიხედვით, როცა „მარტოსახლს“ მთლიანად იხილავ რუსთაველის თეატრის სცენაზე, — დიან, ეს პიესა თავის „კუტუებიანად“, „მთლიანად და სავსებით“ არათუ ეურნალის დიდად დახვეწილი გემოვნების მქონე რედაქტორმა დაბეჭდა საუცხოო ცარცის ქაღალდზე, იგი აგრეთვე „მთლიანად და სავსებით“ მიიღო კულტურის სამინისტრომ, და ახლა მას ამზადებს ჩვენი სახელგანთქმული, რუსთაველის სახელობის, ჩვენი პირველი ეროვნული თეატრი დიდად დახვეწილი გემოვნების მქონე რეჟისორის რობერტ სტურუას ხელმძღვანელობით; ამზადებს, ცხადია, „მთლიანად და სავსებით“,

რაც, რასაკვირველია, ბევრად არც გაუჭირდება ჯერ „რიჩარდ-ში“ ქვედა საცვლების გაუხდელად, მერე კი „შეშლილში“ დიდი ოსტატობით დადგმულ იმ სცენის შემდეგ, რომლისთანებზე დასაელეთის პორნოფილმების უნახავმა და ამიტომ უბედურმა ციკერონმა ოცი საუკუნის წინათ თქვა: „...показывать непристойно“-ო.

ამ თხუთმეტიოდე წლის წინათაც კი, აბა, სცენაზე ვინ იტყოდა „ნიფხავსაც“ კი; „ნიფხავი“ კი არა, ერთმა ჩემმა საყვარელმა მსახიობმა-ქალმა კუპრის ცრემლებით მატირა, როცა ფრაზაში — „ვიდრე მაგას ბარძაყს არ გამოაჭამს, მანამ არც დაიჭერებს, რომ მისი ძალღი იკბინება“, — „ბარძაყი“ ამომიგდო, როგორც უცენზურო სიტყვა და თავი რომ შემართლებინა, ვერც ილია მომეშველა და ვერც აკაკი („შე არდასაცალე-ბელო, რისთვის მოუცია ღმერთს ეგ ბარძაყისოდენა მკლავები!“ „ცხელი მჭადი მომედვა ბარძაყზე და მეცხუნა“).

ახლა კი, იმავე თეატრის სცენაზე, თანაც ქალი — ავტორის პიესებში ისეთი „ანტიკა“ სიტყვებია მიმობნეული, დიდუბელ ფხაკი-კოლასაც რომ შეშურდება...

რას იზამთ, განათლდა ხალხი, საოცრად განათლდა.. ერთმა, როგორც ჩანს, თავზე საყრელად განსწავლულმა მოდრამატურგო დრამატურგმა შარშან, მოსკოველთა ღირსსახსოვარ გასტროლებს მხოლოდ ცალი თვალი რომ შეავლო, პირად საუბარში, ქედმაღლურად წაუფორიზმა: „მართლაც მცირე თეატრი ყოფილა მცირე თეატრი“.

მე კი მეორემ, გ. ტოვსტონოგოვის „ცხენის ისტორიის“ პირველი მოქმედების ნახვითაც უკვე გაბრუებულს, ანტრაქტის დროს, ისე დამცინავად გადმომხედა, რომ შევატყვე, ცოტათი შევეცოდე კიდეც და ამიტომ სულ ერთიანად არ გამწირა და არ მომახალა — „რა გესმით თქვენ ხელოვნებაში?!“ — მან მხოლოდ სასწორზე შემავლო: „ნუთუ ეს მოგწონთ?!“

ალბათ გასურთ იცოდეთ, ამ „მეორის“ ვინაობა, — რუსთაველის თეატრის წამყვანი რეჟისორი გახლდათ (ეს თითქმის ჩვენს თემას არ ეხება, მაგრამ მაინც... რა ენობრივი უბედურებაა ეს... „წამყვანი“, „წამყვანი...“

პროგრამის წამყვანი — კიდეც პო, წამყვანი ორთქლმავა-

ლიც, მაგრამ „წამყვანი შემოქმედი?“ „წამყვანი უნივერსიტეტი?“ თუ მოწინავე?!

ეს „წამყვანი“ რუსულიდან კი მოდის პირდაპირი გზით, მაგრამ რუსულ-ქართულში ნუთუ ველარ გავიწაფეთ ოციანი წლების შემდეგაც, როცა „подпольщик“-ს უსატყვისებდნენ ქერქვეშელს... ქერქვეშელი რევოლუციონერიო. ქერქვეშ ცხოვრობს ყველა მოდგმა ადამიანისა, რევოლუციონერები და კონტრრევოლუციონერებიც. იატაკქვეშ კი იმალებოდნენ და ბეჭდავდნენ პროკლამაციებს მხოლოდ რევოლუციონერები!).

...დიახ, თაობა მიდის, თაობა მოდის! მე ვფიქრობ... ვფიქრობ, ცხადია, გაუბედავად და რა სამწუხაროა, როცა თაობა მიდის, და რა სასიხარულოა, როცა თაობა მოდის, ოღონდ... ორმაგად სასიხარულო იქნებოდა, თუ ეს თაობა თავის საწინააღმდეგე მოდვას... ბოდიშს მოვიხდით, — „კუტუთი“ არ დაიწყებდა, რომელიც, როგორც „საბავშვო, სალალბო“ სიტყვაც კი, შეტანილი არ არის ჩვენი ეპოქის დიდ ძეგლში — „ქართული ენის განმარტებით ლექსიკონში“.

(ან დე რ ძ ი ს ე ბ უ რ ი: თუკი ასი წლის შემდეგ საქართველოში ქართველობა კიდევ იქნება შემორჩენილი იმ რაოდენობით, რომ მას კვლავაც ექნება ქართული შრიფტი და ქართული სტამბა, თანაც ვითარებაც იქნება ისეთი, რომ შეეძლებათ დაბეჭდონ ჩემი „შავი წიგნი“, ჩემი თხოვნა იქნებოდა, მთელი ეს „სექსუალური“ ნაკვეთი ამოიღონ როგორც ქალაქის ფერის გამშავებელი და ადამიანში ადამიანურობის შეურაცხყოფელი!).

— — —

ნალბანდი რომ უნდა ნალბანდობდეს და ხაბაზი — ხაბაზობდეს, — რაც ადრეულად შეიგნო ნემიროვიჩი-დანჩენკომ, რუბენ სიმონოვმა კი — მოგვიანებით, ამის ჩინებული მაგალითია რეჟისორ რობერტ სტურუას დრამატურგიული საქმიანობა. მე, რასაკვირველია, ძალიან შორსა ვარ იმ აზრისაგან, რომ პიესების წერა, რაკი მათი გათრევა მისთვის, როგორც თეატ-

რის „მთლა უფროსისთვის“, სულ იოლია, — ერთგვარი გეშეფტი იყოს.

არა! რაკი მას ქართული დრამატურგია არ აკმაყოფილებს და მასზე ბევრად უფრო გელმანის სპეკულანტური პიესები ხიბლავს (მაშინ, როცა მეჭურჭლეობის მინისტრიდან შიკრიკამდე ყველა შოვნაზეა გადასული, მუშა უარს ამბობს პრემიაზე... არ დამიმსახურებიაო!), განა გაემტყუნება ამ დიდად ქებულ ხელოვანს, ავტოკალამს თუ მოჰკიდებს ხელს და... „დაჯდეს პიესის წერადა?!“

ეს კია, საუბედუროდ, არც ერთ იმ ქვეყანაში, სადაც რუსთაველის თეატრი საგასტროლოდ ბრძანდებოდა, არც ინგლისში, არც საფრანგეთში, არც მექსიკაში, ჯერ ისეთი ავტოკალამი არ მოუგონიათ, რომელიც პიესებს ავტომატურად წერდეს, — კარგ პიესებს, ცხადია, თორემ ცუდი ჩვენი, უბრალო, თბილისური პასტითაც იწერება, და ბევრიც იწერება...

რატომ?

გადაშალეთ ანტონ ჩეხოვის „Записные книжки“, 1927 წელს მოსკოვში გამოცემული, გვერდი 89, და ამის პასუხს იქ ამოიკითხავთ:

„**Всякий человек может написать пьесу. которую можно поставить.**“

ამ აზრის დამადასტურებელი სულ პატარა მაგალითიც:

„ნ ა ზ ი კ ი (სიხარულით, ეხევეა და კოცნის). უი, მადონან ვენაცვალე. სადა ხარ, ქალო, სად დეიკარგე?“

მ ა დ ო ნ ა (დაღლილი ხმით). პაკუპკებზე ვიყავი, მოსკოვში... (უცხად, ცოცხლად). დედა, რა სერვანტესები ჩამევიტანე, რო იყოდე, ცეკავშირის ჯულეტაც დააფჩენს პირს!“

განა არ შეიძლება ეს სცენა-გადალაპარაკება გათამაშდეს თეატრში?! შეიძლება, ცხადია. ჰოდა, ამას კიდევ სხვა მიუმატე, იმ სხვას კიდევ სხვა და...

მოთხრობა-ლექსისაგან პიესის მთავარ განმასხვავებელ ნიშნად ხომ ერთმანეთში ლაპარაკი ითვლება, ამალღებულად დიალოგს რომ ეძახიან დრამატურგთმცოდნეები, ადამიანები კი, ენის ადგმისთანავე სულ ერთმანეთში ვლაპარაკობთ, ჰოდა,

ამაზე ადვილი რა უნდა იყოს, — ვალაპარაკებ მეც, ხან ქალს, ხან კაცს; ვალაპარაკებ დედას მამასთან, ბებიას შვილიშვილთან, მექრთამეს სამსახურის მაძიებელთან, პატარას დიდთან, ავადმყოფს ექიმთან, მინისტრს მდივანთან, მდივანს სათხოვნელად მოსულთან („თათბირი აქვს“) და ასე შემდეგ და ასე ამგვარად... სხვა რაღა ჯანდაბა უნდა პიესას, ახლა აღეჭი დ ითამაშე, ოღონდ ეს კია, ცოტა ძნელი ყოფილა სცენამდე მიღწევა, მაგრამ „შანციან“ კაცს არც ეს გაუჭირდება, და არც უჭირს თურმე!..

„შანციანმა“ ისიც კი იცის, თურმე, რომ ჩვენი თეატრები პიესებს უფრო იმის მიხედვით იწონებენ და იწუნებენ, თუ ვისი დაწერილია იგი; ფაქტიურად უფრო დამწერს, კაცს დგამენ, ვიდრე ნაწარმოებს, ამიტომაც არის, რომ ახლა დრამატურგია აღარ ითვლება ლიტერატურის ყველაზე რთულ, უძნელეს ქანრად, და არათუ უძნელეს, — საერთოდ, ლიტერატურადაც აღარ ითვლება; „ერთმანეთში ლაპარაკი ორ ნაწილად“ უკვე პიესაა, თუნდაც სახეები მასში უსახური იყოს, ენა გონჯი და მხატვრულ ალღოს მოკლებული, დასაწყისი და ბოლო დაუსაბუთებელი...

თუმცა, რის დასაწყისი, რის ბოლო, როცა მეტ-ნაკლებად მწყობრი სიუჟეტიც კი სულაც აღარ არის სავალდებულო და, მაშასადამე, არც ექსპოზიციან საჭირო და არც კვანძის შეკვრა, არც კონფლიქტის გამძაფრება, რომელსაც მოჰყვება კატასტროფა და გაიხსნება ნასკვი...

ყოველივე ეს სოფოკლეს, შექსპირის, მოლიერის, შილერის, ოსტროვსკის, შოუს უკვე წყალში გადასაყრელი ხერხები ყოფილა. თანაც ამ ძველმოდური კანონებით პიესა რომ დაწერო, ამას ერთი ისეთი რაღაცა უნდა თურმე, რომელსაც „შანცი“ არ იძლევა, მას, თურმე, ბუნება იძლევა, ისიც ძალზე ძუნწად, მის გასაღვივებელ-გასამდიდრებლად კი საჭიროა, თურმე, მთელი ცხოვრება კვარივით იწვოდე...

ვიყავი მხოლოდ დრამით მდიდარი,
არ მიძებნია მე სხვა ქონება,
პიესის გარდა არავითარი
მე არ მხიბლავდა სხვა შთაგონება.

(ვალერიან გაფრინდაშვილის ამ ტაეპში შეცვლილია მხოლოდ ორი ერთი და იგივე სიტყვა: „ლექსი“, „ლექსები“).

დიდება და მადლობა ღმერთს, რომ დრამატურგიაში დაგვიდგა დრო, როცა არათუ კვარით, — ექვსშაურიანი სანთელივითაც რომ იწვოდე, ესეც ზედმეტია, და რომ ყველა ეს „თურმეც“ ბალასტია თურმე!

ღიას, დიდებული რამ ყოფილა დრამატურგობა, თანაც, თურმე, ო, რა უბრალო, იოლი და ადვილი!

(მინი-ცნობა: ოცზე მეტი პიესის, მათ შორის „მდაბიონის“, „მოაგარაკენის“, „ფსკერზეს“, „მზის შვილების“, „ეგორ ბულიჩოვის“ ავტორს თავი დრამატურგად არ მიაჩნდა, და ამით მაქსიმ გორკი ცრუ თავმდაბლობის სამოსელში როდი ეხვეოდა, მე უფრო ბელეტრისტი ვარო...

«Наконец, я обязан сказать кое-что и о себе, ибо есть опасность, что моя «драматургия», ныне чрезмерно восхваляемая, способна соблазнить молодых людей на бесполезное изучение ее и — того хуже — на подражание ей».

«О пьесах».

Полное собр. сочинений. Том 26, стр. 423.

მივაქცევ მკითხველის ყურადღებას ბრჭყალებს, რომლებშიც გორკიმ თავისი დრამატურგია მოაქცია, როგორც, მისი აზრით, მდარე ღირსებისა...

ანტონ ჩეხოვი (ჩეხოვიც!) შეწუხებული სწერდა ა. ი. სუეორინს „თოლიაზე“ („Чайка“):

«...Читая свою новорожденную пьесу, еще раз убеждаюсь, что я совсем не драматург».

Полное собр. сочинений. Том 16, стр. 285.

კონტრასტისათვის მხოლოდ ერთი მაგალითი იმის საილუსტრაციოდ, თუ როგორ გავიზარდეთ ჩვენ, დრამატურგები, ჩეხოვისა და გორკის შემდეგ:

ჩვენი დროის ისედაც ყოველმხრივ სახელგანთქმული ბელეტრისტი, რომელსაც დრამატურგიასთან იმდენივე კავშირი აქვს, რამდენიც პურის ცომს გამომცხეარ პურთან (მის ნაწე-

რებს რომ სხვები ასცენიურებენ, ეს მთელმა მიღეთმა იცის, ლენინგრადელ აღამირზიანიდან თბილისელ ლორთქიფანიძემდე!), თავს მაინც დრამატურგად გვაცნობს:

«Прозаик, драматург, поэт» (იხილეთ Справочник Союза писателей СССР, Москва, 1981 г.).

ნუ ვიტყვით, რომ ასეთ ცნობარში შემდგენელი, ჩვენ მიერ ცნობის მიუწოდებლად, ჩვენდა დაუკითხავად, ზედმეტ „ჩინმენდალ-ტემლას“ მოგვაკერებს).

სტურუას ორად ორ პიესას, თუ საანგარიშოზე ჩამოვკრავთ და არ შევცდებით, მისი ჩათვლით ხუთი ავტორი ჰყავს!

პირველ პიესას, „ბრალდებას“ ბრალს არც წაუყუყუნებთ, რადგან იგი ჰაბუკობაში დაიწერა, დაიწერა იმ ასაკში, როცა ცეცხლთან თამაში უბრალო გართობა ჰგონიათ, მეორე კი — „ვარიაციები თანამედროვე თემაზე“ — სულ აგერ ახლა, ჩვენ თვალწინ, ასაკობრივ და შემოქმედებითს ზენიტში მყოფობის დროს!

მართალია, რუსთაველის თეატრისა და მისი მთავარი რეჟისორისთვის საგულდაგულოდ, მისი კრედოს სრულყოფილად წარმოსაჩენად დაწერილი ეს პიესა სამ ავტორს — თითქმის მთელ ბრიგადას ეკუთვნის, მაგრამ მათი ბრიგადირი, კალმით თუ არა, სულით მაინც, — ხომ სტურუაა და, მაშასადამე, ის არის მისი პირველი და მთავარი ავტორი, რასაც, სხვათა შორის, არ უგულვებელყოფს ნაბეჭდი ქაღალდის არც ერთი ნამუცეცი, რომ აღარაფერი ვთქვათ აფიშა-პროგრამებ-ბუკლეტებზე და ფინანსურ მხარეზე.

ისე კი, არ შევცდები, თუ ვიტყვი, რომ მსოფლიო დრამატურგიაში არ მოიძევება თუნდაც ერთი, ასე თუ ისე ცნობილი დრამა თუ კომედია, ტრაგედია თუ ვოდვეილი, სამ ავტორს რომ ერიოს მასში ხელი, — ორის კი, მაგრამ მხატვრული ღირებულებით დიდად არც ისინი გამოირჩევიან. როგორც ჩანს, დრამატურგიაში არსებობს რაღაც კანონზომიერება, რომლითაც რაოდენობა არ გადადის ხარისხში, თუმცა, ესეც არის, „ვარიაციები“ მართლ სტურუასაც რომ დაეწერა, ხარისხობრივად მაინც იმავე ხარისხში იქნებოდა (და, შესაძლოა, უფრო

დაბალზეც, — ახლა ავტორებში ერთი ეურნალისტი ქალი მაინც ურევია)... მთელ ამ „ვარიაციებში“ კი, გულთან მისატან, გულის გამზარებელ ერთ ვარიაციასაც, ერთ ახლად დანახულ პერსონაჟს, ერთ ფრაზას, მწერალ კაცს რომ შეგშურდება, ნეტავ ამაზე ადრე მე დამენახა, მე შეთქვაო,—ვერ წააწყდებით.

ღიას, „ვარიაციები“, როცა რეჟისორს არც ერთი მისთვის საძულველი ცოცხალი დრამატურგი თავზე არ ადგა, ხელს არ უშლიდა და არ უსაყვედურებდა, დამწყები თერძივით პიესას ასე უგვანოდ ნუ მიჭრი, ნუ მიჩხვავო.

და მაინც,

„ვარიაციები“—პიესა და სპექტაკლი, რომელიც თეატრის მთავარმა რეჟისორმა თავის გემოზე დაწერა და რომლისთვისაც შეარჩია — აბა ხელს ვინ შეუშლიდა — თავისივე თეატრის ყველაზე საუკეთესო მსახიობები (ეროსი მანჯგალაძეს გამოკლებით!) და დადგა, — მაინც ვერ იქცა საეტაპო, საპროგრამო სპექტაკლად, და მან ვერაფერი სინარული მოუტანა ვერც თეატრს და ვერც მაყურებელს!

ასე რომ, აქედანვე ვერჩევ მათ, როცა დროთა განმავლობაში დღევანდელ თეატრალურ ოჯახებში შემორჩენილი, უკვე გაყვითლებული ქალღმერთების მქექავეები გამოჩნდებიან (ქათამი უკან-უკან იქექება, საქმე კი თავისი წინ მიჰყავს!, ნუ გაიჩხვებიან ნაშრომზე—„სტურუა როგორც დრამატურგი“, — რადგან, ვინ იცის, ეგებ მაშინაც მოველინოს საზოგადოებას, ახლა რომ 10—15 წლისაა, იმ დროისათვის კი ოთხმოცს მიტანებული დოქტორ-პროფესორი, რომელიც თავს გადააქნევს და იტყვის: „...ეს იგივეა, გამოსცე წიგნი „სტურუა როგორც მებათქაშე“ („Стурья как штыкатыр“-, მით უმეტეს, რომ ჩვენს სახელოვან რეჟისორს თავის დადგმებში ერთობ უყვარდაო „შტურუებისა და შტურჩების“ მიმობნევა, ზოგი — საკუთარის, ზოგიც — ნასესხების... მაგალითად, „დამწყებ როლში“ ლაპარაკი სიტყვების წამღერებით ახლა ბევრისათვის უკვე მივიწყებულ, მშვენიერი ფრანგული ფილმიდან — „შერბურის ქოლგებიდან“ არის, როგორც იტყვიან, „რბილად“ რომ ვთქვათ, წამოღებული... „ვარიაციების“ მთავარი დრამატურგიული საყრდენი კი, აქაც „რბილად“ რომ ვთქვათ (ო-ო, სიტყვა პლაგიატს არ ეიხმარო!), ცივ-ცივად არის აღებული ინგლის-

ში საკმაოდ ცნობილი ერთი პიესიდან, რომლის ავტორია ფეი უელდონი და რომელიც ამ რამდენიმე წლის წინათ დაიდგა...

არ ვიცი, ეს სხვათა შორის უნდა ითქვას თუ მტკიცედ და გარკვევით, რომ ამ პიესის სათაურიც ინგლისურად „ვარიაციებზე“ იკითხება (Fay Weldon, „Action Play“) და აქაც ასე, როგორც ქართულ „ვარიაციებში“, რამდენჯერმე თამაშდება სხვადასხვა გარემოცვაში სცენები, რომელთაც სხვადასხვა დაბოლოება აქვთ.

(მე აღარაფერს ვამბობ გერმანელი დრამატურგის პეტერ ვაისის დიდად ცნობილ პიესაზე „მარატ საღზე“, საიდანაც ქართულ, სამავტოროვან „ვარიაციებში“, ყოველგვარი მობოდიშების გარეშე, „ნასესხებია“ სიუჟეტური აღნაგობის პრინციპი, და არც ს. ალიოშინის პიესაზე „Тема с вариациями“).

სტალინი, რომელიც სინამდვილეში ხალხს არავითარ ანგარიშს არ უწევდა, მაინც ხშირად იმეორებდა, ხალხი ბრძენიაო („Народ мудр“).

ჰოდა, ბრძენ ხალხს უთქვამს, ნალბანდი უნდა ნალბანდობდეს, ხაბაზი უნდა ხაბაზობდესო.

ახლა ესეც ვიკითხოთ, რამდენად არის რობერტ სტურუა ქართველი... ნალბანდი, ან ქართველი ხაბაზი, ესე იგი ქართველი რეჟისორი?

ნუ გაიკვირვებთ, შემოქმედების სფეროში მარტო გვარი არ განსაზღვრავს ეროვნებას და, საერთოდ, ეროვნების მისაკუთვნებლად გვარი ყოველთვის როდი გამოდგება; მაგალითად, უკრაინაში დღესაც არიან ოდიშელიძეები, ჭყონიები, ცინარიძეები, წარმოიდგინეთ—ორბელიანებიც კი (ეს დიდებულე გვარი კი საქართველოში, საუბედუროდ, უკვე გადაშენდა), მაგრამ ისინი ისეთივე ქართველები არიან, როგორც ჩვენი მგოგოლები — უკრაინელები.

მარჯანიშვილი სულ ათიოდე წელი ემსახურა ქართულ თეატრს და, მაინც, მიუხედავად იმდროინდელი ქართული დრამატურგიის მწირიანობისა, ამ ხნის მანძილზე „გარუსებულმა მარჯანოვმაც“ კი დადგა, ზოგიც ძველი და ზოგიც ახლად დაწერილი, 17 ქართული პიესა (ჰანტომიმა „მზეთამზისა“ და „არსენას ლექსის“ ჩაუთვლელად!); არც ანმეტელს დასცალდა მასზე ბევრად მეტხანს ეგიზგიზებინა ცეცხლი რუსთაველის

თეატრის სცენაზე, მაგრამ მანაც მოასწრო დაედგა 15 ქართული პიესა (გადმოქართულებული „ანზორისა“ და „ნაბიჭვრისა“ ჩათვლით!). დიახ, ახმეტელმა, მარჯანიშვილისა არ იყო, მიუხედავად იმდროინდელი ქართული დრამატურგიის სიღატაკისა, აკი იმ წლებში ჩვენი დრამატურგია, როგორც ლიტერატურის განცალკევებული ქანრი, მხოლოდ ყალიბდებოდა.

თავისი რეჟისორული მოღვაწეობის ოცი წლის მანძილზე რობერტ სტურუამ წარმოგვიდგინა 27 სპექტაკლი, აქედან დამოუკიდებლად, მარტო მან, ქართული პიესა დადგა მხოლოდ... ექვსი! (მათ შორის „ღალატი“ ისე დაასაჭურისა, რასაც თვითონ საჭურისი აღა-მაჰმად-ხანიც ვერ მოახერხებდა, ყვარყვარეს კი, ნატარქეჟიას, არტურო უს ფერ-ხორცი შეასხა, ბრეხტმა მსოფლიოს ამამტუტებელ-დამაქცევეარ ადოლფ ჰიტლერად რომ წარმოგვიდგინა!).

თანაც — ეს როგორღაც ნიშანდობლივია! — ქართული პიესა (და არც უცხოური!) ერთიც არ დაუდგამს ისეთი, რომელიც საღმე უკვე დადგმული არ ყოფილიყო („მზიანი ღამე“, როგორც რომანი, უკვე აპრობირებული იყო და მისი ინსცენირება არ იყო რაიმე სიახლესთან თუ რისკთან დაკავშირებული).

ზოგიერთმა ეს, შეიძლება, ამ ვეება რეჟისორის მორიდებულობით აგვიხსნას, — არ უნდაო ძველი ფეოდალივით პირველი ღამის უფლებით ისარგებლოს მასზე დაქვემდებარებულ დრამატურგიის ლატიფუნდიებში, თუმცა კი ამ უფლებით, მისი წინამორბედნი, მარჯანიშვილი, როგორც „დურგალი“ და ახმეტელი, როგორც „ხურო“, როგორც კი „სპექტაკლ-სკანის“ მზადებას შეუდგებოდნენ, უშიშრად და ფართოდ სარგებლობდნენ: ისინი ერთი წაკითხვით... ბოდიში, ერთი ხელის მოსმით, ერთი თვალის გადავლებით უკვე ხვდებოდნენ, რა ჯიშის ხის მასალასთან ჰქონდათ საქმე: ეს იყო ძვირფასი მუხა თუ ბზა, თუ, მათთან შედარებით, დაბალი ღირსების თელა თუ წიფელი...

მაგრამ, როცა შენ თავად დიდი შთამომავალი ბრძანდები, ყველა წინამორბედისაგან ხომ არ აიღებ მაგალითს, მით უმეტეს, რომ მათ არ მოსწრებიხარ და მათგან მხოლოდ რაღაც რეცენზიები და რაღაც გახუნებული მაკეტები შემორჩენილა. რომლებიც. აბა, რა შედარებაა ედინბურგისა და ლონდონის

რეცენზიებთან და შენს უმაკეტო, თუ თითქმის სულ გაშიშვლებულ არა, — ყოველ შემთხვევაში მარტო სცენის სხვენზე, „კოლოსნიკებზე“ ჩამოკიდებულ რაღაც საფრთხობელებთან, აზიტომ მათ — ვინ იცის, დიდებ-ად შერქმეულ წინამორბედებს. — მეზიკოს ორი ათასი მეტრი სიმაღლიდან ქიანქველებად რომ გეჩვენებია, დამცინავად რომ გადმოხედო, — ამისათვის „დიდები“ საყვედურს როგორ შეგკადრებენ, „პატარებ-სა“ კი, თუნდაც რისხვა, აბა, რა ყურადსაღებია...

(იმიტო, რაც „ფართო“ მაყურებელმა იხილა 1981 წლის 30 ოქტომბერს ფილარმონიის დიდ დარბაზში, რუსთაველის თეატრის ასი (!) წლისთავის იუბილეზე — „თაობა მიდის, თაობა მოდის!“ — საბედნიეროდ, ოდნავაც არ იგრძნობოდა, რომ მომავალი თაობა პანდურით აცილებდა მიმავალს; რამდენიმე დღით ადრე კი, რუსთაველის თეატრში „ვიწრო“ მაყურებელი, ამ სახეიმო პროგრამის ჩვენება-გასინჯვის დროს, მოწმე გახდა ისეთი ცინიკური წიხლ-პანდურ-ტლინკებისა წინამორბედთა სამადლობლად, რომ ალექსანდრე ახმეტელის ერთ ახლო ნათესავს ლამის გული შეუღონდა, არანათესავეებს კი... დარბაზში, საერთოდ, ისეთი სულისშემბუთველი სევდა ჩამოწვა, როგორც მთელ ქალაქ თბილისში 1934 წელს, როცა მაშინდელ ციციანოვის და ახლანდელ ბარათაშვილის აღმართზე — ზემოდან მომავალი ტრამვაი, მუხრუჭების მოშლის გამო, დვინაოსავით გადაიჩეხა...).



საქართველოს გარეთ ქართული თეატრისათვის ისე არავის გაუთქვამს სახელი, როგორადაც ალექსანდრე ახმეტელმა გაუთქვა.

და ისიც რა დროს? როცა მატარებელი თბილისიდან მოსკოვამდე ჩასვლას ოთხ დღეს უნდებოდა, როცა უჩინმაჩინის ქუდი უფრო რეალური ამბავი იყო, ვიდრე ტელევიზია...

1930 წლის მოსკოვის თეატრალურ ოლიმპიადაზე რუსთაველის თეატრმა არა მარტო ჩვენი დროის ყველაზე დიდი ესთეტი ლუნაჩარსკი განაცვიფრა („რუსთაველის თეატრი მსოფლიო თეატრების პირველ რიგში წინაუბრდება“) და აგრეთვე.

ბევრი სხვა, თითქმის მისი ტოლი რუსი თეატრალური მოღვაწე და უბრალო მაყურებელი, არამედ მრავალი უცხოელიც...

ამერიკელებმა მიიწვიეს კიდევ ქართული თეატრი საგასტროლოდ თავის ქვეყანაში, და თუ ეს გასტროლები არ შედგა, ამაში ბრალი მხოლოდ იმ დროს დასწი მყოფ ზოგიერთ ქუეამოკლე და ენაგრძელ, თანაც ნიქით პატარა მსახიობებს მიუძღვით („თუ მოგვეწონა ამერიკა, დავრჩებით იქ, აპა რას ვიზამთ“.—ახლაც მახსოვს, საკუთარი თვალებით როგორ ამოვიციოთხე ჩემი სკოლის ამხანაგის მამის—საქართველოს მუშათა და გლეხთა ინსპექციის სახალხო კომისრის ანდრო დოლიძისადმი გამოგზავნილ საიდუმლო ბარათში; იმ ხანებში ბევრი საიდუმლო ჭერ კიდევ არ იყო ასკეცად გასაიდუმლოებული და, როგორც ჩანს, მათ, დიდი თანამდებობის პირთ, ბინებზეც უგზავნიდნენ).

როგორ ფიქრობთ, ეს გასტროლები რომ შემდგარიყო, უფრო ნაკლები წარმატება ექნებოდათ მათ, ვიდრე ახლანდელ რუსთაველის თეატრს ჰქონდა მექსიკაში? ანდა „ურიელ აკოსტას“, რომლის დეკორაციული გაფორმება დღემდე ინარჩუნებს სიახლეს და გვაოცებს მუსიკით, „სტურუასებურად“ რომ იყენებს მარჯანიშვილი, რაც ეგზომ აძლიერებს სპექტაკლის ემოციურ ზემოქმედების ძალას? არ კიდევ მისივე, მარჯანიშვილისავე, „ბეატრიჩე ჩენჩის“—საუცხოო სპექტაკლს, რომელიც მაშინ მხოლოდ იმიტომ გააქრეს, რომ ამორალურად მიიჩნიეს? (ეს თუ ასეა, — „ოიდიპოს მეფე“, მასთან შედარებით, ათჯერ უფრო ამორალურია).

იმდროინდელი რუსთაველის თეატრისა და მისი ვაჟკაცი ხელმძღვანელის ალექსანდრე ახმეტელის სასახელოდ და სადიდებლად ხმამაღლა უნდა ითქვას, რომ მათ ქართულ თეატრს სახელი ქართული პიესებით გაუთქვეს, „ლამარა“ და „ანზორი“, — აი, რა იყო მათი თეატრალური თავბრუს დამხვევი სავიზიტო პარათი! სწორედ ამ სპექტაკლებში ბობოქრობდა ქართული სული და ქართული ბუნება!

— დიან, შეიძლება სცენაზე ქაროულად შეტყვევლებდნენ, მაგრამ თეატრი მაინც არ იყოს ქართული!..



მიხეილ ჯავახიშვილი ავტორის სათქმელს ერთ თავის პერსონაჟს ათქმევინებს:

„ზოგჯერ სახელიც ისე ადვილად რყვნის მწერალს, როგორც სილამაზე ქარაფშუტა ქალს“.

პროზაულ ნაწარმოებში ვერ ჩამოთვლიდა, თორემ ისე, რასაკვირველია, ჯავახიშვილი ამ შემთხვევაში მხოლოდ მწერალს კი არ გულისხმობდა, — არტისტსაც, რეჟისორსაც, პროვიზორსაც, სახელმწიფო მოღვაწეებსაც კი...

მართლაცდა, დიდი ნებისყოფის პატრონი უნდა იყო და დიდი ჰკუისაც, რომ ზოტბა-დიდებამ, თუნდაც დამსახურებულმა, ტვინი არ აგიმღვრიოს, მით უმეტეს დამსახურებულმა... ასეთები კი, დიდი ნებისყოფისა და დიდი ჰკუის გამგებლები, კერძოდ, ხელოვნების დარგში, არათუ იშვიათად არიან, მე მგონია, სულაც არ არიან, ამიტომ მათ მიმართ, ვინც ქების სალაროს განაგებს, უფრო მეტი სიძუნწე მართებს გენიოსობის ერთხელ და სამუდამოდ ბეჭედდარტყმულ მოწმობების ჩამორიგებაში.

ნუ გაასულელებენ და ნუ გაათავზედებენ მით უფრო იმათ, ვისაც ბუნებამ საამისო მონაცემები უხვად მიაფინტა, — თუნდაც პროფილაქტიკური მოსაზრებით ნუ შეუწყობენ ხელს, რომ თავში მათ სისხლი აუვარდეთ, რაც პირველი, მაგრამ მეტად საშიში ნაბიჯია, გადადგმული ტვინის სისზღობარღვთა სისტემის მოსაშლელად.

უმადურობა ყოველთვის ითვლებოდა ადამიანისათვის დიდ სიმბინჯედ და არც ახლა, როცა „ქვეყანა გამოიცვალა, ჩარხი უკუღმა ტრიალებს“ (აკაკი), არ უნდა იყოს, თუ არ ვცდები, მისი შემამკობელი და დამამშვენებელი.

ჩვენი ხალხის დიდმა მეგობარმა, საზღვარგარეთ ქართული ხელოვნების თავგამოდებულმა მაქებარ-აგიტატორმა, არ იქნებოდა გადაქარბება, თუ ასეც ვიტყვოდი, ჩვენი დროის უორდროპმა თეატრალური ხელოვნების არეში, გერმანელმა რეჟისორმა ჰერმან ვედეკინდმა რუსთაველის თეატრში მე-17 საუკუნის თავის თანამემამულე დრამატურგის გრიფიუსის „ქეთევან ქართველი“ დადგა...

მტკიცედ ამის თქმის უფლებას ჩემს თავს არ მივცემ, ესე
კი, რეპეტიციების დროს ქალაქში არცთუ ისეთი ხმები გამო-
დიოდა, რომ თეატრში ჩვენს-მოამაგე უცხოელ რეჟისორს
ყოველმხრივ ხელს უწყობდნენ მოთამაშენი და არამოთამაშე-
ნიც, თუნდაც უბრალო თავაზიანობისა და ზრდილობისათვის...

ასე იყო თუ ისე, შედგა მაინც პრემიერა, რომელმაც გრავა-
ლი ხელისშემშლელი სიძნელე გადალახა და მაინც რიგიანად
ჩაიარა, და მაინც, მეორე დღით გაფრინდა თუ არა თბილი-
სიდან ვედეკინდი, ახლა უკვე მეორედ ნაწამები „ქეთევან
წამებული“ სასწრაფოდ ამოიღეს რეპერტუარიდან, როგორც...
ნუ იტყვი, როგორც მხატვრულად არასაკადრისი რუსთავე-
ლის თეატრის სამსოფლიო სახელისა!..

ეს, რასაკვირველია, არ გაკეთებულა თეატრის დირექტო-
რისა და მთავარი რეჟისორის უნებართვოდ, რომელნიც, ამ
შემთხვევაში, ერთსახეობაში გვეცხადებიან...

(მინი-ცნობა: არსად, არც „პროვინციულ“ ბაქოსა და ერე-
ვანში, მოსკოვსა და ლენინგრადში ხომ არა და არა, — არ არ-
სებობს თეატრი (გარდა საბავშვო საოპერო თეატრისა), რომ-
ლის მთავარი რეჟისორი ერთდროულად დირექტორიც იყოს;
ეს კია, ასეთი გაერთიანებული, „სამალალპრესტიჟო“ პოსტი,
საქართველოს გარდა, ლილიპუტიაშიც ყოფილა თურმე, მსგავსად
„Директор — капитан рыболовного траулера“).

კი, მაგრამ... ასეთი რა უბადლო რეპერტუარი მოეპოვება
ამჟამად რუსთაველის თეატრს, რომ გრიფოუს-ვედეკინდის
„ქეთევან წამებული“ შავ ლაქას მოსცხებს მის თოვლივით
თეთრ სამოსელს?!?

ჩამოვთვალათ...

„მშენიერი ქართველი ქალი?“ — ყელგამოღადრული და
გულგამოცლილი, გაოპერტებული გოლდონი?

თუ საერთოდ დაიდგმებოდა ეს პიესა, მაშინ ყველაზე მე-
ტად საჭირო იყო დაეცვათ ორიგინალი, რომ გაგვეგო, როგორ
და რას წერდა ჩვენზე დიდი იტალიელი დრამატურგი...

ეგებ შატროვის „ლურჯი ცხენები წითელ ბალახზე?“ —
ამაზე წინა ერთ გვერდზე ქარაგმულად უკვე მოგახსენეთ...

ანდა, ეგებ სტურუა—ვარსიმაშვილ—ფოფხაძის „ვარიაცი-

ები თანამედროვე თემანზე? — ამაზე კი, ასევე წინა ერთ ჰვერღზე, ყოვლად უქარაგმოდ მოგახსენეთ...

თ. ჭილაძის „როლი დამწყები მსახიობი გოგონასათვის?“ — ამ კითხვაზე პასუხის გაცემა, და ისიც — გულში, და არა საჯაროდ (ვინ გაბედავს?!), მკითხველისთვის მიმინდვია.

ველიებოს „ოცნება?“ — ხანდაზმული მაყურებელი შემიძლია დავამშვიდო, — ასეთი რამ სპექტაკლი თუ იხილა კიდევ და მის მეხსიერებას სათაურიც არ შემოიჩია, სკლეროზს ნუ დააბრალებს, — ოცი-ოცდაორი წლისანნიც ველარ ეგონებენ ახლა მას...

ჰიგინისა და კარიერის „პეროლდი და მოდი?“ — მკითხველს ვიხივ ორი სტრიქონით უკან დაიხიოს და კვლავ წაიკითხოს „ოცნება“, „ოცნება...“

„ტარტიუფი?“ — მოლიერს რომ ასწავლიან 350 წლის შემდეგ, როგორ უნდა დაეწერა და დაედგა თურმე მას „ტარტიუფი?!“

ან ეგებ ლიუსის „ამპერსტის მშვენება“. ერთი ამერიკელი პოეტი ქალის ცხოვრებას რომ ასახავს?..

ვისაც არ ვკითხე, მათ შორის განათლებულ ფილოლოგებსაც, თითქმის არავის არ გაეგონა, შესაძლოა, დიდად ნიჭიერი დიკინსონის გვარი...

ჰოდა, რით უნდა დაიპყროს მან, მით უმეტეს „საშუალო“ ქართველი მაყურებლის გულისყური? ამავე დროს თვით პიესაც არ გამოირჩევა შეუდარებელი ღირსებებით...

არა, შეიძლება არც ჩვენ გვაქვს სრულყოფილი პიესები ბარათაშვილზე, ილიაზე, ფიროსმანზე, მაგრამ ჩვენ მათ შინც ინტერესით ვუყურებთ. რადგან მათს სახილველად ბავშვობიდანვე მომზადებული ვართ და ჩვენი წარმოსახვითაც ვამატებთ და ვამდიდრებთ ამ დიდებულ სახეებს, დიკინსონი კი... ასეც არ იყოს, ნუთუ თეატრმა წინასწარ ვერ უნდა აუღოს ალლო, რომ ერთპერსონაჟიანი ორსაათიანი სპექტაკლი ქართველი მაყურებლის ტემპერამენტის ბუნებისათვის მოსაწყენი და მომბებრებელი იქნება, თუნდაც მის ერთადერთ გმირ-ქალს ყველა დროისა და ყველა ხალხის პირველი მსახიობიც კი — ელეონორა დუზე ასახიერებდეს?!

ანდა „შეშლილი, შეშლილი... ახალი წელი?!“ — ძველი

ბერძნები კათარსისს რომ ეძახდნენ, — თეატრის მეშვეობით სულის გაწმენდას, როგორ, ეს „შეშლილი ახალი წელი“ უფრო გაწმენდას ჩვენს გაბინძურებულს სულს, ვიდრე „ქეთევან წამებული“, თუნდა სულ ცუდადაც იყოს იგი დადგმულ-გათამაშებული?!

მე, რა თქმა უნდა, ყველა თეატრალურ ინსტიტუტდამთავრებულსავეთ თეატრის უცილობელ მცოდნედ თავი არ მომაქვს, მაგრამ რაკი ამ უამინტიტუტოდაც უკვე ვახევავებ ამპლუას ამპლუასაგან, თეატრალური ხელოვნების სფეროში გაზეთი „Советская культура“ არ მიმაჩნია შაინცდამაინც ისეთ ურყევ ავტორიტეტად, რომ ჩემი აზრის გასამაგრებლად იგი მოვიშველიო; მაგრამ ამჯერად, რაკი — ვინ იცის! — ეს ჩემი ღარიბი ნააზრევი შეიძლება შემთხვევით „დიდებმაც“ წაიკითხონ, და რომ ეს ცილისწამებად არ ჩათვალონ, ამიტომ მოვიყვან მოსკოვის ამ გაზეთიდან ამონაწერს, რომელიც სპექტაკლის მოხსნის დღიდან საკმაო დროის გასვლის შემდეგ დაიბეჭდა:

«В спектакле ярко и образно раскрыты мужество, гордость, стойкость грузин, которые в кровопролитных боях с иноземными захватчиками защищали родину».

თავად ვედეკინდმა სპექტაკლზე გუშაობის პროცესში ასე განაცხადა:

„მე მიყვარს საქართველო მთელი ჩემი არსებით, მინდა მას, ამ სიყვარულის ნიშნად, ვაჩუქო ეს სპექტაკლი“.

(იხ. უურნალი „პარტიული სიტყვა“, № 10, 1981 წ.)

ჰოდა, ეს არის ჩვენი ქებული ქართველობა, რომ ვედეკინდს, თუნდაც იგი ბოლო დროს, ვთქვათ და მართლაც შეშლილიყო, ასე უვანოდ და უპატივცემულოდ მოგვპრობოდით?!

ღარჩა კიდევ რამე რუსთაველის თეატრის რეპერტუარიდან? — ღარჩა-ღარჩა: „კავკასიური ცარცის წრე“ და „რიჩარდი...“

(ამ თერთმეტი სპექტაკლ-პიესიდან, რომლებიდანაც, სხვა-

თა შორის, თუ დავთვლით, ქართველ ავტორებს მხოლოდ ორი ეკუთვნით,—ერთ-ერთი ამთგანი, რაკი იმ საღამოს არც „რიჩარდი“ გადიოდა და არც „ცარცის წრე“, თბილისელი რუსი პედაგოგის სტუმარმა, მოსკოვის მახლობლად მდებარე ქალაქ კოლომნის პედაგოგური ინსტიტუტის პროფესორმა ვ. ინგერმა ნახა და, მიუხედავად იმისა, რომ ჩვენს თეატრზე, „ცარცისა“ და „რიჩარდის“ წყალობით, ბევრი ქება გაეგონა, ლამის გულს შემოეყარა: „И это есть театр Руставели?!“).

„ცარცის წრე“ — კი, ბატონო, შშვენიერი სპექტაკლია, ოღონდ... შეიძლება გაიფიქრო კაცმა, რომ ის როგორღაც მაქავარიანის „ოტელოს“ ჩამოჰგავს: უქაბუკიანოდ ოტელო უკვე აღარ იყო ის სულისშემძერელი „ოტელო“, რომლიდან გამოყოლილი შთაბეჭდილებაც, სასიამოვნოდ ნერვებაწეწილთ, ღამის სამ საათამდე აღარ გვაძინებდა, ასევე, ყანჩელის უმუხიკოდ „ცარცის წრე“ ვერა და ვერ შემოხაზავს დიდ, გაშლილ წრეს, რა თქმა უნდა, ესეც ნიჭიერების დამადასტურებელია, მუსიკა ისე მოარგო დრამას, რომ ჩინებული სპექტაკლი გამოვივიდეს.

თუკი ტექსტუალურ მხარეს არ გამოვედავებით, „რიჩარდი“ ერთიანი სტილის, ყოველმხრივ გამართული, და რაც მთავარია, წმინდა დრამატული სპექტაკლია, სადაც შექსპირის სუნთქვა, თუმცა ზოგჯერ არითმიული, მაინც გარკვევით იგრძნობა...

შეიძლება მკითხველებიდან ზოგიერთი გამოერიოს ისეთი, რომელიც თუ პირში არ მეტყვის, გულში მაინც გაიფიქრებს,—ახლა მოხვედი ამ აზრზე, ბიძიკო, როცა მთელმა ევროპამ, და რაც ჩვენთვის განსაკუთრებით უფრო საამაყოა, კრომველის, გლადსტონის, ჩერჩილისა და მარგარეტ ტეტჩერის ინგლისმა უკვე იწამა ქართული „რიჩარდი?!“

არა, ამ აზრზე ახლა არ მოვსულვარ; იმ დროს, როცა „რიჩარდი“ აგონიური მშობიარობის კრუნჩხვებში იმყოფებოდა, და მის მიმღებ ბებიაქალებს კულტურის სამინისტროდან ეჭვი არ ეპარებოდათ, რომ იგი მკვდარი დაიბადებოდა, და მერე კი, სულ ვიწრო წრისთვისაც საცდელად რომ ეჩვენებინათ, რაკი ყოველმხრივ დღენაკლულ და უდღეურად იყო მიჩნეული, ამაზეც კი ჭოქმანობდნენ,—მე როგორღაც მომიხდა დავსწრებო-

დი ბოლო რეპეტიციებს, და ერთადერთი მე ვიყავი, რომელსაც გამბედაობა ეყო გამოეთქვა საპირისპირო აზრი, რის გამოც აქედან და იქიდან, ცხადია, ჩურჩულით, ერთგვარად საიდუმლოდ (თუ გავვიგო, არც როლს მოგვეცემს და არც საზღვარგარეთ წაგვიყვანსო), — არა ერთმა და ორმა გამეიცხა: „რას ამბობთ?! როგორ გეკადრებათ?! ეს მოგწონთ?.. რობია ამ სპექტაკლში პალოზე მიბმულ იმ თხას ჰგავს, რომელმაც სადამდეც თოკი გასწვდა, მოჩირკნა მთელი ბალახი და ახლასეგ, უკვე ხელმეათედ, ნაძოვნს უბრუნდებაო“.

არა მგონია ახსოვდეს — „თათარი“ ხომ „ქრისტიანისა“ კარგს არაფერს იხსომებს, — მაშინდელი ღირექტორის თანდასწრებით დამდგმელი რეჟისორი გავამხნევე, რომელსაც, უკლებლივ ყველას აზრით, თითქმის მთელი წლის ნაშუაგვეარი წყალში უნდა გადაეყარა, თანაც არა მღორე ტემზაში, — მღვრიე მტკვარში!..

და მაინც, „რიჩარდმა“ პირველ ხანებში ვერ ირგუნა ქართული ტაში; ვიდრე თეატრი ინგლისში პირველი საგასტროლო მოგზაურობიდან არ დაბრუნდა, „რიჩარდზე“ პარტიერიც ძლივს იესებოდა. მერე და მერე კი... წამხედურობას შეუძლია არა მარტო ქვეყნის ამოგდება, ზოგჯერ იგი შეიძლება სასიყვეთო საქმეშიც გადაიზარდოს, ყველასათვის ზარგებლობის მომტან მიმბაძველობაში.

და ახლა „რიჩარდი“ ერთადერთია რუსთაველის სახელობის აკადემიური თეატრის რეპერტუარში, რომელიც მის აკადემიურობას ამართლებს და რომლის სანახავადაც მაყურებლის შემოყვანა ქამანდით, ანდა კოვბოები, ამერიკაში, გაგარეულებული ცხენების დასაქვრად, ლასოს რომ ეძახიან, — საპირო არ არის.

კი, მაგრამ... როდემდე იკმარებს ეს ერთი „რიჩარდი“, თუნდაც ჩინებული, განა მარტო ერთი სპექტაკლი ეყოფა წლების მანძილზე სულიერ საზრდოდ ათიათასობით ქართველ მაყურებელს?! მოსკოვის, ლენინგრადის, კიევის დრამატულ თეატრებს მიმდინარე რეპერტუარში ოცზე მეტი დასახელების სპექტაკლი აქვთ. იქ, წარმოდგენას, რომელზეც დასწრება 90 პროცენტამდე დაეცემა, — უმაღვე ხსნიან (თუმცა იყო ერთი შემთხვევა, როცა ჩვენდამი, ქართველებიდან გამოსაკუთ-

რებული პატივისცემის ნიშნად, „მხატმა“ რამდენიმე ხანს შეინახა დიმიტრი ალექსიძის დადგმა „Я вижу солнце“ და მერე, როცა „Комсомольская правда“-ს უმცროსმა ძმამ „Московский комсомолец“-მა არ დაგვიწოდო და მოათავსა კრიტიკული წერილი სათაურით — „А где солнце?“, მაშინ „მხატმა“ იფიქრა, ცარიელი დარბაზი უფრო სახელის გამტეხია პიესისა და სპექტაკლისათვის, ვიდრე მისი საერთოდ არ არსებობა რეპერტუარშიო და...).

ჩვენც რომ დასწრების, თანაც ნებაცყოფლობითი დასწრების პროცენტებით ვიხელმძღვანელოთ, მაშინ ორივე ჩვენი აკადემიური თეატრი უნდა მივხუროთ, — ამას, რასაკვირველია, რესპუბლიკა არ დაგვანებებს, მაგრამ არც ის არის სულ სინდისიერი საქციელი, როცა შენ, „დირექტორ-კაპიტანი“, სახელმწიფოს იმედით ლოგინს ფართოდ იშლი და რაკი ფინანსური გაკოტრებისა არ გეშინია, მხატვრული გაკოტრების ამბავი ბევრად არც განაღვლებს.

„თეატრში იმან უნდა იაროს, ვისაც სურს ეს, ვისაც ამის შინაგანი მოთხოვნილება აქვს, ვისთვისაც თეატრში ყოფნის ყოველი დღე დღესასწაულია“, —

ეს ოქროს სიტყვები მარჯანიშვილის თეატრის ახალ ხელმძღვანელს ეკუთვნის, და რარიგ მოჩარული ვიქნებოდით, თუ მათ ოქროს საქმედაც აქცევდა.

გვახსოვდეს კი: სადღესასწაულო განწყობილება ადამიანს თეატრში უბრალო, ფიზიკური ყოფნით როდი შეექმნება, — მხოლოდ და მხოლოდ კარგი სპექტაკლებით, და თუ მათ შორის, თუნდა ხუთ წელიწადში ერთხელ მაინც, სადღესასწაულო სპექტაკლიც გამოერევა, ეს უკვე დიდი დღესასწაული იქნება არა მარტო ხელოვნებისთვის, — მთელი ქვეყნისთვისაც.

მაყურებლისათვის თეატრში სასიარულოდ შინაგანი მოთხოვნილების გალვიძება-გალვივება, რასაკვირველია, ისევ და ისევ თეატრზეა დამოკიდებული; მაკავარიან-ჭაბუკიანის „ოტელომ“ იმ დროს უმაყურებლოდ გამოყრუებული ოპერის თეატრი კვლავ ააზმიანა და რამდენიმე სეზონით გამოაცოცხლა; „კავკასიურმა ცარცის წრემაც“ ააფორიაქა ჩვენი უტახტო სატახტო ქალაქი და გაგვახსენა „ესპანელი მღვდლის“ ღროინღელი რუსთაველის თეატრი; მარჯანიშვილის თეატრის

ამასწინანდელმა ერთმა სპექტაკლმაც, რომლის სათაურში ერთი შინაური ცხოველის სახელია ჩართული, რომელიც, ადამიანებისა არ იყოს, შეიძლება ავიც იყოს და კეთილიც, — გამოიწვია მაყურებელთა ცხარე ინტერესი და, მიუხედავად ტელევიზიით მისი უმოწყალო ექსპლოატაციისა, ეს ინტერესი, შეიძლება, ორასი ან შლაგის შემდეგაც არ დამცხრალიყო, რომ... ქათმის გოდებისა არ იყოს, ნუ დამკლავთ და მაშინ ვნახოთ, რამდენ წელიწადსაც ვიცოცხლებო... ჰოდა, რა იმ სპექტაკლის ბრალია, თუკი ის მოსვლისთანავე დაკლა (ამოიღო რეპერტუარიდან) თეატრის ახალმა მხატვრულმა ხელმძღვანელმა, როგორც ანტიმხატვრული...

კი, მაგრამ, თუკი ის ანტიმხატვრული ნაკეთობაა (ნაწარმოებით, ამის თქმას ვერ ვებდავ, ვაითუ ტრაბახში ჩამითვალოს ხელოვანმა ხელოსანს), მაშინ როგორღა გამოძერწეს მისმა მშობლებმა ისეთი მხატვრული სახეები (ჩინჩახელი, სარე), რომლებიც, თითქმის 30 წლის შემდეგაც, ახსოვს ახლაც ბევრს?! ეგებ ეს მართო მათი. ხალასი ნიჭიერებით აიხსნება და დრამატურგი მათ თავისი ნაცოდვილარით სულაც არ დახმარებია, ა?!

ვინ იცის, ეგებ ასეა მართლაც, მაგრამ... მაშინ რამ შეუშალა ხელი მათს ტალანტს, ასევე გაბრწყინებულებიყვნენ თითქმის საბუნეფესოდ, სპეციალურად მათთვის დადგმულ „სარეველასა“ და „სიტუაციაში“!

ჩვენ უკვე ვიცით, რომ თაობა მიდის, ისიც ვიცით, რომ თაობა მოდის...

ჰოდა, ალბათ, რა დიდად ეფონება გულს, და რა ამაყად მოიღერებს ყელსა, როცა ერთდროულ გაზეთ „ქართული თეატრის დღეში“ ამოიკითხავს ერთ, აწ უკვე მოსულ-მობრძანებულ კრიტიკოს-დრამატურგის წერილში:

„თ. ჩხეიძემ უდიდესი რისკი გასწია — მან „ოდიზისი“ გაიაზრა, არა როგორც ტრაგედია, არამედ როგორც ფსიქოლოგიური დრამა“.

ზედავ, თვალბრიალა მკითხველო, დამდგმელ რეჟისორს რა რისკი გაუწევია, თანაც რა უდიდესი (величайший!)? ამ რისკთან შედარებით ნიაგარაზე გაჭიმულ ბაგირზე გავლა განა შეიძლება, სართოდ, რაიმე რისკად მივიჩნით?

ესეც არის, დაახლოდა კი ვისმე, ნახვის შემდეგ დაძინებადღე მაინც, ამ უდიდესი რისკის შედეგი — „ოიდიპოსი“, როგორც ტრაგედია ან როგორც ფსიქოლოგიური დრამა?!

მკითხველის ყურადღებას იმასაც მივაქცევდი, — როგორ ფიქრობს იგი, ეს მშფოთვარე: „ფიქრები თეატრზე“ ამ კრიტიკოს-დრამატურგს ანგარებამ აფიქრებინა („ხომ ხედავ, როგორ გაქებ, — არც ახლა დამიდგამ პიესას?“) თუ უვიცობა-უვეემონობამ?!

და საერთოდ, ღირდა კი ალექსიძის დიდებული „ოიდიპოსის“ შერე, ქართულ სცენაზე დროის ასეთ მცირე მონაკვეთში, სხვა „ოიდიპოსების“ გამომწვეურება?!



ეს არაფერია, თუ სხვებმა ისე არ იციან, როგორც ჩვენ გვინდა, სამაგიეროდ, ჩვენ ხომ ვიცით, რა „დიდი კულტურის ხალხიც“ ვართ ქართველები, განსაკუთრებით კი თეატრალური ინტელიგენცია პირად და საზოგადოებრივ ურთიერთობაში; როგორ ვუფრთხილდებით ერთმანეთს, როგორ ვაფასებთ ერთმანეთს, როგორ ვუხანგრძლივებთ სიცოცხლეს თითქოს უკვე სიცოცხლემოსწრაფებულთაც კი... ამის დამამტკიცებელ, მხოლოდ ერთ „ნივთიერ საბუთს“ შორეული წარსულის ჩემი მახსოვრობის არქივიდან წარმოგიდგენთ:

ეს იმ დროს მოხდა, როცა ჩვენს ოპერის თეატრს ხალხი ისე აწყდებოდა, როგორადაც ახლა უნივერსალს მიაწყდება, თუ გვიგეს, რომ „გაყიდვაშია დუბლიონკები...“

ამ ზღვა მაყურებელში უბილეთო ღარიბ ყმაწვილს შეგედლო საკონტროლო ბარიერის ფეხებში გამძვრალიყავი, ანდა, — ტოლებში ეს უფრო ვაუკაცობად ითვლებოდა, — ზედ ბარიერზე გადაშვებულიყავი. ერთიც და მეორეც მოსახერხებელი იყო მხოლოდ იმ შემთხვევაში, როცა მთავარი კონტროლიორი, სათვალთან, ზორბან ტანის ტრუსევიჩი და მისი თანაშემწე, ესეც ზორბა ტანის მისივე ქალიშვილი და წინა ფოიეში მოფუსფუსე ტანმალალი მთავარი აღმინისტრატორი (შემდგომში რეჟისორი) კვალაშვილი როგორღაც ყურადღებას და სიფხიზლეს მოადუნებდნენ... სწორედ ამ მომენტის მომლო-

დინე და შემჩერე ვიყავი, როცა ტრუსევიჩის მკვებარე ხმა გასმა ირგვლივ:

— Я ничего не знаю! Мне приказано не впускать Вас в театр!.. Отойдите! Вам говорят! Не мешайте людям проходить...

მის წინ კი გაცეცხლებული, და თითქოს ცეცხლმოდებულის, პატარა ტანის გურული კაცი იდგა, რომელიც აღშფოთების გამომხატველ სიტყვებს, დიდი ხნის შემდეგ გამოგონილი ავტომატივით ისროდა და სულაც არ აპირებდა „ატილის...“

დღესაც არ ვიცი, რა დააშავა, ანდა, უფრო გარკვევით რომ ვთქვათ, რა უნდა დაეშავებინა ისეთი „ქეთო და კოტეს“ შემქმნელ კომპოზიტორ ვიქტორ დოლიძეს, რომ მისთვის — თითქმის საკუთარ სახლში! — ოპერის თეატრში შესასვლელი გზა დაეხშოთ, თანაც ასე თავმოსაჭრელად, საჯაროდ?!

ეგებ ესეც იმით უნდა აიხსნას, რომ „თაობა მიღის, თაობა მოდის?“

ვინ იცის — ვინ იცის, ოღონდ ეს კია, ამ ამბოს შემდეგ ნახევარი საუკუნე გავიდა, მაგრამ ვიქტორ დოლიძის ღირსეული შემცვლელი — კომიკური ოპერის ქანრში — ჯერ არავინ მოსულა.

სიცოცხლეში ჩადენილი სიგლაზე არც სიკვდილის შემდეგ უნდა ეპატიოს მის მქმნელს: არ ვიცი, ვის მიუძღვის კონკრეტულად ბრალი ზემოთ აღწერილ სიგლაზეში, ეს კი ვიცი, იმ ხანებში ოპერას ინტელიგენტად მიჩნეული ლელი ჯაფარიძე დირექტორობდა...

— — —

ო, უკვე მოაწია დრომ, რათა ბოლოში მოვიხადოთ ასე მრავალგზის გადახვევ-გადმოხვევისათვის და, როგორც იტყვიან, მადლობაც მოვახსენო მკითხველს ყურადღებისათვის, მაგრამ ჯერ, ცოტათი მაინც, კვლავ მინდა ვისარგებლო მისი ყურადღებით და სამიოდე გვერდის უკან შეწყვეტილ აზრს დაუბრუნდე...

...დაიხ, საბედნიეროდ, რუსთაველებს, „რიჩარდის“ გარდა, „ცარკის წრეც“ მოეპოვებათ, დიდხანს რომ ემსახურა თე-

ატრსაც და მაყურებელსაც, მაგრამ მან ხომ უკვე კარგა ხანია საგასტროლო რეპერტუარში გადაინაცვლა...

ო, ეს გასტროლები!..

თუ ჩვენი ქვეყნის ქალაქები, თუ ბებერი ევროპა, თუ კაბუკი ამერიკა!..

როგორც ქართველ კაცს, რასაკვირველია, გიხარია შენი პატარა ქვეყნის გაფრენა წითელ ხიდს იქით, და თან, როგორც იმავე ქართველ კაცს, გულს უანგი გედება, — ჩვენი პირველი ეროვნული თეატრი „ციგნების ხოროს“ ხომ არ უნდა ემსგავსოს, — სულ მოგზაურობაში იყოს, სულ დაწოწავდეს? ამათ ჩვენ, როგორც ერს, ვითომ ბებერი რამე გვემატება? აი წუხელ, ბოშური სიმღერის კონცერტზე რომ ვიყავით და დიდი ესთეტიკური სიამითაც გავიმსკვალეთ, დღეს კი, ნაძალადევისკენ გადასასვლელ ხიდზე „კევა-ჟვაჩვას“ გამყიდველ ბოშა-ქალებს რომ ჩავეუარეთ, ზურგზე რომ ერთი ღლაპი ჰკიდიათ და „მეორე“ კი, თოჯინისებურად, თავიან-ფეხიანად ბინძურ კინკვებში გახვეული — მილიციის დასაფრთხობად, ბიჭი ხარ და ხელი მახლეო! — ცალ მკლავზე „მიუძინებიათ“, — როგორ, ჩვენ მათდამი, წუხანდელი საღამოს ეშხით, უფრო მეტი სიყვარულით გავიმსკვალეთ?! (მე ამას უფრო ჩვენი ქვეყნის შინა გასტროლებზე მოგახსენებთ, საზღვარგარეთ კი ასე „ფართოდ“, საბედნიეროდ, ჯერ არ გვიცნობენ).

არც ერთი დიდი, სერიოზული თეატრი თავის ადგილსამყოფელს იშვიათად თუ ტოვებს დიდი ხნით, და თან ხშირ-ხშირად... ასე რომ იყოს, როგორ ფიქრობთ, მოსკოვის ტაგანკის თეატრს, ვახტანგოვის თეატრს, სატირის თეატრს, ტოვსტონოგოვის თეატრს ლენინგრადში, უკრაინის ფრანკოს სახელობის, ლიტვის პანევეჟისის, ესტონეთის „ვანემუინეს“ თეატრებს საზღვარგარეთ მიმპატიუებლები არ გამოუჩნდებოდნენ და იქ, თუნდაც დიდი ხნით დარჩენილიყვნენ, მაყურებლები მოაკლდებოდათ?!

რასაკვირველია, არა, მაგრამ ისინი უფრო იმაზე ზრუნავენ და დღენიდაღ იმაზე ფიქრობენ, რა გზებით გაახარონ საკუთარი, თავისი მაყურებელი და რით მოხიბლონ (ცხადია, ამ გზებსა და ამ მოხიბლვაში კარგი სპექტაკლები იგულისხმება). ჰოდა ჩვენ, ქართველ მაყურებლებს კი რით გვახარებს

ჩვენი პირველი, „საგასტროლო“ რუსთაველის თეატრი? ჩვენ ხომ მისი, ასე ვთქვათ, მაინც ძირითადი, მთავარი მაყურებელი ვართ? იგი ხომ ათასჯერ უფრო ჩვენზე უნდა ეყრდნობოდეს, ვიდრე ცხრა მთას იქითურ მექსიკელებზე?!

ნუ მოგვერიდება და ვთქვათ. გულახდილად: ჯერჯერობით მაინცდამაინც ბევრით ვერაფრით გვახარებს. საამაზოდ, ერთი შეხედვით, თითქოს პრიმიტიულ საბუთს მოგიყვანთ: რემონტის გამო რუსთაველის თეატრმა, მთელი თავისი რეპერტუარით („ცარცისა“ და „რიჩარდის“ გამოკლებით), დროებით ბინა საბურთალოში დაიდო, სადაც ათიათასობით ქართველი მოსახლეობაა, მაგრამ აქაც კი, მათთან ახლოს გადმოსული თეატრის კარებს მტვრევა არცთუ ბევრმა დაუწყოს და ხელოვნების ახლა უკვე ამ მოძრავმა კერამ ამჯობინა ადგილი გამოეცვალა...

და აი, რამდენი ხანია რუსთაველის თეატრი თბილისში არ იმყოფება, და არავის ამის გამო გული არ შესტკივა, არავინ არ კითხულობს, სად არის, ან როდის ჩამოვა, მომენატრაო.

დიახ, ერთი პოეტის ცნობილ სტრიქონს სახე რომ ოდნავ ვუცვალათ... თეატრი, რომელიც ქალაქს აკლია, — ეს რომ არ იგრძნობა ხოლმე, ამაზე უფრო გულსაწევავი თავად თეატრისათვის შეიძლება იყოს სხვა რამე?!

ამის მიზეზი ბარე ათამდეც შემიძლია დავასახელო, ზოგიერთი მათგანი, ოღონდ პირდაპირ მიუთითებლად, ადრეც მოვიხსენიე, ახლა კი მხოლოდ ერთზე, დასკენისებურ მიზეზზე შევჩერდები:

გზა, რომლითაც რუსთაველის თეატრი მიდის, არ უნდა იყოს ჩვენი პირველი, ეროვნული თეატრის მთავარი გზა: სტილური აღრევა, მომაბეზრებელი და გაუთავებელი მოხისური „ექსპერიმენტები“; ცოტა პანტომიმა, ცოტა პიროტექნიკა, ცოტაც „მიკროფონიკა“, - „ტანცები“ და, საერთოდ, დრამატული თეატრისათვის შეუთავსებელი და მისი დამაპყრობელი არცთუ ცოტა ოპერეტულობა, და ამავე დროს სრული უპატივცემლობა სიტყვისა და მისი გამომხატველი საშუალებებისადმი. საერთოდ, დრამატურგიული მასალისადმი თვითნებური, დამწყები ყასბის — ჯერ კიდევ რომ ვერ გარკვეულა, ჩალაღაჯი სად არის და სუკი სად, — დანით მიდგომა დრამის,

პიესისადმი, რომელიც მუდამ იყო და დარჩება თეატრის საფუძველი. თუკი, ცხადია, გვინდა, რომ დრამატული თეატრი ჰგავდეს დრამატულ თეატრს, და არა მოციროკო-მოოპერეტო-შობალავანო სანახაობას.

რაკი მე. როგორც შინაურ მღვდელს, ვიცი, შენდობა არ მექნება, ჩვენი რეჟისორ-ნოვატორების (!) თვალთახედვასა და ყურთასმენას ვთავაზობ „გარეულ“, თანაც არათუ რიგითი „მღვდლების“, — „ეპისკოპოსებისა“ და „არქიეპისკოპოსების“ ნაქადაგებს, თუმცა ესეც ვიცი, — კარგ მთქმელს კარგი გამგონე უნდა, კარგად დაწერილს კი კარგი წამკითხველი:..

კონსტანტინე სტანისლავსკი:

«Театр живет идеями драматурга».

ალექსანდრე სუმბათაშვილი-იუენი:

„გადაშეტებულ მიმიკას, მოქმედებას, მოძრაობას შეუძლია ზიანი მოუტანოს ს ი ტ ყ ვ ა ს, რომელიც დრამატურგიისა და სცენური ხელოვნების დ ე დ ა ბ ო ძ ი ა“. რეჟისორი გიორგი ტოვსტონოვოვი:

„ჩვენი პროფესიის კეთილშობილური სიდიადე, მისი ძალა და სიბრძნე ის არის. რომ ნებაყოფლობით და შეგნებულად შეიზღუდო თავი. წარმოსახვის საზღვრებს ზომ ავტორი გვიდგენს. და ამ საზღვრებიდან გადასვლა უნდა ისჯებოდეს კიდევ, როგორც ავტორის მიმართ ჩადენილი დ ა ლ ა ტ ი და ვ ე რ ა გ ო ბ ა; მონახო ერთადერთი სწორი, ზუსტი და მხოლოდ ამ პიესისათვის გამოსადეგი პირობითი ხერხი — აი. რეჟისორის უმაღლესი და უძნელესი ამოცანა“.

დრამატურგი ვიქტორ როზოვი:

«Еще и еще раз я убеждаюсь: если театр ставит пьесу так, как ее замыслил автор, впечатление наиболее сильное».

(«ЛГ», № 23, 1982 г.)

როდღ ხოხუტი, ჩვენში ჯერ კიდევ ნაკლებად, მაგრამ დავსვლეთში დიდად ცნობილი გერმანელი დრამატურგი:

«Обычно в возрасте сорока лет многие режиссеры переходят к постановкам лишь классических пьес, видимо, полагая, что таким путем и сами они станут классиками. Между тем, история культуры сохранила

имена только тех режиссеров, которые работали с авторами—своими современниками.

Постановка произведений современных, живых драматургов предполагает наличие у режиссера мужества, которое присуще подлинному служению в искусстве. Музейные отношения с давно признанными авторами, произведения которых никого более не беспокоят, удел посредственностей».
(«Театр», № 12, 1981 г.).

— — —

(...27 სექტემბერი, 1982 წელი, საღამოს 8 საათი: ეს-ეს არის ტელევიზიით გადასცეს „რუსთაველის თეატრი შორეულ აღმოსავლეთში“; გვესაუბრნენ თეატრის ერთპიროვნული ხელმძღვანელი და სხვა პატივსაცემი პირები.

ჩვენება დაიწყო იმ ქართულ-რუსულ-ინგლისურ ენოვან ემბლემით, რომელიც — ამას ხაზი უნდა გაესვას და არ უნდა ითქვას ეს სხვათა შორის — ჯერ კიდევ თეატრის შარშანდელ იუბილეზე შემოგვაპარეს, რაც, ცხადია, ჯაჭვის იმ ერთ-ერთი რგოლთაგანი იყო. თავდაპირველადვე წინამორბედთა მიმართ სამადლობელი ტლინკებისგან რომ იყო ასხმული...

რუსთაველის თეატრს მშვენიერზე მშვენიერი ირაკლი გამ-რეკელისეული ემბლემა აქვს და მისი შეცვლა იმდენჯერვე, რამდენჯერაც თეატრში განდიდების მონატრული („ისტორია ჩემით უნდა დაიწყოს!“) ესა თუ ის „დირექტორ-კაპიტანი“ მოვა, არ უნდა იყოს მის ხუშტურზე დამოკიდებული... ორი ემბლემა კი — ერთი შინ სახმარად, მოკვდავთათვის და მეორე გარეთ გასატანად, უკვდავთათვის, — არათუ მოსკოვის სამხატ-ვრო თეატრს, რომლის ფარდას, აფიშებს და პროგრამებს თი-ქემის დღიდან დაარსებისა თოლია ამშვენებს, — აფრიკის ეგ-რეთ წოდებული განვითარებადი ქვეყნების, ჯერ კიდევ ძიე-ბა-არჩევანში მყოფ არც ერთ თეატრს არ მოეპოვება, — ერ-თი ჩვენთვისო, ზანგებისათვის, მეორე თეთრებისათვის!

ამ გადაცემაში ჩემთვის ერთდროულად სამწუხაროც იყო და სასიამოვნოც რომერტ სტურუას ბავეთგან გაგონება იმ სიტყვებისა, რომ ამ გასტროლების დროს „ნაკლები წარმატე-ბა ჰქონდა „ვარიაციებს“ და „როლს დამწყები მსახიობისათ-ვის...“

სამწუხარო იყო იმიტომ, რომ შორეულ ხაზაროვსკშიც მე ქართველი კაცი ვარ და იქაც კი ყოველგვარი ღირსეული ქართული საქმის წაფორხილება („И это есть театр Руставели-III?!) ცხადია, დაძალონებს, მეორე მხრივ კი სასიამოვნო იყო იმიტომ, რომ ამ სპექტაკლების ჩემი შეფასება არ გამოდგა სუბიექტური და მცდარი...

დამდგმელმა გვამცნო აგრეთვე, რომ ერთ-ერთი ამ სპექტაკლის პირველი მოქმედება ახლებურად გადაამუშავა, მეორე მოქმედება კი, დროის სიმციროს გამო, ვერ მოასწრო...

დაე, ყოვლისშემძლე მელპომენა იყოს ამ სანაქებო საქმეში დირექტორ-რეჟისორ-დრამატურგ რობერტ სტურუას მფარველი. ისე კი, ვფიქრობ მაინც, ფუჟად ჩაივლის „ფიქრნი მისნი, შავად მღელვარნი“... ამ პიესებს არათუ ხელახალი დადგმა, — ხელახლა დაწერაც ვერაფერს უშველის).



მკითხველო, მით უფრო არათეატრალი მკითხველი, ალბათ, იკითხავს, ასე კუპრში ამოვლებული ფუნჯით რომ დაგვიხატეთ ჩვენი საუკუნოვანი, ეროვნული თეატრის სურათი, თუკი აქედან სულ ცოტა რამეც არ ღალატობს სინამდვილეს და ზოგი რამ მაინც, ასე თუ ისე, მართებულია. მაშინ სად არის, რატომ არ იჩიჩქნის ყურებს და არ აქცევს ყურადღებას კულტურის სამინისტრო, მისი კულტურული მინისტრიო...

ო-ო, ჩვენი კულტურული მინისტრი!..

ის ბევრად უფრო მეტია, ვიდრე კულტურული: ნიქიერი, გონიერი, განათლებული, მართლაც გამოსაჩენი, „საგასტროლო-საექსპორტო“ კაცია, რომელზეც ენა ვერ მოგიბრუნდება თქვა — У кого нет вкуса, ему нечего делать в искусстве! ალბათ ამიტომაც არის იგი შეუცვლელი მინისტრი აი უკვე 18 წელიწადია და. როგორც ჩანს, რევოლუციის პირველი წლების ერთი პლაკატისა არ იყოს... «Царству рабочих и крестьян не будет конца!»

ჰოდა, თუკი ასეა, მით უმეტესო, — მეუბნებით თქვენ, რის პასუხადაც ერთი პაწია კულდმოკვეცილ ზღაპარს გიამბობთ:

იყო და არა იყო რა, მინისტრობაზე უკეთესი, აბა რა იქნებოდა!..

იყო ერთი პატარა ვაიმარის საპერცოვო.

პერცოვს დიდად ესახელებოდა, რომ მას კულტურის მინისტრად გერმანიის ყველაზე დიდი პოეტი ჰყავდა — იოჰან ვოლფგანგ გოეთე.

და არც გოეთე თაყილობდა პერცოვის მინისტრობას: იყო თავისთვის საპერცოვოში, არაფერზე გული არ შესტკიოდა (თუმცა იმ მშვიდ საუკუნეში არცთუ ბევრ ვინმეს ჰქონდა გული ასატყივებელი), ნელა და დინჯად, უშიშრად და აუჩქარებლად თავის საქმეებს აკეთებდა და არც ის მოსდიოდა აინუნში. ზოგ-ზოგებმა მას, სალონებში, საკუთარ საქმეთა მინისტრიო — რომ შეარქვეს.

ასე, ჩემო პატარებო,

ლხინი იქა, ჭირი აქა!.. ოი, შემცდა, ჩემო პატარებო,

ჭირი იქა, ლხინი აქა..

მარტი, 1982 წ.

P. S. წინამდებარე ნაწერით ორ-ბექდვით ორგანოს დავურღვიე მყუდროება, მაგრამ არც ერთმა არ მიიჩნია დაბეჭდვის ღირსად, თუნდაც დისკუსიის წესით მაინც; ერთგან კი მთხოვეს და წამაქეზეს კიდევ. გვიჩვილეო, ჩვენ ეს დამსახურებაში ჩაგვეთვლებო, სწორედ ამიტომაც არ ვამჟღავნებ მათს ვინაობას, — არ მინდა ჩემი წყალობით მათ მადლობა უწყალობონ.

სექტემბერი, 1982 წ.

გ ვ ი ა ნ დ ე ლ ი დ ა მ ა ტ ე ბ ა :

1982 წლის 23 ოქტომბრის რადიოგადაცემიდან:

„მიკროფონთან არის რესპუბლიკის სახალხო არტისტი მედეა ჩახავა:

„...სარეს როლი ჩემი საყვარელი როლი გახლავთ; იგი ისე კარგად აქვს დაწერილი ავტორს, ყოველი მსახიობისათვის მისი თამაში უთუოდ ბედნიერებაა.

მე დიდ მადლობას მოვახსენებ ბატონ კიტა ბუაჩიძეს, რომელმაც როგორც ერთხელ თვითონ მითხრა, ეს როლი თავიდანვე ჩემთვის გაიზარა. მე მას ყოველთვის დიდი ხალისით ვასრულებდი ხოლმე და დღემდე გამომყვა

მისადმი სითბო და სიყვარული; აქვე ისიც მინდა შევნიშნო, რომ ამ როლს, მერე და მერე, ჩემზე უკეთესი შემსრულებლები გამოუჩნდნენ“.

პიესის ავტორი კი ფიქრობს. მეეზოვე სარე, მედგა ჩახავას შესრულებით, ყველაზე უნაკლოა მათ შორის, რომლებიც მას უნახავს, უნახავს კი მას თითქმის ყველა სარე ქართულ, რუსულ, სომხურ, აზერბაიჯანულ სცენებზე.

ავტორი ფიქრობს აგრეთვე, რომ მსახიობი — დედის ამ რადიოგამოსვლას, რომელიც დასათაურებული იყო „უღიმილოდ ვერ მოისმენთ“, — თუ საერთოდ უსმენდა მისი შვილი — რეჟისორი, — უსმენდა. ეჭვი არ არის, ირონიული ღიმილით.

რა გაეწყობა,

„თაობა მიდის, თაობა მოდის!..“

საქართველოს კომუნისტური პარტიის
ცენტრალური კომიტეტის
მდივანს გ. ენუქიძეს

ბატონო გურამ!

თქვენ, ცხადია, ათეისტი იქნებით, ამიტომ ამ პარათში არაღმერთს, — ნეიტრალურ ზეცას ვწირავ მადლობას, რაკი თქვენი სიტყვა თეატრალური საზოგადოების პლენუმზე შარშან, სექტემბერში, დაინფარქტებულს, არ მომასმენინა და, რაღაც ბედად, არც იმ დღეებში და არც მერე, ამის ირგვლივ არც ერთ მნახველ-ნაცნობს ჩემთან კრიტიკ არ დაუძრავს.

თქვენს სიტყვას სულ ახლახან შემთხვევით თვითონ წავაწყდი ჟურნალ „თეატრალურ მოამბეში“:

„ამასწინათ გავეცანი ერთ-ერთი თეატრალური მოღვაწის წერილს, სადაც ჩვენს რეჟისორებს ბრალად ედებათ ათასი რამე. კიდევ კარგი, წერილს აქვს მინაწერი, სადაც ავტორი ერთ-ერთ მსახიობს შესჩივლებს: თქვენმა რეჟისორმა შეიღმა ჩემი პიესა არ დადგაო. ე. ი. მისი კრიტიკის მამოძრავებელი ძალა გახლდათ არა ობი-

ექტურობა, არამედ პირადი განაწყენება. წყენა კი, და-
მერწმუნეთ, ცუდი მეგობარია“.

ასეთი შექებისათვის მადლობის მეტი, აბა, რა მეტქმის: კა-
ცი ტიკი-ტომარად კი არა, მოღვაწედ გამომაცხადეთ, ნაშინ
როცა თავად ჩემი თავი მოღვაწედ სრულებითაც არ მიმაჩნია.
ღრამატურად — კი, მოღვაწედ — არა...

მოღვაწე დიდი ცნებაა, სხვათა შორის, ასევე მეცნიერიც,
ახლა ამა თუ იმ დარგში საშუალო მომუშავეს, ზოგჯერ ცუ-
დად მომუშავესაც კი, მართლაც ტიკი-ტომარას და გაქნილ
საქმოსანსაც რომ მიაკერებენ ხოლმე.

ისე კი...

აბა, რა მოღვაწეა ის „მოღვაწე“, რომელიც მართალ ადა-
მიანებს ფუთობით ცრუბრალდებას წაუყენებს, — იგი უფრო
ცილისწამებელია.

ისე კი, კვლავ ისე კი...

თქვე დალოცვილო. „ათასი რამე“ თუ დავაბრალე „ჩვენს
რეჟისორებს“, — ნუთუ ამ ათასიდან მართებულად ერთიც არ
მიიჩნით? აი, თუნდაც, ის, რომ „კუტუ-კუტუები“ სცენიდან
არაფერი სახსენებელია და არც სქესობრივი აქტი, თუგინდ
მისი იმიტაცია, არაფერი საჩვენებელია?

როგორ ფიქრობთ, ჩვენს ისეც სირცხვილდაკარგულ ახალ-
გაზრდობას ასეთი რეჟისორული „ნახოდვები“ ზნეობრივად
კიდევ უფრო გააფაქიზებენ?!

თქვენ ხშირად დაბრძანდებით ხოლმე პრემიერებზე და...
აბა, ერთი, გულის სიღრმეში საკუთარ თავს დავკითხეთ, „კა-
ლიფორნია“. „ნადირობა“, „ანა კარენინა“, „სამოთხის ჩიტი“,
„სიყვარულის მზე“ და ბევრი სხვაც, — რამდენად დადგმის
ან ამგვარად დადგმის ღირსნი იყვნენ, — ამას რომ სულაც
თავი დავანებოთ, ნუთუ ჩვენი თეატრალური ინსტიტუტისა და
ჩვენი რეჟისორების მიერ გაწვრთნილი მსახიობების მეტყვე-
ლებამ ცოტათი მაინც არ შეგაძრწუნათ?! ანდა ნანახმა მოგა-
ნიქათ კი რაიმე ესთეტიკური სიამოვნება? აღძრა კი თქვენში
სიხარული (ისეთი კი არა, გაზეთებისათვის რომ არის ხოლ-
მე განკუთვნილი), რაიმე ადამიანური სიხარული, და ეს

სიხარული, ვიდრე თეატრიდან შინ მიაღწევდით, გზად მაინც გეთანამგზავრათ?

ეგებ თქვენს მოადგილეს, ნოდარ ჯანბერიძეს გამოჰყვა ამ და მრავალი სხვა სპექტაკლიდან აღმაფრენა და ენთუსიაზმი? აკი ისიც, თქვენი არ იყოს. ერთობ ნაწყენი ყოფილა, თურმე, ჩემზე, „საით მიექანება ქართული თეატრის“ გამო...

...და მაინც, როგორც იტყვიან, შეენდოს!

შეენდოს უფრო იმიტომ, რომ... მახსოვს, დაახლოებით ათი-თორმეტიოდე წლის წინათ ბატონი ნოდარი მსახიობის სახლში ერთ რომელიღაც შეკრებილობაზე გამოვიდა, როგორც უბრალო, რიგითი, მგონი, შემთხვევით იქ დამსწრე და კეთილი. დასაცავი სიტყვებით მოიხსენია იმ დროს ბევრისგან (კომპოზიტორ-მინისტრის, „მეეარკაცი“ თაქთაქიშვილის მეთაურობით!) უსამართლოდ და ტუტუტუურად ჰიტლერამოკრული ვახტანგ ჭაბუკიანი...

საგულსხმომ ის არის, რომ ეს არც იმ კრების თემა-დანიშნულებას შეადგენდა და არც ორატორის მაშინდელი საქმიანობის პროფილიდან გამომდინარეობდა, მაგრამ მან, როგორც იმ დროს პატიოსანმა მოქალაქემ, საამისოდ მაინც მონახა ჭუჭჩუტანა და...

ჰაი-ჰაი, რომ პროფესორი ჯანბერიძე — ამაში პაწაწინტელა ექვიც არ მეპარება — „ზევით“ რომ არ მუშაობდეს, ჩემი იმ „ნაჯღაბნის“ წაკითხვის შემდეგ, ქუჩაში შეხვედრისას, მოწონების ნიშნად, ხელსაც მაგრად ჩამომართმევდა და, ვინ იცის, შეიძლება მადლობითაც დამასაჩუქრებდა, როგორადაც ეს ჭკუით მასზე არანაკლებ სხვა პროფესორებმა მოიმოქმედეს, — და საერთოდ, ყველამ, ვინც კი მასში კბილგაკრული არ არის, — თქვენ დაწერეთ ის, რაც ყველა ჩვენგანს გულში გქვონდაო.

ღიახ, სწორედ ეს გახლავთ, ბატონო გურამ ნამდვილი მწერლობა, — თქვა ის, რაც ხალხს აწუხებს და, სხვადასხვა მიზეზის გამო, ზოგს ვერ უთქვამს, ზოგსაც ვერ გამოუთქვამს, ჩაიხედო მის გულში და ამოიკითხო და შენად მიიღო მისი სატკივარი.

. ამას კი დიდი არაფერი მნიშვნელობა აქვს „პირად განაწყენების“ საფუძველზეა იგი ნათქვამ-დაწერილი, თუ...

ვიცი, არ დამერწმუნებით, მაგრამ მაინც გეტყვით: კარგი და სანაქებო, საერთოდ, არაფერი არ იწერება აულელეებლად!

აულელეებლად დაიწერა ოცდაათიან წლებში, მაგალითად, ფხაკაძის პოემა „შრომადღეები“; რომელიც იმხანად ერთმა სახელმორკმულმა პირმა, მალაქია ტოროშელიძემ, თუმცა „ჩვენი დროის „ვეფხისტყაოსნად“ გამოაცხადა, მაგრამ... ახსოვს კი ახლა ვისმე ეს... „შრომატყაოსანი?“ აი, თუნდაც, თქვენ, გაგონებით კი მაინც გაგიგონიათ?!

და თუ არ გაგიგონიათ, არ შეწუხდეთ, ამის უცოდინარობა თქვენს განათლებულობას ჩრდილს ვერ მოჰფენს, მაგრამ ის კი თუ არ შოგესხენებათ, რომ მსოფლიო ლიტერატურა ათობით დიდებულ მხატვრულ ნაწარმოებს და სატევარივით ბასრ პუბლიცისტურ-კრიტიკულ სტატო-წერილს ითვლის, რომლებიც სწორედ „პირადი განაწყენების“ ნიადაგზეა აღმოცენებული, — ეს კი, ცოტა არ იყოს, საწყენია.

მე შემეძლო ამ აზრის დასადასტურებლად, თვალსაჩინოებისათვის, დამესახელებინა რამდენიმე მათგანი, მაგრამ ამას თუ არ ვშვრები, მხოლოდ იმ მოსაზრებით, რომ უტაქტობად მიმაჩნია „ნუტას სკოლა“ გაგიხსნათ, ეს ერთი, და მეორეც, —მათი სათაურები ისე ლომივით ბრღვეინავენ, ჩემი კატის კნავილის მათს გვერდით ამოყენება, ვიცი, მე თავად ჩამაგდებს, თქვენდა სასიხარულოდ, სასაცილო მდგომარეობაში...

თქვენ ბრძანებთ:

„ავტორი ერთ-ერთ მსახიობს შესჩივლებს: თქვენმა ჩვეისორმა შეიღმა ჩემი პიესა არ დადგაო“..

ბოდიშს კი ეიხდი დაექვებისათვის, მაგრამ...

თქვენ ჩემი ნაწერი დღევანდელ ქართულ თეატრზე მართლა საკუთარი თვალებით წაიკითხეთ, თუ... სხვისი მონაყოლით ბრძანებთ. — უკაცრაული პასუხია — ასეთ მონაჭორს?

მე საამაყოდ საფუძველი, შეიძლება, სულაც არ გამაჩნდეს, მაგრამ ჩვენი დროისათვის და მისთვის ზედმიწევნით ზუსტად ფეხაწყობილ და ხმაშეწყობილ მუცელ და სახელგაბერილი ავტორების მსგავსად, ჯერ კიდევ როდიდან, ჩამოფასებული სიამაყის გრძნობას ახლაც არა ვარ მოკლებული: შედეგა ჩახავასთვის არათუ წერილობით, — პირად საუბარშიც კი

არასოდეს შემიჩვილია, თქვენი შვილი პიესას არ დგამს-მეთქი, — მე მხოლოდ მისი აზრი მოვიყვანე. რაც მან საქვეყნოდ თქვა რადიოთი; ეს ჩანაწერი, ვინ იცის, ეგებ კიდევ ინახება ხელუხლებელ ფონდში, ასე რომ, თუ რამეს ვაყალბებ, ამის დადგენა თქვენს აპარატს არ გაუჭირდება:

„მე დიდ მადლობას მოვასხენებ ბატონ კიტა ბუაჩიძეს, რომელმაც, როგორც ერთხელ თვითონვე შითხრა, სარეს როლი თავიდანვე ჩემთვის გაიაზრა. მე მას ყოველთვის დიდი ხალისით ვასრულებდი და დღემდე გამოძევა მისადმი სითბო და სიყვარული“.

სად აღმოაჩინეთ აქ, ბატონო ჩემო, ჩემის მხრივ, ჩივილი, ბუზღუნა, „წყენა“?

ჰოდა, და თუ თქვენ „თეატრის“ უკანასკნელი გვერდი მართლაც ჩაიკითხეთ, რატომ იმასაც არ მიაქციეთ მცირეოდენი ყურადღება მაინც, ჩვენი „ერთ-ერთი რეჟისორის“ მსახიობი დედის გულიდან ნათქვამს, 30(ოცდაათი!) წლის წინათ ნათამაშები როლი ახლაც მახსოვს და „მისადმი სიყვარული და სითბო“ აქამდე შემოვინახეო?!

სხვათა შორის, ეს ის კომედიიაა, რომელიც დავით მჭედლიშვილის დღევანდელ თქვენს პოსტზე ყოფნის დროს, ვიდრე დაიდგებოდა, კარგა ხანს აწამეს, როგორც „ანტისაბჭოთა პასკვილი“...

ერთხელ „დავით ვასილიჩმა“, როგორც ცეკას მდივანმა, პათეტიკური ტონით საჯაროდაც კი განაცხადა: „მე ამ პიესის შინაარსი მიაშბენს, ამხანაგებო, და, ვინც მას იცნობს, გეკითხებით, ჯანა მისი დადგმა შეიძლება?!“

კი, მაგრამ... ამოდენა თანამდებობის კაცმა სხვისი (რამდენი მტერი ჰყავს, საერთოდ, ყველა ჩვენგანს!) ნაწამობით უნდა გამოუტანო მწერალ კაცს (თუგინდ მწერალი არც იყოს!) თუნდ ნახევარი სიკვდილის განაჩენი?! (იმ დროს ჩვენს ქვეყანაში კიდევ დაძრწოდა სტალინის მტარვალი აჩრდილი!).

...და მაინც, აფერუმ მჭედლიშვილის ვაჟკაცობას: როცა, დიდი მოგვიანებით, ეს სპექტაკლი რუსთაველის თეატრში ნახა, ირგვლივ მყოფთ უთხრა, როგორ შემაცდინეს, რა კარგი პიესა ყოფილაო.

ამას კი მტკიცედ ვერ ვიტყვი, თავისი ცოდვა უფრო იმიტომ მოინანია, რომ უკვე გრძნობდა, იორღადან მალე გადმოსვამენ, თუ...

ეს კი არის, ყველაზე შეუმცდარმა და მკაცრმა მსაჯულმა — დრომ აჩვენა, რომ „იმ“ პიესის დროულად გადაფასებაში მკედელიშვილი არ შემცდარა.

აი, ამის სულ ახალი, ცინცხალი მაგალითი: შარშან მოხდა იშვიათი სასწაული (მსგავსი რამ ჩემს ცხოვრებაში, საშუალოდ, ათ წელიწადში ერთხელ ხდება ხოლმე!), რომლის წყალობითაც ერთი ახალგაზრდა რეჟისორი როგორღაც შეცდა და ჩემი „ავი ძალი“ აირჩია სადიპლომო სპექტაკლად...

ამ სამიოდე კვირის წინათ სოხუმის ქართულ თეატრში მისი პრემიერა გაიმართა, და თუ თბილისამდე მოღწეულ ხმებს დაეჭვრებათ, „არაჩვეულებრივი წარმატებით წავიდა...“ „ანშლავს ანშლავი მისდევს...“ „ღიღად გაიხარა თეატრმა და სოხუმის ქართველობამაც...“

შეიძლება ეს პარადოქსად მოგეჩვენოთ, მაგრამ ჩვენ სოხუმსა და ცხინვალში თბილისზე არანაკლები თეატრები უნდა გქვონდეს: „უცხო ქვეყანაში“ ეროს შემაკავშირებელ დუღაბად თეატრი ყოველთვის პირველ როლს თამაშობდა.

მე მგონია, თქვენს აპარატს არც ამ მორალული ხმების შემოწმება გაუჭირდება, და თუ ისინი დადასტურდნენ, მაშინ თქვენს თანამშრომლებს, ყოველმხრივ განსწავლული ნოდარ ჭანბერიძის მეთაურობით, ესეც დაავალეთ: დაგისახელონ სხვა რომელიმე, ერთი პიესა მაინც, საბჭოთა წყობილების დროს საქართველოში რომ დაიწერა და მას. დღიდან დაწერისა, 32 წლის გასვლის შემდეგაც, მჩქეფარე სიცოცხლის უნარი შერჩა...

და თუ ვერ დაგისახელებენ, მაშინ, წუთით მაინც, იმასაც ჩაუფიქრდით, — ნუთუ მე, პროფესიონალი დრამატურგი, რომლისთვისაც თეატრი, უკვე ნახევარ საუკუნეზე მეტია, ფიზიკური და სულიერი ცხოვრების ერთადერთი წყაროა, — ჩემთან ერთად ჩემი კომედიები „ჩვენი რეჟისორების“ მიერ ასე აგდებულად უნდა იწიხლებოდეს?

თქვენ კი, ნაცვლად იმისა, რომ მათ, კერძო საუბარში მაინც, მოუწოდოთ მწერალთან ურთიერთობაში სულ

უპრალო, ელემენტარული ინტელიგენტურობისათვის (ИНТЕЛЛИГЕНТНОСТЬ) — პირიქით, ისეც ყოველმხრივ გალალეზულთ (და გათავზედებულთ!), მფარველობის კიდევ უფრო ფართო კალთას აფარებთ, მაგრამ...

განა მათ, „ზემოდან“, ისევ რალაც დაცვა ესაჭიროებათ ჩემი „კრიტიკისაგან“, „რომლის მამოძრავებელი ძალა“, თურმე, „არა ობიექტურობაა?!“

რამდენად მართებული ბრძანდებით თქვენ ჩემ მიმართ და რამდენად მტყუანი ვარ მე „ჩვენი რეჟისორების“ შიმართ, ამას განსჯის ისტორია (არცთუ ისე შორეული)!

მხოლოდ ისტორია (ცხადია ნამდვილი, აკი გაყალბებული ისტორიებიც, ჩვენში კარგა ხანს ბოგინებენ ზოლმე!)... დიას, მხოლოდ ისტორია ადგენს უტყუარ სიმართლეს, იგი ზელისუფალის ყოფილ ძალას და არც მის ყოფილ შადალ ტრიბუნას, თეთრისა და შავის გამოსამზეურებლად, არავითარ ანგარიშს არ უწევს.

ჰოდა, რაკი ასეა, თუნდ ამიტომაც არ უნდა ვიცზოვროთ მართოდენ დღედღეობით და ყოველმხრივ ვცდილობდეთ, სულ ცოტა შვილიშვილებს მაინც დარჩეთ საამაყოდ ჩვენი სახელი!..



გიგზავნით გასაცნობად „ერთი ცალმხრივი მიმოწერის პატარა ისტორიას“.

რა დაგიმალთ, გიგზავნით ფრიად დაინტერესებული: ამ ნაწერისთვისაც გამომლანბლავთ (ქარაგმულად!) შადალი ტრიბუნიდან, თუ... გასცემთ განკარგულებას, რათა მისი პირველი ზუთგვერდ-ნახევარი („რუსთაველი!“) დაიბეჭდოს...

აქვე ვურთავ შარშანდელ „თეატრალური მოამბის“ მეოთხე ნომრიდან ამობეჭდილ, ჩემთვის პირადად სრულიად უცნობ თ. ბიბილურის წერილს დღევანდელი ქართული თეატრის მდგომარეობის შესახებ.

თუ დაითვლით, თქვენი ნომენკლატურის ეს მუშაკიც კი, ჩემსავით „ათასს“ არა, მაგრამ „ასიოდე ბრალდებას“ უყე-

ნებს „ჩვენს რევისორებს“, თუმცა მათზე, როგორც არადრამატურად, არაფერი პირადულით განაწყენებული, მგონი, არ უნდა იყოს.

აქედან სულ უბრალო დასკვნა: არა მარტო განაწყენებულები წერენ, თურმე, მწარე სიშართლეს!..

ამისათვის, როგორც ჩანს, საჭიროა არ გაბრუვდე მექსიკისა და „რანდჰაუზის“ ილუზორული ტაშით და, თანაც, სულ ცოტათი მაინც გქონდეს შემორჩენილი, დღეს ასე მივიწყებული და დათრგუნვილი მოქალაქეობრიობის გრძნობა.

ამ წერილს ხელნაწერის სახით მხოლოდ იმიტომ გიგზავნით, რომ არ მინდა მის შინაარსს, თუნდაც შემანქანე გაეცნოს.

ეს კია, ასლს ვიტოვებ: აბა სად არის იმის გარანტია, რომ, საჭიროების შემთხვევაში, ამ დაუბეკდავ წერილსაც იმგვარადვე თავუკულმა არ შეატრიალებენ, როგორადაც წინანდელს და...

საწყალ კურდღელს აქლემად არ დაგქედავენ.

მერე კი, მე შენ გეტყვი, მაღალ ტრიბუნას შემოგთავაზებენ, რომ თავი იშართლო.

კიტა ბუაჩიძე

24 თებერვალი,
1984 წელი

აი, ვის ვუტოვებთ საქართველოს
მოვლინათ, მოვინახინა




— სე-ქარ-თეე-ლო
შა-ლე თქვე-ნი
ა-ღარ იქნებაა-ა!..



СМЕРТЬ ГРУЗИНАМ

ასეთი მოწოდება იკითხებოდა ადრე დილით 1983 წლის 18
ოქტომბერს თბილისის ქუჩების მიწისქვეშა გასასვლელების
კედლებზე და აქა-იქ მიწის ზემოთაც...





საპარტევლოს აღმაშენებლები
სტალინი, ორჯონიკიძე, ელიაშვილი, კირილი და სხვები,
ამათთან შედარებით წერილფეხობა...
მოსკოვი, 1925 წელი.

**აი, ამისთანებს უნდა ვუტოვებდეთ
საქართველოს...**



**ქეთევან და ილია ნიგურიანები
და მათი ათი შვილი.**

სვანეთი, სოფელი მულახი.

ივნისი, 1983 წელი.

თამაზ კვაჭანტირაძეს

როგორც ლიტერატორს და როგორც მინისტრს

ერთ დროს ჩემო ნამეგობრალო თამაზ!

მარჯანიშვილის თეატრში ერთ მსახიობს, რომელიც გატ-
ნობოდა „ჩემი“ რეჟისორის მიმართ, სათვალავით პირველ,
მოურიდებელ, „კბენია“ უსტარს, სინანულით ეთქვა:

— კიტა ბუაჩიძე დრამატურგი კაია, პოლიკარპეს მერე
მეორეა, მარა რა გინდა, პირადი წერილების წერა იცის გლა-
ხისო...

ჰოდა, ახლა ამ განჩინებით შეშინებული, იმაზე ვფიქრობ,
ეს ბარათიც „გლახა“ არ გამომივიდეს, მით უმეტეს, რომ
ამის წინა ბარათმა, რომელიც 1989 წლის იანვრის პირველ
დღეებში გამოგიგზავნეთ, თქვენი თავი დამაკარგვინა: ჩემზე
ხელი აიღეთ, როგორც ახლო ნაცნობზეც კი, არადა, იმ წე-
რილში გულმოსასვლელი თითქოს ისეთი არაფერი იყო რა:
რაკი მთელი ჩემი ცხოვრება ფილოსოფოს ზენონის იმ ერთი
შეგონების მიმდევარი ვარ, რომ სიგლახე არ უნდა შერჩეს
არავის, და არც სიკეთე არ უნდა დაეკარგოს არავის, მეც ავ-
დექი და ბერიკაცმა თქვენ, შედარებით ახალგაზრდა კაცს,
თანაც იმხანად ხალხში განათლების ჯერ კიდევ არა მთესველ
მინისტრს, მამაშვილურად გისაყვედურეთ, ისეთს, აბა, რას და-
კარგავდით, თუ მე ახალი წლის მოლოცვით გამახარებდით-
მეთქი.

ო, თქვენ ეს ისე იწყინეთ, მას შემდეგ ჩემთან უბრობა არ-
ჩიეთ, მაგრამ აი, კარზე მომდგარ 1996 წლის წინა დღეებში
სასწაულსავით, სრულიად მოულოდნელად ჩამესმის ტელეფონ-
ში თქვენი სასიამოვნო, დრამატული ტენორი, ლაპარაკის და-
საწყისში თუ კარგად გავარჩიე, უძღები შვილის თაობაზე...

ჩემთვის ორმაგად სასიხარულო უფრო ის იყო, რომ სწო-
რედ შემოქმედებითმა იმპულსმა — გაზეთ „მთაწმიდაში“ გამო-
ქვეყნებულმა ჩემმა ორმა პუბლიცისტურმა ნაშრომმა, რაკი
გულით მოგეწონათ, — ჩაგაგონათ, ძველ წყენაზე ვაჟკაცურად

ზელი ჩაგექნიათ და გადაწყვეიტეთ შემხშიანებოდით, თუმცა „გამოფიტულ ნიორში“ ჩემთვის უქალსტუხობის, თქვენთვის კი „უხამტობის“ გამო, ცოტა არ იყოს, „გაგწკებლეთ“ კი-დეც.

სხვათა შორის, „ნიორი“ თავდაპირველად „ლიტერატურულ საქართველოს“ გაუგზავნე, მაგრამ თამაზ წივწივაძემ, „დიდას“ მომიხეზებით, უკან დაიბრუნა, უფრო კი, ალბათ, იმიტომ, რომ მასში რედაქტორის არა ერთი ახლო ნაცნობი თუ მეგობარი ნიორწყალში მყავდა განბანილი, რომელთა წყენასაც, შეიძლება, მოერიდა, მათ შორის თქვენიასაც; დასტურ, ჩემი ეარაუდით, მხოლოდ ვარაუდით, — რასაც თქვენს უქალსტუხობაზე ვწერდი, იქნებ სწორედ თქვენმა სეხნიამ გაცნობათ, აკი ზუსტად ამის შემდეგ, იანვარსა და აპრილში, ტელევიზორში ორჯერ გოხილეთ ყელსახვევით, რა „სამოსელშიც“, თუ არაბულ „ლამაზს“ კი არა, ქართულ სიტყვას მოვიშველიებ, დიხაც, რომ პირმშვენიერი წარმოჩნდით, მაგრამ შერე და შერე, რაკი ჩვეულება, როგორც ჩანს, მართლაც რჯულზე უმტკიცესია, კვლავ ბედაურზე ამხედრდით, რისი დამადასტურებელი საბუთი ამასწინანდელ „საქართველოს რესპუბლიკაში“ ახალი მინისტრების სურათების გამოფენაა, საიდანაც „ჩაგალსტუკებულნი“ შემოგვტკერიან ყველანი, გარდა... განათლების მინისტრისა!

გეტყვით იმასაც, რომ დიდ ვერაფერ სიხარულს მგერის, როდესაც საქართველოს პრეზიდენტი უცხოელებს, მიღებისას, კალსტუხით კი, მაგრამ მუქ ჰერანგში ხვდება ხოლმე.

აბა ერთი, აწი მაინც დააკვირდით, ამერიკის პრეზიდენტ ბილ კლინტონს, საფრანგეთისას — ჟაკ შირაკს, ინგლისის პრემიერ-მინისტრ ჯონ მეიჯორს, გერმანიის კანცლერ ჰელმუტ კოლს, რომელიმე ამერიკელ კონგრესმენს ანდა იაპონიის რომელიმე დეპუტატს ასეთ შავებში როდისმე თუ ნახავთ გახვეულს? სუდარა რომ სუდარაა, ისიც კი თეთრია. დიხა!

გნებავთ ობივატელად ჩამთვალეთ, მაგრამ, რა ვქნა, სილამაზისთვის კი არ ამირჩევია, მაგრამ ჩემი არჩეული პრეზიდენტი, რამდენადაც ეს შესაძლებელია მის ასაკში, მაინც მინდა ყოველთვის ლამაზად გამოიყურებოდეს, და არა ისე, როგორადაც ახალი წლის მოლოცვისას, ამ საყოველთაო და არ-

სებითად ზეაწეულ, სამხიარულო, სადღესასწაულო წუთებში ფერად ტელეეკრანზე ბაიყუშურად შავ კოსტუმში, თალხ პერანგზე შავი ქალსტუხით რომ გამოგვეცხადა.

ამბობენ, რუსეთის პრეზიდენტმა ბორის ელცინმა ამერიკიდან პირველად დაბრუნებისას, სადაც პრესამ იგი ამ მხრივ არ დაზოგა და გაკილა, მრჩეველი აიყვანაო, როდის რა ჩაიცივას და როგორ გაიღიმოსო...

ჩვენ „ღიმილის მრჩეველი“ თითქოსდა არ გვეჭირდება, ისე კი, კაცმა რომ თქვას, ამ არჩევნებისას ქურჩებში გამოფენილი ორი ღიმილი სურათიდან პრეზიდენტობის ორი მთავარი კანდიდატი ისეთი ფართო, გულარხინობით აღსავსე, გაბადრული ღიმილით გვიმზერდნენ, თითქოს მათ ეს დაგლახაკებული, გამათხოვრებული ქვეყანა თავზე კი არ ემხობათ, — ასე განსაჯეთ, იგი ვითომ უკვე ოაზისად აქციეს და ააყვავეს და ააყვავეს!

ასე რომ, ჩვენი პრეზიდენტი, თუკი, უფრო, ალბათ, დასაქმების მიზნით, ვინმეს მაინც შეარჩევს ასე ეგზომ საპატიო, ჭკუისდამრიგებლურ, სახელმწიფო თანამდებობაზე, ყოველ შემთხვევაში ახლაც ისევე იმ „მეცნიერს“ ნუ შეიწყალებს, — იყო დრო! — საკანდიდატო დისერტაცია თბილისის უნივერსიტეტში მიახლოებით ამგვარ თემაზე რომ დაიცვა: „ქუთაისის ბოლშევიკები გრიგოლ ნარსიას რაიკომის მდივნობისას“.

სხვათა შორის, მე წინააღმდეგი არ ვიქნებოდი, თუ ეღუარდ შევარდნაძეს, თითქოს ხუმრობით, გააცნობდით ჩემს „კრიტიკულ სჯას“ მის საახალწლო „გარდერობზე“, ოღონდ ეს სხვას უნდა მიაწეროთ და არა მე, რადგან მე მისთვის, საერთოდ, ისეთი „ავტორიტეტი“ ვარ, ასეც რომ ვუთხრა, მათქვენს ამბროსი ერქვა-თქო, არც ამაზე დამთანხმდება და არ დამიკრავს კვერს.

ტელეფონით ჩვენი საუბრისას დაგპირდით, რომ გაზეთ „შანსს“ გამოგიგზავნიდით, სადაც დაუშახინჯებლად დაიბეჭდა ჩემი „არავეითარი საუპირატესო სტატუსი“, აგრეთვე წინა წერილების იმ გვერდებსაც, რომლებიც „მთაწმიდის“ მიერ ამოგდებულ იქნა, რაც მეორე დღესვე მოგართვით კიდეც და გთხოვეთ, რაკი მათ წაკითხვას დრო ბევრი არ დასჭირდება და, სამი დღის შემდეგ დაგებრუნებინათ, მაგრამ, აი, მის შემ-

დღე უკვე ათ დღეზეც მეტი გავიდა და... როგორც იტყვიან, არ შეგჭამოთ, არ შეგჭამოთ რუხმა მგელმა!

მაშინ კი, ისევ თქვენ გასამართლებლად გავიფიქრე, ალბათ ახალი წლის დადგომას ელოდება, და თუ რამდენიმე წლის წინათ არა, ახლა მაინც, წინანდელთან შედარებით კიდევ უფრო დასვედიანებულს და გასაცოდავებულს, საახალწლო მოლოცვით გამაზხალისებს და თან წაკითხულის გარშემო თავის შთაბეჭდილებას გამიზიარებს-მეთქი, მაგრამ...

მაგრამ არც პირველში და არც ორში ხილიანის ქუჩიდან ჩემგან გაფაციცებით მიღარაჯებულ ტელეფონში... „არსაიდან ხმა, არსით ძაზილი!..“

სამში კი, საღამოთი, რაკი დილიდანვე ხანგრძლივ მერყეობას და ჭოჭმანს ჰამლეტივით... დანიის პრინც ჰამლეტივით (და არა ახლა ჩვენში ასე პანტაჟუნტად მიმოფენილ ჭოპორტ-მოხის-აჯამეთელ ჰამლეტებივით!), როგორც იქნა ვძლიე და, რაკი წერილის მოწერა არა და არ მინდოდა ზმის შიშით, ჩემი ბრიყვეული პირდაპირობით, მასში რაიმე „გლახა“, ვაითუ ამჯერადაც გამეპაროს-მეთქი და უბის წიგნაკში დღემდე სასოებით შემონახულ თქვენი ტელეფონის ნომერს (36-59-29) ხელის პარკინსონისებური კანკალით დაეწედი ერთხელ, ორჯერ, სამჯერ და ათჯერაც კი, მაგრამ... ამ შესაძლო შევების წყაროდანაც „არსაიდან ხმა“, არსაიდან ხმა...

ჰოდა, ბოლოს, ამ უსასრულო სატელეფონო წამებისას, თითქოს უფალმა უეცრად გონების გზა გამიკვლია და ცნობათა ბიუროს მივმართე, მაგრამ ვაი ჩემს თავს — აბონენტს და უი მათ პასუხს: ჩვენ მინისტრების ტელეფონებს არ ვიძლევიო...

ალბათ იმიტომ, რომ თქვენ, უსაქმურებმა, არ შეაწუხოთ...

ო, დიდი საქმის კაცი, თქვენც იცით, არც მე ვარ, მაგრამ, თუ ეს საქმეა, უკვე მეორე დღეა საგონებელს მიცემულღ თავს ვიმტკრევე, ახლა მაინც რა ისეთი ვაწყენინე ერთ დროს ჩემს ნამეგობრალ თამაზ კვაჭანტირაძეს, ამჟამად უკვე ბატონ მინისტრს, რომ ჩემთვის, ტვინის ორივე ნახევარსფეროზე სკლეროზმოდებულისთვის, შეეხსენებინა 1996 წლის მობრძანება არა მაქმადიანურ სელჩუკ-მონლოლ-ოსმალებისგან, არა შაჰ-

აბა — ალა-მაჰმად-ხანისაგან, — ქრისტესმიერი ძმებისგან, გამსახურდია-ქობალიასაგან გაუბედურებულ დღევანდელ ქრისტიანულ საქართველოში...

არადა, ვინ იცის, ეგებ ის გეწყინათ, რომ... გურამ ფანჯიკიძისა არ იყოს, როგორც გადმომცეს, ჩემი „საუპირატესო სტატუსი“ დაწუნებით არ დაუწუნებია, ოღონდ საყვედურშეფერილად ესეც უთქვამს, „მანსში“ არ უნდა მიეტანაო.

ჰო, მაგრამ, აბა, რა მექნა, როცა მის დაბეჭდვაზე უარი მითხრეს „ჩემმა“ გაზეთებმა, „საქართველოს რესპუბლიკამ“, „ლიტერატურულმა საქართველომ“, „კავკასიონმა“, დაბოლოს, „ჩემმა“ ჟურნალმა „მნათობმაც“, რომელსაც, დასტურ, ჩემს ლიტერატურულ ცხოვრებაში, ათეული წლების მანძილზე, მოკრძალების გამო, პირველად მიუაკითხე ემზარ კვიტიანიშვილის თაოსნობით და როგორც მალე დაერწმუნდი, მისთვისაც, თურმე, ვინმე მომწერლო ვყოფილვარ, და როგორც ასეთს, ახლა მადლობის მეტი, აბა, რა მეთქმის, მხოლოდ ერთგან ერთ ფრაზაში, ჩემი ენობრივი ქსოვილის კაპიტალური რემონტისათვის; მე მეწერა:

„მთელი ორი საათი, როცა ჩვენ ორნი, 'მამაკაცები, ვსაუბრობდით, თამარ ჩხეიძე თათრის ქალივით სკამზე გახევებული იჯდა, სიტყვა ერთიც არ ამოუღერლავს, სიტყვა ერთიც არ დასცდენია,“ — გადამისწორეს: „ერთი სიტყვაც არ დასცდენია“-ო.

(ისე კი, საერთოდ, 1995 წლის პირველი ოთხი ნომრის მიზეზებით, რომლებიც ხელთ მომხვდა, მგონი, თითქოს უფრო უპრიანი იქნებოდა, „მნათობს“ სახელი თუ შეეცვლებოდა: „მამა-შვილის მნათობელი მნათობი“).

...მაჰატივით, რაკი ახალი რამ ჩაემატე, თხრობის ძაფი გამიწყდა, არადა, იმას გიამბობდით, რომ... მე ზომ რედაქტორებს არავის არ ვემკაცებე, მინდოდეს კიდევ, — არც არავინ დამიძმაცადებდა, — აბა, ვის რაში უნდა, რაში გამოადგება, დაწყებული კომკაეშირული ასაკიდან პარტიის ვეტერანობამდე, რომლის პატივი მას არც ოდესმე ჰქონია და არც როდისმე უქებნია, — მუდამ უთანამდებობო განდევილი, გრძელი წუთისოფელი ისე რომ გალია, სიტყვით ან კალმით „არავის ვაწყენინო, თუნდ არამზადაც იყოს“, საბჭოთა და პოსტსაბჭოთა

ცხოვრებაშიც ამ დიდად მომგებიანი დევიზით ერთი დღეც არ დაუღამებია და ყოველივე ამასთან ერთად იგი არათუ ოთხნაირი გვარის თევზისა და პირში ოხრახუშგაჩრილი, შამფურზე შემწვარი გოჭის სუფრის გამშლელია, რაც ჩვენი საუკუნის საქართველოში, მათ მიერ მიჩნეულ ჩემისთანა მ ა რ ა დ დ ა მ წ ყ ე ბ ი ავტორისათვის, შემოქმედებითაც ზინჯია უკანდამწევი...

არადა, თუნდ ასეც არ იყოს, გატიალბებულ ეკონომიკაზე რომ აღარაფერი ვთქვათ, ქართველი ხალხის ზნეობრივად კიდევ უფრო გამათახსირებლის, ბოროტი მანიაკის გამსახურდიას მოძულემ, ჩემი ნააზრევი გოცირიძის „იბერია-სპექტრში“ ხომ არ მიმიტანია ანდა ჯაველიძის „სამრეკლოში?!“

კი, ვიცო, „შანსი“ არ არის შევარდნაძის მაქებ-მაღიდებელი, მაგრამ ეს მაინც ის გაზეთია, ომიანობისას, აფხაზეთში მთელი რედაქცია რომ წავიდა და იქ, ქვემეხების სროლა-გრუხუნში და ავტომატების ბათქაბუთქში ჩვენს მებრძოლებს ნაბეჭდი სიტყვით ამხნევებდა, ყოველ შემთხვევაში ამას ცდილობდა მაინც... ისიც მიიღეთ მხედველობაში, რომ... არ ვიცო კი, მე დამდეს პატივი თუ შევარდნაძეს, ეს კია, ჩემი სტატიიდან, შევარდნაძის მისამართით თქმული ერთი საქები სიტყვაც არ ამოუგლიათ.

კიდევ ერთი „აი, ისტორიაც“: ამ რამდენიმე ხნის წინათ, როცა „გამოფიტული ნიორი“ არც ერთმა ჩემმა — თეორიულად! — თანამოაზრე რედაქტორმა არ ჩათვალა გამოქვეყნების ღირსად, ვიფიქრე, რომელიმე დიდი კაცის ჩაურევლად ჩემისთანა პატარა კაცის მიერ წამოწყებულ, თუნდაც წმინდა საზოგადოებრივ, საქვეყნო, საერო საქმეს რაკი გვირგვინი არ დაედგმევა, — ავდექი და გურამ ფანჯიკიძეს მიემართე წერილობითი თხოვნით, იქნებ თამაზ წიფწივაძესთან გამიწევდა „პროტექცია“-რეკომენდაციას, — რაღაც ორ ნაბიჯზე, პურის მოედნიდან მაჩაბლის ქუჩაზე მოიხმობდა და მიახლოებით, ჩემი ვარაუდით, ასეთ საუბარს გაუბამდა:

— რვიდან შეიღი არტუ ცუდი კომედიოს, „შავი წიგნისა“ და „ანსტაფიუვის“ დამწერი მართლაც დამწყები მწერალი ხომ არ არის, რომ მის მიერ გამოთქმულ, თუნდაც სადავო აზრზე პასუხს ჩვენ ვაგებდეთ და არა ის, თანაც მისი დღეები, უფალ-

მა თუნდ ცოტა კიდეე გაუხანგრძლივოს, მაინც დათვლილია და დათვლილი, და ნუთუ ჩვენ მხოლოდ ნეკროლოგში უნდა მივყაროთ, მიწასთან ერთად, ადრეც მუდამ ჩალის ფასად ღირებული და ახლა ხომ, ფასიანი ნეკროლოგების პრესაში დამკვიდრებასთან დაკავშირებით, სულ ერთიანად გაუფასურებული... „კაცი ის იყო, მისი სიკვდილით ჩაქრა მზე, დაობლდა მთვარე...“

ჰოდა, საწყალი, ვიდრე კიდეე ბარნოვის... ო, ბოდიში, უკვე გადარქმეულ ირაკლი აბაშიძის ქუნაზე ჯერ კიდეე დალოღავს და სიცივეს არ მოუკლავს (აკი უთქვამს თურმე: ზამთრის ასეთი თვეები თბილისელებს არ უნდა ფთვლებოდეთო სიცოცხლეში!), ავდგეთ და გავახაროთ, დაუბუჭდოთ „გამოფიტული ნიორი...“-ო-ო, ახლაც ნუ ვეტყვიით, ღიღიაო... მის ავტორს არა მგონია გამოჰარვოდა, თითქმის ერთი წელიწადი „ლიტერატურულ საქართველოში“ მთელი რომანი იბეჭდებოდა გაგრძელებებით... ახლა „მინაწერები სატელეფონო წიგნზე?!“ დასტურ, ამ საყოველთაო საქებ-სადიდებელმა „მინაწერებმა“ ჩვენს კონსულტანტებს, ო, რარიგ გაუადვილეს, ვინც უკვე წავიდა, მათი განეკროლოგება და... რას იზამ, რაკი განგებას სიცოცხლე მარადის არავისთვის უბოძებია, გაუადვილებათ, ცხადია, მომავალშიც, აკი, ყოველგვარი დამატება-გამოკლების გარეშე, შეგიძლია პირდაპირ გადმოიტანო მზამზარეული, ოღონდ აწმყო უნდა ნამყოში მოაქციო... ო, არც ის მგონია, ეს ბატონი „ნიორი“, როგორც დრამატურგი, ამ ბოლო დროს ისე მალადად გამოფიტულიყო, ვერ შეენიშნა ჩვენი ერთი საერთო მეგობრის, ასაკობრივად ასე მოგვიანებით, მოულოდნელი გადრამატურგება, რომლის ღიღი მოცულობის, ალბათ ორიგინალობისათვის, ჟანრობრივად ცოტა უცნაურად შესახებლებული

„არბჰეროიკული პიესა დაეით აღმაშენებელზე,
სამ მოქმედებად,“

გაზეთის ერთ ნომერში რომ დაგებუჭდა, მისი გვერდების სათვალავი თექვსმეტიდან ოცდაოთხამდე გაზარდე კიდეც, რასაც, იმქვეყნიურისა არა ვიცი რა, ამქვეყნად კი არასოდეს, არასოდეს არც ერთი დრამატურგი არ მოსწრებია, არც შოუ, არც ბრეხტი, არც კაკაბაძე... თუმცა იყო ერთი

შემთხვევა, 1942 წელს, როცა ომი გერმანელებთან თითქმის წაგებული გეჟონდა, სტალინის ბრძანებით, დიახ, სტალინის... „პრავდაში“ დაიბეჭდა ალექსანდრე კორნეიჩუკის პიესა „ФРОНТ“, ოღონდ არა ერთ ნომერში (სხვათა შორის, მასში ერთი კარგი ქართველი სამხედროცაა გამოყვანილი, — გომელაური)... ისე კი, ჯანსუღ ღვინჯილიას „ახალი ცაც“, ახლებურად თუ ვიტყვით, სამამულო ომის ფონზე იშლება, ვითარდება და, რაც ჩემთვის, როგორც მწერლისთვის, უფრო მნიშვნელოვანია, დაწერილია ჩინებული ქართულით, ოღონდ შეუხერხულა კი, როცა მასში, ალაგ-ალაგ, „ლაბირინთი“, „ფლანგი“, „ცენტრი“ ამოვიკითხე, — აბა, რომელი იმდროინდელი ქართველი, მიხეილ ჭაბაშვილივით, ასე ბერძნულ-ფრანგულ-ლათინურად იმეტყველებდა, მაგრამ ეს, რა თქმა უნდა, სულ პატარა ამბავია, დიდი ამბავი ის იქნება, თუ ამ „არაქროიკას“ დამდგმელი რეჟისორი გამოუჩნდება, არადა, შეიძლება ბუნებით ნიჭიერი, მაგრამ აგრეთვე ბუნებითვე მოტუტული რეჟისორებისგან გაწამებული ერთი დრამატურგის თქმისა არ იყოს, დაუდგმელი პიესა გაუსვენებელი მკვდარი... ამ შემთხვევაში მე მაინც იმედს არ ვკარგავ: თუკი ამჟამად ჩვენში რომელიმე რეჟისორს რაიმე წიგნი აქვს გამოსაცემი, იგი უთუოდ დადგამს „ახალ ცას“, რათა ამით ცა გაეხსნას არა მარტო მის ავტორს, — ამის წიგნიერ რეჟისორსაც!.. რას იზამ, შენც ხომ იცი, ჩვენი ვითომდა უკვე არასაბჭოთა ცხოვრების მამოძრავებელი ძალა ახლაც, ახლაც კვლავინდებურად საბჭოთა რეჟიმის უცუელე პრინციპს ემყარება: შენ მომცემ ამას, მე მოგცემ ამას (Я тебе, ты мне!), და ასე იქნება კიდევ დიდხანს, დიდხანს, ვიდრე ამერიკელებივით ყველანი არ გაემდარდებით და, კაი იმ ბედკრულს, ვისაც სანაცულოდ მოსაწონი მისაცემი არაფერი ექნება...

ჩემდა სამწუხაროდ, გურამსა და თამაზს შორის არაფერი ამის მსგავსი სჯა-ბაასი არ გამართულა: ჩვენმა მართლაც ყოველმხრივ ყოჩაღმა თავმჯდომარემ

(მარტო ის ფაქტი რად ღირს, საახალწლოდ თავის სამწყვსო, არა მარტო ხელგაწედილ მწერალთ, ყველას, 25-25 ლარი ჩამოგვირიგა, და ამას, ასე წარმოიდგინეთ, ქათამიც მოაყო-

ლა, თან — ამის წარმოდგენა კი უთუოდ გაგიჭირდებათ! — ერთი ყვერული კი არა, ორი, ორი!

ჩემი გამოსაქვეყნებელი სტატია კი, მისდამი მიწერილი „საიდუმლო ბარათითურთ“, ყოველგვარი „ზაპისკა“—ჩარევის გარეშე... შიკრიკის ზელით რედაქტორს გაუგზავნა! კიდევ კარგი, ამ „ფელდეგერს“ გზაში ჩემი ზღაპრული მეგობარი რევაზ კვერენჩხილაძე წამოეწია, მე მივუტანო და... რაკი იცოდა ჩემი აზრი, რომ ასეთი „დიპლომატიური ფოსტით“ მიღებულს, ერთხელ მის მიერ უკვე უარყოფილს, თამაზი არ დაბეჭდავდა, მომიტანა მე...

ჰოდა, კიდევ იტყვიან, „შანსი“, „შანსიო...“ სხვა არა იყოს რა, „შანსმა“ თავისი ხარჯით ორჯერ თუ სამჯერ ამგზავრა თბილისელები მეტროთი... არადა, იქნებ რომელიმე სხვა გაზეთი დამისახელოთ, რომელმაც, თუნდაც პოპულარობის მოპოვების მიზნით, როდისმე ამგვარად იქველმოქმედა?

რასაკვირველია, ჩემზე ნაკლებად როდი იცით, იცით, როგორც ლიტერატორმა, ჩვენში არცთუ ცნობილ მწერალსაც კი, პრესაში ხსენებისას, გვარის წინ თუ რაიმე შემამკობელი, მოგუგუნე ეპითეთი არ წარუშქვარე — ცნობილობას ვილა აგდებს რამედ! — მაგალითად, სახელოვანი, სახელგანთქმული, სასიქადულო, ბრწყინვალე და მისთანები, და მასზე მარტო „კარგი“ შემოიფარგლე, შეურაცხყოფად ჩავითვლის.

ამას წინათ „კავკასიონში“ მართლაც კარგი მწერლის გურამ გეგეშიძის ინტერვიუში ამოვიკითხე, „ჯაბა იოსელიანი უნიჭიერესი მწერალია“-ო, დიახ, ნიჭიერი კი არა, უნიჭიერესიო, ჰოდა, ეს თუ ასეა, მაშინ მიხვილ ჯავახიშვილი როგორღა მოვიხსენიოთ?

დიდი ხნის წინათ ვწერდი და, ვფიქრობ, ბევრი არაფერი დაშავდება, უბრალო ჭეშმარიტებას თუ კვლავ გავიბეორებ: ხალხში საერთოდ მართლაც ცნობილს და გამოჩენილს წარდგინება, მწერალია იგი თუ ნოტარიუსი, სულაც არ სჭირდება.

რა თქმა უნდა, ამას შეყოვნება და ჭოჭმანი არ ეგების, ოთარ ჭილაძეც უთუოდ მოაზროვნე ქართველი მწერლების ამ მცირე წყებას განეკუთვნება და, რაკი სიტყვამ მოიტანა, ცოტა არ იყოს, გამაკვირვა ზოგიერთმა მისმა აზრმა, გამოთქმულმა საგულდაგულოდ, სპეციალურად, მისხალ-მისხალ აწონილ-და-

წონილ, ასე ვთქვათ, საექსპორტო სტატიაში: „ორ სიმართლეს შუა“ („Литературная газета“, 6.12.95; „ლიტერატურული საქართველო“, 29.12.95). ასე, მაგალითად, ეხება რა ზოგჯერ „მწერლის „დუმილას“ თუ „გვერდზე დგომის“ ილუზიას“, მოგვახსენებს:

„რასაკვირველია, თუ სამშობლო მოითხოვს, პიუგოც უნდა ავიდეს ბარიკადზე, მაგრამ არ უნდა დაგვაიწყდეს, რომ იმავე პიუგოს საწერ მაგიდასთან გაცილებით მეტის გაკეთება შეუძლია სამშობლოსათვის, ვიდრე პიუგოებისგან შემდგარი ბატალიონი გააკეთებდა ბარიკადზე“.

როგორც ზედათ, თქმულია კობტად, ლამაზად, ნამდვილად დიდმწერლურად, მაგრამ მის სისწორე-უტყუარობაში მაინც ეჭვი მეპარება და ეფიქრობ, ათასჯერ უფრო ბედნიერი იქნებოდა ის ერი და მისი სამშობლო, თუკი მას, ქვეყნის განსაცდელისას, არა მარტო საწერ მაგიდასთან, ბარიკადაზეც ერთი პეტეფი, ერთი ბაირონი, ერთი ლორკა კი არა, — პეტეფებისგან, ბაირონებისგან, ლორკებისგან შემდგარი ათასეული — ბატალიონი აღმოუჩნდებოდა.

ზემოთ მოყვანილი ციტატის გაგრძელება ასეთია:

„ასე რომ, მწერლის დუმილი სრულებითაც არ ნიშნავს ჩუმად ყოფნას. პირიქით, შეიძლება, დუმილით გაცილებით მეტს ამბობდეს, ვიდრე ლაპარაკით“.

ამის წაკითხვით, ო, როგორ ამეხილა თვალები და გამეხსნა დახშული გონება, აკი აქამდე მეგონა, ემილ ზოლა, მაგალითად, ფრანგი ებრაელის, არტილერიის კაპიტნის, ალფრედ დრეიფუსის დასაცავად, რომელსაც სამხედრო შპიონაჟი ბრალდებოდა, თავისი დუმილით სულაც ვერაფერს გააკეთებდა, ვიდრე წერილობითი „ლაპარაკით“ („Я ОБВИНЯЮ!“), რომელმაც თავის დროზე მთელი ეუროპა შეაზანზარა და, მის საფუძველზეც, ნაფიც მსაჯულებმა დრეიფუსს გამართლების ვერდიქტი გამოუტანეს.

ანდა, აი, ლევ ტოლსტოიმ, თუმცა იმ დროს, შეიძლება, „ომსა და მშვიდობას“ ეჭიდებოდა, საწერი მაგიდა მაინც მიატოვა, რათა რიგითი ჯარისკაც შიზუნინის დასაცავად თავი გამოედო, მისი ადამიანური ღირსების შეურაცხყოფისათვის ზეპრე და ტუტუც ოფიცერს სახეში რომ ლეწა, და იგი, მიუ-

ხედავად დიდი მწერლის მხარდაჭერისა, მაინც დახვრიტეს, მაკრამ ტოლსტოი სწორედ ამ შემთხვევაში არა განზე დგომისა და არა ჩუმად ყოფნა-დუმილისთვის ხალხის თვალში კიდევ უფრო ამალღდა...

სხვა არა იყოს რა, მისი ერთი წერილის მარტო სათაური რად ღირს: „Не могу молчать!“

კერძოდ, მწერლის დუმილთან დაკავშირებით, ბარემ ესეც ვიკითხოთ, პრეზიდენტობაზე ჭკუაშეშლილი გამსახურდია, როცა უბრალო მოკვდავებისთვისაც კი იოლად მისახვედრად, საქართველოს უფსკრულისკენ მიაქანებდა, ბევრად ადრე ამ ტრაგიკულ ამბებამდე ჩვენს მწერლებს რევან მიშველაძემ ერის ჭირისუფლები რომ უწოდა, მათმა ავანგარდმა, დიდმა მწერლებმა და დიდმა ერისკაცებმა, არც ირაკლი აბაშიძემ და არც გრიგოლ აბაშიძემ, არც ოთარ ჭილაძემ და არც თამაზ ჭილაძემ, არც ვახტანგ ჭვლიძემ და არც არჩილ სულაკაურმა, არც აკაკი ბაქრაძემ და არც ოთარ ჩხეიძემ, და არც პირველხარისხოვანი პოეტების მთელმა პლეადამ (გარდა ჯანსუღ ჩარკვიანისა) დაბალი ხმითაც არ შესძახეს — „ამას რას სჩადიხარ? შენ ღუპავ საქართველოს, კონსტანტინე ბატონოს ერთადერთო ძე!“

და არც მის შემდეგაც, გამოთქვეს—გამოხატეს თავიანთი მოქალაქეობრივი პოზიცია, როცა გამსახურდიამ, ჩვენი „დიდი ეროვნული“ პოეტის, მუხრან მაჭავარიანის მხარში ამოდგომით, დასავლეთ საქართველოში სამოქალაქო ომის საშინელება დაატრიალა, დიახ, ერთიც არ შეუღრიალეს ვაჟასებურად:

შხამად შეერგოს სიცოცხლე,
ვინც-კი ძმის სისხლით ძლებარ,
ვის საპირადო საქმითა
ოცი და ასი კვლებარ!..

რა თქმა უნდა, მე ზედმიწევნით ვიცი, ერისა და სამშობლოს გამოსახსნელად მათი ასეთი მგზნებარება-ამხედრება, ისტორიას თუ შემორჩებოდა მათივე სასახელოდ, თორემ ისე, არა მგონია, პრაქტიკულად რაიმე დადებითი გავლენა მოეხდინა გამსახურდიაზე და მის მრჩეველ-წარმართველებზე, მორიელი-სებური ინტელექტის მქონე ცოლზე და ცოლის დაზე, აკი (ანბანით) ჭაბუა ამირეჯიბის, თამაზ კვაჭანძირაძის, იზა ორჯო-

ნიკიძის, გურამ ფანჯიკიძის, თამაზ წივწივაძის დროულზე დროულმა გაფრთხილება-შეძახილებმა განა გონს მოიყვანეს პრეზიდენტობით გონგაბრუებული გამსახურდია?!

და მაინც, ამ უიმედო სიტუაციაშიც, გონებადაბინდულ, დაბნეულ ხალხს ზოლა-ტოლსტოისებური შეძახილი უფრო გამოაფხიზლებდა და გაუკვალავდა გზის სწორი არჩევანისკენ, ვიდრე ერის ამ უპირველეს ჭირისუფალთა „დუმილის“ თეორიიდან გამომდინარე გვერდზე განდგომის ცვედნული პოზიცია.

ვინ იცის, იქნებ თქვათ, ამ დიდ მწერლებს ასე რომ ბრახავთ იმუამინდელი დასაგმობი ხმის ამოუღებლობა — ენაზე კბილის დაჭერისათვის, გაყურება-მდუმარებისთვის, იმ დროს თვითონ სად ბრძანდებოდით, ბატონო, მაშინ როგორღა არც თქვენი ხმა ისმოდაო თითქოს...

მართალი ბრძანდებით, ოღონდ სულ მართალი არაა: გამსახურდიას შუა მეფე-ბატონობისას, მისთვის უფრო მახლობელ, მეგრულ გვარს ამოფარებულმა, ხოტბა-ღიდებას დახარბებულს, არა იმდენად მისთვის, რამდენადაც უფრო მიშხვედრისთვის იოლად მისახვედრი ირონიული ქებით შეზავებული ეპისტოლე გაუგზავნე, რომელშიც მოუწოდებდი, განსაკუთრებით საგარეო საქმეების ასპარეზზე, სახელმწიფოებრივი რეალობისთვის ანგარიში გაეწია; არ ვიცი კი, მიიღო და წაიკითხა თუ არა, ეს კია, მისი დაბეჭდვაც კცადე, მაგრამ გამსახურდიას რეჟიმის წინააღმდეგ ინტელიგენტურად მებრძოლმა, არჩილ გოგელიას გაზეთმა „დრონიმ“, ვილაც პენისიონერ მასწავლებლის ჯონდო ნადარაიას ნაფიქრალის გაიოქვეყნებაზე თავი შეიკავა; არადა, ჩემი გვარის გამხელას პრინციპულად მოვერიდე, რადგან გამსახურდიას თვალში, როგორც მლიქვნელის ნაჯღაბნს, ამას რაიმე დადებითი შედეგი არ მოჰყვებოდა...

დიახ, მლიქვნელის, მლიქვნელი, აკი ოთხმოციანი წლების დასაწყისში ქსეროქსზე გადაღებული „შავი წიგნი“, კერეთ წოდებულ უმაღლეს ემელონებში მოვიწიებურ პასკვილად რომ შესახელდა და ხალხში მის გავრცელებას ჩეკისტები თავგამეტებით ებრძოდნენ, გამსახურდიასაც ჩავარდნოდა თურმე ხელთ და... შური თ ავისილმა, ერის მომაკვდინებელ სატკივარზე მომთხრობი ასეთი წიგნი უფრო მას უნდა დაეწერა და არა

სხვას, თუნდაც მე, — მისი დედის თანაკლასელს, ღვარძლიანი „ღია ბარათი“ მახალა, თქვენ ამით ყველაზე ღიდ ოფიციალურ პირს ემლაქენელებითო, ესე იგი, ცუკას აღივანს შევარდნაძეს...

და ეს იმ დროს, როცა მე, საწყალს, გუნებაში ზშირად მუამაყებოდა, ღვთის შეწევნით, კომუნისტური მაიმუნური ცხოვრება, არაჟის წინაშე, იმდროინდელ მრისხანე შევარდნაძის ჩათვლით, ისე განველე, ერთხელაც არ კავმაიმუნებულვარ, ეს კი...

ო-ო, ისე თქვენ იცოცხლეთ, მაშინ მე მას, „ზვიად ბალიშ-ზეთავდაღებულს“, ქართული კაცურკაცობის, საერთაშორისო დისიდენტური მოძრაობის და ამერიკელი ჟურნალისტების ბითუმად გამყიდველს, მოსკოვის ტელევიზიით, წუნკალი კატის შიშით ეკრანზე სულმოკლე თავგვივით რომ გამოგვეცხადა, ისეთი პასუხი ვთეთქვე, რომ...

მოკლედ, ეს პასუხი დაედო პირველ თავად „შავზე შავ წიგნს“, და თუ სურვილი აღგეძრებათ, შემიძლია გაგაცნოთ ისიც და მთელი წიგნის ანახეჭდებიც, რომელიც, „განათლების“ მიერ უკვე 6 წელიწადია აწყობილია და... როგორც შინაბერა სიკვდილამდე ელოდება საბედოს, მთხოვნელს, როგორც ჩანს, სწორედ ისეა მისი გამოცემის საქმეც.

ამ ათიოდე წლის წინათ ერთმა მართლაც ცნობილმა მწერალმა, ჩემზე თითქმის ორჯერ უმცროსმა და მუდამ ამა თუ იმ გავლენიან თანამდებობაზე მყოფმა და უფრო მეტის მსურველმა, როგორღაც, არცთუ ტრაბაზით, გვაცნობა, ჩემს შემოქმედებაზე უფრო მეტია დაწერილი, ვიდრე მე თვითონ დამიწერიაო... არადა, იმხანად ის ოცამდე დასახელების ნაწარმოების ავტორი გახლდათ.

მასთან შედარებით მე, ცხადია, მაცვანცვალა მწერალი ვარ და გთხოვთ, არ მანუგეშოთ, თითქოს ეს ასე არ არის: თუ დავამრგვალებ, სამოცი წელიწადია, ასე ვთქვათ, დრამატურგიას ვემსახურები და ამ დროის განმავლობაში ჩემზე, როგორც დრამატურგზე, არც ერთ გაზეთში, არც ერთ ჟურნალში ერთი კუდმოკლე წერილიც არავის გამოუქვეყნებია, მაშინ როცა ზოგიერთ სხვაზე (აქ კაკაბაძეს არ ვგულისხმობ) ცალკე წიგნებიც კი გამოვიდა, ამის და ამის დრამატურგიაო...

არადა, უცნაურია თუნდაც ის ამბავი, რომ ამ ახალი წლის

წინა ღამეს რადიომ სწორედ ჩემი კომპიდიების მიხედვით, ერთი ორმოკის, მეორე ოცი წლის წინათ დადგმული სპექტაკლები გადასცა: რუსთაველის თეატრმა – „ამბავი სიყვარული-სა“, მარჯანიშვილისამ – „ეზოში ავი ძაღლია!“ დიან, „სამ-წუხაროა“ მაგრამ რას გააწყობ: როგორც ჩანს, მაყურებლის ინტერესი მათ ახლაც შემორჩენიათ.

ღა მაინც, პატარა, უმნიშვნელო მწერალი რომ არ ვიყო და თან, ასე თუ ისე, ღირსეულ მოქალაქედ მთვლიდნენ, ხუთასი ჭირისუფლიდან რომელიმეს, მწერალს თუ კრიტიკოსს, ერთს მაინც, ამ ექვსი წლის წინათ, ათწლიანი ლოდინ-წამების შემდეგ, დასტამბულ „შავ წიგნზე“ ცოტა რაღაც მაინც რომ დაეწერა, ანდა რომელიმე გაზეთს, ერთს მაინც, „ლიტერატურული საქართველოს“ ჩათვლით, მკითხველისთვის თუნდ ძუნწი ქრონიკით ეცნობინებინა, ისე, როგორც ათობით სხვა ავტორების მიმართ იქცევიან, რომ გამოვიდაო...

სხვათა შორის, ჩემი არცთუ ახლო ნაცნობი და საყოველთაოდ ნამდვილ პროფესორად აღიარებული ალექსანდრე ღლონტი 1990 წლის 16 აპრილით დათარიღებულ ბარათში მწერდა:

„თქვენი საოცარი „შავი წიგნი...“ ხელმეორედ, სულმოუთქმელად გადავიკითხე. ესაა საშინელი სიმართლის, შავი სიმართლის ღალადისი. მერედა როგორი ქართულით ნათქვამი! რა მასალაა მოხმობილი, რა ფრთიანი გამოითქმებიან გამოყენებული! თქვენი სიტყვები კაცს ჟრუანტელს ჰკერის, გონებას უფორიაქებს, სულს უღულებს. „შავმა წიგნმა“ გამოაცოცხლა ქართველობა. წლების განმავლობაში ის მელნაწერად ერცულდებოდა. ასეთი ბედი ჩვენს ეპოქაში სხვა წიგნს არ ჰქონია“.

იამზე შენგელია, „ჯერჯერობით ორი შვილის დედა“, მწერდა (10.04.90):

„ნამდვილად შეძრწუნებული და აფორიაქებული ვარ თქვენი „შავი წიგნის“ წაკითხვის შემდეგ, ვინ იცის, რა ბედნიერი დედა ვიქნებოდი დღეს, ეს წიგნი ცოტა ადრე რომ წამეკითხა. მე, ჯერჯერობით ორი შვილის დედას, უფლება არა მაქვს თქვენ შეგეხმინათ, მაგრამ ამ წერილით მინდა გამოვხატო უღრმესი მადლობა თქვენს მიმართ, რამდენადაც თქვენ ჩემს გულში ისეთი პატრიოტული ცეცხლი დანთეთ, რომელიც არ ჩაქრება ჩემი სიცოცხლის ბოლო წუთებამდე“.

დიახ, ამ „ჯერჯერობით ორი შვილის დედის გულში“ კი დაანთო, მაგრამ... ვაჰ, რომ „შაემა წ-გნმა“-იმ დიდი მამულიშვილების გულსა და გონებაში მბეჭუტაევი ცეცხლიც ვერ გააღვია, რომლებსაც 1979 წელს, ქსეროქსზე დიდი შიშით და სიფრთხილით გადაღებული მისი პირველი ეგზემპლარები გაეგზავნათ: მწერალთა კავშირის თავმჯდომარეს გრიგოლ აბაშიძეს, მწერალთა კავშირის მდივანს ნოდარ ღუმბაძეს, კულტურის მინისტრს ოთარ თაქთაქიშვილს და „ლიტერატურული საქართველოს“ რედაქტორს ვახტანგ ჭელიძეს...

(თანამდებობაუქონელ მწერებიდან კი... ბოდში, მწერლებიდან, გამორჩეული პატივისცემის ნიშნად, რევაზ ჯაფარიძეს მიერთვა, რომელსაც პირადად მარტო შორი საღმით ვიცნობდი, მაგრამ საზოგადოებრივი თვალსაზრისით ახლოს შეცნობოდა და დიდადაც ვაფასებდი, როგორც მწერალ-მოქალაქეს, რაც ასეთი იშვიათობა იყო და არის ახლაც).

ვინ იცის, რაკი მთელ საბჭოთა ზალხს არ მივმართაედი და მზოლოდ ჩემიანებს მოვეუწოდებდი, — „ქართველებო, ჩვენი ახლო მეზობლების სასიხარულოდ ნუ ამოვწყდებით, ნუ ამოვწყდებით და თუნდაც მათ გულდასაწყვეტად გავმრავლდეთ, გავმრავლდეთ!“ — ჩემი ის „ქმნილება“, შეიძლება, ამიტომაც ანტისაბჭოთა კრამოლად მიიჩნიეს და თავი ისე მოიჩვენეს, თითქოს ჩემგან არც არაფერი მიუღიათ და არც არაფერი ჩემი წაუკითხავთ...

ამ მხრივ მათ, მოხანებისას, ფსიქიატრიის და პერსონოლოგიის აკადემიკოსმა აელიპი ზურაბაშვილმა ასულაც არ წაბაბა: ჩემი „ძღვენისთვის“, მართალია, ხელიც არ უხლია, და თუ რატომ, ეს მაინც შემომითვალა:

„ — გადაეცით ბატონ კიტა ბუაჩიძეს, მე ცენზურაგაუვლელ წიგნებს არ ვკითხულობ“.

(თუ უკან დავბრუნდები... რუსთაველზე შემთხვევით შეხვედრისას, რევაზ ჯაფარიძემ სალაპი კი მომცა, მაგრამ... არ ვიცი ზიფათს მოერიდა თუ სხვა რაღაც მოსაზრებით, ისე უბრაოდ ჩამიარა, თითქოს ჩემგან „შავი წიგნი“ არც მას მიეღოს).

ჰოდა, როგორ შემიძლია, ასეთი მოულოდნელი შემოღამებისას, არ მოვიგონო, რომ სწორედ იმ ხანებში თამაზ კვაჭანტირაძემ თავის ტელეექციებში, ცოტა შეპარვით, მაგრამ მა-

ინც გაბედულად, ორჯერ თუ სამჯერ, მთელი საქართველოს გასაგონად, მოიხსენია ეს „ცენზურაგაუვლელი“ ნაწარმოები, უნდა გამოიცივოს, როგორც ერისათვის ღიდად საჭირო წიგნი...

ვერც თქვენს იმ ერთ პატარა წერილს დავივიწყებ „ლიტერატურულ საქართველოში“, „მწაპნელებისგან“ რომ მიცავდით...

სხვათა შორის, ეს „წაპნა“, დრო და დრო, მერეც გრძელდება, ოღონდ ერთ შემთხვევაში ცოდვას ვერ დავიდებ და ერთ ღიდად ნიჭიერ მგოსანზე ეჭვს არ მივიტან, „მწაპნელობას“ იგი, აბა, როგორ იკადრებდა, მაგრამ არც ის მინდა მკანმა იფიქროს, რომ მე კი ასეთი ხელცივობის მკადრებელი ვარ, რის უარსაყოფად უბრალოდ თარიღებს მოვიშველიებ:

1982 წელს დაწერილ და 1991 წელს აწყობილ და „შავზე შავ წიგნში“ შეტანილ „საით მიექანება ქართულ თეატრში“ ასეთი ფრაზა მაქვს (გვ. 433):

„ძველად ამბობდნენ, ყველა გზა რომისკენ მიდისო. მე უფიქრობ, რომაელები ცდებოდნენ: ყველა გზა მიდიოდა (და მიდის!) სასაფლაოსკენ!“

„ლიტერატურული საქართველოს“ 1992 წლის 23 ოქტომბრის ნომრის მე-7 გვერდზე კი შეგიძლიათ ამოიკითხოთ:

„ბევრი ვიცხოვრე ქვეყნად,
ცოდნაც მივიღე ღიდად.
ღიდა ბოღიში, რომო,
ყველა გზა საფლავში მიდის...“

როგორც ხედავთ, დიდებული ნათქვამია პოეტურად, მაგრამ არც მისი აღრინდელი პროზაული ვარიანტია, ფრთიან აზრს სულ ერთიანად მოკლებული... ასე რომ, შეგვიძლია ვივარაუდოთ, ეს ორი „გენიოსის“ უცაბედი დამთხვევაა, მიუხედავად იმისა, რომ იმ წლებში „საით მიექანება ქართულმა თეატრმა“ არა ერთი ცნობისმოყვარე მკითხველის ხელში გაიარა, არა ერთი თეატრი მოიარა, ჯანსუღ ღვინჯილიას „ცისკარის“ და რევაზ მიშველაძის „კრიტიკის“ რედაქციების კარებზეც დააკაკუნა, მაგრამ არც ერთმა და არც მეორემ თავიანთ ფურცლებზე უღვინო სუფრაც არ გაუშალა...

ჰოდა, საერთოდ, აბა როგორ არ დავეჭვდეთ ჩემს სამწერლო მოწოდებაში, როგორ არ ვიფიქრო ჩემს შემოქმედებით უნა-

ყოფილებაზე... ასე რომ არ იყოს, ნეთუ ხუთასიდან ერთი მწერალი მაინც, ერთი კრიტიკოსი მაინც, აქამდე არ გამოჩნდებოდა, რომელიც... რომელიც...

„შავ წიგნს“ პრესაში ხომ არ გამოუჩნდა და არ გამოუჩნდა არც მაქებარი და არც მაგინებელი, მაგრამ, ძნელად ასაწერი — არა უქალაღდობის გამო! — იდეური ტანჯვა-წამების შემდეგ, 1989 წელს დასტამბულ „Такое длинное, длинное письмо Виктору Астафьеву“ — სთვის ოციოდე სტრიქონი მაინც რომ მიეძღვნათ, რომელზეც თქვენ, დაბეჭდვამდე, „განათლებისთვის“ განკუთვნილ რეცენზიაში ასე წერდით:

„სამწუხაროდ, მათ („შავ წიგნს“ და „Длинное письмо“-ს) ჯერჯერობით არ ღირსებით ტიპოგრაფიული ნიშნებით აწყობა და, მხოლოდ თვითგამოცემის წესით დაბეჭდილი და ქსეროქსით გამრავლებულნი, გადადიან ხელიდან ხელში. არადა, უნდა გამოიცეს, ვინაიდან ეს წიგნები არიან მართალი, საჭირო და საინტერესო წიგნები. „ვრცელი უსტარიც“ ამ ტიპის წიგნია — ტყვილიანი, მწარე, დაურიღებელი სიტყვა-ცხოვრებისათას დარჯაკამოვლილი პატიოსანი ლიტერატორისა... ეს გახლავთ საინტერესო ავტორის საინტერესო ნაწარმოები, რომელიც თავიდან ბოლომდე გაუნელებელი ინტერესით იკითხება. შეიძლება ითქვას, რომ ამ წიგნში პუბლიცისტი კიტა ბუაჩიძე ტოლს არ უდებს დრამატურს, უფრო ზუსტად — კომედიოგრაფ კიტა ბუაჩიძეს: იუმორი, ირონია, სარკაზმი შეზავებულია ვრცელი და მრავალმხრივი ფაქტობრივი მასალის ღრმა და მახვილ ანალიზთან... ავტორმა ეს წიგნი ქართულადაც უნდა დაწეროს, ხოლო გამომცემლობებმა მათი დაბეჭდვა ითაეონ... მერწმუნეთ, არ წააგებენ — ეს წიგნი (რუსული და ქართულიც) ორ დღეში სანთლით საქებარი გახდება წიგნის ბაზარზე“.

ისე აგობდეთ ყველა სურვილი, როგორადაც მაშინ ეს თქვენი წინათგრძნობა ახდა: ამ „უსტარზე“ პოლიტიკური ერთ-ერთი წევრის მიერ (ო, ცილს ვერ დაეწამებ, ის „ერთ-ერთი“ ედუარდი არ გახლავთ!) ამ ჩემს ნაშრომზე გამოთქმული საქებარი აზრით გათამამებულმა და ბორკილყრილმა ლუკა ხუნდაძემ ივაჟაკა და „Письмо Астафьеву“ ასიათასიანი ტირაჟით გამოსცა, რომელიც ორ დღეში არა, მაგრამ ორ კვირაში კი მართლაც საქებნელი გახდა: ზოგიერთი თბილისელი ათ-

ათ ცალკობითაც ყიდულობდა და თავიანთ ნაცნობ-მეგობართ სიამაყის გრძნობით უგზავნიდა მოსკოვში, ლენინგრადში, კი-ევში და ბევრ სხვაგანაც, წაიკითხეთ და... ახლაც იტყვიეთ, ქარ-თველები სალანძღავი ხალხიაო?!

(ისე კი, რა „საქებარი“ ხალხიც ჩვენ ვიყავით, მე ეს, რა-საკვირველია, „ასტაფიევის“ დაწერამდეც მშვენივრად ვიცო-დი, მაგრამ არაქართველისგან ჩვენს დაცინვა-დაწიხვლას განა მოვითმენდი, ავითანდი და მიუუტევებდი?!).

თავი ძალიანაც რომ მოვისაწყლო, ფაქტს სად გავექცე? საბჭოთა კავშირის რჩეულ მკითხველთა საზოგადოებაში, ქარ-თველი მწერლის მიერ პუშკინის ენაზე დაწერილი და უკვე წიგნად გამოსული „Такое длинное, длинное письмо Викто-ру Астафьеву“ 1989 წელს ლამის ბესტსელერად იქცა: სა-იდან არ მთხოვდნენ და, ზოგჯერ, რა კურიოზულ საჩუქარს არ მიგზავნიდნენ, რომ ეგზემპლარი მიმეწვდინა; ერთმა ქალაქ ნახოლდიდან, მართლაც ცხრა მთას იქით რომ მდებარეობს, ია-პონიის ზღვასთან, ჟენ-შენი და „Пихтовое масло“-ც კი გა-მომიგზავნა: პირველი, როგორც იტყვიან, უკვე გავიხმარე, მე-ორესთვის კი ჯერ ხელიც არ მიხვლია და შემიძლია გისა-ჩუქროთ „საარქივოდ“, თუკი მას იმ ანტისაბჭოთა წიგნების გვერდით მოათავსებთ, რომლებიც ამ თორმეტიოდე წლის წი-ნათ გინობათეთ, როგორც ექვმიუტანელ საბჭოთა ადამიანს, ჩეკისტებისგან, „შავი წიგნის“ გამო, ყოველ დამე, „პერესტრო-იკის“ დამკვიდრებამდე, ჩხრეკა-დაჭერას რომ ველოდებოდი...

ღიახ, მაღლობისა და მოწონების წერილები და ავტოგრა-ფით შემკული წიგნები ვინ აღარ გამომიგზავნა: ლენინგრადი-დან პოეტმა მიხეილ დუდინმა, მოსკოვ-დან პოეტმა რიმა კა-ზაკოვამ, სერგეი მიხალკოვმა, კრიტიკოსებმა: ლევ ანინსკიმ, სტანისლავ რასადინმა, ალექსანდრე ბორშჩაგოვსკიმ, ევგენი სიდოროვმა (ამჟამად რუსეთის ფედერაციის კულტურის მი-ნისტრია), ვლადიმერ ლაკშინმა, ასტაფიევის ახლო მეგობარმა, ჟურნალ „Москва“-ს რედაქტორმა ვლადიმერ კრუპინმა („Это не письмо, а труд!“), ჟურნალ „Книжное обозрение“-ს რედაქტორმა ავერინმა, ეორონეჟიდან გავრილ ტროპოლსკიმ, ზოგის გვარი კი, ასე სახელდახელოდ, ვეღარ მომიგონებია, მაგრამ რუსეთის სინდისად წოდებულ, აკადემიკოს დიმიტრი

ლიხაიოვისას, აბა, რა დამავიწყებს, რომლისგანაც საერთო სათვალავში სამი წერილი და ორი წიგნი მივიღე, ანდა მეორე აკადემიკოსისას, ოლონდ, ვთხოვთ, მის პიროვნებას არა დღევანდელი, იმჟამინდელი საზომით მიუდგეთ: მიუხედავად იმისა, რომ ჩემი „გრძელზე გრძელი უსტარი“, არსებითად იმდენად არა ასტაფიევის, რამდენადაც უფრო საბჭოთა რეჟიმის წინააღმდეგაა მიმართული, საბჭოთა კავშირის კომუნისტური პარტიის ცენტრალური კომიტეტის მდივანსა იდეოლოგიის დარგში, პოლიტბიუროს წევრმა ალექსანდრე იაკოვლევმა, ქართველი ინტელიგენციის ვიწრო წრესთან შეხვედრისას, 1988 წლის თებერვალში, განაცხადა (ამის მოწმეა ჭაბუა ამირეჯიბი, არსებობს აგრეთვე ამ შეხვედრის სრული ჩანაწერი ტელეფირზე): „Ответ очень интересно написан... Скажу я: очень талантливо... Я его прочитал с большим интересом... Я сначала только хотел послать обычно, но пока страницу прочитал — страшно интересно, дальше еще интереснее и так до конца... И так оставил у себя“.

ჰოდა, თუ არ გაგიჭირდებათ და, მე მგონია, არ უნდა გაგიჭირდეთ, ისიც წარმოიდგინეთ, საკავშირო ცეკას კომუნდატურაში, სადაც ყოველ დღე თვითდინებით (самотек) ასობით ბანდეროლი შემოდის, ვიღაც ბუაჩიძის „Длинное письмо“ შეერჩიათ და იგი პოლიტბიუროს წევრის რამდენ ზელქვეითს უნდა წაეკითხა, რომ საბოლოოდ საბჭოთა კავშირის, გორბაჩოვის შემდეგ, მეორე კაცის კაბინეტში საწერ მაგიდაზე დაედოთ, როგორც რაღაც დიდმნიშვნელოვანი...

არადა, მათგან, აბა, ვის ეცოდინებოდა, რომ მოგვიანებით, თბილისში, იაკოვლევთან შეხვედრისას, ჭაბუა ამირეჯიბი, საუბარში, სიამაყით ასეთ რეპლიკას ჩაურთავდა:

„— Чингиз Айтматов считает, что это исторический документ“.

ცხადია, არც ის ეცოდინებოდათ, რომ სომხების დედად მიჩნეული სილვა კაპუტიკიანი, სომხებიდან ყველაზე ცნობილი პოეტი საბჭოთა კავშირში, მაჩაბლის ცამეტის მისამართით, მისთვის სრულიად უცნობი ავტორის სახელზე დეკემას აფრენდა ერევნიდან:

„С наслаждением читаю Ваше длинное письмо...“

მიაქციეთ ყურადღება: „прочла“, „прочитала“ კი არა, —

„ИHTAIO“, ესე იგი, რას იზამ, ძალაუნებურად იუმორგარევეით თუ იფიქრებ, კითხვისას ისე აღტაცდა, დამთავრებას აღარ დაუცადა, ფეხი დაჰკრა და... ჰერი, ჰერი, ფოსტისკენ, ფოსტისკენ!

ღიას, ეს სომეხმა მწერალმა, შენიანებმა კი, ქართველმა მწერლებმა არათუ დეჰეშა, არც ერთმა, არც ერთმა...

თუმცა არა: იმხანად ბაზალეთის ქუჩაზე შემთხვევით ირაკლი აბაშიძე შემომხვდა და... ო-ო, ვიდრე ამას ვიამბობდეთ, პანაწკინა „პრეისტორიას“ გაგაცნობთ: ჩვენ შორის ასაკობრივი სხვაობა სულ რაღაც რამდენიმე წელიწადს მოიცავდა, მაგრამ ეს „რაღაც“, ღიღზე ღიღი მანძილია, როცა შენ თხუთმეტისა ხარ, ის კი უკვე ქალებში „დაგულაობს“, — ოცისაა და როგორც თითქმის უკვე ცნობილი პროლეტარული პოეტი შენს უფროს ძმას, უკვე უთითქმისოდ ცნობილ და მეზდამტეხ პროლეტარულ კრიტიკოსს, ბენიტო ბუანიძეს ემეგობრება, და მას, ამის მერეც — მერეც, სიბერეშიც არ ავიწყდება, ძალზე ზშირად კუჭშიმხმარი ყმაწვილი როგორ ეღრითინებოდი ზოლმე:

— რა იქნება, თუ გაქვს, მომეცი შაური, პონჩიკს ვიყიდი...

აღამიანურად ეს ბეერ ხანმოთეულსაც სჩვევია იფიქროს, ამ ღროის განმავლობაში იგი, ო, რა უსაშველოდ გაიზარდა, შენ კი, მის მეხსიერებაში, ისევ „რომეცი შაურის“ ღონეზე დარჩი... ამიტომ არც გამევირვებია, როცა ირაკლიმ, გაქილიკების მოტრფიალემ, განგებ გაოცებით მკითხა:

— კიტა, ბიჭო, მართლა შენ აუწვი კული ასტაფიევს? ის წივნი მართლა შენ დაწერე?

— მე არა, გრიგოლ აბაშიძემ, — მოსაჩვენარი სერიოზულობით ღინჯად ეუპასუხე, რაკი ვიცოდი (და ეს ვინ არ იცოდა!), ამ ორ აბაშიძეს ერთმანეთი გულზე არ ეხატებოდათ.

— კაი ერთი, გრიშა რა ამის დაწერია?! ისე, მაინც, ბიჭო, რა კაი რუსული ვისწავლია ციხეში!

— ციხეში, შე კაცო, რა რუსულს ვისწავლიდი, მთელი შვიდი წელიწადი ყურში სამად სამი უცენზურო სიტყვა ჩამესმოდა... ეს კია, რუსულად მოლაპარაკენი მათ ექვსივე ბრუნვაში ისეთი ლინგვისტური ოსტატობით აბრუნებდნენ და მათი შემწეობით არცთუ უბრალო აზრებსაც ყველასათვის ისე გასაგებად გამოთქვამდნენ, ნიკო მარსაც შემურდებოდა.

ამის დამადასტურებელი ორიოდ „თვალსაჩინო“ მაგალი-
თიც მოვიყვანე, „პალესტინა, პალესტინამ“ ჩაიზითხითა და,
ალბათ, ასე იოლად გონმისაწვდომი „განათლებისთვის“, მად-
ლობის ნიშნად, მხარზე ხელი დამკრა, რაც მისი აზოვნების-
ვის ძნელი არ იქნებოდა, თუკი ჩემს „აზოვნებასაც“ გაითვა-
ლისწინებო.

— კი, მაგრამ, იცი შენ მაინც, რა დავწერე, რა გააკეთე?

მე ირავლის ისე ავხედე, თითქოს მართლაც არ ვიცი რა
დავწერე და რა გააკეთე, და რომ ბევრად ადრე „ასტაფიევის“
წიგნად დაბეჭდვამდე, მასზე არც აკადემიკოს ღიმილური ღიზა-
ნოვის, არც პოლიტბიუროს წევრის ალექსანდრე იაკოვლევის
და ბევრ სხვათა დადებით აზრზე ვიოიბ არც არაფერი მსმენია
რა. კერძოდ, ვითომ არც ის გამიგია, რომ ჩვენი ეპოქის ის-
ტორიაზე დასპეციალებულმა რიგი შედეგებმა, ჩემთვის შეუ-
ტყობინებლად და ჩემთან შეუთანხმებლად, ცხადია, თავის მო-
საზრებათა გასამაგრებლად (მოლოტიკოვთან დაკავშირებით),
დიდი ნაწყვეტი ამოიღო ჩემი, ჯერ კიდევ თითქმის არალეგა-
ლურად მიჩნეული ხელნაწერიდან და დაათავსა ორი მილიონ-
ნის ტირაჟის მქონე ჟურნალ „Юность“-ში, (მოგვიანებით
შეიტანა წიგნშიც — „Они окружали Сталина“).

— არა, დაწერით ასტაფიევზე ჩვენც დაწერეთ, სამმა კაც-
მა გეერდნახევარი, მაგრამ „დღინი პისმოსთან“ რას მრევა, რომ-
ლითაც ქართველებს არა მარტო რუსების, სხვა ხალხების
თვალშიც, სახეზე ჩამორეცხე ამ ციმბირელის ნასროლი ღა-
ფი და... ყოჩაღ შენ! — და ამ თითქოს უკვე ჩამოწმენდილ ლო-
ყაზე, ლამის როგორც პატარა ბაემეს, ღიმილით ხელი მომი-
თათუნა, — დედა, დედა, ასე რაღა გამოგეპარა, რამხელა „პონ-
ჩიკი“ გაზრდილხარ თურმე!.. აფსუ!, საწყალი ბენიტო, რა
ნიჭის კაცი იყო!.. არშარუნმა დადუპა, დადუპა ამ სახემაღლმა...

ღიან, ასე კაზმულად შემაქო, მაგრამ დაწერით არაფერი
დაწერა და ამისთვის ვერც დაემდურები: თავის ცოცხალ კო-
ლეგებზეც კი, რამდენადაც მახსოვს, ის, საერთოდ, არაფერს
წერდა, მაგრამ...

ხუთასიდან სხვა მწერლებს და კრიტიკოსებს, მით უმეტეს
პროფესიონალებად რომ ითვლებიან და...

საბაბი, სულ მცირედიც თუ მიეცათ, ნაცნობ ავტორს, მე-

გობრობით თუ „ისე“, ხოტბის სიტყვებს; ხოშკაკალასავეით რომ მიყრიან...

ჰოდა, თუკი ერის სახეზე მართლაც ლაფის ჩამომრეცხი წიგნი გამოცა, თანაც რუსულ ენაზე

(დასტურ, საქართველოში ეთერ გუგუშვილია ერთადერთი, რომელმაც, მიუხედავად ჩემზე მრავალწლიანი მომდურაობისა, „ასტაფიევს“ მშვენიერი წერილი მიუძღვნა გაზეთ „ЗАРЯ ВОСТОКА“-ში), —

რალა მაინცდამაინც ახლა შეახმათ პასტა?!

ო, არა, პასტა სულაც არ შეხშით, მაგრამ ვინაა მათთვის ვილაც კიტა ბუაჩიძე, რა პირადი ურთიერთობა აკავშირებთ მასთან, თავიანთ მარაქა-საკრებულოში იგი ზომ, არც ახალ-გაზრდა, არც ხნიერი, არასოდეს უნახაეთ და...

პირადად გვთხოვდეს მაინც, ჩემზეც დაწერეთ რამეო!

არადა, რაკი ჩვენში, ეთქვათ, ღირსეულზეც, უძმაკაცურად, უთხოვნელად არაფერი იწერება; ერთი მითხარით, აბა, როგორ არ მიუუსადაგო სამშობლოსათვის დაწვარ ამ ერისკაცებს, პოლონეთის ოციან-ოცდაათიანი წლების, სტალინის მომსგავსო დიქტატორის, იუზეფ პილსუდსკის მწარე გამონათქვამი, რომლითაც მან ერთხელ, გაგულისებისას, სეიმის წევრებს მიამბა:

— Фшиште йестесче курвами, Паньство!

(ამის თარგმანი თეატრალური „მოღვაწეების“ ერთი ნაწილის მიმართ გაგზავნილ ბარათში უკვე მოვიყვანე, ასე რომ, მეტჯერ საამისოდ თავის შეწუხებას არ ვაპირებ).

გაკვრიო, როგორც საქართველოს მთავრობის წევრს, იმასაც მოგახსენებთ, რომ ქართველებს სახეზე ეს ლაფი უფრო ადრეც ჩამოერეცხებოდათ, საამისოდ ხელშემწყობი დროულად რომ გამოჩნენოდა: 1988 წელს. პარტიის ცენტრალური კომიტეტის მდივნებმა, ჯუმბერ პატიაშვილმა და ნუგზარ ფოფხაძემ, გაეცნენ რა „ასტაფიევს“ და — არ ვაჭარბებ, — მყის დატყვევდნენ, მისი სასწრაფოდ გამოცემა „მერანოს“ ღირექტორს გურამ გვერდწითელს დააუღეს, და მეც, რა გასაკვირია, სიხარულით ცას ვეწიე, მის დაბეჭდვას აწი, აბა, წინ რალა და ვილა დაუდგება-მეთქი და...

ჰოდა, როდესაც რესპუბლიკის დედოზარის ამ ჩამოკერიდან გავიდა ერთი დღე, გავიდა სამი დღე და მთელი კვირაც, არადა,

გამომცემლობიდან არათუ „სასწრაფოდ“, საერთოდაც არაეინ მებახის, მეც ავდექი და მიუპატიჟებლად ბატონ გურამის კაბინეტის კარები, ცეკათი ზურგგამაგრებულმა, მაგრამ რაკი ვიციოდი რა ქვეყანაშიც ვცხოვრობთ, ყმის მოკრძალებით შეეაღე და...

თუმცა იმ დროიდანაც კი, როცა „ჴერანს“ ჴერ კიდეე „სახ-ჭიოთა მწერალი“ ერქვა, თავის საბატონოში პირველად მხოლოდ ახლა მიხილა, და მაინც, ამ პირველი ზილვა-გაცნობი-სასაც, კრიტიკოს-გამომცემელს სახეზე ღიმილის ნასახიც არ აესახა და ახალგაზრდა „ბარიშნას“ ჴვალეებით თუ შეხედავდით, საკოცნელი ბაგე-ტუჩებიდან, თავისი მდიდარი კრიტიკული არსენალიდან, ერთი, ერთი ნელთბილი სიტყუაც არ გაიშეტა ამდენ ჴირგამოვლილ „ასტაფიევის“ რაიმე ლიტერატურულ თუ საზოგადოებრივ, თუნდაც ერთ ღირსებაზე შაინც, და წარბ-შეკრულმა, თითქოს 1937 წელს სპეცკოლეგიის თავმჯდომა-რის, ერვანდ თათუზოვის „ტროიკის“ წინაშე ვმდგარიყავი, მოკლედ „მომახარა“, იმ მომენტში ნემს მდგომარეობაში მყოფისათვის, არცთუ სიმბოლური სადახვრეტო განაჩენი: ამის გამოცემით რუსებს ვაწყენინებთ, რის შესახებაც მე ცეკას ვაცნობებ და მოეახსენებო.

ეპ, ამას რა დიდი ექსტრასენსური განჭვრეტა უნდა, უკვე მოხსენებულიც ექნებოდა, ცეკა კი, ასეთი საშიში სიგნალ-გაფრთხილების შემდეგ, რუსეთის განაწყენებას საქართველო რომ დარჩენოდა ნაწყენი, ცხადია, ამას უფრო ამჯობინებდა და... ეერც გაამტყუნებდი, — „ერთი“ პოეტის თქმისა არ იყოს, „დრო აღნიშნე, დრო!“

დრომ კი, როგორც ჴემოდან ჩემი მონაყოლიდან უკვე იცით, ფრიად ნათლივ აჩვენა, რომ „ასტაფიევის“ რუსები არათუ წყენით შეხვდნენ და არათუ მხოლოდ მათ მოფხანა გული, — არა რუს პატარა ერებსაც, რომელთა ორი გამორჩენილი წარმომადგენელი, კაპუტიკიანი და აიტმატოვი, დაგისახელეთ კიდეც, დანარჩენები კი, — არა, ჩვენში მათი ნაკლებცნობილობის გამო.

ამას წინათ ბევრი ვიფიქრე თუ ცოტა, სწორედ წიგნის გამოცემის თაობაზე დავაპირე თხოვნით მიმემართა გურამ ფანჯიკიძისთვის, რომლის ძველი და უახლოესი მეგობარია გუ-

რამ გვერდწითელი, ოღონდ ესეცაა, როცა იხინი თავიანთ სა-
მუშაო კაბინეტებში იმყოფებიან, გურამ მეორე გურამ პირვე-
ლის ხელქვეითია, და მაინც გადავიფაქრე: ამ ჩემმა ვედრების
ბარათმა, ვაითუ წინანდელივით, თავი იმის მაგიდაზე ამოყოს,
ვისაც „ეუნივი“, რაიც, კომუნისტების დროს თუ გავიზსენებთ,
„На Ваше усмотрение“-ს რეზოლუციას წააგავს, ესე იგი
შეგიძლია თავი არ შეიწუხო.

მოვიგონოთ ისიც, რომ გურამ გვერდწითელმა „სისხლის
წვიმების დროს“ ცეკას მდივნები დაარწმუნა პოლიტიკურ ახ-
ლომხედველობაში და... ახლა — ვისთვის უქალაღლობისას! —
ძმად შეზრდილის „უსმატრენიეს“ გაუწევს რაიმე ანგარიშს?!

სამიოდე წლის წინათ ვიქტორ რცხილაძემაც სთხოვა, ორი
სართულით მის ქვემოთ მოღვაწე ჯანსუღ ლეინჯილიას, რა-
მენაირად გამოეცა ჩემი პუბლიცისტური ნაწერები, ბოლოდრო-
ინდელი მაინც, და ოციანი წლების გამომცემელ თომა ჩიქვა-
ნაიასავით დიდად პატივისცემმა, ეროი პირი თანხმობა თით-
ქოს მისცა კიდევ, მაგრამ... თუ აქ მდაბიურ ქართულში დამ-
კვიდრებულ რუსულს გამოვეურევ, ორი „სუტკაც“ არ იყო გა-
სული, რომ თავი ამისგან შორს დაიჭირა.

გასართობად იმასაც გაგანდობთ, რომ ამ „სუტკიდან“ მრავალი
დღე-ღამის გასვლის შემდგომ, ვიქტორმა... არ ვიცი
ჩემს შესაძლო სკლეროზს დაეყრდნო თუ თავად მას უღალატა
მეხსიერებამ, ეს კია, ბრალდებასავით წამომიყენა, თქვენ მა-
შინ ტირაჟი გეცოტავათ და გამოცემაზე თვითონვე თქვით
უარიო...

ესე იგი, არსებითად, ფეთხუმად გამომიყენა, რაც, საერ-
თოდ, შეიძლება, მართალიც არის, ოღონდ არა ამ შემთხვე-
ვაში: განა რა მაგდენი „თომა ჩიქვანაია“ შეძლებოდა, არა,
ჩვენ გამოგიცემთ, არა, ჩვენ გამოგიცემთო, და რა ისეთი დაბ-
ღური და ლენჩი ვიყავი არ მცოდნოდა, იმხანად ნაბეჭდი ლი-
ტერატურა, გარდა პორნოგრაფიულია, გინდ შეგელოცა, არ
იყიდებოდა და არც ამხანად იყიდება და... ტირაჟზე დავიწყებ-
დი ჭოჭმანს და ვაჭრობას?! ასეც არ იყოს, — პირდაპირ სასა-
ცილოა! — ტირაჟამდე ვინ მიგიშვა სალაპარაკოდ?!

სხვათა შორის, ჯანსუღ ლეინჯილიას მე მხოლოდ ტელე-
ეკრანიდან ეიცნობ, ის კი მე — არანაირად, მაგრამ როდესაც

მისი სიცოცხლე წკიპზე ეკიდა და საოპერაციოდ კანადას უნდა გაემგზავრებინათ, მის მკურნალ ექიმს, ღია მარწყვიშვილს, შიშის ეჭვი ღრღნიდა, კანადა კი არა, ვაითუ მოსკოვამდეც ვერ ჩავალწიოთო, და როცა, იმდენად არა ღვთის, უფრო, მგონი, იმჟამად კანადაში მცხოვრებ ქართველი ებრაელის შეწევნით, მეორე სიცოცხლეს ნაზიარები დაგვიბრუნდა, მისი არა ნათესავეებიდან, როგორც ქართველმა, ერთ-ერთმა პირველმა მეც ვავიხარე, რადგან ეს შიორეული გადაფრენა ტრაგიკულად რომ დაშთავრებულყო, ამით საქართველოს ბევრი რამ...

მოდით, წინასწარმჭვრეტელობას აქ დავუსვათ წერტილი, ისე კი, საერთოდ, საერთოდ, ბედნიერებაა ქვეყნისათვის, თუ მის გამორჩეულ შვილს ნიჭიერებასთან ერთად კაცობაც ამშვენებს, და რა სამწუხაროა, რომ ცხოვრებაში ეს ერთდროულად არცთუ ხშირად გვხვდება ხოლმე.

ახალი წლის წინა დღეებში, „დალხინებული სამწერლო ცხოვრებისგან“, ექვსლარიანი წამლებუქონელ პენსიონერს, სტენოკარდიამ მთელი სიმძაფრით შემომიტია და მიქელგაბრიელთან პირისპირ ჭიდილში იმ უბრალო, სადა, მარტივ ჭეშმარიტებამდე მივედი, რომ სულ ტყუილია, სულ ერთიანად მოგონილია, მტკნარი აბსურდია, არაბუნებრივი და არაადამიანურია საყოველთაოდ ცნობილი ლეგენდა იმაზე, თითქოს დიდი ადამიანები, სკკედილის უკანასკნელ წუთებში, საშთამომავლოდ სამარადისო რაიმე სიბრძნეს აღმოთქვამენ ხოლმე.

ო, ყველა ეს „უკანასკნელი ამონათქვამი“, თუნდაც, აი, როცა კოცონზე იწვოდა იან ჰუსი და თვალი მოჰკრა, ერთი დედაბერი როგორ აყრიდა ცეცხლზე ფიჩხს, რათა ის კიდევ უფრო გაძლიერებულიყო და ერეტიკოსი მალე დამწვარიყო, ჰუსმა წამოიძახაო, „ოი, წმინდაო გულუბრყვილობაჲ!“ ანდა სხვა, მაგრამ არა ანალოგიურ შემთხვევაში, გალილეო გალილელის „მაინც ბრუნავს, მაინც ბრუნავს!“, მათთვის, დროთა განმავლობაში, მიწერილია მაღლიერი შთამომავლების მიერ.

ეჰ, იმ წუთებში, აბა, ვინ ფიქრობს ამაზე და ვის სცხელა ამისთვის!

რა ეროვნებისაც არ უნდა იყვნენ ეს დიდი ადამიანები და უამისოდაც მართლაც უკვდავნი, მათი უკანასკნელი ამონაქვნისი იქნებოდა, არის და მუდამც იქნება ის, რაც ამ ერთ ქარ-

თულ ხალხურ სტრიქონშია პარადოქსული გენიალობით ჩაქსოვილი:

— თუ სიკვდილი მეწერა, რისთვის მშობე მშობელო...

მე გთხოვთ, „ოდესღაც“ ჩემო ნაჩეგობრალო თამაზ, ისეთ სულელად ნუ ჩამთვლით, ვითომდა ჩემი პერსონა დიდ ქართულად მიმაჩნდეს, ოღონდ ეს კია, ღიანაც ასეთი რომ ვიყო და სიცოცხლესთან გამოთხოვებისას თავს თუ მოვერეოდი, თუ მოვერეოდი, ჩვენი დღევანდელი დემოგრაფიული მდგომარეობა, ჩვენივე ეროვნული უჭკუობით

გავიხსენოთ ვაზგენი:

„ქართველებს რომ შეეძლოთ, ნახევარ ბავშვს გააკეთებდნენო...“

„Грузины, подобно корякам и чукчам, вымирающая нация)“, —

ისეთი ტრაგიკული და კატასტროფულია, სიკვდილის წინ უეჭველად წაიბუტბუტებდი:

— დარდი მიმყვება საქართველოსი...

„შავზე შავი წიგნის“ გამოუცემლობაც ამ დარდის ერთი შემადგენელი ნაწილია, რადგან ის, მისი წინაპრის, „შავი წიგნისა“ არ იყოს, უმთავრესად იმ საკითხებს ეხება, რომელთა გამო, სულ ცოტა, უკვე შეიძლია ათეული წელიწადია, ეროვნული სისხლისგან წვეთ-წვეთობით, დღითი დღე ვიცლებით, ვიწრიტებით, და თუ თქვენ, როგორც მინისტრი და ლიტერატორი, გულით მონდომებთ და ამ საერო წიგნის გამოცემის საქმეს წარუძღვებით, ამით, მერწმუნეთ, დღევანდელი საქართველოს საუბედურო ისტორიაში უფრო დამშვენებული შეხვალთ, ვიდრე 300 „უნივერსიტეტიანი“, „უგანათლებულესი“ საქართველოს განათლების მინისტრობით, მე კი ამით ისე გამაჩნარებთ და სიცოცხლეს ისე გამიხანგრძლივებთ, რომ შეგეძლებათ შარშანდელი უგულისყურობა გამოასწოროთ და 1996 წლის 31 დეკემბერს თქვენი სასიამოვნო, დრამატული ტენორი ტელეფონით გამაგონოთ:

— მოგილოცაეთ ახალ წელს — კიდევ უფრო
მიახლოებას უკუნეთთან!

ო, ელდა მე ამით სულაც არ მეცემა, მე რეალისტი ვარ და მეტად დავალებული ვიქნები იმითვისაც, რომ სასიცოცხ-

ლად მოელი ერთი წელიწადი მისაჩუქრეთ, რათა „შავზე შაკა“ იეთრ ყდაში მეხილა, რომლის პირველი ეგზემპლარი, რასაკვირველია, მოგეძღვნებათ თქვერ, სამშვილიანს, ეჭვიშუტანელი სამადლობელი წარწერით...

ო, ეჭვის მიტანაზე გამახსენდა: ამ ათი-თორმეტი წლის წინათ ლიტფონდის აწ განსვენებული თავმჯდომარის, ამირან ვაბესკირიას კაბინეტში, საწერ მაგიდაზე ახლად გამოცემული წიგნი ეიხილე, რომლის ავტორისეულმა წარწერამ როგორღაც გამააკირვა: ჩვეულებრივ „ამას და ამას და ასეთს და ასეთს“ მოსდედა:

მართლა პატივისცემით კობა იმედაშვილი

დიახ, მე სწორედ ამ „მართლამ“ შემაცბუნა... არადა, ვერც გამატყუნებ: ისე გაიაფდა, ისე დაეცა ჩვენში ურთიერთ პატივისცემა და ისე აღზევდა ცბიერობა და ორპირობა, ჭეშმარიტი პატივისცემის დასადასტურებლად გიხდება კაცს „მართლას“ მოსეულიება!

საბედნიეროდ, არაფრის თავმჯდომარე მე არა ვარ, მით უმეტეს ლიტფონდის თავმჯდომარე, რომ ჩემგან ვინმე ქვიშხეთის უფასო საგზურს მოელოდეს ანდა ფულად დახმარებას, ასე რომ, თუ თავის წიგნს ავტორისეული წარწერით გამოგიგზავნის ლიტერატურულ სამყაროში ისეთი ცნობილი პიროვნება, რომელიც შენზე არ არის დამოკიდებული, არაფერში შენ მას არ ჭირდები და არც ოდესმე დასჭირდები, თანაც არავითარი ახლო ნაცნობობის ძაფი არ გაერთიანებთ და მხოლოდ ერთხელ, ოცი წლის წინათ, გასაუბრებიხარ გაგრაში, — ცხადია, მის შენდამი გულწრფელ პატივისცემაში უ—„მართლოდაც“ არ დაეჭვდები და ნობათს მოსას, შეიძლება, დაუმსახურებლადაც კი შერაცხავ:

ბატონ კიტა ბუჩიძეს,

ქართული ლიტერატურას მშვენებას,

უკვდავ მწერალსა და პიროვნებას

ულრმესი პატივისცემით და მოკრძალებით —

ჭაბუკა ამირეჯიბი

თბილისი. 18. 10. 95.

აი, კიდევ ერთიც, ოღონდ ცოტა სახუმაროდ, რომლის მო-

მძღვენელს ახლოს გასაცნობად და საბაასოდ, ჩემდა სამწუხაროდ, ჯერ არასდროს შევხვედრივარ:

„ვეფხისტყაოსნისა“ და ვეფხვების ქვეყანაში
სასწაულებრივად გადარჩენილ ვეფხს —
ბატონ კიტას ნიშნად დიდი პატივისცემისა
და ქრისტესმიერი სიყვარულისა.

ვახტანგ გურგენიძე. 24. 02. 95.

ო, ნუ, ნუ! მე ნუ მკითხავეთ, ჭაბუა ამირეჯიბისა და ვახტანგ გურგენიძის ამ ბაჯალლო ოქრო სიტყვებიდან თუ რამდენს მივიძეული ვერცხლად, საილენძად და ფრაჟადაც კი, ეს პკითხეთ თქვენთვის კარგად ცნობილ ბატონებს, გურამ გვერდწითელი იქნება ის თუ გურამ ფანჯიკიძე, ვიქტორ რცხილაძე თუ ჯანსუღ ღვინჯილია, შეიძლება ლუკა ხუნდაძესაც, — ჩემი „სუკვდავებისა“, „მშვენებისა“ და ჩემი „ვეფხობის“ ნატამალის მაინც თუ სჯერათ,

ჩემი ამ, არცთუ მოსანატრად შესახსენებელ, ლამის უკვე „უზუცულობის“ „მხცოვნობის“, „უკანასკნელი მოპიკანობისას“, ნუთუ იმის ღირსი არა ვარ, რომ

ჩემი კალმის ერთი მაინც ნამოღვაწარი გამოიცეს ამ არასრული სიიდან:

„შაეზე შავი წიგნი“, ან

„ხალხის მტრის ჩანაწერები ნახევარი საუკუნის მანძილზე (1929—1979)“, ან პუბლიცისტური ნაწერების კრებული:

„სიგლაზე არ უნდა შერჩეს არავის,
და არც სიკეთე დაეკარგოს არავის...“

ანდა ქართული თარგმანი წიგნისა:

„Такое длинное, длинное письмо Виктору Астафьеву“.

და თუ არა ვარ ამის ღირსი, ბოდიში თქვენთან და... მაშინ რაღა ჩემი ფეხების მწერალი ვარ და... როგორც ასეთს, დიდუბელ ავარა ბიჭივით უკვე ამთავითვე მიმიპურჭყებია თქვენგან (და სხვებისგანაც) ხელმოწერილ ჩეკროლოგში ჩემი მწერლური მეობის განსადიდებელ სტრიქონებისათვის, „ქართულმა მწერლობამ დიდი დანაკლისი განიცადაო“... მიმიპურჭყებია, ვთქვათ და გაიმეტეს, „დაკრძალვის ხარჯებს გაიღებსო სახელმწიფო“, — ჩვენი დროის „სარაჯიშვილების“ საქართველოში, რომელთა სისზღზორცეული საზრუნავი უფრო ის არის, მა-

კალითად, მეტრი „რუსთაველთან“ „კოკა-კოლებმა“ სადღეღამისო ყავახანა როგორ გახსნან, ეიდრე რუსთაველის ენაზე ერთი საერო წიგნი გამოსცენ, — ჯერ კიდევ ცოცხალს ამის სპონსორ-გამომცემელი ვერ შიპოვნია, თორემ სპონსორ-გამსვენებელი მერვე დღეს მაინც გამომიჩნდება სანეპიდემსადგურიდან, მაგრამ ამაზე ბევრად თავსატეხი პრობლემაა, სამსულიან, ორ-ოთახიან ბინაში სასახლის დასადგმელი ადგილი რა ეშმაკებით მოინახოს... მიმიპურჭყებია აგრეთვე, თუ დააპირეს, ეგრეთ წოდებულ საუკედავსაყოფად რომელიმე ქუჩას სახელი შეუცვალონ ჩემი სახელით, რაიც იმ ქუჩაზე მცხოვრებთა მართებულ უთოფო ჯანყს იწვევს, როგორც ეს მოხდა ახლახანს „ბარნოვის“ განკვეთისას... და რაც მთავარია, ო-ო, მიმიპურჭყებია, მიმიპურჭყებია პანთეონისთვისაც, ჩემი პანთეონი კუკიაზეა, — 25 წლის წინათ გარდაცვლილ, წერა-კითხვის დამარცვლითი მცოდნე, მაგრამ ბუნებით გონით სავსე დედის გვერდით, რომლის ერთხელ ანაზღად თქმული, —

— შვილი რაც მეტი გეყოლება, მით უკეთესია: ზოგი კაი გამოეა და ზოგიც გლახა, ჭკუითაც, გარეგნობითაც, საქციელითაც, —

ორი წიგნის, „შავისა“ და „შავსე შავის“ წერისას გზას წმინდა კანდელივით მინათებდა.

...დიას, ნეკროლოგამდე ზალბში წიგნებმა შენმან უნდა გამოგაჩინონ შენ, და არა კრიტიკის ჟანგბადის ბალიშებმა.

მწერლობაში სასიცოცხლოდ ზელოვნურ ჟანგბადს შე პირადად არასოდეს გაეკარებივარ და... ვფიქრობ, არც აწი, არც აწი... ოღონდ მოხდეს სასწაული და გამომცენ,

ოღონდ გამომცენ გაუძალღებლად და წრფელი გულით, და არა იმის იმედით, ვაღოროთ, ვაღოროთო ეს ბებრუკა და... ამა-სობაში — ღმერთი იყოს ჩვენი შემწე! — ვინ იცის, იქნებ მოიხმოსო კიდევ სასუფეველსა თვისსა...

ჩემთვის თვალის ახვევა არც ისე იოლია, ასე რომ, ეს თუ ვიგრძენი, პოლონურიდან ერთხელ კიდევ ვთარგმნი და მივახლი მათ სახეში იუზეფ პირწუწკის სეტენციას:

— Фсиште њестесче курвами, Паньство!

კიტა ბუაჩიკმ

ბოლო ორი სიტყვა

ჩემო ძვირფასო მკითხველო, თუმცა ეს ძნელზე ძნელი დასაჯერებელია, მაგრამ სასწაული, საბედნიეროდ, მართლაც მოხდა; ამის დამამტკიცებელი ნივთიერი საბუთი ახლა სწორედ თქვენს ხელთაა: 14 წელიწადს იქდაყრილ ტყვეობაში ნამყოფი „შავზე შავი წიგნი!“

„ქაჯეთიდან“ მისი გამომხსნელი და, საერთოდ, ამ სასწაულის თავიდათავე შემოქმედი კი, როგორც მინისტრი და როგორც ლიტერატორი, თამაზ კვაჭანტირაძეა, რომელსაც, არა ძალდატანებით, — გულით, მხარში ამოუდგნენ „განათლების“ დირექტორი ლუკა ხუნდაძე და საგამოცემლო ფირმა „ლამპარის“ თაოსანი ვია მგალობლიშვილი...

და მე, უნაპირო მადლობის ნიშნად, მათ წინაშე დაბლა ეხრი თავს და, ო, რარიგ მოხარული ვიქნებოდი, თუ ჩემს ამ მადლობას მკითხველთა ნაწილიც შემოუერთდებოდა, დიახ, თუნდ მცირე ნაწილი, რადგან დღეუადელ საქართველოში ყველასათვის ერთნაირად მოსაწონი „ოხხულება“ მხოლოდ დავით აღმაშენებლის გამოხატულებიანი 100-ლარიანია!

სწორუპოვარ მადლობას მივაგებ აგრეთვე

ქეთევან ლომაშვილს,
რევაზ კვერენჩხილაძეს,
ვახტანგ დოხნაძეს,
შოთა ვეშაპიძეს,

რომელთა მოამაგეობა, არა მარტო ამ წიგნის ბედის მიმართ, ჩემთვის ნიადაგ ნეტარმოსაგონარია.

1996 წელი.

მამსო,

წ. ტყუაჩიძე

ს ა რ ჩ ე ვ ი

ავტორისაგან	3
ჩემო შკითხველო	7
კიდევ ერთი დამატება საბოლოო და უკანასკნელო	9
შავი ქვები და თეთრი კენკები	64
რა ღირს დაბადება და სიკვდილი თბილისში	124
გვიშველე, მამაუფალო	156
ქეთი, თემურ-ლენგი, კოსმოსა და სხვები	244
ერთშვილიანო ქართველო დედებო, ო, რარიგ მძულხართ	326
დამატებანი	373
საით მიეჭანება ქართული თეატრი	407

რედაქტორი ქ. ლომაშვილი. სამხატვრო რედაქტორი თ. კობეღი-
შვილი. გარეკანის მხატვარი თ. შარიფაშვილი. ტექნიკური
მ. ოსიტაშვილი. უფრ. კორექტორი ი. დონაძე. კორექტორი ქ. ცა-
გურიძე. გამოშვები რ. გოგიშვილი.

ხელმოწერილია დასაბეჭდად 25. 04. 95. ქაღალდის ზომი 84X108¹/₃₂.
ნაბეჭდი თაბახი 32. პირ. ნაბ. თაბახი 26,88. საღებავები 27,09. სა-
აღრიცხვო-საგამომცემლო თაბახი 22, 44. ტირაჟი 3000. შეკეთა № 490.

გამომცემლობა „განათლება“, 380064, თბილისი, გ. ჩუბინაშვილის ქ. № 50.
1996

სააქციო საზოგადოება „ფარნავაზი“. თბილისი, გრ. რობაქიძის გამზ. № 7.